

O LE EKALESIA A IESU KERISO O LE AU PAIA O ASO E GATA AI • NOVEMA 2018

O Le Liahona

Saunoaga o le Konafesi Aoao

Iesu Keriso: E
Totonugalemu i o
Tatou Olaga ma o le
Igoa o le Ekalesia

Ua Faapaleni e
Mataupu Aoaoina
Fou ma le Faasologa o
Sauniga i le Aso Sa le
Suesueina o le Talalelei
i le Aiga ma le Ekalesia

Ua Faasilasila Mai
Malumalu Fou e 12





“Ou te uunaia outou i le po nei, faatasi ma le faamoemoe uma o lo’u loto, ia tatalo ina ia malamalama i au meaalofo faaleagaga—ia atiae, faaaoga, ma faalautele i latou, ia matua sili atu nai lo se isi lava taimi. O le a e suia le lalolagi a o e faia lea mea. . . .

“O’u tuafafine pele, matou te manaomia outou! Matou te ‘manaomia lo outou malosi, lo outou liua, lo outou talitonuga maumaututu, lo outou tomai e taitai, lo outou atamai, ma o outou leo.’ E le mafai lava ona matou faapotopotoina Isaraelu e aunoa ma outou.

“Ou te alofa ma faafetai atu ia te outou ma ou te faamanuia nei outou i le tomai e tuuese ai le lalolagi a o outou fesoasoani mai i lenei galuega taua ma le faanatinati. E mafai ona tatou faia faatasi mea uma ua manaomia mai e lo tatou Tama Faalelagi tatou te faia e saunia ai le lalolagi mo le Afio Mai Faahua o Lona Alo.”

Peresitene Russell M. Nelson, “Auai o Tuafafine i le Faapotopotoina o Isaraelu,” 69, 70.

Toe Taunuu i le Mea
na Amata Ai, saunia
e Jenedy Paige

Sauniga o le Taeao o le Aso Toonai

- 6 **Malelega Amata**
Peresitene Russell M. Nelson
- 8 **Liuaia Loloto ma Tumau i le Tama**
Faalelagi ma le Alii o Iesu Keriso
Elder Quentin L. Cook
- 12 **Inā Ea ia i Luga Lou Ulu ma Olioli**
M. Joseph Brough
- 15 **Faataatiaina o le Faavae o se**
Galuega Tele
Elder Steven R. Bangerter
- 18 **Aua Le Atuatuva**
Elder Ronald A. Rasband
- 21 **Faapotopoto Faatasi Mea Uma**
ia Tasi ia Keriso
Elder David A. Bednar
- 25 **Upumoni ma le Fuafuaga**
Peresitene Dallin H. Oaks

Sauniga o le Afiafi o le Aso Toonai

- 28 **O Le Lagolagoia o Taitai**
o le Ekalesia
Peresitene Henry B. Eyring
- 30 **Tumau ma Mausali i le Faatuatua**
o Keriso
Elder D. Todd Christofferson
- 34 **O Mai, Faalogo i le Siufofoga**
o le Perofeta
Epikopo Dean M. Davies
- 37 **Tasi ia Keriso**
Elder Ulisses Soares
- 40 **O La Tatou Afi o le Tolauapiga**
o le Faatuatua
Elder Gerrit W. Gong
- 43 **E Tatau i Tagata Uma ona Ave**
i ō Latou luga le Suafa ua Tuuina
Mai e le Tamā
Elder Paul B. Pieper
- 46 **Talitonu, Alofa, Faia**
Elder Dieter F. Uchtdorf

Sauniga Aoao a Tamaitai

- 50 **Mo Ia**
Joy D. Jones
- 52 **Lē Faamalieina**
Faaleagaga
Michelle D. Craig
- 55 **O Le Olioli o Auaunaga**
Lē Manatu Faapito
Cristina B. Franco
- 58 **O Tamaitai ma le Aoaoia**
o le Talalelei i le Aiga
Peresitene Henry B. Eyring
- 61 **Matua ma Fanau**
Peresitene Dallin H. Oaks
- 68 **Auai o Tuafafine i le**
Faapotopotoina o
Isaraelu
Peresitene Russell M. Nelson

Sauniga o le Taeao o le Aso Sa

- 71 **O Le Faaaliga o le Togiolaina o**
Ē ua Maliliu
Peresitene M. Russell Ballard
- 74 **Avea ma se Leoleo Mamoe**
Bonnie H. Cordon
- 77 **O Le Galuega o le Faaleleiga**
Elder Jeffrey R. Holland
- 80 **O Le Matafaioi a le Tusi a Mamona**
i le Liuaia
Elder Shayne M. Bowen
- 83 **Manu'a**
Elder Neil L. Andersen
- 87 **O Le Igoa Sa'o o le Ekalesia**
Peresitene Russell M. Nelson

Sauniga o le Afiafi o le Aso Sa

- 90 **Taumafai**
Peresitene Henry B. Eyring
- 93 **O Le Tamā**
Brian K. Ashton
- 97 **Ave i o Tatou Luga le Suafa**
o Iesu Keriso
Elder Robert C. Gay
- 101 **E Te Fia Malolo Ea?**
Elder Matthew L. Carpenter
- 104 **Ina Filifili ia o Outou i le Aso Nei**
Elder Dale G. Renlund
- 107 **O Le Taimi Lenei**
Elder Jack H. Gerard
- 110 **Leoleoina o Agaga**
Elder Gary E. Stevenson
- 113 **Avea ma Faataitaiga Lelei o le**
Au Paia o Aso e Gata Ai
Peresitene Russell M. Nelson
- 64 **O Au Pulega Aoao ma Taitai Aoao**
o Le Ekalesia a Iesu Keriso o le Au
Paia o Aso e Gata Ai
- 115 **Faasino Upu o Tala o le Konafesi**
- 116 **Tala Fou o le Ekalesia**
- 121 **Sau, Mulimuli Mai ia te A'u—Mo le**
Korama a Toeaina ma le Aualofa



O Le Konafesi Aoao Faaleafatausaga Lona 188

Taeao o le Aso Toonai, 6 Oketopa, 2018, Sauniga Aoao

Taitai: Peresitene Henry B. Eyring
Tatalo Amata: Elder Craig A. Cardon
Tatalo Faaiu: Elder Adilson de Paula Parrella
O musika na saunia e le Aufaipese a le Tape-neko i le Lotoa o le Malumalu; Mack Wilberg ma Ryan Murphy, taitai pese; Brian Mathias ma Richard Elliott, taokeni: “Ieova e, Ia Tautai Pea i Matou,” *Viiga*, nu. 47; “Ua Tafa o Ata,” *Viiga*, nu. 1, arr. Wilberg; “A Ou Faalogo Ma Lo’u Loto,” DeFord, arr. Murphy; “I Luga o Mauga,” *Viiga*, nu. 4; “O Le A Ou Mulimuli i le Fuafuaga a le Atua,” *Tusipese a Tamaiti*, 86-87-65, arr. Hofheins; “O Mai, Outou o le Au Paia,” *Viiga*, nu. 17, arr. Wilberg.

Afiati o le Aso Toonai, 6 Oketopa, 2018, Sauniga Aoao

Taitai: Peresitene Dallin H. Oaks
Tatalo Amata: Sharon Eubank
Tatalo Faaiu: Elder Joni L. Koch
O musika na saunia e se aufaipese tuu faatasi mai le Nofoaga Autu e Aoaoina ai Faifeautalai i Provo; Ryan Eggett ma Elmo Keck, taitai pese; Linda Margetts ma Bonnie Goodliffe, taokeni: “Faalogo, Nu Umai!” *Viiga*, nu. 165, arr. Schank; pese suifefiloi: “O Le A Ou Lototoa,” *Tusipese a Tamaiti*, 85, ma le “O Le Ekalesia a Iesu Keriso,” *Tusipese a Tamaiti*, 48, arr. Warby; “Tofia e Auauna i le Atua,” *Viiga*, nu. 156; “Faamoemoe o Isaraelu,” *Viiga*, nu. 161, arr. Schank.

Afiati o le Aso Toonai, 6 Oketopa, 2018, Sauniga Aoao a Tamaitai

Taitai: Jean B. Bingham
Tatalo Amata: Memnet Lopez
Tatalo Faaiu: Jennefer Free
O musika na saunia e se aufaipese a tamaitai talavou mai siteki i Pleasant Grove, Iuta; Tracy Warby, taitai pese; Bonnie Goodliffe, taokeni: “O Mai, Fanau a le Atua,” *Viiga*, nu. 24, arr. Warby; “This Is the Christ,” Faust, Pinborough, ma Moody; “Ia Fiafia Tatou,” *Viiga*, nu. 3; “Matou Te Aumaia le Upumoni i le Lalolagi,” *Tusipese a Tamaiti*, 92-93, arr. Warby.

Taeao o le Aso Sa, 7 Oketopa, 2018, Sauniga Aoao

Taitai: Peresitene Henry B. Eyring
Tatalo Amata: Elder Allan F. Packer
Tatalo Faaiu: Elder Donald L. Hallstrom
O musika na saunia e le Aufaipese a le Tapeneko; Mack Wilberg, taitai pese; Richard Elliott ma Andrew Unsworth,, ta okeni: “Fiafia, o le Ali’i o le Tupu!” *Viiga*, nu. 38; “Faola o Isaraelu,” *Viiga*, nu. 5, arr. Wilberg; “Filifili Tau o Mea Tonu,” *Viiga*, nu. 149, arr. Wilberg; “Ia Viia Oe le Atua,” *Viiga*, nu. 10; “His Voice as the Sound,” American folk hymn, Walker, arr. Wilberg; “It Is Well with My Soul,” Spafford ma Bliss, arr. Wilberg.

Afiati o le Aso Sa, 7 Oketopa, 2018, Sauniga Aoao

Taitai: Peresitene Dallin H. Oaks
Tatalo Amata: Elder Gary B. Sabin
Tatalo Faaiu: Elder Michael John U. Teh.
O musika na saunia e le Aufaipese a le Tapeneko; Mack Wilberg ma Ryan Murphy, taitai pese; Andrew Unsworth ma Brian Mathias, taokeni: “In Hymns of Praise,” *Viiga*, nu. 75, arr. Murphy; “Ou Te Talitonu ia Iesu,” *Viiga*, nu. 71, arr. Wilberg; “Mamalu i le Atua,” *Viiga*, nu. 40; “Our Prayer to Thee,” Nelson ma Parry, arr. Wilberg.

E Maua Saunoaga o le Konafesi

Ina ia maua saunoaga o konafesi aoao i luga o le Initoneti i le tele o gagana, asiasi i le conference.lds.org ma filifili se gagana. O loo maua foi lauga i luga o le Gospel Library polokalama feaveai. O loo maua faamatalaga e uiga i le konafesi aoao i mamanu e mafai ona faaaogaina e tagata o le ekalesia e i ai manaoga faapitoa i le disability.lds.org.

I Le Faavaa

Luma: *Malamalama o le Lalolagi* (2015), saunia e Walter Rane, e le mafai ona kopiina. Tua: Ata na pueina e Cody Bell.

Puega o Ata o le Konafesi

Ata na pueina i le Aai o Sate Leki, na pueina e Cody Bell, Janae Bingham, Mason Coberly, Weston Colton, Brian Nicholson, Leslie Nilsson, Matt Reier, ma Christina Smith.



**NOVEMA 2018 VOL. 42 NU. 11
O LE LIAHONA 14853 890**

O Le Lomiga Faamaonia Faa-Samoa a le Ekalesia
a Iesu Keriso o le Au Paia o Aso e Gata Ai

Susuga a le Au Peresitene Sili: Russell M. Nelson,
Dallin H. Oaks, Henry B. Eyring

O Le Korama a Aposetolo e Toasefululua:

M. Russell Ballard, Jeffrey R. Holland, Dieter F. Uchtdorf,
David A. Bednar, Quentin L. Cook, D. Todd Christofferson,
Neil L. Andersen, Ronald A. Rasband, Gary E. Stevenson,
Dale G. Renlund, Gerrit W. Gong, Ulisses Soares

Faatonu: Randy D. Funk

Fautua: Brian K. Ashton, Randall K. Bennett, Becky Craven,
Sharon Eubank, Cristina B. Franco, Donald L. Hallstrom,
Larry S. Kacher, Erich W. Kopischke, Lynn G. Robbins

Pule Faatonusili: Richard I. Heaton

Faatonusili o Mekasini a le Ekalesia: Allan R. Loyborg

Pule o Mea Tau Pisinisi: Garff Cannon

Pule Faatonutonu: Adam Olson

Pule Faatonutonu Lagolago: Ryan Carr

Lagolago o Lomiga: Francisca Olson

Au Tusiutusi ma Faatonutonu: Maryssa Dennis, David Dickson,
David A. Edwards, Matthew D. Flitton, Lori Fuller, Garrett H.
Garff, Jon Ryan Jensen, Charlotte Larcabal, Michael R. Morris,
Eric B. Murdock, Sally Johnson Odekirk, Joshua J. Perkey, Jan
Pinborough, Richard M. Romney, Mindy Selu, Chakell Wardleigh,
Marissa Widdison

Pule Faatonusili Tusiata: J. Scott Knudsen

Faatonusili Tusiata: Tadd R. Peterson

Au Mamau: Jeanette Andrews, Fay P. Andrus,
Mandy Bentley, C. Kimball Bott, Thomas Child, Joshua Dennis,
David Green, Colleen Hinkley, Eric P. Johnsen, Susan Lofgren,
Scott M. Mooy, Emily Chieko Remington, Mark W. Robison,
Brad Teare, K. Nicole Walkenhorst

Faatonu o le Puletaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosi: Ira Glen Adair, Kevin Banks, Julie Burdett, Thomas G.
Cronin, Bryan W. Gygi, Ginny J. Nilson, Marissa M. Smith

Tailolomi: Joshua Dennis, Ammon Harris

Faatonusili Lolomiga: Steven T. Lewis

Faatonusili o le Tufatufuga: Troy R. Barker

Mo le okaina o mekasini, alu i le store.lds.org po o le Faletusi
Tutotoni i Pesega. Telefoni 64127. Totogi o le Mekasini: \$0.55
(Samoa) I i le kopi. Totogi mo le Tausaga Atoa \$6.60 (Samoa).

Auina atu tusitusiga ma faafesili i luga o le

initoneti i le liahona.lds.org: pe meli mai i le *Liahona*,
Rm. 2420, 50 E. North Temple, Salt Lake City, UT 84150-0024,
USA; po o le i-meli: liahona@ldschurch.org.

O Le Liahona (o lona uiga i le Tusi a Mamona o le "tapasa" po
o se "faatonuala") e lomia i le faa-Alepania, Aminia (Sasae),
Pisilama, Palekeria, Kemupotia, Sepuano, Saina, Kalaotia,
Siekisolovakia, Tenimaka, Take, Iglisi, Esitonia, Fiti, Finelani,
Farani, Siamani, Eleni, Hanikeri, Initu, Iselani, Initonesia, Italia,
Iapani, Kiripati, Korea, Lativia, Litunia, Malakasa, Masela,
Monokolia, Nouei, Polani, Potukale, Romania, Rusia, Samoa,
Saina (ua faafigofieina), Silovenia, Sipaniolo, Suetena, Swahili,
Tagaloka, Tahiti, Tai, Toga, Iukureini, Urutu, ma Viatename.
(E eese lava gagana.)

© 2018 Puletaofia e le Intellectual Reserve, Inc. Ua taofia aia
tatau uma. Lomia i le Lunaite Setete o Amerika.

Faamatalaga o le Puletaofia: Vagana ua faailoa atu,
e mafai e tagata taitoatasi ona kopiina anomea mai le
Liahona mo lo latou faaagaina patino, ma le saili tupe (e
aofia ai mo valaauga o le Ekalesia). O lenei aia tatau e mafai
ona faaleagaina i soo se taimi. O anomea o mea faitino e
le mafai ona kopiina pe afai o o loo faailoa mai se faasa i le
laina o loo i ai ma le faatufugaga. O fesili mo le Puletaofia
e tatau ona faatuatusi mai i le Intellectual Property Office,
50 E., North Temple St., FL 13, Salt Lake City, UT 84150,
USA; email: cor-intellectualproperty@ldschurch.org.

For Readers in the United States and Canada:

November 2018 Vol. 42 No. 11. O Le Liahona (USPS 311)
Samoan (ISSN 1045-0947) is published monthly by The
Church of Jesus Christ of Latter-day Saints, 50 East North
Temple, Salt Lake City, UT 84150. USA subscription price
is \$10.00 per year; Canada, \$12.00 plus applicable taxes.
Periodicals Postage Paid at Salt Lake City, Utah. Sixty days'
notice required for change of address. Include address label
from a recent issue; old and new address *must* be included.
Send USA and Canadian subscriptions to Salt Lake Distribution
Center at address below. Subscription help line: 1-800-
537-5971. Credit card orders (Visa, MasterCard, American
Express) may be taken by phone. (Canada Poste Information:
Publication Agreement #40017431)

POSTMASTER: Send all UAA to CFS (see DMM 507.1.5.2).
NONPOSTAL AND MILITARY FACILITIES: Send address changes
to Distribution Services, Church Magazines, P.O. Box 26368,
Salt Lake City, UT 84126-0368, USA.



**Failauga i le Faasologa
Faaalafapeta**

Andersen, Neil L., 90
Ashton, Brian K., 93
Ballard, M. Russell, 71
Bangerter, Steven R., 15
Bednar, David A., 21
Bowen, Shayne M., 80
Brough, M. Joseph, 12
Carpenter, Matthew L., 101
Christofferson, D. Todd, 30
Cook, Quentin L., 8
Cordon, Bonnie H., 74
Craig, Michelle D., 52
Davies, Dean M., 34
Eyring, Henry B., 28, 58, 90
Franco, Cristina B., 55
Gay, Robert C., 97
Gerard, Jack N., 107
Gong, Gerrit W., 40
Holland, Jeffrey R., 77
Jones, Joy D., 50
Nelson, Russell M., 6, 68,
87, 113
Oaks, Dallin H., 25, 61
Pieper, Paul B., 43
Rasband, Ronald A., 18
Renlund, Dale G., 104
Soares, Ulisses, 37
Stevenson, Gary E., 110
Uchtdorf, Dieter F., 46

Faasino Autu

Afiafi faaleaiga, 8
Agaga Paia, 18, 43, 80, 93
Agalelei, 61
Aiga, 6, 8, 15, 25, 58, 61, 113
Aiga o Isaraelu, 68
Ala o faasalalauga, 68
Alofa, 18, 37, 40, 46, 50,
55, 58, 61, 74, 77, 90, 93,
97, 110
Alofa Mama, 55, 58, 90
Alofa tunoa, 40, 52, 97
Aoao atu, 15, 58, 68
Aoaoina, 58, 113
Ata o le faaolataga, 25, 61,
71, 93, 104
Atoatoa, 40
Aualofa, 68
Auauna atu, 37, 40, 50, 52,
55, 74, 97
Auaunaga, 37, 40, 46, 50, 68,
74, 77, 97, 110
Autalavou, 74
Avea ma Soo, 12, 43, 46, 52
Faaaliga, 18, 34, 80
Faaameaina, 37
Faaleleiga, 77
Faamagalaga, 12, 77
Faamalologa, 46, 83, 97, 101
Faamanatuga, 8, 43, 90
Faamasinoina, 97
Faamoemoe, 46, 90
Faapalepale, 30, 90
Faapotopotoina o Isaraelu, 21,
68, 74, 80
Faataitaiga, 113
Faatoaagaina Mai, 110
Faatuatua, 6, 15, 18, 21, 25,
30, 40, 52, 83, 90, 104, 113
Faatumauiua o tagata liliu
mai, 37
Faauoga, 37, 74
Faigata, 12, 18, 30, 46, 55,
71, 90, 101
Faitalia, 25, 104
Fatufatuga, 40
Feagaiga, 30, 43, 80, 107
Fefe, 18, 101

Galuega faalemalumalu, 68,
113
Iesu Keriso, 6, 8, 12, 15, 18,
21, 25, 30, 34, 37, 40, 43,
46, 50, 52, 55, 58, 71, 74,
77, 80, 83, 87, 90, 93, 97,
101, 104, 107, 110, 113
Igoa o le Ekalesia, 87, 113
Iosefa Samita, 34, 52, 80, 107
Itulau Autu, 6, 8, 15, 18, 21,
58, 113
Lalolagi o agaga, 71
Liua, 8, 21, 30, 37, 80
Maluu, 71
Malumalu, 18, 34, 113
Mataupu Aoaoina, 6, 8, 113
Mea e faamuamua, 107
Molimau, 80
Muai olaga, 93
Mulimuli i le perofeta, 34
Natura paia, 68
Olioli, 12, 40, 46
Papatissoga, 43
Perofeta, 18, 34
Salamo, 25, 101, 104
Sapati, 8
Sauaga, 90
Suesue i tusitusiga paia, 8,
38, 58
Tama Faalelagi, 25, 40, 93, 104
Tamaiti, 15, 25, 61
Tatalo, 58
Taua o le tagata lava ia, 74, 97
Taulaga, 55
Tekinolosi, 61
Toafilemu, 18, 77, 90
Toefuataiga, 87
Toetu, 71, 93
Tofotofoga, 83, 90
Tulaga Faamatua, 15, 61
Tulaga Faatinā, 58, 61, 68
Tu ma aga masani, 15
Tusi a Mamona, 34, 68, 80
Upumoni, 25, 107
Uunaiga, 52
Vaaiga, 68, 107



Mea na Faamamafa Mai mai le Konafesi Aoa Faaleafatausaga Lona 188

Sa toe fofogaina mai foi ni suiga tetele i le konafesi aoao. E ui ua ese faasilasilaga i le taimi lenei, ae o faamoemoega i tua atu o i latou e tumau pea ona tutusa: Ua lagona e le perofeta a le Atua se naunautaiga e saunia i tatou mo le Toe Afio Mai Faalua o le Alii ma ua valaauliaina ai i tatou ia faamallosia lo tatou faatuatua i le Tama Faalelagi ma Lona Alo, o Iesu Keriso.

O nisi nei o nai valaaulia ma folafolaga taua ua faamamafaina mai e Peresitene Russell M. Nelson i le taimi o le konafesi.

Faapaiaina Atili o le Aiga

I lana malelega amata, sa fofogaina mai ai e Peresitene Nelson le manaomia o le faia o ni suiga i o tatou olaga ina ia avea o tatou aiga ma totonugalemu o le aoaoina o le talalelei. O le taimi lenei mo se *Ekalesia e-faatotonugalemu-i-le-aiga*, ma lagolagoina mea o loo tutupu i totonu o faletapu ai o a tatou paranesi, uarota, ma siteki.”

- Faitau e uiga i suiga ua fautuaina mai i le aiga ma fetuunaiga i le lotulea e lagolagoina i latou (tagai i le itulau e 8).
- Saili ni faamatalaga faaopoopo i le “Ua Fesoasoani Suiga e Faapaleni Aoaoga o le Talalelei i le Aiga ma i le Ekalesia” (itulau 117).

“Tuuese le Lalolagi”

Na valaaulia e Peresitene Nelson ia tuafafine i le sauniga aoao a tamaitai ia auai i le “faamoemoega *silisili* . . . i luga o le lalolagi i lenei vaitaimi.” Na Ia folafola mai, “E mafai ona tatou faia faatasi mea uma ua manaomia mai e lo tatou Tama Faalelagi tatou te faia e saunia ai le lalolagi mo le Afio Mai Faalua o [Iesu Keriso].”

- Faitau i valaaulia e fa a Peresitene Nelson i tuafafine (tagai i le itulau e 68).

“Toefuatai le Igoa Sa’o o le Ekalesia a le Alii”

Na valaau mai Peresitene Nelson i tagata o le ekalesia ia ta’ua le Ekalesia

a le Faaola i le igoa na tuuina atu i ai e le Faaola. “Ou te folafola atu afai o le a tatou faia le mea sili tatou te mafaia e toefuatai ai le igoa sa’o o le Ekalesia a le Alii, o le a liligi mai e Ia o le e ana le Ekalesia Lona mana i lalo ma faamanuiaga i luga o ulu o le Au Paia o Aso e Gata Ai, i auala tatou te lei vaaia lava.”

- Faitau i faatonuga a Peresitene Nelson i le igoa o le Ekalesia (tagai i le itulau e 87).

“Ia i ai i totonu o Lona Maota Paia”

Na faaiu e Peresitene Nelson le konafesi i le fofogaina mai o malumalu fou e 12 ma se valaaulia ina ia “i ai soo i totonu o Lona maota paia.” Na ia saunoa mai, “Ou te folafola atu ia te outou o le a aumai e le Alii ni vavega ua Ia silafia tou te manaomiaina a o outou faia ni osigataulaga e auauna atu ma tapuai atu i totonu o Ona malumalu.”

- Tagai po o fea o le a fausia ai malumalu na fofogaina mai (tagai i itulau e 113, 116).





Saunia e Peresitene Russell M. Nelson


Malelega Amata

O le taimi lenei mo se Ekalesia e faatotonugalemu-i-le-aiga ma lagolagoina e mea o loo tutupu i totonu o o tatou fale o paranesi, uarota, ma siteki.

O'u uso e ma tuafafine pele, ua matou tulimatai atu e toe faatasi ma outou i lenei konafesi aoao a le Ekalesia ia Oketopa. Matou te faa-feiloai atu ma le fiafia tele ia te outou taitoatasi. Matou te matuai faafetai mo a outou tatalo o loo lagolagoina ai i matou. O loo mafai ona matou lagona-ina lo latou aafiaga. Faafetai lava!

Matou te faafetai atu mo a outou taumafaiga maoae e mulimuli i fautuaga

na tuuina atu i le konafesi aoao i le ono masina talu ai. Sa saili atu au peresitene o siteki i le lalolagi atoa i faaaliga e talafeagai e toefaatulaga ai korama a toeaia. O alii o na korama faatasi ai ma o tatou tuafafine tuuto o le Aualofa o loo galulue filiga e auauna atu i o tatou uso ma tuafafine i se auala maua-luga atu, ma paia atu. Ua uunaia i matou e lo outou lelei ma a outou taumafaiga tula-gaese e aumai le alofa o le Faaola i o



outou aiga, tuaoi, ma uo ma ia auauna atu ia i latou e pei ona Ia faia.

Talu mai le konafesi ia Aperila, ua ma feiloai atu ma Sister Nelson i tagata o le ekalesia i konetineti e fa ma atumotu o le moana. Mai Ierusalema i Harare, mai Winnipeg i Bangkok, ua ma lagonaina lo outou faatuatua tele ma le malosiaga o a outou molimau.

Ua ma soona olioli i le toatele o a tatou talavou ua auai i le autau a le autalavou a le Alii e fesoasoani e faapotopoto Isaraelu ua faataapeapeina.¹ Matou te faafetai atu ia te outou! A faaauau pea ona outou mulimuli i a'u valaaulia na tuu atu i la tatou faigalotu mo le autalavou i le lalolagi atoa, o le a outou faatuina le tagavai mo le



toatele o matou e mulimuli ai. Ma e maeu le eseesea o loo faia e outou le autalavou!

I le tele o tausaga talu ai nei, o loo tauivi ai pea i matou i aufono pule-faamalumalu o le Ekalesia ma se fesili autu: e mafai faapefea ona tatou avatua le talalelei i lona mama faigofie, ma sauniga i lo latou aafiaga e faavavau, i fanau *uma* a le Atua?

I le avea ai ma tagata o le Au Paia o Aso e Gata Ai, ua tatou masani lava i le manatu o le “lotu” o se mea e tupu i totonu o o tatou falesa, ma e lagolagoina e mea o loo tutupu i le aiga. Ua tatou manaomia se fetuunaiga i lenei mamanu. O le taimi lenei mo se *Ekalesia e-faatotonugalemu-i-le-aiga*,

ma lagolagoina e mea o loo tutupu i totonu o o tatou fale o paranesi, uarota, ma siteki.

A o faaaauau pea ona faatupulaia le Ekalesia i le lalolagi atoa, e toatele tagata o le ekalesia o loo nonofo i nofoaga e le o i ai ni a tatou falesa—ma atonu o le a leai pea mo se taimi umi. Ou te manatua se aiga o ē, ona o ia tulaga, sa manaomia ai ona fai sauniga i totonu o lo latou fale. Sa ou fesili i le tina pe o le a sona lagona i le alu ai i le lotu i lona lava fale. Sa tali mai o ia, “Ou te fiafia i ai! Ua faaaga e lo’u toalua se gagana lelei atu i le aiga i le taimi nei, ma le iloina o le a ia faamanuiaina le faamanatuga iinei i Aso Sa taitasi.

O le faamoemoega lava o le Ekalesia ua leva ona i ai o le fesoa-soani lea i tagata uma ia faateleina lo latou faatuatua i lo tatou Alii o Iesu Keriso ma i Lana Togiola, ina ia fesoa-soani ai ia i latou i le osia ma le tausiga o a latou feagaiga ma le Atua, ma ia faamalosia ai ma faamauina o latou aiga. I lenei lalolagi faigata i nei aso, ua le faigofie ai lenei mea. Ua faateteleina e le fili ana osofaiga i le faatuatua ma o tatou luga ma o tatou aiga i se saoasaoa matua uigaese. Ina ia sao mai ai faaleagaga, tatou te manaomiaina ni fuafuaga e faatoilalo ai le fili ma ni fuafuaga mamao. Ona o lenei mea, ua matou mananao ai nei ia faatulaga ni fetuunaiga faalefaalapotopotoga ia o le

a faamalosia atili ai o tatou tagata ma o latou aiga.

Mo le tele o tausaga, na galulue ai lava taitai o le Ekalesia i se mataupu aoaoina ua tuufaatasia e faamalosia ai aiga ma tagata taitoatasi e ala i se fuafuaga e *faatotonugalemu-i-le-aiga* ma lagolagoina-e-le-Ekalesia e aoao ai aoaoga faavae, faamalosia ai le faatuatua, ma atiae ai se lototapu ai sili atu faaletagata lava ia. O a tatou tau-mafaiga i nei tausaga ua alu e faapaia le Sapati—ia faia o se aso fiafia ma se faailoga faaletagata lava ia i le Atua o lo tatou alofa mo Ia—o le a faaleleia e fetuunaiga o le a matou faalauiloa atu nei.

I lenei taeao o le a matou faalauiloa atu ai se paleni fou ma le fesootaiga i le va o le aoaoina o le talalelei i totonu o le aiga ma i le Ekalesia. E nafa i tatou taitoatasi ma lo tatou tuputupu ae faaleagaga faaletagata lava ia. Ma ua faamanino mai e tusitusiga paia ua i ai i matua le tiutetauave muamua e aoao atu aoaoga faavae i a latou fanau.² O le tiutetauave o le Ekalesia o le fesoasoani lea i tagata taitoatasi i le sini faalelagi ua tuuina mai o le faateleina lea o lo latou malamalama faaletalalelei.

O le a faamalamalama atu nei e Elder Quentin L. Cook nei fetuuniga taua. Ua autasi uma uso o le Aufono a le Au Peresitene Sili ma le Korama a Aposetolo e Toasefululua i le faamaoniaina o lenei savali. Matou te faamamaluina ma le lotofaafetai le musumusuga mai le Alii na faatosinaina le atinaega o fuafuaga ma faiga faavae ia o le a tuuina atu e Elder Cook.

O'u uso e ma tuafafine pele, ou te iloa o loo soifua le Atua! O Iesu o le Keriso! O Lana Ekalesia lenei o loo Ia taitaia e ala i valoaga ma faaaliga i Ana auauna faatauva. Ou te moli-mau atu ai i le suafa o Iesu Keriso, amene. ■

FAAMATALAGA

1. Tagai i le Russell M. Nelson ma Wendy W. Nelson, "Faamoemoe o Isaraelu" (faigalotu a le autalavou i le lalolagi atoa, 3 Iuni, 2018), HopeofIsrael.Lds.org.
2. Tagai i le Mataupu Faavae ma Feagaiga 93:40; Mose 6:58–62.



Saunia e Elder Quentin L. Cook

○ Le Korama a Aposetolo e Toasefululua

Liuaia Loloto ma Tumau i le Tama Faalelagi ma le Alii o Iesu Keriso

O lo tatou faamoemoega o le faapaleni lea o aafiaga i le Ekalesia ma le aiga i se auala o le a matua faateleina ai le faatuatua ma le faaleagaga ma faalolotoina ai le liua.

Epei ona faato'a faamalamalama atu ma le matagofie ma le mamana e Peresitene Russell M. Nelson, ua umi se taimi o galulue taitai o le Ekalesia i se "fuafuaga e *faatotonugalemu-i-le-aiga* ma *lagolagoina-e-le-Ekalesia* e aoao ai aoaoga faavae, faamalosia ai le faatuatua, ma atiae ai le lototapu ai sili atu faaletagata lava ia." Ona faasilasila mai lea e Peresitene Nelson o se fetuunaiga ina ia ausia ai "se paleni fou ma se fesootaiga i le va o aoaoga o le talalelei i totonu o le aiga ma totonu o le Ekalesia."¹

Ina ia ausia nei faamoemoega—na faamatala mai e, ma i lalo o le taitaiga a Peresitene Russell M. Nelson ma sosoo ai ma le faaiuga a le Aufono a le Au Peresitene Sili ma le Korama a Aposetolo e Toasefululua—o le a fetuunaia ai le faatulagaga o sauniga i le Aso Sa i auala nei, e amata atu ia Ianuari 2019.

Faasologa o Sauniga i le Aso Sa

O sauniga a le Ekalesia i le Aso Sa o le a aofia ai le lotu faamanatuga e 60 minute i Aso Sa taitasi, e taulai atu i le Faaola, le sauniga o le faamanatuga, ma savali faaleagaga. A maea ona taape lea o tagata i vasega, o le a auai tagata o le Ekalesia i se vasega e 50 minute lea o le a felafoa'i i Aso Sa taitasi:

- O le A'oga Sa o le a faia i Aso Sa muamua ma Aso Sa lona tolu o le masina.
- O sauniga a korama a le Au Perisitua, Aualofa, ma Tamaitai Talavou o le a faia i Aso Sa lona lua ma Aso Sa lona fa.
- O sauniga [po o vasega] o le Aso Sa lona lima o le a i lalo o le taitaiga a le epikopo.

O le a faia pea le Peraimeri i vaiaso taitasi i le taimi lava lea e tasi e 50



minute ma o le a ofia ai ma taimi o pesepesega ma vasega.

E tusa ai ma le faasologa o sauniga i le Aso Sa, ua silafia ai e taitai sinia o le Ekalesia mo le tele o tausaga e faapea mo nisi o o tatou tagata faapelepele, o se faatulagaga tolu itula i le lotu i le Aso Sa e ono faigata. E moni lenei mea aemaise lava mo matua e i ai ni fanau laiti, o tamaiti Peraimeri, o tagata matutua, o tagata fou liliu mai, ma isi.²

Ae e telē atu se mea o loo i ai i lenei fetuunaiga nai lo le na ona faapuu-puuina o le faatulagaga o sauniga i le Aso Sa. Ua faailoa atu e Peresitene Nelson ma le lotofaafetai le tele o mea ua ausia ona o se taunuuga o lo outou faatuatua i valaaulia talu ai. O ia, faatasi ma taitai uma o le Ekalesia, ua finagalo ia aumai le olioli sili atu o le talalelei—i matua, fanau, autalavou, tagata nofotoatasi, tagata matutua, tagata fou liliu mai, ma tagata na o loo aoaoina e faifeautalai—e ala i se taumafaiga paleni e faatotonugalemu-i-le-aiga, ma lagolagoina-e-le-Ekalesia. O faamoe-moega ma faamanuiaga e fesootai ma lenei fetuunaiga ma isi suiga talu ai nei ua aofia ai mea nei:

- Faalolotoina o le liua i le Tama Faalelagi ma le Alii o Iesu Keriso

ma le faamallosia o le faatuatua ia i La'ua.

- Faamallosia o tagata taitoatasi ma aiga e ala i le mataupu aoaoina e faatotonugalemu-i-le-aiga, ma lagolagoina-e-le-Ekalesia lea e saofagā atu i le ola fiafia i le talalelei.
- Faamamaluina o le aso Sapati, i se taulaiga i le sauniga o le faamanatuga.
- Fesoasoani atu i fanau uma a le Tama Faalelagi i itu uma e lua o le veli e ala i le galuega faafaifeautalai ma le mauaina o sauniga ma feagai-ga ma faamanuiaga o le malumalu.

Aoaoina o le Talalelei e Faatotonugalemu-i-le-Aiga ma Lagolagoina-e-le-Ekalesia

O lenei faatulagaga o sauniga o le Aso Sa o le a faatagaina ai se taimi tele atu mo se afiafi faaleaiga ma le suesueina o le talalelei i le aiga i le Aso Sa po o nisi taimi e ono filifilia e tagata taitoatasi ma aiga. O se po o gaoioiga faaleaiga e mafai ona faia i le Aso Gafua po o se isi taimi. I lenei tulaga, e tatau ai i taitai ona faaavanoa afiafi o Aso Gafua mai fonotaga ma gaoioiga faale-Ekalesia. Peitai, o taimi e faaluina i afiafi faaleaiga, suesuega o le talalelei, ma gaoioiga mo tagata taitoatasi ma

aiga e mafai ona faatulagaina e tusa ma o latou lava tulaga faaletagata lava ia.

O le suesueina o le talalelei e le aiga ma le tagata lava ia i le fale o le a iloga le faaleleia e se mataupu aoaoina laugatasia ma se punaoa fou, o le *Sau, Mulimuli Mai ia te Au* mo tagata taitoatasi ma aiga lea ua faamaopopoina faatasi ma mea ua aoaoina i le A'oga Sa ma le Peraimeri.³ Ia Ianuari, o le a suesueina ai e vasega o le autalavou a le Ekalesia ma tagata matutua i le Aoga Sa ma le Peraimeri le Feagaiga Fou. O le punaoa fou mo suesuega i le fale, o le *Sau, Mulimuli Mai ia te Au* mo tagata taitoatasi ma aiga ua mamanuina e fesoasoani i tagata o le ekalesia ia aoaoina le talalelei i totonu o le aiga. Ua faamalamalama mai: “O lenei punaoa e mo tagata taitoatasi uma ma aiga i le Ekalesia. Ua mamanuina e fesoasoani ia [i tatou] e aoao [atili ai] i le talalelei—pe na o [tatou] pe faatasi ma [o tatou] aiga. O auivi o lenei punaoa [fou] ua faatulagaina e tusa ai ma se faasologa faalevaiaso.”⁴

O lesona fou o le *Sau, Mulimuli Mai ia te Au* a le Peraimeri e aoaoina i le lotu, o le a mulimulitaia le faatulagaga lava lea e tasi faalevaiaso. O vasega a le au matutua ma le autalavou i le Aoga Sa i Aso Sa muamua ma le tolu o le a



faamaopoopoina ina ia latou lagolagoina le punaoa fou o le *Sau, Mulimuli Mai ia te Au* mo le aiga. I Aso Sa lona lua ma lona fa, o le a faaauau pea ona suesueina e tagata matutua i le au perisitua ma le Aualofa ia aoaoga a taitai o le Ekalesia, ma le faamamafa atu i savali o loo i ai nei a perofeta o aso nei.⁵ O tamaitai talavou ma alii talavou o le Perisitua Arona o le a suesueina autu o le talalelei i na Aso Sa.

Ua maua i punaoa fou mo suesuega i le aiga ni “Manatu mo Suesuega Faaleaiga o Tusitusiga Paia ma Afiati Faaleaiga.”⁶ O auivi mo vaiaso taitasi o loo i ai ni manatu aogā mo suesuega ma ni gaoioiga mo tagata taitoatasi ma aiga. O le punaoa o le *Sau, Mulimuli Mai ia te Au* mo tagata taitoatasi ma aiga o loo i ai foi ni ata se tele o le a fesoasoani e faaleleia le aoaoina o tagata taitoatasi ma aiga, aemaise lava mo fanau.⁷ O lenei punaoa fou o le a tuuina atu i aiga taitasi ia Tesema o lenei tausaga.

Ua apoapoiina i tatou e Peresitene Nelson, mai lana uluai savali i tagata o le Ekalesia ia Ianuari, ina ia saunia mo le Afio Mai Faalua o Iesu Keriso e ala i le savavali i le ala o feagaiga.⁸

Ona o tulaga o le lalolagi, ua matua manaomia ai ona faalolotoina le liua ma le faamallosia o le faatuatua i le Tama Faalelagi ma Iesu Keriso ma Lana Togiola. Ua saunia e le Alii i tatou, i lea fuaitau ma lea fuaitau, mo taimi faigata ua tatou feagai ai nei. I tausaga talu ai nei, ua taialaina i tatou e le Alii ia tauli-maina ni atugaluga autu, e aofia ai:

- Faamamaluina o le aso Sapati ma le sauniga paia o le faamanatuga ua toe faamamafaina mo tausaga e tolu ua mavae atu.
- I lalo o le taitaiga a le epikopo, o korama a toeaina ma Aualofa ua faamallosia o loo taulai atu i le faamoemoega o le Ekalesia⁹ ma fesoasoani i tagata ia osia ma tausia feagaiga paia.
- O le auuina atu i se ala maua luga atu ma paia atu ua faatinoina ma le olioli.
- O le amataina faatasi ma se tau-nuuga i le mafaufau, ua avea ai feagaiga o le malumalu ma auuina i talafaasolopito o aiga ma se vaega mautu o le ala o feagaiga.

O fetuunaiga ua faasilasila atu i lenei taeao o se isi lea o faataitaiga o le taiala mo luitau o o tatou aso.

O mataupu aoaoina a le Ekalesia ua masani ai ua faamamafa ai le aafiaga faale-Ekalesia i le Aso Sa. Ua tatou iloa ina lenei mea pe a lelei ona tatou aoa atu ma tele ni tagata o le vasega e saunia faaleagaga, e maua so tatou aafiaga sili atu i le Lotu i le Aso Sa. E faamanuiaina i tatou, lea e tele ai ina faateleina le Agaga ma faamallosia ai le liuaina i totonu o le faatulagaga faale-Ekalesia.

E manaomia ona faatosinaina ma le mamana atili e le mataupu aoaoina fou e faatotonugalemu-i-le-aiga ma lagolagoina-e-le-Ekalesia le tapuaiga faalelotu ma amioga faaleaiga ma tapuaiga faalelotu ma amioga faaletagata lava ia. Ua tatou iloa le aafiaga faaleagaga ma le liuaina loloto ma tumau lea e mafai ona ausia i le faatulagaga faaleaiga. I ni tausaga ua mavae, sa faamautu ai se suesuega e faapea mo alii ma tamaitai talavou, o le faatosinaga a le Agaga Paia e tele lava ina i ai i le suesueina o tusitusiga paia ma tatalo a le tagata lava ia i le aiga. O lo tatou faamoemoega o le faapaleni lea o aafiaga i le Ekalesia ma le aiga i se auala o le a matua faateleina ai le faatuatua, faaleagaga, ma faalolotoina ai le liua i le Tama Faalelagi ma le Alii o Iesu Keriso.

I le vaega o le faatotonugalemu-i-le-aiga ma lagolagoina-e-le-Ekalesia o lenei fesuiaiga, o loo i ai le fetuunaiga

mo tagata taitoatasi ma aiga e fuafua ai ma le agaga tatalo le auala ma le taimi o le a faatinoina ai. Mo se faataitaiga, e ui o le a matua faamanuiaina e lenei mea aiga uma, e fua i manaoga i le lotoifale, ae o le a talafeagai atoa mo talavou nofofua, tagata matutua nofofua, matua nofotoatasi, aiga e le auai uma tagata i le lotu, tagata fou o le ekalesia,¹⁰ ma isi ia potopoto i ni vaega i fao atu o sauniga tapuai masani o le Aso Sa ia olioli ai i mafutaga faaletalalelei ma ia faamallosia ai e le suesueina faatasi o le punaoa e faatotonugalemu-i-le-aiga ma lagolagoina-e-le-Ekalesia. O le a ausia faasamasamanoa lenei mea e i latou e mananao i ai.

I le tele o vaega o le lalolagi, e filifili tagata e nonofo i le falesa pe a mavae sauniga masani o le Aso Sa e olioli ai i sootaga faaagafesootai. E leai ma se mea o i ai i lenei faasilasilaga o le fetuunaiga o le a faalavelave i lenei faiga masani matagofie ma tauia i soo se auala.

Ina ia fesoasoani i tagata o le ekalesia ia saunia mo le Sapati, ua uma lava ona auina atu e nisi o uarota se imeli manino, tesi, po o se feau faaagafesootai i le ogatotonu o le vaiaso. I le tagai la i ai i lenei fetuunaiga, matou te fautua malosi atu lenei ituaiga o fesootaiga. O nei valaaulia o le a faamanatu atu ai i tagata o le au paia faatulagaga o sauniga o le Aso Sa mo lenei vaiaso, e aofia ai le autu o le lesone o le a oo i ai, ma le lagolagosua i talanoaga faifai pea o le talalelei i le aiga. Ma le isi, o sauniga a tagata matutua i le Aso Sa o le a maua ai foi faamatalaga e fesootai ai suesuega i le ekalesia ma le aiga i vaiaso taitasi.

O le sauniga faamanatuga ma le taimi o le vasega o le a manaomia ai se iloiloaga ma le agaga tatalo e faamautinoa ai o loo faamamafaina mea faamuamua faaleagaga i lo matafaioi faalepulega. Mo se faataitaiga, o faasilasilaga e mafai mo le tele o vaega ona avatu i le valaaulia i le ogatotonu o le vaiaso pe lolomi foi i polokalama. E ui o le sauniga faamanatuga e tataua ona i ai se tatalo amata ma se tatalo faaiu, ae o le sauniga po o le vasega e sosoo ai, e na o le tatalo faaiu e manaomia.¹¹

E pei ona ta'ua muamua atu, o le faatulagaga fou i Aso Sa o le a lē amataina seia oo ia Ianuari 2019. E tele ni mafuaaga mo lenei mea. O mafuaaga sili ona taua e lua, muamua, ia lava le taimi e tufatufa atu ai le punaoa o le *Sau, Mulimuli Mai ia te Au* mo tagata taitoatasi ma aiga ma le lona lua, ia lava se taimi mo peresitene o siteki ma epikopo e fetuunai ai faatulagaga o sauniga faatasi ai ma le sini ia tele ni uarota e vave amata i le aso.

A o saili atu taitai i faaaliga, o le taitaiga na maua i nai tausaga ua alu o le faamalositia lea o sauniga faamanatuga, faamamalu le aso Sapati, ma uunaia ma lagolago matua ma tagata taitoatasi ia faia o latou aiga o se punavai o le malosiaga faaleagaga ma le faatuatua faateleina—o se nofoaga o le olioli ma le fiafia.

Faamanuiaga Ofoofogia

O le a le uiga o nei fetuunaiga mo tagata o Le Ekalesia a Iesu Keriso o Au Paia o Aso e Gata Ai? Ua matou talitonu o le a faamanuiaina ai tagata o le ekalesia i ni auala tulagaese. O le Aso Sa e mafai ona avea ma se aso o le aoao mai ma le aoao atu o le talalelei i le lotu ma i le aiga. Pe a auai tagata taitoatasi ma aiga i aufono faaleaiga, talafaasolopito o aiga, auunaga, galuega fesoasoani, tapuaiga faaletagata lava ia, ma taimi fiafia faaleaiga, o le a avea moni le aso Sapati ma aso fiafia.

O se tasi o aiga mai Pasila o ni tagata o se siteki lea sa faataitai ai le punaoa fou mo aiga o le *Sau, Mulimuli mai ia te A'u*. O le tama ia Fernando, o se faifeautalai ua foi mai le misiona, o ia ma lona faletua ia Nancy, o ni matua o se fanau e toafa, na lipoti mai: “Ina ua faalauiiloa mai le polokalama o le *Sau, Mulimuli Mai ia te Au* i le matou siteki, sa ou matua fiafia lava, ma sa ou mafaufau ‘o le auala o loo matou suesueina ai tusitusiga paia i le aiga o le a suia.’ Na tupu moni lava i lo'u aiga, ma i le avea ai ma se taitai o le Ekalesia, sa ou vaaia na tupu i isi foi aiga. . . . Na fesoasoani ia i matou ia talanoaina moni lava tusitusiga paia i totonu o lo matou aiga. Na ma maua ma lo'u toalua se malamalamaaga loloto atu i autu sa



suesueina. . . . Na fesoasoani ia i ma'ua . . . e faalautele lo ma malamalama o le talalelei, ma faaleleia lo ma faatuatua ma molimau. . . . Ou te molimau atu . . . ou te iloa sa musuia e le Alii ina ia mafai ona aumaia e le suesueina faifai pea ma le anoa o mataupu faavae ma aoaoga faavae o loo i ai i tusitusiga paia le faatuatua tele atu, molimau, ma le malamalama i aiga . . . i se lalolagi ua faateleina le pa'ū.”¹²

I polokalama faataitai i siteki i le lalolagi atoa, sa i ai se tali sili ona faafiafiaina i le punaoa fou o le *Sau, Mulimuli Mai ia te Au* mo aiga. E toatele sa latou lipoti mai ua latou alualu i luma mai le faitauina o tusitusiga paia i le suesueina moni o tusitusiga paia. Sa lagona tutusa foi le lagonaina o le aafiaga sa siitia ai le faatuatua ma sa i ai se aafiaga matagofie i le uarota.¹³

Liaina Loloto ma Tumau

O le sini o nei fetuunaiga o le maua lea o se liaina loloto ma tumau o tagata matutua ma le tupulaga faiae. O loo faamamafa mai e le uluai itulau o le punaoa mo tagata taitoatasi ma aiga e faapea: “O faamoemoega uma o le aoao mai ma le aoao atu o le talalelei o le faalolotoina lea o lo tatou liua ma fesoasoani ai ia te i tatou ia avea atili e faapei o Iesu Keriso. . . . O lona uiga ia faalagolago ia Keriso e suia o tatou loto.”¹⁴ E lagolagoina lenei mea e ala i le aapa atu “i tua atu o se potuaoga i le loto o se tagata ma le aiga. E moomia ai le faifaifea e le aunoa, o taumafaiga i aso taitasi ia

malamalama ma ola ai i le talalelei. O le liua moni e moomia ai le faatosinaga a le AgagaPaia.”¹⁵

O le sini sili ona taua ma le faamanuiaga silisili o le liua loloto ma tumau o le mauaina lea ma le agavaa o feagaiaga ma sauniga o le ala o feagaiga.¹⁶

Matou te faatuatua outou ia fefautuaai faatasi ma ia saili atu i faaaliga mo le faatinoina o nei fetuunaiga—ae ia le vaai ai i tala atu o le faailoga po o le taumafai e pulemalosi tagata po o aiga. O faamatalaga faaopoopo o le a faasoa atu i fesoataiga o le a oo atu, e aofia ai se tusi ma faamalamalama mai le Au Peresitene Sili.

Ou te molimau atu ia te outou i fonotaga a le Aufono a le Au Peresitene Sili ma le Korama a Aposetolo e Toasefululua i totonu o le malumalu, ma i le mavae ai ona aioi atu o lo tatou perofeta pele i le Alii mo se faaaliga ia faatino ai nei fetuunaiga, sa maua ai se faamautinoaga mamana e uso uma. O Russell M. Nelson o lo tatou Peresitene ma perofeta soifua. O le faasilasilaga ua faia i le asō o le a oo ai i faamanuiaga loloto mo i latou o ē taliaina ma le naunautai ia fetuunaiga ma saili atu i le taitaiga a le Agaga Paia. O le a tatou latalata atili atu i lo tatou Tama Faalelagi ma lo tatou Alii ma Faaola, o Iesu Keriso, o lē ua avea ai a'u ma se molimau mautinoa. I le suafa, o Iesu Keriso, amene. ■

FAAMATALAGA

1. Russell M. Nelson, “Malelega Amata,” *Liahona*, Nov. 1996, 35.

2. Ua matou iloa foi, i le lautele o le malo, o le tele naua o mea e tutupu mo faamatalaga, a'oga, ma faafiafiaga ua matua faapuupuuina lava.
3. O le a maua le mataupu aoaoina i masini faaeletonika ma lomiga.
4. *Sau, Mulimuli Mai ia te Au—Mo Tagata Taitoatasi ma Aiga* (2019), vi.
5. Tagai i le “Sau, Mulimuli Mai ia te A'u—Mo le Korama a Toeaina ma le Aualofa,” *Liahona*, Me 2018, 140. Nai lo o Aso Sa lona lua ma lona tolu: o le a talanoaina savali o le konafesi aoao i Aso Sa lona lua ma lona fa.
6. Tagai i le *Sau, Mulimuli Mai ia te Au—Mo Tagata Taitoatasi ma Aiga*, 4. E fuafua e tagata taitoatasi ma aiga po o le a le vaega o le suesuega o le talalelei i le aiga, afiafi i le aiga, ma gaoioiga faaleaiga o le a avea ma afiafi faaleaiga (lea ua toatele lava tagata ua ta'uina o le *afiafi i le aiga*). Ona o le a faia e tagata taitoatasi ma aiga lenei filifiliga, o lea ua fesuisuia ai le faaagaina o le *afiafi i le aiga* ma le *afiafi faaleaiga* i fetuunaiga ua faasilasila atu.
7. Tagai i le *Sau, Mulimuli Mai ia te Au—Mo Tagata Taitoatasi ma Aiga*, 29.
8. Tagai i le Russell M. Nelson, “A'o Tatou Agai Faatasi Atu i Luma,” *Liahona*, Ape. 2018, 7.
9. Tagai i le *Tusitaulima 2: Taitaitina o le Ekalesia* (2010), 2.2. O tiutetauave e tofia mai le lagi ua “aofia ai le fesoasoani i tagata o le ekalesia ia ola i le talalelei a Iesu Keriso, faapotopotoina o Isaraelu e ala i le galuega faafaifeautalai, tausiga o e matitiva ma e le tagolima, ma faataunuuna le faaolataga o e ua malilili e ala i le fausiaina o malumalu ma le faatinoina o sauniga sui mo i latou.” Tagai foi i le Mataupu Faavae ma Feagaiga 110, lea o loo i ai le tala o le toefuataiga o ki e tatau ai.
10. Ia gauai faapitoa atu i na fanau a matua e le o ni tagata o le ekalesia pe le auai soo foi i le lotu. E mafai foi ona feiloai faatasi tagata nofofua ma se aiga pe afai e aoga lena mea i e uma e aafia ai.
11. O sauniga amata e masani lava o le a le avea ma se vaega o le sauniga lona lua.
12. Aiga o Fernando ma Nancy de Carvalho, Pasila.
13. O tagata taitoatasi ma aiga o e na auai i le polokalama faataitai, i se tulaga faaaveresi, na suesueina soo le talalelei ma sa maua se suesuega anoa atili o tusitusiga paia ma talanoaga o le talalelei i totonu o le aiga. Sa latou lipotia mai le mauaina o le tele atu o talanoaga faasamasamanoa o le talalelei faatasi ai ma le aiga ma tagata o le uarota ma talisapaia le suesueina o poloka mau lava e tasi faapei o o latou aiga. E matuai moni lava lenei mea mo le autalavou.
14. *Sau, Mulimuli Mai ia te Au—Mo Tagata Taitoatasi ma Aiga*, v; tagai foi 2 Korinito 5:17.
15. *Sau, Mulimuli Mai ia te Au—Mo Tagata Taitoatasi ma Aiga*, v.
16. Russell M. Nelson, “A'o Tatou Agai Faatasi Atu i Luma,” 7.



Saunia e Brother M. Joseph Brough

Fesoasoani Lua i le Au Peresitene Aoao o Alii Talavou

Inā Ea ia i Luga Lou Ulu ma Olioli

Ao tatou fetaiai ma mea faigata i le ala a le Alii, e mafai ona tatou ea i luga o tatou ulu ma olioli.

I le 1981, o lo'u tama, o ni uo mamae se toalua, ma a'u na o i se malaga i Alaska. Sa faapea matou te tulauelele i se vaituloto maotua ma feaei atu i se atunuu maua luga matagofie. Ina ia faaitiitia ai a matou avega e amoina, sa matou tuuina a matou sapolai i atigipusa, ufiufi i momi, faapiipii i ai ni fasi ieie lanu uumi, ma togiina i fafo o le faamalama o la matou vaalele laitiiti i lo matou nofoaga faamoemoeina.

Ina ua matou taunuu, sa matou saili ma saili, ae i lo matou ofo, sa le mafai ona matou mauaina soo se atigipusa. Na iu lava ina matou mauaina le tasi. Sa

i ai se tamai ogaumu kesi, se tapoleni, nai lole, ma ni nai pepa o Hamburger Helper-ae leai ni hamburger. Sa leai se auala matou te fesoatai ai ma le lalolagi i fafo atu ma o le taimi faatulaga e piki ai matou o le vaiaso a sau.

Sa ou aoaoina ni lesone taua se lua mai lenei aafiaga: Tasi, aua nei togiina i fafo o le faamalama au meaai. Lua, o nisi taimi e tatau ai ona tatou fetaiai ma ni mea faigata.

O le tele o taimi, o le tatou tali mua-mua lava i mea faigata o le “Aisea [ua tupu ai ia te] a'u?” Peitai, o le fesili pe aisea, e le aveesea ai lava le mea faigata.



E manaomia e le Atua lo tatou foia o faa-fitauli, ma ua ia faailoa mai “o nei mea uma [tatou] te maua ai le poto masani, ma o le a avea mo [o tatou] lelei.”¹

O nisi taimi e talosaga ai i tatou e le Alii e faia se mea faigata, ma o nisi taimi o o faa-fitauli ua foafoaina i lo tatou faaaogaina e i tatou lava po o i nisi foi o le faitalia. Na oo ia Nifae nei tulaga uma e lua. Ina ua valaaulia e Liae ona atalii e toe foi e aumai papatusi mai ia Lapana, sa ia fai mai, “Faauta ua muimui ou uso, fai mai o se mea faigata ua ou faatonuina ai i laua, ae faauta ou te lei faatonuina ai i laua, ae o se poloaiga mai le Alii.”² I se mea na tupu, sa faaaoga e uso o Nifae lo la faitalia e faatapulaa ai lona [faitalia]: “Sa oo ina fetagofi mai o laua lima ia te a’u, aua faauta, sa laua faitai tele, ma laua noatia a’u i maea, aua sa laua saili e aveese lo’u ola.”³

Na feagai Iosefa Samita ma se mea faigata i le Falepuipui o Liperate. Ma le leai o se toomaga sa vaaia, ma le faanoanoa, na alaga atu Iosefa, “Le Atua e, o fea o i ai oe?”⁴ Ou te matea na lagona e nisi o i tatou lagona na oo ia Iosefa.

E fetaiai uma lava tagata ma ni mea faigata: o le maliu o se e pele, tatala se faaipoipoga, o se tamaitiiti faalogogata, ma’i, tofotofoga o le faatuatua, o le aveesea o se galuega, po o soo se isi lava faa-fitauli.

Sa suia lo’u tagata e faavavau i le faalogo atu i upu nei mai ia Elder Neal A. Maxwell o le Korama a le Toasefululua, na saunoa ai ao i ai i le lotolotoi o ona tauviga ma le lukimia. Na ia saunoa, “Sa ou faia ni mafaufauga loloto ae oo mai nei upu aoga ma faamafanafana e 18 i lo’u mafaufau: ‘Ua ou tuu atu ia te oe lukimia ina ia e aoao atu ma le faamaoni o’u tagata.’ Ona ia faaauau atu lea e faaalua le ala ua faamanuiaina ai o ia e lenei aafiaga ma se “vaaiga e uiga i mea maoae moni o le faavavau. . . . O ia vaaiga i le faavavau e mafai ona fesoasoani ia i tatou ia faimalaga atu ai i le isi 100 iata, atonu e sili atu ona faigata.”⁵

Ina ia fesoasoani ia i tatou ia agai i luma ma faatoilalo o tatou taimi faigata ma ni vaaiga o le faavavau, sei ou fautuaina atu ni mea se lua. E tatau ona



tatou fetaiai ma ni mea faigata, mua-mua, e ala i le faamagalaga atu o isi ma le, lona lua, i le tuuina atu o i tatou lava i le Tama Faalelagi.

O le faamagaloina o i latou atonu lea na mafua ai o tatou tulaga faigata ma toe faaleleia ai “[o i tatou lava] ma le finagalo o le Atua”⁶ e mafai ona faigata tele. E mafai ona sili atu ona tiga pe afai o tatou faigata na mafua i se tagata o le aiga, se uo mamae, po o i tatou lava.

I le avea ai ma se epikopo talavou, sa ou aoao i le faamagalaga i le taimi na faasoa mai ai e le matou peresitene o le siteki, o Bruce M. Cook, le tala lenei. Na ia faamatalaina mai:

“I le faaiuga o le vaitau o le 1970, sa ou amatalia ai ma nisi o paaga se pisinisi. E ui matou te lei faia se mea e le tusa ai ma le tulafono, ae o nisi o filifiliga le lelei, tuufaatasi ai ma taimi faigata o le tamao-aiga, na taunuu ai i lo matou toilalo.

“Na faia e nisi o tagata faipisinisi se moliaga ina ia toe maua mai a latou tupe. O le latou loa o se fesoasoani i le au epikopo a lo matou aiga. Sa faigata tele le lagolagoina o le alii lea na foliga mai o loo saili e faatamaia a’u. Sa ou atiaeina ni lagona le fiafia moni ia te ia ma mafaufau ia te ia o so’u fili. Ina ua mavae tausaga e lima o taua faaletulafono, sa aveesea mea uma na matou umiaina, e aofia ai le matou fale.

“I le 2002, sa ma iloina ma lo’u toalua ua toe faatulagaina le au peresitene o le siteki lea sa ou galue ai o se fesoasoani. Ao ma malaga atu i se tafaoga puupuu ao lumanai ai le faamalologa, sa ia fesili mai ia te a’u po o ai ou te filifilia e avea ma au fesoasoani pe afai ou a’u e valaauina e avea ma peresitene fou o le siteki. Ou te lei manao e talanoa i ai, ae sa ia tauanau mai. Mulimuli ane, e tasi lava le igoa na oo mai i lo’u mafaufau. Ona ia ta’ua lea o le igoa o le loa lea na ma manatu sa i le ogatotonu o o ma faa-fitauli i le 20 tausaga ua mavae. A o ia talanoa mai, na faamautu mai e le Agaga o ia e tatau ona avea ma le isi fesoasoani. E mafai ona ou faamagalaga i le tamaloa?”

“Ina ua tuuina mai e Elder David E. Sorensen ia te a’u le valaauga e auauna atu o se peresitene o le siteki, sa ia tuuina mai ia te a’u le itula e filifili ai ni fesoasoani. E ala atu i loimata, sa ou faailoa atu ua uma ona saunia e le Alii lena faaaliga. Ao ou ta’uina le igoa o le tamaloa lea na ou mafaufau i ai o lo’u fili, na mouese atu le ita, le fiafia, ma le inoino sa ou tauaveina. I lena lava taimi, sa ou aoaoina ai le filemu lea e sau faatasi ma le faamagalaga e ala i le Togiola a Keriso.”

I nisi upu, na “faamagaloina moni” o ia e lo’u peresitene o le siteki, e

pei o Nifae anamua.⁷ Na ou iloina Peresitene Cook ma lona fesoasoani o ni taitai perisitua amiotonu e toalua o e alofa le tasi i le isi. Sa ou naunau ia avea e pei o i la'ua.

I tausaga na muamua atu, i le taimi o le mea na tupu i le matou malaga i Alaska, sa vave ona ou aoaoina ai o le tuuaia o matou tulaga i isi—o le lafoina i fafo e le pailate o meaai i le mou atu o le malamalama—sa le o se vaifofo. Ae peitai, ao matou lagonaina le vaivai faaletino, leai o ni meaai, mama'i, ma le momoe i luga o le palapala i le taimi o se afa tele ma e na o se tapoleni e ufiufi ai i matou, sa ou aoaoina ai “e leai se mea e le mafaia e le Atua.”⁸

Tagata talavou e, e manaomia e le Atua mea faigata mai ia te outou. O se tasi o tamaitai talavou e 14 tausaga sa auai i tauvaga pasiketipolo. Sa ia moemiti i le taalo pasiketipolo i le aoga mauuluga e pei o lona uso matua. Ona ia iloina lea ua valaauina ona matua e pulefaamalumalu i le misiona i Kuatemala.

I le taunuu atu, sa ia iloina ai o nisi o ana vasega e faaSipaniolo, o se gagana na te lei tautala ai lava. Sa leai ma se 'au taalo e tasi a teine i lana aoga. Sa nofo o ia i le fogafale lona 14 o se fale e matuai malupuipua lava. Ma o le mea silisili o na mea uma, sa le mafai ona ia alu na o ia i fafo mo mafuaaga o le saogalemu.

Sa faalogo ona matua i lona tagi ma moe i po uma mo le tele o masina. Na momomo o la'ua loto! Na iu lava ina la filifili o le a la auina atu o ia i le aiga i lona tina matua mo le aoga mauuluga.

Ina ua ulu atu lo'u toalua i le potu o le ma afafine e ta'u ia te ia le ma filifiliga, sa ia vaaia le ma afafine o loo tootuli i le tatalo ma o loo tatala le Tusi a Mamona i luga o le moega. Na musu-musu atu le Agaga i lo'u toalua, “O le a OK o ia,” ma sa aluese filemu mai lo'u toalua mai le potu.

Ma te lei toe faalogoina o ia o tagi ma moe. Faatasi ai ma le naunautaiga ma le fesoasoani a le Alii, sa ia fetaiaia ma le toa i na tausaga e tolu.

I le faaiuga o le ma misiona, sa ou fesili i lo'u afafine pe na te alu e auuina atu i se misiona faafaifeautalai.



O lana tali o le “Leai Tama, ua uma ona ou auuina atu.”

Sa ou fiafia i lona mea! Ae pe a ma le ono masina mulumuli ane, na fafaguina a'u e le Agaga i le po ma lenei manatu: “Ua ou valaauina lou afafine e auuina atu i se misiona.”

O la'u tali e faapea “Tama Faalelagi, ua tele mea ua ia tuuina atu.” Sa vave ona faasa'oina a'u e le Agaga ma ou iloa ai sa manaomia e le Alii lana auuina faafaifeautalai.

Sa ou aveina lo'u afafine mo se 'aiga o le aoauli. Mai le isi itu o le laulau, sa ou fai atu i ai, “Ganzie, e te iloa le mafuaaga ua ta i ai iinei?”

Sa fai mai o ia “Ioe. Tama. E te iloa e tatou ona ou alu i se misiona. Ou te le fia alu, ae o le a ou alu.”

Talu ai sa ia tuuina atu lona loto i le Tama Faalelagi, sa ia auuina atu ia te ia ma lona loto atoa, manatu, mafaufau, ma le malosi atoa. Sa ia aoaoina i lona tama le ala e faia ai se mea faigata.

I le faigalotu i le lalolagi atoa a Peresitene Russell M. Nelson mo le autalavou, sa ia talosagaina ai ni mea faigata i le autalavou. Na saunoa Peresitene Nelson: “O la'u valaaulia e mo oe ia e tu matilatila mai ma ia ese mai le lalolagi. . . . E manaomia oe e le Alii ina ia foliga e pei o, ia leo e pei o, ia aga e pei o, ma laei e pei o se soo moni o Iesu Keriso.”⁹ E mafai ona faigata lona mea, ae, ou te iloa e mafai ona e faia—ma le olioli.

Manatua “ua i ai tagata, ina ia latou maua le olioli.”¹⁰ Mai mea uma na

fetaiaia ma Liae, sa ia mauaina lava le olioli. Manatua le taimi sa “faapea ona mamafa o le faanoanoa i luga o Alema”¹¹ ona o le nuu o Amonaea? Sa tau atu e le agelu ia te ia, “Amuia lava oe, Alema, o lea, inā ea ia i luga lou ulu ma olioli, . . . ona sa e faamaoni i le tausiga o poloaiga a le Atua.”¹² Sa aoaoina e Alema se mea moni maoae: e mafai lava ona tatou maua le olioli pe a tatou tausiga poloaiga. Manatua ia taimi o taua ma tofotofoga na fetaiaia ma Kapeteni Moronae, “sa leai se taimi sili ona fiafia i totonu o le nuu o Nifae.”¹³ E mafai ma e tatou ona tatou maua le olioli pe a tatou fetaiaia ma mea faigata.

Na fetaiaia le Faaola ma mea faigata, “Ma o le lalolagi . . . o le a faamasino ia te ia o se meanoa; o le mea lea latou te sasa ai ia te ia, ae tuu atu e ia i ai; ma latou taia o ia, ae tuu atu e ia i ai. Ioe, latou te tuufeanu ia te ia, ae tuu atu e ia i ai, ona o lona agalelei alofa ma lona tali-tiga i le fanauga a tagata.”¹⁴

Ona o lona alofa-agalelei, na puapugatia ai Iesu Keriso i le Togiola. O se taunuuga, ua Ia fetalai mai ai ia i tatou taitoatasi, “E maua foi outou e le puapuga i le lalolagi a ia outou lototetele ua ou manumalo i le lalolagi.”¹⁵ Ona o Keriso, e mafai foi e i tatou ona manumalo i le lalolagi.

Ao tatou fetaiaia ma mea faigata i le ala a le Alii, e mafai ona ea i luga o tatou ulu ma olioli. I lenei avanoa paia e molimau atu ai i le lalolagi, ou te folafola atu ai o loo soifua lo tatou Faaola ma o loo taitaiina Lana Ekalesia. I le suafa, o Iesu Keriso, amene. ■

FAAMATALAGA

1. Mataupu Faavae ma Feagaiga 122:7.
2. 1 Nifae 3:5.
3. 1 Nifae 7:16.
4. Mataupu Faavae ma Feagaiga 121:1.
5. Neal A. Maxwell, “Revelation,” *First Worldwide Leadership Training Meeting*, Jan. 11, 2003, 6.
6. 2 Nifae 10:24.
7. 1 Nifae 7:21.
8. Luka 1:37.
9. Russell M. Nelson, “Faamoemoe o Isaraelu” (faigalotu a le autalavou i le lalolagi atoa, 3 Iuni, 2018), [HopeofIsrael.org](https://www.hopeofisrael.org).
10. 2 Nifae 2:25.
11. Alema 8:14.
12. Alema 8:15.
13. Alema 50:23.
14. 1 Nifae 19:9.
15. Ioane 16:33.



Saunia e Elder Steven R. Bangerter

○ Le Fitugafulu

Faataatiaina o le Faavae o se Galuega Tele

O lesona na aoaoina e ala i tu masani tatou te faavaeina i totonu o o tatou aiga, e ui ina laiti ma faatauvaa, ua faateleina le taua i le lalolagi i aso nei.

I le avea ai ma matua i Siona, ua ia i tatou se tiutetauave paia e fagua i totonu o a tatou fanau le naunautai ma le tautinoga i le olioli, malamalama, ma upumoni o le talalelei a Iesu Keriso. Ao faafaileleina a tatou fanau, tatou te faavaeina ni tu masani i totonu o tatou aiga ma tatou fausia ai ni mamanu o fesootaiga ma amioga i totonu o a tatou mafutaga faaleaiga. I le faia ai o na mea, e tatau i tu masani ua tatou faavaeina ona fausia ai ni amioga malosi ma lē maluelue o le lelei i totonu o a tatou fanau lea o le a tuuina atu ia i latou le malosi e fetaiai ai ma luitau o le olaga.

Mo le tele o tausaga ua fiafia lo matou aiga i tu masani faaletausaga o le toalaupi maua luga i Mauga o Uintah i sautesasae o Iuta. Matou te malaga mo le 20 maila (32 km) i luga o auala maamaā palapalā ia taunuu ai i se vanu lanulauvao matagofie, ma puipui papa maua luga lea e tafe ai se vaitafe ua faatumulia i le vai malulu ma manino. O tausaga taitasi, i le faamoemoe ai e toe faamautu le taua o aoaoga faavae ma faiga masani o le talalelei i totonu o loto o la ma'ua fanau ma fanau a ma

fanau, ma te fesili atu ai ma Susan i ma atalii e toaono taitasi ma o latou aiga e saunia se savali puupuu i se autu latou te lagona o se elemene taua i le faavaega o se aiga e totonugalemu ia Keriso. Ona matou potopoto lea mo se faigalotu faaleaiga i se nofoaga tuufua, ma taitasi ma tuu mai a latou savali.

O lenei tausaga na tusia ai e fanau a le ma fanau le autu o a latou savali i luga o maa, ona taitasi lea, ma tanuina

i autafa o le isi, e suitulaga i se faavae mautu lea e faavaeina ai se olaga fiafia. Na aofia ai i totonu o a latou savali uma e ono le upumoni le masuia e faavavau o Iesu Keriso o le maatulimanu lea o lena faavae.

I upu a Isaia, “O lenei, o loo faapea ona fetalai mai o le Alii o Ieova, Faauta, ou te tuuina i Siona le maa e fai ma faavae, o le maa ua uma ona faataitaiaina, o le maa tulimanu taua, o le faavae ua mau.”¹ O Iesu Keriso o le maatulimanu taua lea i le faavae o Siona. O Ia lea na faaali i le Perofeta o Iosefa Samita: “O le mea lea aua le faavaivai i le faia o mea lelei ona o loo oulua faataitaiaina le faavae o se galuega tele. Ma o mea iti e tutupu mai ai mea tetele.”²

O lesona na aoaoina e ala i tu masani tatou te faavaeina i totonu o o tatou aiga, e ui ina laiti ma faatauvaa, ua faateleina le taua i le lalolagi i aso nei. O a mea laiti ma faatauvaa ia, pe a faatulagaina, o le a faataunuuina ai se galuega tele i olaga o a tatou fanau?

Na saunua talu ai nei Peresitene Russell M. Nelson i se faalapopotoga toatele e lata i Toronto, Kanata, ma faamanatu atu ma le alofa i matua e uiga i le tiutetauave paia ua ia i tatou e aoao atu a tatou fanau. I totonu o tiutetauave taua ua faailoa mai, na faamamafaina ai e Peresitene Nelson ia tiute ua ia i tatou o ni matua e aoao atu a tatou fanau ina ia malamalama i le mafuaaga tatou te aai ma feinu ai i le faamanatuga, le taua o le fanau i totonu o le feagaiga, ma le



O savali e suitulaga i le faavae o se olaga fiafia, ma o Iesu Keriso o le maatulimanu o lena faavae.



taua o le sauniuni mo ma le mauaina o se faamanuiaga faapeteriaka, na ia faamalosiaiu atu i matua ina ia taimua i le faitauina faatasi o tusitusiga paia o se aiga.³ E ala i nei taumafaiga, ua uunaia i tatou e lo tatou perofeta pele ina ia avea o tatou fale ma “malutaga o le faatuatua.”⁴

I le Tusi a Mamona, na tusia ai e Enosa le lagona o le agaga faafetai tele mo le faataitaiga a lona tama, o le na “aoaoina [o ia] i lana gagana, ma i le aoaoga ma le apoapoiga foi a le Alii.” Ma le ootia tele na alaga atu ai Enosa, “Ma ia faamanuina lava le suafa o lo’u Atua mo lena mea.”⁵

E pele ia te a’u ia tu masani laiti ma faatauvaia ua matou matauina i totonu o le matou aiga i le silia ma le 35 tausaga o le ma faaipoipoga. O le tele o a matou tu masani e laiti ae anoa. Mo se faataitaiga:

- I taimi o afiafi pe a ou aluese mai le aiga, ou te iloa lava i taimi uma i lalo o le taitaiga a Susan, o le ma atalii ulumutua o loo i ai na te aveina i ona luga le taitaiga o le aiga i le sue-sueina o tusitusiga paia ma le tatalo faaleaiga.⁶
- O le isi tu masani—e le mafai ona matou tuua lo matou fale pe faaiu se

talanoaga i le telefoni e aunoa ma le fai atu, “ou te alofa ia te oe.”

- Ua faamanuiaina ō matou olaga i le faataatiaese o se taimi i tulaga masani e fialia ai i faatalanoaga patino ma a ma’ua atalii taitoatasi. I se tasi o faatalanoaga sa ou fesili ai i le ma atalii e uiga i ona manaoga ma sauniuniga e auauna atu i se misiona. Ina ua mavae ni talatalanoaga, sa i ai sina taimi o le manatunatu lē leoa; ona ia punou mai lea i luma ma tautino mai ma le totoā, “Tama, manatua a o o’u laitiiti ma amata ona faia a tatou faalatanoaga faatama?” Sa ou fai atu, “Ioe.” “Ia,” na ia fai mai ai, “Sa ou folafola atu ia te oe i lena taimi o le a ou auauna atu i se misiona, ma na lua folafola mai ma Tina ia te a’u o le a lua auauna atu i se misiona pe a lua matutua.” Ona toe filemu foi lea. “O i ai se faaletonu ia te oulua o le a taofia ai oulua mai le auauna atu—aua atonu e mafai ona ou fesoasoani atu?”

O le faifai pea o tu masani faaleaiga aoga lea e aofia ai le tatalo, faitauina o tusitusiga paia, afiafi faaleaiga, ma le auai i sauniga o le Ekalesia, e ui e foliga laitiiti ma faatauvaia, ae fausia ai se aganuu o le alofa, faaaloalo,

lotogatasi, ma le malupuipua. I le agaga e o faatasi ma nei taumafaiga, o le a puipua a tatou fanau mai u fanafana mu a le tiapolo lea ua mauaa i aganuu faalelalogi i o tatou aso.

Ua faamanatu mai ia i tatou le fautuaga poto a Helamana i ona atalii: “Ia manatua o luga lava o le papa o lo tatou Togiola, o le o Keriso lea, le Alo o le Atua, e ao ina oulua atinae ai lo oulua faavae; ina ia pe a auina mai e le tiapolo ana matagi malolosi, ioe, ana ufanafana i le asiosio, ioe, pe a pesi mai ia te oulua ana uatoa uma ma lana afa malosi, o le a leai sona mana i luga o oulua e toso ifo ai oulua i lalo i le to o le pagatia ma le malaia e le gata, ona o le papa lea ua oulua atinae ai i luga, o le faavae mautinoa lea, o se faavae lea afai e atiae ai tagata e le mafai lava ona pauu i latou.”⁷

I tausaga ua tea, ao o’u auauna atu o se epikopo talavou, na talosaga mai ai se tamalii matua e feiloai ia te a’u. Sa ia faamatalaina lona aluese mai le Ekalesia ma tu masani amiotonu a ona matua ao ia talavou. Sa ia faamatalaina auiliili ia lototiga na ia oo i ai i le taimi o lona olaga ao saili ma le le aoga le olioli tumau, i le lotolotoi i le fialia le tumau ua ofo mai e le lalolagi. I le taimi nei, i tausaga mulimuli o

lona olaga, ua ia lagonaina le aga-vaivai, o nisi taimi le faalavelave mai o musumusuga a le Agaga o le Atua e toe taitaia o ia i tua i lesona, faiga masani, lagona, ma le saogalemu faaleagaga o lona talavou. Na ia faaalua le agaga faafetai mo tu masani a ona matua, ma i upu faaona po nei, na ia toe taua ai le folafolaga a Enosa: “Ia faamanūina lava le suafa o lo’u Atua mo lena mea.”

I lo’u aafiaga, o le toe foi mai o lenei tamalii faapelepele i le talalelei o se uiga a le toatele ma e faia soo e fanau a le Atua o e tuua mo sina taimi, ae na o le toe foi mai lava i aoaoga ma faiga masani o lo latou talavou. Tatou te molimauina i na taimi, le atamai o le tusitala o le faataoto, lea na apoapoai atu i matua, “Aoa ia i le tama e tusa ma lona ala: a oo ina toaina lava o ia, e le te’a ese ai.”⁸

O matua uma lava e feagai ma taimi o le lē mautonu ma le eseese o tulaga o le naunautaiga ma le malosi ao tausia fanau. Ae peitai, afai e faatino e matua le faatuatua i le aoao atu o fanau i taimi uma, faamaoni, alofa ma le faia o mea uma latou te mafaia e fesoasoani ai ia i latou i le ala, latou te maua le faamoemoe sili atu faapea o le fatu o loo totoina o le a mauaa i totonu o loto ma mafaufau o a latou fanau.

Na malamalama lelei Mose i le manaomia taua o le aoao atu faifaiepa. Na ia fautua atu, “Ia e matua aoao soo [nei upu] i lau fanau, ma ia e tautalatala a’i, pe a e nofo i lou fale, pe a e savali foi i le ala, pe a e taoto, pe a e tulai foi.”⁹

Tatou te tootutuli i autafa o a tatou fanau i taimi o tatalo faaleaiga, tatou te faafaiilele i latou e ala i a tatou taumafaiga ia faia ni faitauga tusitusiga paia faaleaiga anoa, tatou te faafaiileleina ma le onosai ma le alofa i latou ao tatou auai faatasi i afiafi faaleaiga, ma e tatou te popole mo i latou ao tatou tatalo i o tatou tulivae i le ogatotonu o a tatou tatalo lilo i le lagi. Oka, so tatou nau-nau mo fatulaau o loo tatou totoina ina ia mauaa i totonu o loto ma mafaufau a o tatou fanau.

Ou te talitonu e le o se fesili e popole tele i ai le pe o “mauaina” e



a tatou fanau i le lotolotoi o a tatou aoaoga, e pei o le tauivi e faitau ia tusitusiga paia pe ina ia auai i le Mutuale ma isi sauniga o le Ekalesia. O se fesili e le popole tele i ai pe na latou malamalama i na taimi i le taua o na gaoioiga ae o se fesili e sili le popole i ai pe o i tatou, i le avea ai ma matua, o lava le faatinoina o le faatuatua e mulimuli ai i fautuaga a le Alii ia ola ai ma le maelega, aoao atu, apoapoai atu, ma faatulaga faamoemoga ua musuia e le talalelei a Iesu Keriso. O se taumafaiga ua uunaia e lo tatou faatuatua—la tatou talitonuga o le a i ai se aso o le a mauaa ai fatu na totoina i lo latou talavou ma amata ona totogo ae ma tuputupu ae.

O mea tatou te tautatala ai, o mea tatou te talai atu ma aoao atu e fuafua ai mea o le a tutupu i totonu o i tatou. Ao tatou faatulagaina ni tu masani

lelei lea e aoao atua ia aoaoga faavae a Keriso, o le a molimau atu le Agaga Paia i le moni o a tatou savali ma faafaiilele ia fatu o le talalelei o loo totoina loloto i totonu o loto o a tatou fanau e ala i a tatou taumafaiga i le aluga o le ala. Ou te molimau atu ai i le suafa o Iesu Keriso, amene. ■

FAAMATALAGA

1. Isaia 28:16.
2. Mataupu Faavae ma Feagaiga 64:33.
3. Tagai i le itulau o le Facebook a Neil L. Andersen, post from Aug. 19, 2018, [facebook.com/lds.neil.l.andersen](https://www.facebook.com/lds.neil.l.andersen).
4. I le Sarah Jane Weaver, “Ua Uunaia e Peresitene Nelson Tagata o le Ekalesia i British Columbia ia ‘Aoa Atu le Fanau,’” *Church News*, Sete. 23, 2018, 11.
5. Enosa 1:1.
6. Tagai i le Dallin H. Oaks, “Pule o le Perisitua i le Aiga ma le Ekalesia,” *Liahona*, Nov. 2005, 24–27.
7. Helamana 5:12.
8. Faataoto 22:6.
9. Teuteronomi 6:7.



Saunia e Elder Ronald A. Rasband

○ Le Korama a Aposetolo e Toasefululua

Aua Le Atuatuvaile

la faamalosi, uso e ma tuafafine. Ioe, ua tatou ola i taimi faigata, ae pe a tatou tumau ai i luga o le ala o feagaiga, e le tataua ona tatou fefefe.

O u te faaopoopo atu la'u moli-mau i savali a Peresitene Russell M. Nelson ma Elder Quentin L. Cook na tuuina atu i nai minute ua tea e uiga i le lotogatasi ma le maliega a le Aufono a le Au Peresitene Sili ma le Korama a Aposetolo e Toasefululua. Ou te iloa o nei faasilasilaga faafaaliga o le mafaufau ma le finagalo lea o le Alii ma o le a faamanuiaina ma faamalosi tagata taitoatasi, aiga, ma Le Ekalesia a Iesu Keriso o le Au Paia o Aso e Gata Ai mo augatupulaga a sau.

I nai tausaga ua mavae, na fesili mai ai se tasi o ma afafine faatoa faaipoipo ma lana tane ia i ma'ua ma Sister Rasband i se fesili taua tele e uunaia ai le olaga: "O saogalemu lava ma atamai le aumaia o fanau i lenei lalolagi foliga leaga ma tauaafefe ua tatou ola ai?"

O se fesili taua lena mo se tina ma se tama e mafaufau i ai ma a laua fanau pele ua faaipoipo. Sa mafai ona ma faalogoina le fefe i o la'ua leo ma lagona le fefe i o la'ua loto. O le ma tali ia i laua o se "Ioe, [mausali] e sili atu nai lo le OK," a o matou fetufaai i aoaoga faavae o le talalelei ma a ma'ua uunaiga faamaoni ma aafiaga o le olaga.

E le fou le fefe. Na fefefe soo o Iesu Keriso, i luga o le Sami o Kalilaia i le "matagi . . . ma peau" i le pouliuli o le po.¹ I le avea ai ma Ona soo i nei

aso, e i ai foi mea tatou te fefefe ai. Ua fefefe a tatou talavou matutua nofofua i le faia o ni tautinoga e pei o le faaipoipo. O ulugalii talavou, e pei o le ma fanau, e mafai ona fefefe i le aumaia o fanau i se lalolagi ua faateleina le amioleaga. Ua fefefe faifeautalai i le tele o mea, aemaise le talanoa atu i tagata ese. Ua fefefe tina ua oti a latou tane e agai i luma na o i latou [e aunoa ma tane]. Ua fefefe le autalavou i le le taliaina; o tamaiti laiti e fefefe i le aso muamua o le aoga; e fefefe tagata a'oga o le iunivesite i le mauaina o le taunuuga o se suega. Tatou te fefefe i le toilalo, teenaina, faanoanoa, ma le le mailoa. Tatou te fefefe i afā, mafuie, ma afi ia e faatamaiaina le laueleele ma o tatou olaga. Tatou te fefefe i le le filifilia o tatou ma i le taimi lava e tasi, tatou te fefefe i le filifilia o tatou. Tatou te fefefe i le le lava o lo tatou lelei; tatou te fefefe ona ua leai ni faamanuiaga a le Alii mo i tatou. Tatou te fefefe i suiga, ma e mafai ona oo atu lo tatou fefefe i le atuatuvaile. Ua ou faaofiaina ea mea uma tatou te fefefe ai?

Talu mai taimi anamua, ua faatapu-laaina e le fefe le vaai a fanau a le Atua. Ou te fiafia lava i le tala ia Elisaia i le 2 Tupu. Na auina atu e le tupu o Suria se autau lea na "oo [atu i le] po. . . , ona latou sio lea o le aai."² O lo latou

faamoemoe o le pu'e ma fasioti le perofeta o Elisaia. Tatou te faitauina:

"Ua tulai le auauna a le tagata o le Atua i le taeao lava, ua alu i fafo, faauta, o 'au ua sio le aai ma a latou solofanua ma kariota. Ona fai mai ai lea o lana auauna ia te ia, Aue! le alii e, pe faapefea se mea tatou te fai a'i?"³

O le fefe lena na tautala.

"Ona tali atu lea o (Elisaia), Aua e te fefe: aua e toatele ua ia te i tatou i e ua ia te i latou."⁴

Ae na te lei taofi ai iina.

"Ona tatalo ai lea o Elisaia, ua faapea atu, Ieova e, ia e faapupula i ona mata, ina ia na iloa. Ona faapupulaina lea e Ieova o mata o le taulealea, ona iloa ai lea e ia, faauta foi, ua tumu le mauga i solofanua ma kariota afi ua latou vagavagai ia Elisaia."⁵

Atonu e i ai pe leai foi ni a tatou kariota o afi na auina mai e faate'a lo tatou fefe ma faatoilalo o tatou temoni, ae ua manino le lesone. E faatasi le Alii ma i tatou, silafia i tatou ma faamanuiaina i tatou i auala e na o Ia e mafaia. O le tatalo e mafai ona valaau mai ai i lalo le malosi ma faaaliga ia tatou te manao-mia e faatotonugalemu ai o tatou mafaufauga ia Iesu Keriso ma Lana taulaga togiola. Na silafia e le Alii e i ai taimi o le a tatou lagona ai le fefe. Na ou i ai iina ma na faapena foi ma oe, o le mafuaaga lena ua tumu ai tusitusiga paia i fautuaga a le Alii:



“Ia fiafia, ma aua le fefefe.”⁶

“Vaai mai ia te a’u i mafauauga uma; aua le masalosalo, aua le fefefe.”⁷

Aua le matatau, le lafu mamoe itiiti e.”⁸ Ou te fiafia i le agavaivai o le “lafu mamoe itiiti.” I lenei Ekalesia atonu tatou te toalaiti i fuainumera i ala e faitaulia ai e le lalolagi faatosinaga, ae a tatalaina o tatou mata faaleagaga, “e toatele ua ia te i tatou i e ua ia te i latou.”⁹ Na faaauau lea o le fetalaiga a lo tatou Leoleo Mamoe alofa, o Iesu Keriso, “Ia tuu le lalolagi ma seoli e afaatasi faasaga mai ia te [outou], auā afai ua [tou] atia’e i luga o la’u papa, e lē mafai ona latou manumalo.”¹⁰

E faapefea ona aveese le fefe? Mo le alii talavou, sa tu o ia i autafa o Elisaia, o se perofeta a le Atua. Ua tatou maua lena lava folafolaga e tasi. Pe a tatou faalogo ia Peresitene Russell M. Nelson, pe a tatou faalogo i lana fautuaga, ua tatou tutu ma se perofeta a le Atua. Ia manatua upu a Iosefa Samita: “O lenei, ina ua uma ona faia molimau e tele e uiga ia te ia, o le molimau tupito mulimuli lenei i mau uma lava, mā te faia ia te ia: O loo soifua o ia!”¹¹ O loo soifua Iesu Keriso. O lo tatou alolofa ia te Ia ma Lana talalelei e aveese ai le fefe.

O lo tatou mananao ina “ia maua pea lona Agaga”¹² e faatasi ma i tatou o le a faataatiaesea ai lo tatou fefefe mo se vaaiga faavavau sili atu o o tatou olaga faaletino. Na lapatai mai Peresitene Nelson, “I aso a sau, o le a le mafai ona ola ai faaleagaga e aunoa ma le taiala, taitaiga, faamafanafanaga, ma le faatosinaga mafanafana a le Agaga Paia.”¹³

Na fetalai mai le Alii, e faatatau i mala o le a ufitia ai le laueleele ma o le a faamaaa ai loto o le toatele, “O o’u soo o le a tutu i nofoaga paia, ma o le a le masii ese.”¹⁴

Ona sosoo ai lea ma lenei apoapo-aiga paia: “Aua tou te atuatuvaile, aua, a faataunuuna nei mea uma, o le a mafai ona outou iloa o le a faataunuuna folafolaga na fai atu ia te outou.”¹⁵

Tutu i nofoaga paia—aua le atuatuvaile—ma o le a faataunuuna folafolaga. Sei o tatou tagai taitasi i nei mea e faatatau i lo tatou fefefe.



Muamua, tutu i nofoaga paia. A tatou tutu i nofoaga paia—o tatou aiga amiotonu, o tatou faletatalo paia, malumalu faapaiaina—tatou te lagona le faatasi o le Agaga o le Alii ma i tatou. Tatou te maua tali i fesili o loo tatou atuatuvaile ai po o le filemu i le tau lava ina lafoaiese i latou. O le Agaga lena o loo galue. O nei nofoaga paia i le malo o le Atua i le lalolagi o loo valaau mai mo lo tatou migao, faaaloalo mo isi, o o tatou tagata silisili i le ola ai i le talalelei, ma o tatou faamoemoega e faataatiaese lo tatou fefe ma saili le mana faamalolo o Iesu Keriso e ala i Lana Togiola.

E leai se avanoa mo le fefe i nei nofoaga paia a le Atua po o i totonu o loto o Lana fanau. Aisea? Ona o le alofa. E alofa le Atua ia i tatou—e le aunoa—ma e tatou te alolofa ia te Ia. O lo tatou alolofa i le Atua e taofia ai le fefe, ma e faatumulia e Lona alofa nofoaga paia. Mafauafau i ai. Pe a tatou le mautonu i a tatou tautinoga i le Alii, pe a tatou se ese mai Lona ala e tau atu i le ola e faavavau, pe a tatou fesiligia pe masalosalo i lo tatou taua i Lana

mamanu faalelagi, pe a tatou faataga le fefe ia tatou lagonaina le—lotovaivai, ita, le fiafia, faanoanoa—e tuua e le Agaga i tatou, ma ua tatou aunoa ma le Alii. Afai e te iloa lena ituaiga o lagona, e te iloa lava e le o se lagona lelei. I se faatusatusaga, pe a tatou tutu i nofoaga paia, e mafai ona tatou lagonaina le alofa o le Atua, ma e “lafo ese e le alofa ua atoatoa le fefe uma.”¹⁶

O le folafolaga e sosoo ai o le “Aua le atuatuvaile.”¹⁷ Po o le a lava le tele o le amioleaga ma vevesiga ua faatumulia ai le lalolagi, ua folafola mai ia i tatou e ala i lo tatou faamaoni i aso taitasi ia Iesu Keriso le “[filemu] mai le Atua, o loo silisili lava i mea uma e manatu i ai.”¹⁸ Ma pe a afio mai Keriso i le mana ma le mamalu atoa, o le a muta le amioleaga, fouvale, ma faiga le tonu.

Na valoia e le Aposetolo o Paulo i aso ua tea o tatou taimi, ma fai atu i le taulealea o Timoteo:

“A e ia e iloa e oe lenei mea, o ona aso e gata ai e oo mai ai aso faigata.

“Aua e ave tagata ma e alolofa i latou ia i latou, o e mananao i tupe, o e loto vii, o e faamaualuga, o e upu



leaga, o e le faalogo i matua, o e le faafetai, o e amio leaga, . . .

“ . . . o e ua tele le manao i mea faafiafia a e leai se manao i le Atua.”¹⁹

Ia manatua, “e toatele ua ia te i tatou” i itu uma o le veli, i latou o e alofofa i le Alii ma o latou loto, mafaufau, manatu, ma le malosi atoa, “i e ua ia te i latou.”²⁰ Afai tatou te faalagolago atoa toa i le Alii ma Ona ala, afai tatou te punouai i Lana galuega, o le a tatou le fefefe i faiga a le lalolagi pe atuatuvaile ai foi. Ou te augani atu ia te outou ia tuuese faatosinaga ma uunaiga faalelalogagi ma saili le faaleagaga i lou olaga i aso taitasi. Fiafia i mea e fiafia i ai le Alii—lea e aofia ai Ana poloaiga, Lona maota paia, a tatou feagaiga paia ma Ia, o le faamanatuga i aso Sapati taitasi, o a tatou fesootaiga e ala atu i le tatalo—ma o le a e le atuatuvaile ai lava.

O le manatu mulimuli: faalagolago i le Alii ma Ana folafolaga. Ou te iloa o le a faataunuuna uma Ana folafolaga. Ou te iloa ma le mausali e pei ona ou tu atu iinei i o outou luma i lenei sauniga paia.

Ua faaaliga mai e le Alii: “Aua o i latou o e e popoto ma ua latou talia le upumoni, ma ua latou ave le Agaga Paia mo o latou taiala, ma sa lei faase-seina—e moni Ou te fai atu ia te outou, o le a lē tatuuina i latou i lalo ma lafo i le afi, ae o le a latou gafatia le aso.”²¹

O le mafuaaga lenei e le tatau ai ona tatou atuatuvaile i vevesi o nei aso, ia i latou o i le fale tele ma le ateatea, ia i latou o e tauemu i taumafaiga faamaoni ma auaunaga tuuto i le Alii o Iesu Keriso. O le manatu lelei, lototele, e oo lava i le alofa mama e sau mai le loto e le mamafa i ni faafitauli po o faalavelave. O Peresitene Nelson, o lē “manatu o le a lelei mea uma i le lumanai,” na faamanatu mai ia i tatou, “Afai e ao ona tatou maua se faamoemoe o le suesueina o le tele o manatu ma filosofia a tagata ia e osofaia le upumoni, e tatau ona tatou aoao e maua ia faaaliga.”²²

Ina ia maua se faaaliga patino, e tatau ona tatou tuu le faamuamua i le ola ai i le talalelei ma uunaia le faamaoni ma le faaleagaga i isi faapea ma i tatou foi.

O Spencer W. Kimball sa avea ma se tasi o perofeta i lo’u talavou. I nai tausaga nei ua mavae, ina ua uma ona valaauina o se Aposetolo, sa ou maua le filemu i lana savali muamua i le konafesi aoao ia Oketopa 1943. Sa lofituina o ia i lona valaauga; ou te iloa lena ituaiga lagona. Na saunoa Elder Kimball: “Sa ou mafaufau tele ma tatalo, ma anapogi ma tatalo. Sa i ai ni mafaufauga feteenai na osofaia lo’u mafaufau—o leo na foliga o fai mai: ‘E le mafai ona e faia le galuega. E te le agavaa. E le o i ai sou tomai’—ma e masani ona faaii i se manatu manumalo: ‘E tatau ona e faia le galuega ua atofaina—e tatau ona e faia oe lava ia mafai, agavaa, ma faaagavaaina.’ Ma na faaauau ai pea le fetauaiga.”²³

Ua faamallosia a’u mai lena moli-mau mama a’ia’i a lenei Aposetolo lea na avea ma Peresitene lona 12 o lenei Ekalesia malosi. Na ia iloina na tatau ona ia le amanaiaina lona fefe ina ia “faia le galuega ua atofaina atu” ma ua tatau ona ia faalagolago i le Alii mo le malosi ina ia “mafai ai, agavaa ma faaagavaaina” o ia lava. Tatou te mafaia foi. O le a faaauau pea ia taua, ae o le a tatou taulimaina i latou i le Agaga



o le Alii. O le a tatou “le atuatuvaale” aua a tatou tutu ma le Alii ma tutu atu mo Ana mataupu faavae ma Lana fuafuaga e faavavau, ua tatou tutu i laueleele paia.

Ia, ae a la lena afafine ma le atalii faaletulafono o e na tuuina mai se fesili faamaoni, vailiili ma taufaafefe i tausaga ua mavae? Sa la mafaufau mamafa lava i le matou talanoaga i lena po; sa la tatalo ma anapopogi ma oo ai i sa la’ua lava faaiuga. O le fiafia ma le olioli mo i la’ua ma mo i ma’ua, o matua matutua, ua faamanuiaina ai nei i la’ua i ni fanau aulelei e toafitu a o la agai atu i luma ma le faatuatua ma le alofa.

Ia faamalosii, uso e ma tuafafine. Ioe, ua tatou ola i taimi faigata, ae pe a tatou tumau ai i luga o le ala o feagaiga, e le tataua ona tatou fefefe. Ou te faamanuiaina outou a o outou faia, o le a outou le atuatuvaale i taimi ua tatou ola ai po o faafitauli e oo mai ia te outou. Ou te faamanuiaina outou ina ia filifili e tutu i nofoaga paia ma ia le masii ese. Ou te faamanuiaina outou ina ia talitonu i folafolaga a Iesu Keriso, o loo soifua o Ia, ma o loo Ia vaavaaia i tatou, popole mo i tatou, ma tu i o tatou autafa. I le suafa o lo tatou Alii ma le Faaola, o Iesu Keriso, amene. ■

FAAMATALAGA

1. Mareko 4:37.
2. 2 Tupu 6:14.
3. 2 Tupu 6:15.
4. 2 Tupu 6:16.
5. 2 Tupu 6:17.
6. Mataupu Faavae ma Feagaiga 68:6.
7. Mataupu Faavae ma Feagaiga 6:36.
8. Mataupu Faavae ma Feagaiga 6:34.
9. 2 Tupu 6:16.
10. Mataupu Faavae ma Feagaiga 6:34.
11. Mataupu Faavae ma Feagaiga 76:22.
12. Mataupu Faavae ma Feagaiga 20:77.
13. Russell M. Nelson, “Faaaliga mo le Ekalesia, Faaaliga mo o Tatou Olaga,” *Liahona*, Me 2018, 95.
14. Mataupu Faavae ma Feagaiga 45:32.
15. Mataupu Faavae ma Feagaiga 45:35.
16. Moronae 8:16.
17. Mataupu Faavae ma Feagaiga 45:35.
18. Filipi 4:7.
19. 2 Timoteo 3:1–2, 4.
20. 2 Tupu 6:16.
21. Mataupu Faavae ma Feagaiga 45:57.
22. Russell M. Nelson, “Faaaliga mo le Ekalesia, Faaaliga mo o Tatou Olaga,” 93–96.
23. Spencer W. Kimball, i le Conference Report, Oct. 1943, 16–17.



Saunia e Elder David A. Bednar

○ Le Korama a Aposetolo e Toasefululua


Faapotopoto Faatasi Mea Uma ia Tasi ia Keriso

O le mana o le talalelei a le Faaola e suia ma faamanuia ai i tatou e tafe mai i le iloaitino ma le faaaogaina o fesootaiga o ana aoaoga faavae, mataupu faavae, ma faiga masani.

O le maea o se meafaigaluega taua lea ua masani ai i tatou uma. O maea e fai mai fasi manoa o filo, laau, uaea, po o isi mea e milo taitasi pe fili faatasi. O le mea e mata’ina ai, o elemene atonu e le tulagaese e mafai ona lalaga faatasi ma oo ai ina tulagaese le malolosi. O lea, o le faafesootaiina ma le fusia mataalia o ni mea masani e mafai ona gaosi mai ai se meafaigaluega tulagaese.

E pei lava o se maea e maua mai lona malosiaga mai le tele o fasi manoa taitasi e milo faatasi, e faapena foi ona tuuina atu e le talalelei a Iesu Keriso le vaaiga silisili o le upumoni ma ofo atu ai faamanuiaga silisili a’o tatou faalogo atu i le apoapoaiga a Paulo “ina ia [faapotopoto faatasi mea uma ia tasi] ia Keriso, o i latou uma lava o i le lagi, atoa ma i latou o i le lalolagi; [e oo ia te ia lava].”¹ O le mea taua, o lenei faapotopotoina taua o le upumoni e totonugalemu ma taulai atu i le Alii o Iesu Keriso ona o Ia “o le ala, o le upumoni, ma le ola.”²

Ou te tatalo ia faamalamalamaina e le Agaga Paia i tatou taitoatasi a o tatou iloiloiloina le auala e faaaoga ai le mataupu faavae o le [faapotopoto faatasi mea uma ia tasi] ia Keriso i ni auala moni e aoao ma ola ai i Lana talalelei toefuataiina i o tatou olaga i aso taitasi.





O Se Vaitau o Faaaliga

Ua tatou ola i se vaitau ofoofogia o faaaliga o le Ekalesia toefuataiina a Iesu Keriso. O le fetuunaiga faasolopito na faasilasilaina i le asō e na o le tasi lava le faamoemoega autu: ia faamalosia le faatuatua i le Tama Faalelagi ma Lana fuafuaga ma i Lona Alo o Iesu Keriso ma Lana Togiola. O le faatulagaga o sauniga i Aso Sa sa le na o le faapuupuuina. Ae, ua tatou maua nei ni avanoa ma tiutetauave faateleina o ni tagata taitoatasi ma aiga e faaoga ai o tatou taimi mo le faaleleia o le Sapati o se aso fiafia i le aiga ma i le ekalesia.

Ia Aperila talu ai, o le faatulagaga faalefaalapotopotoga o korama o le perisitua sa le'i suia moni. Ae, o le faamamafa ma le malosiaga na tuu atu i se ala maua atu ma paia atu o le auaunaga i o tatou uso ma tuafafine.

E pei lava o fasi manoa ua fili faatasi o se maea e maua ai se mea faigaluega malosi ma anagata, o nei faatinoga fesootai uma o se vaega o se taumafaiga tuu faatasi ia faaogatusa atili ai le taulaiga, punaoa, ma le galuega a le Ekalesia toefuataiina a le Faaola faatasi

ma lana misiona autu: ia fesoasoani i le Atua i Lana galuega e faataunuu le faaolataga ma le faaega o Lana fanau. Faamolemole aua ne'i tulaia atu i vaaiga o le faatulagaga o mea ua faasilasila atu. E le tatau ona tatou faatagaina auiliiliga o faiga faatulagaina e faalavelave ai i mafuaaga autu faaleagaga ua faia e nei suiga i le taimi nei.

O lo matou manao ia faateleina le faatuatua i le fuafuaga a le Tama ma i le misiona togiola a le Faaola i le lalolagi ma ia faamautuina le feagaiga e faavavau a le Atua.³ E na o le pau lava o tatou faamoemoega ia faafaigofieina le liua faifai pea i le Alii ma ia alolofa atili ma le atoatoa ma auauna atu ma le mataalia atili i o tatou uso ma tuafafine.

Tuuvaegaina ma Tuueseeseina

O nisi taimi i le avea ai ma tagata o le Ekalesia tatou te tuuvaega, tuueseese, ma faaoga le talalelei i o tatou olaga e ala i le fatuina o ni lisi uumi o autu taitasi e suesue ma galuega e faataunuu. Ae o se auala faapena e ono mafai ona tapulaa ai lo tatou malamalama ma le vaaiga mamao. E tatau

ona tatou faateete ona o le taulaiga faafaesaisa i lisi o mea e fai e mafai ona tatou se ese ai mai le faalatalatala atili atu i le Alii.

O le faamoemoega ma le faamamāāga, o le fiafia ma le olioli, ma le liua faifai pea ma le puipuiga e sau mai le “tuu atu o o [tatou] loto i le Atua”⁴ ma o le “[mauaina] o ona foliga i o [tatou] mata”⁵ e le mafai ona maua i le na ona faatinoina ma le kolosi ese o mea uma faaleagaga sa tatau ona tatou faia. Ae, o le mana o le talalelei a le Faaola e suia ma faamanuia ai tatou e tafe mai le iloaitino ma le faaogaina o fesootaiga o ana aoaoga faavae, mataupu faavae, ma faiga masani. Ua na o lo tatou *faapotopoto faatasi o mea uma ia tasi ia Keriso*, faatasi ma se taulaiga mausali ia te Ia, e mafai ai e upumoni o le talalelei ona galulue faatasi e faamalosia i tatou ia avea ma tagata e finagalo le Atua e avea ai i tatou⁶ ma tumau ai ma le lototoa e oo i le iuga.⁷

Aoaoina ma le Faafesootaiina o Upumoni o le Talalelei

O le talalelei a Iesu Keriso o se ie lalaga o ata felanulanui o le upumoni “ua faavaaina lelei”⁸ ma lalaga faatasi. A o tatou aoa ma faafesootai faatasi ia upumoni faaaliga o le talalelei, e faamauina i tatou e maua vaaiga taua ma le malosiaga faateleina faaleagaga e ala i mata e mafai ona vaai i faatosinaga a le Alii i o tatou olaga ma taliga e mafai ona lagonaina Lona siufofoga.⁹ Ma o le mataupu faavae o le *faapotopoto faatasi ia tasi—ia te Ia* e mafai ona fesoasoani ia i tatou i le suiga o lisi masani o mea e fai i se vaega atoa tuu faatasi, ma fusia faatasi atoatoa. Se'i o'u tuu atu se faataitaiga faaleaoga faavae ma faale-Ekalesia o le mea ua ou fautuaina atu.

Faataitaiga 1. O le mataupu faavae o le faatuatua lona fa o se tasi o faataitaiga silisili o le faapotopotoina faatasi o mea uma ia tasi ia Keriso: “Matou te talitonu o uluai mataupu autu ma sauniga nei o le Talalelei: muamua, Faatuatua i le Alii o Iesu Keriso; o lona lua, Salamo; o lona tolu, Papatisoga e ala i le faatofuina mo le faamagaloga o agasala; o lona fa, Faaega o lima mo le meaalofo o le Agaga Paia.”¹⁰

O le faatuatua moni e taulai atu i le Alii o Iesu Keriso—ia te Ia o le Alo paia ma le Toatasi na Fanaua e le Tama ma ia te Ia ma le misiona togiola na Ia faataunuaina. “Ona ua uma ona tali e ia iuga o le tulafono, ma ua ia i latou uma o e ua faatuatua ia te ia; ma o i latou o e ua faatuatua ia te ia o le a latou piimau i mea lelei uma; o le mea lea ua fautuaina ai e ia le faamoemoe o le fanauga a tagata.”¹¹ O le faatinoina o le faatuaua ia Keriso o le *faatutuaina* ma le tuu lea o lo tatou talitonuga maumaututu ia te Ia o lo tatou Faaola, i Lona suafa, ma i Ana folafolaga.

O le taunuuga masani lava ma le muamua o le faatuatua o le Faaola o le salamo ma le liliu ese lea mai le leaga. A tatou faatinoina le faatuatua i le Alii, e otometi lava lo tatou liliu mai, o mai, ma faalagolago ia te Ia. O lea, o le salamo o le *faatutuaina* ma le *faalagolago* atu lea i le Togiola e faia mo i tatou mea e le mafai ona tatou faia

mo i tatou lava ia. O tatou taitoatasi e tatau ona “[*faalagolago*] atoa i galuega a ia o lē ua malosi aoao e laveai”¹² auā ua na o le “ala atu i galuega, ma le alofa mutimutivale, ma le alofa tunoa o le Mesia Paia”¹³ e mafai ai ona avea i tatou ma tagata fou ia Keriso¹⁴ ma mulimuli ane toefoi atu ai ma nonofo i le afioaga o le Atua.

O le sauniga o le papatisoga e ala i le faatofu mo le faamagaloga o agasala e manaomia ai ona tatou *faatutuaina* o Ia, *faalagolago* ia te Ia, ma *mulimuli* ia te Ia. Na folafola mai e Nifae, “Ua Ou iloa afai tou te *mulimuli i le Alo* ma le faamoemoe atoa o le loto, ma lē faia se pepelo ma se faa’ole’ole i luma o le Atua, ae ma le manatu tonu i ai, ma salamo ia outou agasala, ma molimau atu i le Tamā ua outou loto e ave i o outou luga le suafa o Keriso, i le papatisoga—ioe, i le *mulimuli atu lea i lo outou Alii ma lo outou Faaola* i lalo i totonu o le vai, e tusa ma lana afioga, faauta, ona outou maua lea o le Agaga

Paia; ioe, ona oo mai ai lea o le papatisoga i le afi ma le Agaga Paia.”¹⁵

O le sauniga o le faaee atu o lima mo le meaalofo o le Agaga Paia e manaomia ai i tatou ona *faatutuaina* o Ia, *faalagolago* ia te Ia, *mulimuli* ia te Ia, ma *fetaomi atu i luma* ia te Ia faatasi ai ma le fesoasoaniga a Lona Agaga Paia. Ma sa tautino mai Nifae, “Ma o lenei . . . ua ou iloa i lenei mea vagana ai ua tumau le tagata sei oo i le iuga, i le mulimuli lea i le faataitaiga a le Alo o le Atua soifua, e lē mafai ona faaolaina o ia.”¹⁶

Ua le na ona faailoina mai e le mataupu faavae o le faatuatua lona fa o mataupu faavae atu ma sauniga o le talalelei toefuataina. Ae, o lenei faamatalaga musuia o talitonuga ua faapotopoto faatasi ai mea uma ia tasi ia Keriso: *faatutuaina* o Ia, *faalagolago* ia te Ia, *mulimuli* ia te Ia, ma le *fetaomi atu i luma* faatasi ma Ia—ia te Ia.

Faataitaiga 2. Ou te fia faamatala atu nei pe faapefea ona faapotopoto faatasi polokalama uma ma galuega ta’imua a le Ekalesia ia tasi ia Keriso. E tele mau faataitaiga e mafai ona tuu atu; ae o le a ou faaogaina na o ni nai mea ua filifilia.

I le 1978, sa faatonuina ai e Peresitene Spencer W. Kimball tagata o le Ekalesia ia atiae le malosiaiga o Siona i le lalolagi atoa. Sa ia fautuaina le Au Paia ia nonofo pea i o latou lava atunuu moni ma atiae ai ni siteki malosia e ala i le faapotopotoina o le aiga o le Atua ma aoao i latou i ala o le Alii. Sa ia toe faailoa mai foi o le a fausiaina nisi malumalu ma folafola mai faamamamuiaga mo le Au Paia po o fea lava o nonofo ai i le lalolagi.¹⁷

A o faateleina ai le aofai o siteki, sa faateteleina le manaoga mo aiga o le au paia ia “avea ma [nofoaga] e [fiafia] tagata o le aiga e mafuta ai, lea e [mafai] ona latou faamauoaina ai o latou olaga ma maua ai le alofa, lagolago, talisapaia ma le faamalosiuga e tasi.”¹⁸ I se tau-nuuga, i le 1980, sa tuufaatasia ai sauniga o le Aso Sa i se poloka tolu-itula e “faamamafaina ai tiutetauave o le tagata lava ia ma le aiga mo le aoaoina, ola ai, ma le aoaoina atu o le talalelei.”¹⁹ O lenei faamamafa i le aiga ma le auaga





sa toe faamautuina i le “O Le Aiga: O Se Folafolaga i le Lalolagi,” lea na faalauiloa mai e Peresitene Gordon B. Hinckley i le 1995.²⁰

Ia Aperila o le 1998, sa faasila-sila mai ai e Peresitene Hinckley le fausiaina o le tele o malumalu laiti, lea e aumaia sauniga paia o le maota o le Alii faalatalata i tagata taitoatasi ma aiga o le Au Paia o Aso e Gata Ai i le lalolagi atoa.²¹ Ma o nei avanoa ua faaleleia mo le tuputupu ae ma le atinaega faaleagaga sa matua faaleleia e le faatelega o polokalama e fesootai ma le ola-tutoatasi faaletino e ala i le faalauiloaga o le Tupe Faaagaga mo A’oga i le 2001.²²

I le taimi o lana pulega, sa fautua mai pea Peresitene Thomas S. Monson i le Au Paia ia o atu “i le laveai” ma faamamafa mai le tausiga o ē matitiva ma lē tagolima o se tasi o tiutetauave a le Ekalesia na tofia mai le lagi. I le faaauau ai o le faamamafa i sauniuniga faaletino, sa faatinoina ai le ta’imua o Auaunaga o le Ola-Tutoatasi i le 2012.

I le aluga o nai tausaga ua mavae, o mataupu faavae taua e uiga i le faia o le aso Sapati o se aso fiafia i le aiga ma le ekalesia ua toe faamamafaina ma toe faamalosi,²³ o lea ua saunia ai tatou mo faasologa o sauniga o le Aso Sa ua faasilasilaina i lenei sauniga o le konafesi aoao.

Ae i le ono masina talu ai, sa faamalosi ai ma faaogatusa atili ma

le mataalia korama o le Perisitua Mekisateko ma ausilali ia faataunuu se auala maua-luga atu ma paia atu i le auaunaga.

Ou te talitonu o le faasologa ma le taimi o nei faatinoga i le tele o tausaga e mafai ona fesoasoani ia i tatou e iloa ai le galuega tuufaatasi ma le atoa-toa ae le na o se soloā’iga o galuega ta’imua tuma’oti ma tuumavaevae. “Ua faaalai mai e le Atua se mamana o le alualu i luma faaleagaga mo tagata taitoatasi ma aiga e ala i sauniga, aoaoga, polokalama, ma gaoioiga ia e **faaogatotonuina i le aiga ma lagolagoina e le Ekalesia**. Ua i ai faalapopotoga ma polokalama a le Ekalesia ina ia faamanuiaina ai tagata taitoatasi ma aiga ae ua le na ona faia ma muta ai ia i latou lava.”²⁴

Ou te tatolo ina ia tatou iloina le galuega a le Alii o le galuega sili e tasi i le lalolagi atoa ua atili taulai atu pea i le aiga ma lagolagoina e le Ekalesia. Ou te iloa ma molimau atu o loo faaali mai e le Alii ma o le a faaali mai pea le tele o mea sili-sili ma le taua tau i le Malo o le Atua.”²⁵

Folafolaga ma le Molimau

Sa amata atu la’u savali i le faamamafaina o le malosiaga lea e fatuina e fasi manoa o anomea ia e milo faatasi pe fili faatasi i se maea. I se ala talitutusa, ou te folafola atu o le a manino le faateleina o le vaaiga, faamoemoega, ma le mana i la tatou aoaoga ma le ola ai i le talalelei toefuataina a Iesu Keriso

a o tatou tauivi ai e faapotopoto faatasi mea uma ia tasi ia Keriso.

O avanoa ma faamanuiaga uma o taunuuga e faavavau e pogai mai, ma e mafai ma i ai le faamoemoega ona o le [Alii], ma tumau ai e ala i le Alii o Iesu Keriso. E pei ona molimau mai Alema: “Ua leai se isi ala po o ni auala e mafai ona faaolaina ai le tagata, ua nao Keriso. Faauta, o ia o le ola ma le malamalama o le lalolagi.”²⁶

Ou te tautino atu ma le olioli la’u molimau e uiga i le paia ma le moni a’ia’i o le Tama Faavavau ma Lona Alo pele, o Iesu Keriso. I lo tatou Faaola, tatou te maua ai le olioli. Ma ia te Ia tatou te maua ai le faamautinoaga o le “filemu i le lalolagi lenei, ma le ola e faavavau i le lalolagi a sau.”²⁷ Ou te molimau atu ai i le suafa paia o le Alii o Iesu Keriso, amene. ■

FAAMATALAGA

1. Efeso 1:10.
2. Ioane 14:6.
3. Tagai i le Mataupu Faavae ma Feagaiga 1:21–22.
4. Helamana 3:35.
5. Alema 5:14.
6. Tagai i le Mataio 5:48; 3 Nifae 12:48.
7. Tagai i le Mataupu Faavae ma Feagaiga 121:29.
8. Efeso 2:21.
9. Tagai i le Mataupu Faavae ma Feagaiga 136:32.
10. Mataupu Faavae o le Faatuatua 1:4.
11. Moronea 7:28.
12. 2 Nifae 31:19.
13. 2 Nifae 2:8.
14. Tagai i le 2 Korinito 5:17.
15. 2 Nifae 31:13; faapoopo le faamamafa.
16. 2 Nifae 31:16.
17. Tagai i le Spencer W. Kimball, “The Fruit of Our Welfare Services Labors,” *Ensign*, Nov. 1978, 76.
18. Faatonuga mo au peresitene o siteki ma au epikopi, i le “Church Consolidates Meeting Schedules,” *Ensign*, Mar. 1980, 73.
19. Faatonuga, i le “Church Consolidates Meeting Schedules,” 73.
20. Tagai i le “O Le Aiga: O Se Folafolaga i le Lalolagi,” *Liahona*, Me 2017, 145.
21. Tagai i le Gordon B. Hinckley, “O Malumalu Fou Ina ia Maua Ai ‘Faamanuiaga Tumutumu’ o le Talalelei,” *Liahona*, Iul. 1998, 87.
22. Tagai i le Gordon B. Hinckley, “O Le Tupe Faaagaga mo A’oga,” *Liahona*, Iulai 2001, 60–62, 67.
23. Tagai i le Russell M. Nelson, “O Le Aso Sapati o Se Aso Fiafia,” *Liahona*, Me 2015, 129–32.
24. *Tusitaulima 2: Taitaiina o le Ekalesia* (2010), 1:4; faapoopo le faamamafa.
25. Mataupu Faavae o le Faatuatua 1:9.
26. Alema 38:9.
27. Mataupu Faavae ma Feagaiga 59:23.



Saunia e Peresitene Dallin H. Oaks
Fesoasoani Muamua i le Au Peresitene Sili

Upumoni ma le Fuafuaga

A tatou saili i upumoni e uiga i tapuaiga, e tatau ona tatou faaaogaina metotia faaleagaga talafeagai mo lena sailiga.

Ua faauigaina e faaaliga o nei ona po le upumoni o le “iloa lea o mea e pei ona i ai, ma e pei ona sa i ai, ma e pei ona o le a oo mai” (Mataupu Faavae ma Feagaiga 93:24). O se faauigaga tonu lena mo le ata o le faaolataga ma le “O Le Aiga: O Se Folafolaga i le Lalolagi.”

O loo tatou ola i se taimi o faamatalaga o fesoootaiga ua matua faateteleina. Ae e le o faamatalaga uma nei e moni. E tatau ona tatou faaeteete ao tatou saili i le upumoni ma filifili ni punavai mo lena sailiga. E le tatau ona tatou mafau-fau i le lauiloa po o le pule faalelalolagi o ni punavai agavaa o upumoni. E tatau ona tatou faaeteete e uiga i le faalagolago atu i faamatalaga po o fautuaga e ofo mai e tagata lauiloa, tagata afeleti ta’uta’ua, po o punavai faalilolilo o le initoneti. O le tomai faapitoa i le tasi matata e le tatau ona avea o se tomai faapitoa i le upumoni i isi mataupu.

E tatau foi ona tatou faaeteete e uiga i uunaiga a le tagata o loo aumaia le faamatalaga. O le mafuaaga lena ua lapatai mai ai tusitusiga paia ia i tatou e faasaga i le faitaulaga pepelo (tagai i le 2 Nifae 26:29). Afai e faalilolilo pe lemailoa le punavai, e mafai foi la ona masalomia le faamatalaga.

O a tatou faaiuga faaletagata lava ia e tatau ona fua i faamatalaga mai punavai ua agavaa i le mataupu ma saoloto mai mea sese e mafai ona tupu mai uunaiga faaloloto.

I.

A tatou saili i upumoni e uiga i tapuaiga, e tatau ona tatou faaaogaina metotia faaleagaga talafeagai mo lena

sailiga: tatalo, o le molimau a le Agaga Paia, ma le suesueina o tusitusiga paia ma upu a perofeta o aso nei. Ou te faanoanoa lava i taimi uma pe a ou faalogo i se tasi ua lafoaia lona faatuatua faaletapuaiga ona o aoaoga faalelalolagi. O i latou o e na maua muamua se vaaiga faaleagaga e mafai ona mafatia mai le faaoo ia te ia lava o le tauaso faaleagaga. E pei ona ta’ua e Peresitene Henry B. Eyring, “O le latou faafitauli e le o taoto i mea latou te manatu o latou vaai i ai; ae o loo taoto i mea e le o mafai ona latou vaai i ai.”¹

O metotia faasaienisi e taitai atu ai tatou i mea ua tatou ta’ua o upumoni faasaienitisi. Ae o le “upumoni faasaienitisi” e le o le olaga atoa lea. O i latou e le aoao “e ala i le suesue ma le faatuatua foi” (Mataupu Faavae ma Feagaiga 88:118) e tapulaa lo latou malamalamaaga e uiga i upumoni i mea e mafai ona latou faamaonia i auala faasaienitisi. E tuu e lena mea ni tapulaa sese i le sailiga o le upumoni.

Sa saunoa Peresitene James E. Faust: “O i latou ua [papatisoia] latou te tuuina o latou agaga e faavavau i le lamatia e ala i le saili ma le le faaeteete na o punavai faalelalolagi o le aoaoina. Tatou te talitonu o Le Ekalesia a Iesu Keriso o le Au Paia o Aso e Gata Ai ua i ai le atoaga o le talalelei a Keriso, o le talalelei lava lea o le ute o le upumoni ma le malamalama e faavavau.”²





Ua tatou maua le olioli moni ma le tumau e ala i le iloina ma le faatinoina o upumoni e uiga ia i tatou lava, o le uiga o le olaga faaletino, ma le mea tatou te o i ai pe a tatou feoti. O na upumoni e le mafai ona aoaoina e ala i metotia faasaienitisi pe faalelalolagi.

II.

O le a ou talanoa atu nei e uiga i upumoni o le talalelei toefuataiina ia e taua i le aoaoga faavae o Le Ekalesia a Iesu Keriso o le Au Paia o Aso e Gata Ai. Faamolemole ia iloilo ina nei upumoni ma le faateete. O loo faamalamalama atu ai le tele o la tatou aoaoga faavae ma faiga masani, masalo e aofia ai nisi o mea e lei malamalama lava i ai.

O loo i ai se Atua, o le Tama alofa o agaga o tagata uma o e ua soifua pe o le a soifua.

O le itupa e faavavau. Ae tatou te lei fananau mai i lenei lalolagi, sa tatou ola uma o ni agaga tane po o fafine i le afioaga o le Atua.

O lea faato'a mae'a ona tatou faalogologo atu i le Aufaipese a le Tapeneko i le Lotoa o le Malumalu na usuina le pese "O Le a Ou Mulimuli i le Fuafuaga a le Atua."³ O le fuafuaga lena sa faatuina e le Atua ia mafai ai e Ana fanau agaga uma ona alualu i luma e faavavau. O lena fuafuaga e taua tele ia i tatou taitoatasi.

I lalo o lena fuafuaga, na foafoa ai e le Atua lenei lalolagi e avea o se nofoaga lea e mafai ai e Ana fanau agaga faapelepele ona fananau mai i le olaga nei ina ia mauaina se tino faitino

ma maua se avanoa mo le alualu i luma faaleagaga e ala i le faia o ni filifiliga amiotonu.

Ina ia anoa, o filifiliga faaletino e ao ona faia i le va o malosiaga faatautava o le lelei ma le leaga. Sa tataua ona i ai le faafeagai ma, o le mea lea, sa faatagaina ai le fili, o le sa tuliese i fafo ona o le fouvale, ina ia faaosooso fanau a le Atua e tetee i le fuafuaga a le Atua.

O le faamoemoega o le fuafuaga a le Atua o le tuu atu lea o le avanoa i Lana fanau e filifili ai le ola e faavavau. E na o le pau le mea e ausia ai lenei mea o aafiaga ia faaletino ma, pe a mavae le oti, e ala i le tuputupu ae i le lalolagi o agaga.

I le malaga o le olaga faaletino, o le a tatou elelea uma i le agasala ao tatou gauai atu i faaosoosoga leaga a le fili, ma o le a iu ina tatou feoti. Na tatou taliaina na faigata i le faalagolago atu i luga o le faamautinoaga o le fuafuaga lea o le a saunia ai e le Atua lo tatou Tama se Faaola, Lona Alo e Toatasi na Fanaua, o le a laveaiina i tatou e ala i se toetu mo tagata uma i se soifuaga mamalu i le mavae o le oti. O le a saunia foi e le Faaola se togiola e totogi ai le tau mo tagata uma ina ia faamamaina mai agasala e tusa ma tuutuuga Na te faia. O na tuutuuga e aofia ai le faatuatua ia Keriso, salamo, papatisoga, meaalofo o le Agaga Paia, ma isi sauniga e faatinoina e le pule o le perisitua.

O le fuafuaga sili o le fiafia a le Atua e maua ai se paleni atoatoa i le va o le faamasino tonu e faavavau ma le alofa

mutimutivale e mafai ona tatou maua e ala i le Togiola a Iesu Keriso. E mafai ai foi e i tatou ona suia i ni tagata fou ia Keriso.

E aapa mai se Atua alofa ia i tatou taitoatasi. Ua tatou iloa e ala i Lona alofa ma ona o le Togiola a Lona Alo e Toatasi na Fanaua, "e mafai ai ona faaolaina *tagata uma* e ala i le usiusitai i tulafono ma sauniga o [Lana] Talalelei" (Mataupu Faavae o le Faatuatua 1:3; faaopoopo le faamamafa).

O Le Ekalesia a Iesu Keriso o le Au Paia o Aso e Gata Ai o le Ekalesia ua lauiloa lelei o se Ekalesia e totonugalemu i aiga. Ae o le mea e le o malamalama lelei, o lo tatou totonugalemu i aiga o loo taulai sili atu i mafutaga faaletino. O sootaga e faavavau e taua tele foi i lo tatou faatuatua. "O le aiga ua faauuina e le Atua."⁴ I lalo o le fuafuaga sili a lo tatou Foafoa alofa, o le misiona a Lana Ekalesia toefuataiina o le fesoasoani lea i fanau a le Atua ia ausia le faaeaga i le malo selesitila, lea na o le faaipoipoga e faavavau i le va o se alii ma se tamaitai e mafai ona ausia ai (tagai Mataupu Faavae ma Feagaiga 131:1-3). Matou te faamautu atu o aoaoga a le Alii e faapea "o le itupa o se uiga taua lea o le faasinomaga patino o le muai olaga, olaga faaletino ma le faavavau ma le faamoemoega" ma o le "faaipoipoga i le va o le alii ma le tamaitai e taua i Lana fuafuaga e faavavau."⁵

Ma le mea mulimuli, o le alofa o le Atua e matua silisili lava lea na Ia saunia ai se taunuuga o le mamalu mo Ana fanau uma, vagana ai nisi toalaiti na loto lava e avea ma atalii o le malaia. "O Ana fanau uma" e aofia ai ma i latou uma o e ua maliliu. Tatou te faia sauniga mo i latou e ala i le fai ma sui i totonu o a tatou malumalu. O le faamoemoega o le Ekalesia a Iesu Keriso o le faaagavaaina lea o Ana fanau mo le tikeri sili ona maua luga o le mamalu, o le faaeaga po o le ola e faavavau lea. Mo i latou e le mananao i ai pe le agavaa foi mo lena mea, ua saunia e le Atua isi malo o mamalu, e ui e maua lalalo ifo.

Soo se tasi e malamalama i nei upumoni e faavavau e mafai ona malamalama pe aisea o i tatou o tagata o

Le Ekalesia a Iesu Keriso o le Au Paia o Aso e Gata Ai ona mafaua e pei ona tatou mafaua ai ma fai e pei ona tatou faia.

III.

O le a ou ta'ua nei nisi o faatatau a nei upumoni e faavavau, ia e na o le fuafuaga a le Atua e mafai ona malamalama i ai.

Muamua, tatou te faamamaluina le faitalia o le tagata. E toatele ua silafiaina taumafaiga maoae a le Ekalesia e siitia ai le saolotoga faaletapuaiga i le Iunaite Setete ma le lalolagi atoa. O nei taumafaiga e le siitia ai na o mea tatou te fiafia i ai, ae e tusa ma Lana fuafuaga, e saili e fesoasoani atu i fanau uma a le Atua ia olioli i le saolotoga e filifili ai.

Lua, o i tatou o se nuu o faifeautalai. O nisi taimi e fesiligia ai i tatou pe aisea tatou te auina atu ai faifeautalai i le tele o malo, e oo lava i nuu o Tagata Kerisiano. Tatou te maua foi lea lava fesili e tasi e uiga i le mafuaaga tatou te foai atu ai le tele o miliona talā o fesoasoaniga alofa i tagata e le o ni tagata o le tatou Ekalesia ma le mafuaaga tatou te le faafesootaia ai lenei fesoasoaniga i a tatou taumafaiga faafaifeautalai. Tatou te faia lenei mea ona tatou te mafaua o tagata uma o fanau a le Atua—o o tatou uso ma tuafafine—ma e tatou te manao e faasoa atu o tatou faamanuiaga faaleagaga ma faaletino i tagata uma.

Tohu, e paia le olaga faaletino ia i tatou. O lo tatou tuuto atu i le fuafuaga a le Atua e manaomia ai ona tatou tetee atu i le faapa'u pepe ma le faamuta o le soifua o se gasegase ua leai se togafitiga.

Fa, o nisi ua faaatuatuvaletino e nisi o a tatou tulaga faale-Ekalesia i faaipoipoga ma fanau. O lo tatou malamalama e uiga i le fuafuaga faaaliga o le faaolataga a le Atua ua manaomia ai lo tatou tetee i tulaga faagafesootai ma uunaiga faaletulafono o i ai nei e o ese ai mai faaipoipoga masani ma faia ni suiga ia e fenumia ai pe suia ai le itupa pe tafieseai ai le eseesea i le va o le tane ma le fafine. Ua tatou iloa o sootaga, faasinomaga, ma matafaioi o alii ma tamaitai e taua i le faataunuuna o le fuafuaga sili a le Atua.



Lima, e i ai foi se tatou malamalama tulagaese e uiga i fanau. Tatou te vaai atu i le fanauina ma le tausina o fanau o se vaega o le fuafuaga a le Atua ma o se tiute fiafia ma le paia a i latou o e ua tuuina atu i ai le mana e faaoga ai. I la tatou vaaiga, o oa silisili o le lalolagi ma le lagi o a tatou fanau ma ē tutupu mai ia i tatou i le lumanai. O le mea lea, e tatau ona tatou aoao atu ma puipuia mataupu faavae ma faiga masani ia e maua ai tulaga silisili mo le atinaega ma le fiafia o fanau—fanau uma.

Ma le mulimuli, o i tatou o se fanau faapelepele a se Tama Faalelagi, na aoaoina i tatou o le tulaga tane ma le tulaga fafine, faaipoipoga i le va o se alii ma se tamaitai, ma le fanauina ma le faafaileleina o fanau e taua uma i Lana fuafuaga sili o le fiafia. O o tatou tulaga i nei mea faavae ua tele ina tupu mai ai feteenaiga i le Ekalesia. Tatou te manatu i ai o ni mea e le maalofia. O le faafeagai o se vaega o le fuafuaga, ma o fouvalega aupito sili ona malolosi a Satani ua faasaga tonu lea i soo se mea e silisili ona taua i le fuafuaga a le Atua. Ua ia saili e faaumatia le galuega a le Atua. O ana metotia atu o le faaleagaina lea o le Faaola ma Lana pule

paia, e tafieseai aafiaga o le Togiola a Iesu Keriso, ia faavaivaia le salamo, ia faaseseina faaaliga, ma ia feteenai ma le tali atu o le tagata lava ia mo ia lava. O loo ia saili foi e faafenumia ia itupa, ia faaleaga le faaipoipoga, ma ia faavaivaia le fanauina o fanau—aemaise lava e matua o le a tasi ae fanau i le upumoni.

IV.

O loo agai pea i luma le galuega a le Alii e ui i fouvalega ua faatulagaina ma faifai pea o loo tatou fetaiai ai a o tatou tauivi e faataitai ia aoaoga a le Ekalesia a Iesu Keriso o le Au Paia o Aso e Gata Ai. Mo i latou ua faavaivaia i fouvalega, ou te ofo atu ni fautuaga nei.

Ia manatua le mataupu faavae o le salamo ua mafai ona maua e ala i le mana o le Togiola a Iesu Keriso. E pei ona ta'ua ai e Elder Neal A. Maxwell, aua ne'i faatasi ma i latou “o e taumafai e sui le Ekalesia nai lo le suia o i latou lava ia.”⁶

E pei ona uunaia mai e Elder Jeffrey R. Holland:

“Pipiimau i mea ua uma ona outou iloa ma tutu malosi seia oo ina oo mai le malamalama sili atu. . . .

“... I lenei Ekalesia, o le mea ua tatou iloa o le a sili atu ona taua i taimi uma nai lo mea tatou te le o iloa.”⁷

Ia faatino le faatuatua i le Alii o Iesu Keriso, o le uluai mataupu faavae lea o le talalelei.

Ma le mulimuli, saili se fesoasoani. E alolofa o tatou taitai ia te oe ma saili atu i le taitaiga faaleagaga e fesoasoani ai ia te oe. Matou te saunia le tele o punaoa e pei o [punaoa] o le a e maua e ala mai i le LDS.org ma isi lagolago mo le suesueina o le talalelei i le aiga. Ua i ai foi o tatou uso ma tuafafine o auaunaga ua valaauina e tuu atu fesoasoaniga alofa.

E finagalo lo tatou Tama Faalelagi alofa ia maua e Lana fanau le olioli aua o le faamoemoega lena o lo tatou foafoaga. O lena taunuuga fiafia o le ola e faavavau, lea e mafai ona tatou mauaina e ala i le fetaomi atu i luma ma le tumau i le mea ua tele ina ta’ua e lo tatou perofeta, o Peresitene Russell M. Nelson, o “ala o feagaiga.” O lana saunoaga lena i lana uluai savali i le avea ai ma Peresitene o le Ekalesia, “Ia tumau i luga o le ala o feagaiga. O lo outou tuuto e mulimuli i le Faaola e ala i le osia o feagaiga ma ia ona tausia lea o na feagaiga, o le a matala ai le faitotoa i faamanuiaga uma faaleagaga ma avanoa e maua e alii, tamaitai, ma fanau i soo se mea.”⁸

Ou te molimau faamaoni atu o mea na ou fai atu ai e moni, ma e mafai ona faia e ala i aoaoga ma le Togiola a Iesu Keriso, o le na te faia mea uma i lalo o le fuafuaga sili a le Atua, lo tatou Tama Faavavau. I le suafa, o Iesu Keriso, amene. ■

FAAMATALAGA

1. Henry B. Eyring, *To Draw Closer to God: A Collection of Discourses* (1997), 143.
2. James E. Faust, “The Abundant Life,” *Ensign*, Nov. 1985, 9.
3. “O Le a Ou Mulimuli i le Fuafuaga a le Atua” *Tusipese a Tamaiti*, 86–87.
4. “O Le Aiga: O se Folafolaga i le Lalolagi,” *Liahona*, Me 2017, 145.
5. “O Le Aiga: O se Folafolaga i le Lalolagi,” 129.
6. Neal A. Maxwell, *If Thou Endure It Well* (1996), 101.
7. Jeffrey R. Holland, “Le Alii e, Ua Ou Faatuatua,” *Liahona*, Me 2013, 94; faamamafa i le uluai tusiga.
8. Russell M. Nelson, “A’o Tatou Agai Faatasi Atu i Luma,” *Liahona*, Ape. 2018, 7.



Saunia e Peresitene Henry B. Eyring
Fesoasoani Lua i le Au Peresitene Sili

O Le Lagolagoina o Taitai o le Ekalesia

Uso e ma tuafafine, o le a ou tuuina atu nei ia te outou le Au Pulega Aoao, Fitugafulu Eria, ma au Peresitene Aoao o Ausilali o le Ekalesia mo la outou palota lagolago.

E tuuina atu tatou te lagolagoina Russell M. Nelson o le perofeta, tagata-vai, ma talifaaaliga ma o le Peresitene O Le Ekalesia a Iesu Keriso o le Au Paia o Aso e Gata Ai; Dallin Harris Oaks o le Fesoasoani Muamua i le Au Peresitene Sili; ma Henry Bennion Eyring o le Fesoasoani Lua i le Au Peresitene Sili.

O e lagolagoina ia faailoa mai.

O i latou e faatuiese, pe afai e i ai, ia faailoa mai.

E tuuina atu tatou te lagolagoina Dallin H. Oaks o le Peresitene o le Korama a Aposetolo e Toasefululua ma M. Russell Ballard o le Sui Peresitene o le Korama a Aposetolo e Toasefululua.

O i latou e finagalo i ai, ia faailoa mai.

A i ai se faatuiese, faailoa mai.

E tuuina atu tatou te lagolagoina e avea ma uso o le Korama a Aposetolo e Toasefululua: M. Russell Ballard, Jeffrey R. Holland, Dieter F. Uchtdorf, David A. Bednar, Quentin L. Cook, D. Todd Christofferson, Neil L. Andersen, Ronald A. Rasband, Gary E. Stevenson,



Dale G. Renlund, Gerrit Walter Gong, ma Ulisses Soares.

O i latou e finagalo ai, faamolemole ia faailoa mai.

Ai sē faatuiese, ia faailoa mai.

E tuuina atu tatou te lagolagoina ia fesoasoani i le Au Peresitene Sili ma Aposetolo e Toasefululua o ni perofeta, tagatavaai, ma talifaaaliga.

O i latou uma e lagolagoina, faailoa mai.

O e au ese ai, pe afai e i ai, i lea faailoga e tasi.

E tuuina atu tatou te lagolagoina Brook P. Hales, o le ua valaauina e auauna atu o se Fitugafulu o le Pulega Aoao.

O i latou e finagalo ai, faamolemole ia faailoa mai.

O i latou e faatuiese, pe afai e i ai, ia faailoa mai.

E tuuina atu ina ia tatou faamalolo mai ma le agaga faafetai mo a latou auaunaga tuuto ia Elders Mervyn B.

Arnold, Craig A. Cardon, Larry J. Echo Hawk, C. Scott Grow, Allan F. Packer, Gregory A. Schwitzer, ma Claudio D. Zivic o ni Fitugafulu o le Pulega Aoao ma ua malolo mai ma le mamalu.

O i latou e fia aufaatasi ma i matou e tuu atu le agaga faafetai i nei Uso mo la latou tautua maoae, faamolemole ia faailoa mai.

E tuuina atu ina ia tatou faamalolo mai uso nei o Fitugafulu Eria: B. Sergio Antunes, Alan C. Batt, R. Randall Bluth, Hans T. Boom, Fernando E. Calderón, H. Marcelo Cardus, Paul R. Coward, Marion B. De Antuñano, Robert A. Dryden, Daniel F. Dunnigan, Jeffrey D. Erekson, Mervyn C. Giddey, João Roberto Grahl, Richard K. Hansen, Todd B. Hansen, Michael R. Jensen, Daniel W. Jones, Steven O. Laing, Axel H. Leimer, Tasara Makasi, Alvin F. Meredith III, Adonay S. Obando, Katsuyuki Otahara, Fred A. Parker, José C. Pineda, Gary S. Price, Miguel A. Reyes, Alfredo L. Salas,

Netzahualcoyotl Salinas, Michael L. Southward, G. Lawrence Spackman, William H. Stoddard, Stephen E. Thompson, David J. Thomson, George J. Tobias, Jacques A. Van Reenen, Raul Edgardo A. Vicencio, Keith P. Walker, ma Daniel Yirenya-Tawiah.

O e fia au faatasi ma i matou e faailoa atu le lotofaafetai mo la latou tautua matavela, faamolemole faailoa mai.

E tuuina atu tatou te lagolagoina isi Au Pulega Aoao, Fitugafulu Eria, ma Au Peresitene Aoao o Ausilali e pei ona i ai nei.

O i latou uma e lagolagoina, faailoa mai.

O e au ese ai, pe afai e i ai, i lea faailoga e tasi.

O i latou atonu na faatuiese i soo se tofiga e tatau ona faafesootai o latou peresitene o siteki.

Uso e ma tuafafine, matou te faafetai atu mo lo outou faatuatua ma tatalo faifai pea mo taitai o le Ekalesia. ■





Saunia e Elder D. Todd Christofferson

○ Le Korama a Aposetolo e Toasefululua

Tumau ma Mausali i le Faatuatua o Keriso

O le tumau ma mausali faifaiepa i le faatuatua o Keriso e manaomia ai ona ulufia e le talalelei a Iesu Keriso le loto ma le agaga o le tagata.

I le talafaasolopito o le Feagaiga Tuai, tatou te faitau ai i vaitau faamanuiaina pe a faamamaluina e le fanauga a Isaraelu le latou feagaiga ma Ieova ma tapuai atu ia te Ia ma o isi taimi pe a latou le amanaia lenei feagaiga ma tapuai atu i tupua po o Paala.¹

O le nofoaiga a Aapo o se tasi o vaitau o le liliuese i le malo i matū o Isaraelu. I se tasi taimi na ta'u atu ai e le perofeta o Elia i le Tupu o Aapo ia faapotopoto mai le nuu o Isaraelu faapea ai ma perofeta po o faitaulaga a Paala i le Mauga o Karamelu. Ina ua o mai faatasi tagata, sa fai atu Elia ia i latou, “Pe tou te faaletonu i manatu e lua seia afea? [Pe i nisi upu, “O afea ea tou te filifili tonu ai?”] afai o Ieova o le Atua ia, . . . mulimuli atu ia te ia; ae afai o Paala, . . . mulimuli atu ia te ia. A e le tali mai le nuu ia te ia i se upu.”² Ona faatonu lea e Elia ia pena uma e ia ma perofeta a Paala se tamai povi ma tuu i luga o faaputuga fafie i a latou lava fata-faitaulaga ae “aua nei avane ai le afi.”³ Ona, “Valaau atu lea o outou i le igoa o outou atua, ou te valaau atu foi i le suafa o Ieova: o le Atua na te tali mai i le afi, o le Atua lea. Ona tali mai lea o le nuu uma, ua faapea mai, Ua lelei lau upu.”⁴

Tou te manatua sa alalaga atu ma le malosi faitaulaga a Paala i lo latou atua e leai se ola mo le tele o itula e aumai le afi, ae “sa leai se leo, e leai se na tali mai, pe faalogo mai.”⁵ Ina ua oo i le taimi o Elia, sa ia toefaaaleleia le fata faitaulaga a le Alii na solo i lalo, tuu i ai fafie ma le taulaga i ona luga, ona faatonu lea o tagata uma ia sasaa i ai le vai, e le faatasi ae faatolu. Sa leai se masalosalo e na te le mafai po o se isi lava malosiaga faaletagata soifua ona faamuina le afi.

“Ua oo i le itula e fai ai le taulaga afiafi, ona faalatalata atu ai lea o Elia le perofeta, ua faapea atu, Ieova e, le Atua o Aperaaamo, ma Isaako, ma Isaraelu, ia faailoa i lenei aso, o oe o le Atua o Isaraelu, o a'u foi o lau auauna, ma ua ou faia o nei mea uma e tusa ma lau afioga. . . .

Ona pa'u ifo lea o le afi a Ieova, ma faaumatia ai le taulaga mu, ma fafie, ma maa, ma le eleele, ua mitiia ai foi le vai sa i le utu.

“Ua iloa e le nuu uma, ona faapa'u'ūfaō ai lea o i latou, ua faapea, O Ieova, o le Atua ia, o Ieova o le Atua ia.”⁶

O le asō atonu e faapea mai Elia:

- Pe o i ai le Atua, lo tatou Tama Faalelagi, pe leai, ae afai o loo i ai o Ia, tapuai atu ia te Ia.
- Pe o Iesu Keriso o le Alo o le Atua, le Togiola toetu o tagata uma, pe leai, ae afai o Ia, mulimuli ia te Ia.
- Pe o le Tusi a Mamona o le afioga a le Atua, pe leai, ae afai o le afioga a le Atua, ona “faalatalata atili atu lea i le Atua e ala i le [suesueina ma le] ola ai i ona mataupu.”⁷
- Pe na vaai Iosefa Samita ma talanoa ma le Tama ma le Alo i lenei aso o le Tautotogo o le 1820, pe leai, ae afai a moni, ona mulimuli lea i le tiute faaperofeta, e aofia ai ki o faamauga lea na faaee atu e a'u, o Elia i ona luga.

I le konafesi aoao talu ai nei lava, na folafola mai ai e Peresitene Russell M.



Nelson e faapea: “E te le tau mafaufau solo po o le a le mea e moni [tagai i le Moronae 10:5]. E te le tau mafaufau po o ai e mafai ona e faatuatua ma le saogalemu. E ala mai i faaaliga faaletagata lava ia, e mafai ai ona e mauaina lau oe lava ia molimau o le Tusi a Mamona o le afioga a le Atua, o Iosefa Samita o se perofeta, ma o le Ekalesia lenei a le Alii. Po o a lava tala po o mea e fai e isi, e leai se tasi e mafai ona aveesea se molimau na fanau a’e i lou loto ma le mafaufau e uiga i le mea e moni.”⁸

Ina ua folafola mai e Iakopo e faapea o le Atua e “foai tele mai i tagata uma ma le le toe tautaua” o e saili i Lona atamai,⁹ sa ia lapatai mai foi:

“A ia ole atu ma le faatuatua, ‘aua lava ne’i masalosalo. Aua o lē masalosalo e tusa ia ma le peau o le sami ua sousou i le matagi ma felafolafoaiina.

“Aua lava ne’i manatu lea tagata na te maua se mea e tasi mai le Alii.

“O le tagata faalotolotolua e faaletu-mau ia i ona ala uma.”¹⁰

O lo tatou Faaola, i le isi itu, o le faataitaiga atoatoa lea o le tumau. Sa Ia fetalai, “E le tuua a’u e toatasi e le Tama, aua ou te faia *pea* o mea e lelei ia te ia.”¹¹ Mafaufau i faamatalaga nei mai tusitusiga paia e uiga i alii ma tamaitai o ē, e pei o le Faaola, sa tumau ma mausali:

“Na liliu mai [i latou] i le faatuatua moni; ma sa latou le fia o ese mai ai, ona sa latou [tumau, ma] mausali, ma lē maluelueina, ma sa latou loto ma le filiga atoatoa e tasi poloaiga a le Alii.”¹²

“Ua mausali o latou mafaufau, ma ua latou tuu atu o latou faalagolago i le Atua e le aunoa.”¹³

“Ma faauta, ua outou iloa mo outou lava, ona ua outou molimauina, o le toatele o i latou o e ua aumai i le malamalama o le upumoni . . . ua tutumau ma mausali i latou i le faatuatua, ma i mea ia ua faasaolotoina ai i latou.”¹⁴

“Ua tumau pea i latou i le mataupu a le au aposetolo, ma le mafuta faatasi, ma le tofitofiga o le areto, ma tatalo.”¹⁵

O le tumau ma mausali faifaiepea i le faatuatua o Keriso e manaomia ai ona ulufia e le talalelei a Iesu Keriso le loto ma le agaga o le tagata, o lona uiga e le avea le talalelei na o se tasi o le tele o



faatosisaga i le olaga o se tagata ae o le taulaiga manino atoa o lona olaga ma uiga faaletagata. Ua fetalai le Alii:

“Ou te avatu foi ia te outou le loto fou, ma ou tuu i totonu ia te outou le agaga fou; ou te aveesea le loto maaa ai o outou tino, ma ou avatu ia te outou le loto aano.

“Ou te tuuina atu lo’u Agaga i totonu ia te outou, tou te savavali ai i a’u tulafono, tou te anaana foi i a’u faamasinoga, ma outou faia.

“Ma . . . e fai outou mo’u nuu, e fai foi a’u mo outou Atua.”¹⁶

O le feagaiga lenei tatou te faia e ala i a tatou papatisoga ma i sauniga o le malumalu. Ae o nisi e lei mauaina atoatoa lava le talalelei a Iesu Keriso i o latou olaga. E pei ona fai mai Paulo, e ui na “tatanu faatasi i tatou ma [Keriso] i le papatisoga,” o loo misi lava le vaega e faapea “pei ona toe faatuina mai o Keriso nai e ua oti . . . , [e faapena foi

ona tatou] . . . savavali i le ola toefuataina.”¹⁷ E le’i faauigaina lava e le talalelei i latou. E le’i faatotonugalemuina lava i latou ia Keriso. E ai filifili i latou i aoaoga faavae ma poloaiga o le a latou mulimuli ai ma le mea ma le taimi o le a latou auauna ai i le Ekalesia. I se eseese, o loo i ai i le tausiga o a latou feagaiga ma le sa’olele e faapea o i latou “o e ua filifilia e tusa ma le feagai-ga”¹⁸ e aloese mai mea taufaasese ma tumau mausali i le faatuatua o Keriso.

O le toatele o i tatou e iloa i lenei taimi o loo i ai i se mea i le va o le auai i le talalelei e uunaia e agafesootai i le tasi itu ae i le isi itu ua atiae atoatoa ai le tuuto FaaKeriso i le finagalo o le Atua. I se mea i le aluga o lona ala, e ulufale mai ai le tala fou o le talalelei a Iesu Keriso i o tatou loto ma pulea o tatou agaga. Atonu e le tupu i se taimi vave, ae e tatau ona tatou agai uma i luma i lona setete faamanuiaina.



E luitauina ae e taua le tumau ma le mausali pe a tatou iloa i tatou lava ua faamamaina “i le ogaumu o pua-puaga,”¹⁹ o se mea e vave pe tuai foi ona oo mai ia i tatou uma i le olaga faitino. A aunoa ma le Atua, o nei aafiaga pogisa e oo atu i le leai o se faamoe-moe, faanoanoa, ma le lototiga. O le i ai o le Atua, e suia ai e le mafanafana le tiga, o le filemu e suia le vavaō, ma e suia e le faamoemoe le faanoanoa. O le tumau mausali i le faatuatua o Keriso o le a aumaia ai Lona alofa tunoa tumau ma le lagolago.²⁰ O le a Ia liliua tofotofoga i le faamanuiaga ma, i upu a Isaia, “e foaiina atu . . . le matagofie e sui a’i le lefulefu.”²¹

Se’i o’u ta’ua ni faaitaitaiga se tolu lea e i ai so’u iloa patino:

E i ai se tamaitai o loo mafatia i se faama’i lamatia faaumiumi e ui i toga-fitiga faafomai, faamanuiaga faaleperisitia, ma anapogi ma tatalo. E ui i lea, o lona faatuatua i le mana o tatalo ma le moni o le alofa o le Atua mo ia e le faaititia. E agai pea o ia i luma i lea so ma lea aso (ma o nisi taimi o lea itula ma lea itula) e auauna atu ai e pei ona valaauina ai i le Ekalesia ma, e faatasi ai

ma lana tane, e tausi lo la aiga talavou, e mata’ata’ata i le tele na te mafaia ai. E loloto lona agaalofo mo isi, ma e faaleleia e ona ia lava mafatiaga, ma e tele ina tuu atu atoa o ia e auauna ai i isi. E faaauau pea ona mausali, ma e lagona e tagata le fiafia pe a i ai o ia.

O se alii na ola a’e i le Ekalesia, sa auauna atu o se faifeautalai faamisi-ona, ma sa faaipoipo atu i se tamaitai lelei sa faate’ia ina ua amata ona talanoa nisi o ona uso ma tuafafine ma faitioina le Ekalesia ma le Perofeta o Iosefa Samita. I le mavae ai o se taimi sa latou tuua le Ekalesia ma tau-mafai ai e tauanau o ia e mulimuli atu. E pei lava ona tupu soo i tulaga faapenei, sa latou osofaia o ia i talafatu, faasalalauga, ma vitio e faia e tagata faitio, o le toatele o i latou o tagata faitai na avea muamua ma tagata o le Ekalesia. Sa faatauemu ona uso ma tuafafine i lona faatuatua, ma ta’u atu ua faaseseina ma taitaiseseina o ia. Sa le’i i ai ni ana tali i a latou tuuaiga uma, ma na amata ai ona maluelue lona faatuatua ona o le tetee faifai pea. Na ia mafaufau pe tatau ona ia le toe auai i le lotu. Sa ia talanoa atu i lona

toalua. Sa ia talanoa atu i tagata na ia faatuatua. Sa tatalo o ia. A o ia manatunatu loloto i lenei tulaga atu-atuvale o le mafaufau, sa ia manatua ai ni taimi sa ia lagonaina ai le Agaga Paia ma maua ai se molimau o le upumoni e ala i le Agaga. Sa ia faai’uina e faapea, “Afai ou te faamaoni ia te a’u lava ia, e tatau ona ou tautino atu na ootia a’u i le Agaga e sili atu ma le faatasi ma o le molimau a le Agaga e moni.” Sa i ai sona lagona faafouina o le fiafia ma le filemu na faasoina faatasi ma lona toalua ma le fanau.

O se tane ma se ava o ē sa mulimuli fiafia ma le tumau i le fautuaga a le Usoga i o la olaga, sa faanoanoa i le faigata na la oo i ai i le mauaina o fanau. Sa la faaaluina ni tupe se tele e galulue ai ma fomai atamamai ma, i le mavae ai o se taimi, sa faamanuiaina i latou i se atalii. Peitai, i se faalavelave, i le mavae ai i le na o se tausaga, sa aafia le pepe i se faalavelave faafuasei lea e leai se tasi e tuua’ia ai ae sa tuua ai o ia i le koma, ma se aafiaga tele i le faiai. Sa ia maua le tausiga silisili, ae na le mafai ona iloa e fomai pe o le a faape’i le gasologa i le agai i luma. O

le tamaitiiti sa matua galulue ma tatalo malosi ai lenei ulugalii ia aumai i le lalolagi, i so la lagona, ua aveese atu, ma la te le iloina pe o le a toefoi mai ia i la'ua. Ua la tauivi nei e faafetaia'ia manaoga ogaoga o le la pepe a o faataunuuina ai foi isi o la tiutetauave. I lea taimi silisili ona faigata, na la liliu atu ai i le Alii. Ua la faalagolago atu i le “meaai e tataua ma le aso” ua la maua mai ia te Ia. Sa fesoasoani atu i ai ni uo ma aiga agaalofa ma sa faamalositia e faamanuiaga faaleperisitua. Ua atili ai ona la latalata o le tasi i le isi, masalo o le la faatasiga ua matua malosi atu nei ma sili ona atoatoa nai lo le se isi auala e ono mafai ai.

I le aso 23 o Iulai, 1837, sa tuusa'o atu ai e le Alii se faaaliga ia Thomas B. Marsh i le taimi lea sa avea ai ma Peresitene o le Korama a Aposetolo e Toasefululua. O loo i ai mea nei:

“Ma tatalo mo ou uso o le Toasefululua. Apoapoi malosi atu ia te i latou ona o lo'u igoa, ma ia apoapoiina i latou ia latou agasala uma, ma ia e faamaoni i lo'u igoa i o'u luma.

“Ma a mavae atu o latou faaosoosoga, ma puapuaga e tele, faauta, o A'u, o le Alii, o le a Ou tautagotago i latou, ma afai latou te lē faamaaa o latou loto, ma lē faamalo o latou ūa e faasaga mai ia te a'u, o le a faaliliu mai i latou, ma o le a Ou faamaloloina i latou.”²²

Ou te talitonu o mataupu faavae o loo ta'ua i nei fuaiupu e faatatau ia i tatou uma. O faaosoosoga ma puapuaga tatou te oo i ai, faaopoopo i ai ma soo se tofotofoga ua silafia e le Alii e talafeagai ona tatou oo i ai, e mafai ona taitai atu i lo tatou liua atoatoa ma le faamalologa. Ae faato'a tupu lenei mea pe afai, tatou te le faamaaa o tatou loto pe faamalō o tatou ua e tetea ia te ia. Afai tatou te tumau ma mausali, po o a lava mea e oo mai, tatou te ausia le liua na faamoemoeina e le Faaola ina ua Ia fetalai atu ia Peteru, “Pe a liua mai oe, ona e faamalosi ai lea i lou uso,”²³ o se liua e matua atoatoa e le mafai ona toe suia. O le faamalologa folafolaina o le faamamaina ma le faapaiaina lea o o tatou agaga ua manunu'a i le agasala, e faia i tatou ia paia.



Ou te manatua le fautuaga a o tatou tina: “Ai au fualaaui aina; o le a e lelei ai.” E sa'o lava o tatou tina, ma i le aano o le mausali i le faatuatua, “o le taumafaina o au fualaaui aina” o le tatalo e le aunoa, ia taumafa fiafia i tusitusiga paia i aso taitasi, ia auauna atu ma tapuai i le Ekalesia, ia taumafa ma le agavaa i le faamanatuga i vaiaso taitasi, ia alofa atu i lou tuaoi, ma ia ave lou satauro i le usiusitai i le Atua i aso taitasi.²⁴

Ia manatua e le aunoa le folafolaga o mea lelei e oo mai, i le taimi nei ma le lumanai, mo i latou e tumau ma mausali i le faatuatua o Keriso. Ia manatua le “ola e faavavau, ma le olioli o le au paia.”²⁵ “E, outou uma e o e loto mamā, ia ea ia o outou ulu ma tali le afioga malie a le Atua, ma taumamafa fiafia i lona alofa; aua tou te mafai, pe afai e mausali o outou mafaufau, e faavavau.”²⁶ I le suafa, o Iesu Keriso, amene. ■

FAAMATALAGA

1. Tagai i le Bible Dictionary, “Baal.”
2. 1 Tupu 18:21.
3. 1 Tupu 18:23.
4. 1 Tupu 18:24.
5. 1 Tupu 18:29.
6. 1 Tupu 18:36, 38–39.
7. Faatomuaga i le Tusi a Mamona.
8. Russell M. Nelson, “Faaaliga mo le Ekalesia, Faaaliga mo o Tatou Olaga,” *Liahona*, Me 2018, 95.
9. Tagai i le Iakopo 1:5.
10. Iakopo 1:6–8.
11. Ioane 8:29; ua faaopoopo le faamamafa.
12. 3 Nifae 6:14; tagai foi i le Alema 27:27.

13. Alema 57:27.
14. Helamana 15:7–8.
15. Galuega 2:42.
16. Esekiele 36:26–28; tagai foi i le 2 Korinito 3:3.
17. Roma 6:4.
18. Tagai i le Iosefa Samita—Mataio 1:22–23; tagai foi i le Mataio 24:24–25.
19. 1 Nifae 20:10; tagai foi i le Isaia 48:10.
20. E pei ona fetalai atu le Alii ia Iosefa Samita e 22 tausaga le matua i le mavae ai ona leiloloe o se vaega o le faaliliuga o le Tusi a Mamona: “Sa le tatau ona sili atu lou fefe i tagata nai lo i le Atua. . . . Semanu e faaloaloa atu e ia lona aao ma lagolago ia te oe e faasaga i u fanafana mu uma a le fili; ma semanu e faatasi atu o ia ma oe i taimi uma o faalavelave.” (Mataupu Faavae ma Feagaiga 3:7–8). Sa molimau mai Alema ina ua mavae lona liuaina, “Sa lagolagoina a'u a'o ou i ai i lalo o tofotofoga ma faalavelave o ituaiga eseese uma, ioe, ma puapuaga uiga eseese uma; ioe, sa laveaiina au e le Atua mai le falepuipui, ma mai i noanoaga, ma mai i le oti, ioe, ma ou te tuu atu lo'u faalagolago ia te ia; ma o le a ia laveai mai pea ia te au. Ma ua ou iloa o le a ia faatu mai au i luga i le aso gataaga, e mau faatasi ma ia i le mamalu” (Alema 36:27–28).
21. Isaia 61:3.
22. Mataupu Faavae ma Feagaiga 112:12–13.
23. Luka 22:32.
24. Tagai Luka 9:23. Ua faamanatu mai e Peresitene Russell M. Nelson ia i tatou, “E leai se mea na te mafai ona tatalaina le lagi e pei o le tuufaatasiga o le faateleina o le ola mama, usiusitai atoatoa, saili ma le naunautai, taumafa i aso taitasi i afioga a Keriso i totonu o le Tusi a Mamona [tagai i le 2 Nifae 32:3], ma taimi masani e tuuto atu i le galuega o le malumalu ma talafaasolopito o aiga” (“Faaaliga mo le Ekalesia, Faaaliga mo o Tatou Olaga,” 95).
25. Enosa 1:3.
26. Iakopo 3:2.



Saunia e Bishop Dean M. Davies

Fesoasoani Muamua i le Au Epikopo Pulefaamalumu

O Mai, Faalogo i le Siufofoga o le Perofeta

Ao tatou faamautuina i o tatou olaga faiga masani o le faalogologo ma le usitaia o le siufofoga o perofeta soifua, o le a tatou selesele i faamanuiga e faavavau.

le talanoa ai e uiga i le Peresitene o le Ekalesia a Iesu Keriso o le Au Paia o Aso e Gata Ai, na fetalai mai le Alii:

“O lenei foi, o le tiute o le Peresitene o le tofi o le Perisitua Maua luga o le pulefaamalumu i le ekalesia atoa, ma ia avea e pei o Mose—

“... Ioe, ia avea o se tagatavāai, o se talifaaliga, o se faaliliu-upu, ma se perofeta, *ua i ai meaalofo uma a le Atua e faaee mai e ia i luga o le ulu o le ekalesia*” (Mataupu Faavae ma Feagaiga 107:91–92; faaopoopo le faamamafa).

Ua faamanuaina a’u e molimauina nisi o meaalofo a le Atua ua tuuina atu i luga o Ana perofeta. E mafai ona ou faasoa atu se tasi o na aafiaga ma outou? A o lei oo i lo’u valaauga i le taimi nei, sa ou fesoasoani i le faailoaina ma le fautuaina atu o nofoaga o malumu i le lumanai. I le mavae ai o le aso 11 o Setema, 2001, o le sopoiaina o tuaoi o le I.S. ua amata ona sili atu ona puleaina. O se taunuuga, e lua i le tolu itula e faigamalaga mai ai tagata o le Ekalesia mai Vancouver, Kanata, ao malaga atu i le Malumu o Seattle Uosigitone. O Peresitene Gordon B.

Hinckley, le Peresitene o le Ekalesia i lenei vaitaimi, sa fautuaina mai o se malumu i Vancouver o le a faamanuaina ai tagata o le Ekalesia. Sa faatagaina le suesueina o se nofoaga, ma i le maea ai ona matou suesueina le tele o fanua o ni meatotino a le Ekalesia, sa suesueina foi isi nofoaga e le ni meatotino a le Ekalesia.



Sa maua se nofoaga matagofie mo tapuaiga faalelotu i autafa o le Aualatele i Setete o Kanata. Sa faigofie le mauaina o le fanua, sa faatumulia i laau paina matagofie o Kanata, ma sa fafia i se nofoaga e iloa gofie lea o le a mafai ona iloina e le faitau afe o tagata femalagaai i taavale.

Sa matou tuuina atu lenei nofoaga faatasi ai ma ata ma faafanua i le fonotaga faalemasina o le Komiti o Nofoaga o Malumu. Sa faatagaina e Peresitene Hinckley le matou faia o se konakarate ma faamaea ia sailiiliga manaomia. Ia Tesema o lenei tausaga, sa matou toe lipoti atu i le komiti ua maea sailiiliga, ma sa matou sailia le faatagana e faaauau ai le faatauina. Ina ua maea ona faafofoga i la matou lipoti, sa saunoa mai Peresitene Hinckley, “Ou te lagona e tatau ona ou vaai i lenei nofoaga.”

Mulimuli ane i lenei masina, lua aso ina ua mavae le Kerisimasi, sa matou malaga ai i Vancouver ma Peresitene Hinckley; Peresitene Thomas S. Monson ma Bill Williams, o le tusi ata o malumu. Sa faafeiloai i matou e Paul Christensen, le peresitene o le siteki i le lotoifale, lea na aveina i matou i le nofoaga. Sa fai sina susu ma puaoa lenei aso, ae sa oso i fafo Peresitene Hinckley mai le taavale ma amata ona savalia le nofoaga atoa.

Ina ua mavae le faaaluina o se taimi i le nofoaga, sa ou fesili ia Peresitene Hinckley pe finagalo e maimoa i isi nofoaga na mafaufauina. Na fai mai o ia ioe, e finagalo i ai. E te iloa, i le tilotilo atu i isi nofoaga, sa mafai ai ona matou faia se faatusatusaga i o latou tulaga lelei.

Sa matou faia se taamiloga tele e faataamilo i Vancouver e matamata i isi fanua, ma iu ai ona toe taunuu mai i le muai nofoaga. Na saunoa mai Peresitene Hinckley, “O se nofoaga matagofie lenei.” Ona ia fesili mai lea, “E mafai ona tatou o i le faalelotu a le Ekalesia pe a ma le tasi le kuata maila [0.4 km] le mamao?”

“Ioe, Peresitene,” sa matou tali atu.

Sa matou toe tulioso i taavale ma malaga atu i le faalelotu e lata ane. Ao matou taunuu atu i le faalelotu, na saunoa mai Peresitene Hinckley,

“Agavale ii.” Sa matou liliu ma mulimuli i le magaala e pei ona faatonuina. Sa amata ona a’ea’e lemu le auala.

I le taimi lava na taunuu ai le taavale i le tumutumu o le aega, sa saunoa mai Peresitene Hinckley, “Tu le taavale, tu le taavale.” Ona ia faasino lea i le taumatau i se fasi laufanua ma faapea mai, “Ae a le fanau lea? O i e fai ai le malumalu. O i e finagalo i ai le Alii mo le malumalu. E mafai ona e mauaina? E mafai ona e mauaina?”

Matou te lei vaai i le fanau lenei. Sa mamao i tua ma mamao ese mai le auala autu, ma e lei lisia e faatau. I le taimi na matou tali atu ai matou te lei iloa, sa toe faasino Peresitene Hinckley i le fanua ma toe faapea mai, “O i e fai ai le malumalu. Sa matou nonofo mo ni nai minute, ona malaga lea mo le malaevaalele e toe foi i le aiga.

O le aso na sosoo ai, sa valaauina ai i ma’ua ma Brother Williams i le ofisa o Peresitene Hinckley. Ua uma ona ia tusia mea uma i luga o se fasi pepa: o auala, le falesa, afe i le agavale ii, o le X e maka ai le nofoaga mo le malumalu. Sa ia fesili mai po o le a se mea ua mauaina. Sa ma tau atu ia te ia ua ia filifilia se fanua sili ona faigata. Sa umia e ni tagata taitoatasi e toatolu: e toatasi mai Kanata, tasi mai Initia, ma le tasi mai Saina! Ma e lei mauaina ni tulaga manaomia faalelotu.

“Ia, fai le mea sili lua te mafaia,” o lana tala lea.

Ona tutupu lea o ni vavega. I totonu o ni nai masina ua tatou umiaina le fanua, ma mulimuli ane aumai e le aai o Langley, British Columbia le faatagaga e fausia ai le malumalu.

I le tomanatu ai i lenei aafiaga, ua faamaualaloina a’u i le iloaia e ui sa ma’ua umia uma ma Brother Williams ni aoaoga aloaia ma tausaga o le potomasani i mea tau fanua ma le mamanu o malumalu, e leai sea ituaiga o aoaoga aloaia a Peresitene Hinckley; ae sa ia mauaina se mea sili atu—o le meaalofo o le vaaiga faaperofeta. Sa mafai ona ia vaai faalemafaufau atu i le mea e tatau ona tu ai le malumalu a le Atua.

Ina ua poloaiina e le Alii ia le Au Paia anamua i lenei tisipenisione e fausia se malumalu, sa Ia folafola atu:



“Ae ia tuu atu ia fausia se fale i lo’u igoa e tusa ma le ata o le a Ou faaali atu ia te i latou.

“Ma afai e lē fausia e lo’u nuu e tusa ma le ata o le a Ou faailoa atu . . . o le a Ou lē taliaina mai o latou lima.” (Mataupu Faavae ma Feagaiga 115:14–15).

Na faapena i le Au Paia anamua, ma e faapena foi ia i tatou i aso nei: ua faaali mai e le Alii ma faaauau ona faaali mai i le Peresitene o le Ekalesia ia mamanu lea e taitaiina ai le malo o le Atua i o tatou aso. Ma, i se tulaga patino, ua ia tuuina mai le taitaiga i le ala e tatau ai ona tatou taitaia o tatou olaga, ina ia taliaina a tatou amioga i le Alii.

Ia Aperila 2013 sa ou talanoa atu ai i taumafaiga na aofia i le sauniaina o faavae uma o le malumalu ina ia mau-tinoa e mafai ona tatalia afa ma mala lea o le a aafia ai. Peitai o le faavae e na o le amataga lea. O se malumalu e aofia ai le tele o poloka faufale, faapi-pii faatasi e tusa ma mamanu na muai faatulagaina. Afai o tatou olaga e tatau ona avea ma malumalu o loo tatou tauivi taitasi e fausia e pei ona aoao mai e le Alii (tagai 1 Korinito 3:16–17), e mafai ona tatou fesili ifo ia i tatou lava, “O a poloka faufale e tatau ona

tatou faatulagaina ia faamatagofie ai, mamalu, ma tetee atu ai o tatou olaga i afa o le lalolagi?”

E mafai ona tatou maua le tali i lenei fesili i le Tusi a Mamona. Na saunoa mai le Perofeta o Iosefa Samita e uiga i le Tusi a Mamona, “Na ou tauina atu i le usoga o le Tusi a Mamona o se tusi silisili ona sa’o i tusi uma lava o i le lalolagi, ma o le maa auau o la tatou ekalesia, ma e sili atu ona latalata le tagata i le Atua e ala i le usitaia o mataupu o le Tusi a Mamona, nai lo se isi lava tusi” (faatomuaga i le Tusi a Mamona). I le faatomuaga i le Tusi a Mamona, ua aoaoina i tatou o i “latou o ē e mauaina [le] molimau paia mai le Agaga Paia [o le Tusi a Mamona o le afioga a le Atua] o le a iloa foi e ala i le mana lava lea e tasi o Iesu Keriso o le Faaola o le lalolagi, o Iosefa Samita o Lana talifaaaliga ma o le perofeta o le Toefuataiga, ma o Le Ekalesia a Iesu Keriso o le Au Paia o Aso e Gata Ai o le malo a le Alii ua toe faatuina i le lalolagi.”

O nisi nei o poloka faufale taua o lo tatou faatuatua ma molimau taitoatasi.

1. O Iesu Keriso o le Faaola o le lalolagi.
2. O le Tusi a Mamona o le afioga a le Atua.



3. O Le Ekalesia a Iesu Keriso o le Au Paia o Aso e Gata Ai o le malo lea o le Atua i le lalolagi.
4. O Iosefa Samita o se perofeta, ma o loo i ai o tatou perofeta soifua i luga o le fogaeleele i aso nei.

I masina talu ai nei, sa ou faalogo ai i saunoaga uma o le konafesi aoa lea na fofogaina mai e Peresitene Nelson talu ona muai valaauina o ia o se Aposetolo. O lenei gaoioiga ua suia ai lo'u olaga. Ao o'u suesue ma mafau fau loloto i le 34 tausaga o le atamai na mauaina e Peresitene Nelson, o mataupu manino ma le tumau na afua mai i ana aoaoga. E fesootai nei mataupu taitasi i na poloka faufale faatoa ta'ua pe o se isi poloka faufale autu mo o tatou lava malumalu. Latou te aofia ai le faatuatua i le Alii o Iesu Keriso, salamo, papatisoga mo le faamagaloga o agasala; le meaalofa o le Agaga Paia, togiolaina o ē ua maliliu ma le galuega o le malumalu, tausia ia paia le aso Sapati, amata ma le faaiuga i le mafau fau; tumau i luga o le ala o le feagaiga. Na saunoa Peresitene Nelson e uiga ia i latou uma ma le alofa ma le tuuto.

O le maatulimanu autu ma le poloka faufale o le Ekalesia ma mo o tatou olaga o Iesu Keriso. O Lana Ekalesia

lenei. O Peresitene Nelson o Lana perofeta. O aoaoga a Peresitene Nelson ua molimauina ma faaali mai mo lo tatou manuia le soifuaga ma uiga o Iesu Keriso. Na ia saunoa ma le alofa ma le silafia lelei e uiga i le natura a le Faaola ma Lana misiona. Na ia tuuina mai foi le molimau faifaiepa ma le naunautai e uiga i le valaauga paia a perofeta soifua—o Peresitene o le Ekalesia—ia sa ia auauna i ai.

I le taimi nei, o se faamanuiaga le lagolagoina o ia o se perofeta soifua a le Alii i luga o le fogaeleele. Ua tatou masani i le lagolagoina o taitai o le Ekalesia e ala i le mamau paia o le siiina o ō tatou lima i le sikuea e faaalua ai lo tatou taliaina ma le lagolagoina. Sa tatou faia lenei mea i ni nai minute ua tea. Peitai o le lagolagoina moni e oo i tua atu o lenei faailoga faaletino. E pei ona ta'ua i le MF&F 107:22, e ao i le Au Peresitene Sili ona 'lagolagoina i le talitonuga, faatuatua, ma le tatalo a le ekalesia." Tatou te lagolagoina ma le atoatoa ma le faamaoni le perofeta soifua ao tatou atiina a'e le mamau o le fesootai atu i ana upu, maua le faatuatua e faatino ai, ona tatalo lea mo faamanuiaga faifaiepa a le Alii i ona luga.

Pe a ou mafau fau ia Peresitene Russell M. Nelson, ou te maua le

toafimalie i le fetalaiga a le Faaola ina ua Ia fetalai mai, "Afa'i e faalogo mai lo'u nuu i lo'u leo, ma le leo o a'u auauna o e ua Ou tofia e taitaia lo'u nuu, faauta, e moni Ou te fai atu ia te outou, o le a lē aveesea i latou i fafo mai lo latou nofoaga" (MF&F 124:45).

O le faalogo atu i perofeta soifua o le a i ai ni aafiaga loloto e oo lava i le suia ai o o tatou olaga. Ua faamalosia i tatou. Ua sili atu lo tatou mautinoa ma le talitonuga i le Alii. Ua tatou faalogo i le afioga a le Alii. Ua tatou lagona le Alofa o le Atua. O le a tatou iloa le ala e faatautaia ai o tatou olaga ma le faamoemoe.

Ou te alofa ma lagolagoina Peresitene Russell M. Nelson ma isi o ē ua valaauina o ni perofeta, tagatavaai, ma talifaaaliga. Ou te molimau atu ua ia te ia meaalofa ua faaee mai e le Alii i luga o lona ao, ma ou te molimau atu a tatou faamautuina o tatou olaga i faiga masani o le faalogo atu ma usitai i le siufofoga o perofeta soifua, o le a fausia o tatou olaga e tusa ma le mamau paia a le Alii mo i tatou, ma o le a tatou selesese i faamanuiaga e faavavau. Ua tuuina mai le valaaulia ia i tatou uma. O mai, faalogo i le siufofoga o le perofeta, o mai ia Keriso ma ola ai. I le suafa, o Iesu Keriso, amene. ■



Saunia e Elder Ulisses Soares

○ Le Korama a Aposetolo e Toasefululua

Tasi ia Keriso

A'u soa pele i le galuega a le Alii, ou te talitonu e tele ni mea lelei atu e mafai ona tatou faia ma tatau ona faia ia lelei atu i le talileleia o uo fou i le Ekalesia.

Talofa, uso e ma tuafafine pele. E pei ona matou faatalofa ai i la'u gagana Pasila Potukale, “Boa tarde!” Ou te lagonaina le faamauina i le potopoto faatasi ai i lenei konafesi aoao matagofie a Le Ekalesia a Iesu Keriso o le Au Paia o Aso e Gata Ai i lalo o le taitaiga a lo tatou perofeta pele, o Peresitene Russell M. Nelson. Ou te maofa i avanoa maoae ua maua e i tatou taitoatasi e faalogo ai i le siufofoga o le Alii e ala i Ana auaina i aso nei e gata ai ua tatou ola ai.

O le matou atunuu moni o Pasila e matua tamaoaga i punaoa faalenatura. O se tasi o na mea o le Vaitafe lauiloa o le Amasone, o se tasi o vaitafe telē ma umi i le lalolagi. E āfua mai i ni vaitafe eseese se lua, o le Solimões ma le Negro. O le mea mata'ina, la te tatafe faatasi atu mo le tele o maila a o le'i fesootai ia vai, ona o vaitafe nei e matuā eseese lava tupu'aga, saoasaoa, vela, ma le fatufatuga o vailaau. I le mavae ai o ni maila se tele, ona fesootai faatasi loa lea o vai, ma avea ai ma se vaitafe e ese mai nai lo ona vaega taitasi. I le mavae ai o le fesootai faatasi o vaega nei, faatoa oo loa lea o le Vaitafe o le Amasone i se malosi na'ua lea e oo atu i le Vasa Atelani, na te tuleia i fafo atu le suāsami ina ia mafai

ona maua pea le suavai fou mo le tele o maila i totonu atu o le vasa.


I se ala talitutusa lava o loo tafe faatasi ai Vaitafe o le Solimões ma le Negro e fatu ai le Vaitafe tele o le Amasone, ua faapena foi fanau a le Atua ua o mai faatasi i le Ekalesia a Iesu Keriso mai talaaga faaagafesootai eseese, tu ma aganuu, ua fatuina ai lenei nuu matagofie o le Au Paia ia Keriso. Mulimuli ane, a o tatou uunaia, lagolago, ma fealofaa'i le tasi i le isi, ua tatou tuu faatasi ai ina ia fatu se malosiaga malosi mo le lelei i le lalolagi. I le avea ai ma soo o Iesu Keriso, o le tafe

faatasi ai i lenei vaitafe o le lelei, o le a mafai ai ona tatou tuu atu le “suavai fou” o le talalelei i se lalolagi o galala.

Ua musuia e le Alii Ana perofeta e aoao i tatou i le auala e mafai ai ona tatou lagolagoina ma alolofa i le tasi ma le isi ina ia mafai ona tatou lotogatasi i le faatuatua ma le faamoemoe i le mulimuli ia Iesu Keriso. E pei ona fai mai Paulo, o i latou o ē “na papatisoina ia Keriso ua oofu ia Keriso . . . : aua [o outou uma ua] tasi ia Keriso Iesu.”¹

Ina ua tatou folafola atu i le papatisoga e mulimuli i le Faaola, ua tatou molimau atu i luma o le Tama ua tatou loto e ave i o tatou luga le suafa o Keriso.² A o tatou tauivi ia maua Ona uiga paia i o tatou olaga, e oo ina ese i tatou nai lo tagata na tatou i ai, e ala i le Togiola a Keriso le Alii, ma e meafua lava le faateleina o lo tatou alofa mo tagata uma.³ Tatou te lagonaina se popole faamaoni mo le tulaga manuia ma le fafia o tagata uma. Tatou te vaai atu i le tasi ma le isi o ni uso ma ni tuafafine, o ni fanau a le Atua o loo i ai le tupuaga, o uiga, ma gafatia paia. Tatou te mananao e tasi le tasi ma le isi ma tauave avega a le tasi ma le isi.⁴

O le mea lea na faamatalaina e Paulo o le alofa mama.⁵ Na faamatalaina foi e Mamona, o se perofeta o le Tusi a Mamona, “o le alofa le pona o Keriso,”⁶ o le ituaiga sili lea ona ofoofogia, malualii, ma sili ona malosi o le alofa. Na faamatalaina talu ai nei e lo tatou perofeta o i ai nei, Peresitene Russell M. Nelson se faailoaga o lenei



E pei o le Vaitafe malosi o le Amasone, lea e tuleia i fafo atu le suasami pe a oo atu lana tafe i le Vasa Atelani, o soo o Iesu Keriso e tuu atu le “suavai fou” o le talalelei i se lalolagi o galala.

alofa le pona o Keriso o le auauna atu, o se auala ua sili atu ona taulai ma paia atu e alofofa ma popole ai mo isi e pei ona faia e le Faaola.⁷

Ia tatou iloiloaina lenei mataupu faavae o le alofa ma le popole, e pei ona faia e le Faaola, i totonu o le aano o le faamalosiuga, fesoasoani atu, ma le lagolagoina o isi o ē faatoa liliu mai ma i latou ua amata ona faaali le fiafia e auai i a tatou sauniga Faale-Ekalesia.

A ō ese mai nei uo fou i fafo ma le lalolagi ma taliaina le talalelei a Iesu Keriso, ma auai i Lana Ekalesia, e avea i latou ma Ona soo, ua toe fanaufouina e ala ia te Ia.⁸ Latou te tuua se lalolagi na latou iloina lelei ma filifili e mulimuli ia Iesu Keriso, faatasi ma le faamoemoe atoa o le loto, ma auai i se “vaitafe” fou e pei o le Vaitafe malosi o le Amasone—o se vaitafe e i ai se malosiaga lototoa o le lelei ma le amiotonu e tafe agai atu i le afioaga o le Atua. Ua faamatalaina e le Aposetolo o Peteru o se “tupulaga ua filifilia, o tupu ma ositaulaga, o le nuu paia, ma le nuu na faatauina mai.”⁹ A o tuufaatasia ai nei uo fou i lenei vaitafe fou, atonu latou te lagonaina sina sē teisi i le taimi muamua i se siosiomaga e le masani ai. E iloa e nei uo fou lo latou fefiloi faatasi ai i totonu o se vaitafe i ona lava āfuaga, vevela, ma fatufatuga o vailaau—o se vaitafe e i ai ona lava tu masani, aganuu, ma le vaogagana. O lenei olaga fou ia Keriso atonu e foliga lofituina mo i latou. Mafaufau mo sina taimi e uiga i ni o latou lagona a o latou faalogo mo le taimi muamua i faaupuga e pei o le “Afiafi Faaleaiga,” “BYC,” “Aso Sa anapogi,” “papatisoga mo ē ua maliliu,” “fusitolu,” ma isi mea faapena.

E faigofie lava ona iloa le mafuaaga latou te ono lagona ai le le fia auai. I ni tulaga faapea, atonu latou te fesili ifo ia i latou lava, “O i ai se nofoaga mo a’u iinei? E fetau i ea a’u i Le Ekalesia a Iesu Keriso o le Au Paia o Aso e Gata Ai? E manaomia ea e le Ekalesia a’u? Pe o le a ou maua ea ni uo fou e naunau e fesoasoani mai ma lagolagoina a’u?”

A’u uo pele, i ni taimi faapena, o i tatou o loo i ai i vaega eseese i le malaga umi o le avea ma soo e tataua



ona faaloaloa atu se lima mafanafana o le faaumea i a tatou uo fou, talia i latou i mea o loo latou i ai, ma fesoasoani atu, alofa, ma faaafia i latou i o tatou olaga. O nei uo fou uma o ni atalii ma afafine faapelepele o le Atua.¹⁰ E le mafai ona tatou ma’umauina e oo lava i se toatasi o i latou ona, e pei o le Vaitafe o le Amasone e faalagolago i tama’i vaitafe o loo fafagaina, tatou te manaomia i latou e pei foi ona latou matua manaomiaina i tatou, ina ia avea ma ‘au malosi mo le lelei i le lalolagi.

E aumai e a tatou uo fou ni taleni mai le Atua, fiafiaga, ma le lelei i totonu o i latou. O lo latou naunautai mo le talalelei e mafai ona pipisi solo, lea e fesoasoani ai ia i tatou e toe faaolaola a tatou lava molimau. Latou te aumaia foi ni vaaiga fou i lo tatou malamalamaaga i le olaga ma le talalelei.

Ua leva ona aoaoina i tatou i auala e mafai ona tatou fesoasoani atu ai i a tatou uo fou ia lagonaina le talileleia ma le alofaina i le Ekalesia toefuataiina a Iesu Keriso. Latou te manaomiaina ni mea se tolu e tumau ai le malosi ma le faatuatua i o latou olaga atoa:

Muamua, latou te manaomia ni uso ma ni tuafafine i le Ekalesia o ē naunau atu ma le faamaoni ia i latou, o ni uo moni ma faamaoni o ē mafai ona latou liliu atu pea i ai, o ē o le a savavali i o latou autafa, ma o ē o le a taliina a latou fesili. I le avea ai ma tagata o le ekalesia, e tataua i taimi uma ona tatou

mataala ma vaavaai mo ni foliga fou pe a auai i gaoioga ma sauniga o le Ekalesia, e tusa lava poo a tiutetauave, tofiga, poo popolega o ia i tatou. E mafai ona tatou faia ni mea faigofie e fesoasoani ai i nei uo fou ia lagona le taliaina ma le talileleia i le Ekalesia, e pei o le tuuina atu o se faafeiloaiga mafanafana, ‘ata’ata ma le faamaoni ia i latou, nonofo faatasi e vivii ma tapuai, faailoa atu i latou i isi tagata o le au paia, ma isi mea faapena. A o tatala o tatou loto i a tatou uo fou i nisi o auala nei, ua tatou galulue i le agaga o le auaunaga. A tatou auauna atu ia i latou e pei ona faia e le Faaola, o le a latou lē lagonaina e pei “o ni tagata ese i le Ekalesia.” O le a latou lagona le faaafia ai ma faia ni uo fou, ma e sili ona taua, o le a latou lagona le alofa o le Faaola e ala i lo tatou tausiga faamaoni.

Lua, e manaomia e uo fou se tofiga—o se avanoa e auauna atu ai i isi. O le auaunaga o se tasi lea o atamai sili o Le Ekalesia a Iesu Keriso o le Au Paia o Aso e Gata Ai. O se faagasologa e mafai ai e lo tatou faatuatua ona tuputupu a’e malosi atili. E moomia e uo fou uma lena avanoa. E ui ua i ai i le epikopo ma le aufono a le uarota le tiutetauave tuusao e tuu atu ai ni valaauga i le taimi lava lea e maea ai le latou papatisoga, ae e leai ma se mea e taofia i tatou, o ni tagata o le au paia, mai le valaauliaina o a tatou uo fou e fesoasoani ia i tatou e auauna atu faasamasamanoa i isi pe ala foi i galuega fesoasoani.

Tolu, o uo fou e tataua ona “tausia i le afioga lelei a le Atua.”¹¹ E mafai ona tatou fesoasoani ia te i latou ia fiafia ma faamasani i tusitusiga paia a o tatou faitauina ma talanoaina aoaoga faatasi ma i latou, tuuina atu anotusi i tala ma faamalamalama atu i ai upu faigata. E mafai foi ona tatou aoaoina i latou pe faapefea ona maua le taitaiga patino e ala i le suesueina soo o tusitusiga paia. Ma le isi, e mafai ona tatou aapa atu i a tatou uo fou i o latou lava fale ma valaaulia i latou i o tatou fale i taimi e ese mai ia tatou sauniga ma gaoioga faisoo a le Ekalesia ua faatulagaina, ma fesoasoani ia i latou ia tuufaatasia i le vaitafe malosi o le nuu o le Au Paia.

O le iloaina o fetuunaiga ma luitau e faia e a tatou uo fou i le avea ai ma tagata o le aiga o le Atua, i le avea ai ma o tatou uso ma tuafafine, e mafai ona tatou faasoa atu i ai le auala o loo tatou faatoilaloina ai luitau talitutusa i o tatou olaga. O le a fesoasoani lenei mea ia i latou e iloa ai e le o tuua na o i latou ma o le a faamanuiaina e le Atua i latou pe a latou faatino le faatuatua i Ana folafolaga.¹²

A fesootea faatasi Vaitafe o Solimões ma Negro, e matua aave lava ma malosi le Vaitafe o Amasone. I se tulaga talitutusa, a oo ina tuufaatasia moni i tatou ma a tatou uo fou, e matua malosi ma mausali atu le Ekalesia toefuataiina a Iesu Keriso. Ma te matuai faafetai tele ma la'u manamea, o Rosana, mo i latou uma sa fesoasoani ia i ma'ua ia auai faatasi i lenei vaitafe fou i le tele o tausaga ua mavae, ina ua ma taliaina le talalelei a Iesu Keriso i lo ma atunuu moni o Pasila. I le aluga o tausaga, sa auauna ai ma le faamaoni nei tagata lelei tele ia i ma'ua ma fesoasoani ia i ma'ua ia faaauau pea ona tafe i le amiotonu. Ma te matuai faafetai tele ia i latou.

Sa iloa lelei e perofeta i le Itulagi i Sisifo le auala e faatumauina ai le tafe faatasi ma le faamaoni o uo fou i lenei vaitafe fou o le lelei e agai atu i le ola e faavavau. Mo se faataitaiga, i le vaai ai i o tatou aso ma le iloaina o le a tatou feagai ma luitau talitutusa,¹³ sa faaafia ai e Moronae nisi o na laasaga taua i ana tusitusiga i le Tusi a Mamona:

“Ma ina ua uma ona taliaina o i latou i le papatisoga, ma galueaiina ma faamamaina e le mana o le Agaga Paia, sa faitauina i latou i totonu o tagata o le ekalesia a Keriso; ma sa ave o latou igoa ina ia manatua i latou ma tausia i le afioga lelei a le Atua, e faatutumu ai i latou i le ala sao, e faatutumu ai i latou ia mataala e le aunoa i le tatalo, ua nao galuega a Keriso, o le pogai ma le iuga o lo latou faatuatua, ua faalagolago i ai.

“Ma sa potopoto soo faatasi le ekalesia, e anapopogi ma tatalo, ma talatalanoa o le tasi i le tasi, e uiga i le uelefeaa o o latou agaga.”¹⁴

A'u soa pele i le galuega a le Alii, ou te talitonu e tele ni mea lelei atu e



mafaia ona tatou faia ma tataua ona faia ia lelei atu i le talileleia o uo fou i le Ekalesia. Ou te valaaulia outou ia iloilo ina mea e mafai ona tatou faia ia opomau ma taliaina atili ai, ma aoga ia i latou, e amata atu i le Aso Sa a sau nei. Ia faateete ia le faalavelave ou tofiga Faale-Ekalesia i le faafeiloai atu i uo fou i sauniga ma gaoioiga a le Ekalesia. Po o a lava mea uma, e pele nei agaga i fofoga o le Atua ma e matua taua atu nai lo polokalama ma gaoioiga. Afai tatou te auauna atu i a tatou uo fou ma o tatou loto e tumu i le alofa le pona e pei ona faia e le Faaola, ou te folafola atu ia te outou, i Lona suafa, o le a Ia fesoasoani ia i tatou i a tatou taumafaiga. A tatou galulue o ni auauna faamaoni, e pei ona faia e le Faaola, o le a maua e a tatou uo fou le fesoasoaniga latou te manaomia e tumau ai le malolosi, tuuto, ma le faamaoni e oo i le iuga. O le a latou auai ma i tatou a o avea i tatou ma se nuu malosi o le Atua ma o le a fesoasoani ia i tatou e aumai le suavai fou i se lalolagi ua matua manaomia lava faamanuiaga o le talalelei a Iesu Keriso. O le a lagona e nei fanau a le Atua ua “le toe tagata ese [i latou] po o ē ua aumau, ae ua nuu faatasi ma le au paia.”¹⁵ Ou te folafola atu ia te outou o le a latou iloaina le afio ai o lo tatou Faaola, o Iesu Keriso, i Lana lava Ekalesia. O le a faaauau ona latou tafe atu faatasi ma i tatou o se vaitafe i le punavai o le lelei uma seia oo ina taliaina i latou i aao o lo tatou Alii,

o Iesu Keriso, ma latou faalogo atu i le Tama o fetalai mai, “O le a outou maua le ola e faavavau.”¹⁶

Ou te valaaulia outou ina ia saili le fesoasoani a le Alii i le alofa atu i isi e pei ona Ia alofa mai ia te outou. Sei o tatou mulimuli uma i le apoapoiga na tuuina mai e Mamona, “O le mea lea, ou uso e [ma tuafafine] pele, ia outou tatalo atu i le Tama ma le malosi atoa o le loto, ina ia faatumulia outou i lenei alofa, lea ua ia faaee mai i luga o i latou uma o e o soo moni o lona Alo o Iesu Keriso.”¹⁷ O nei upumoni, ou te molimau atu ma faia ai i le suafa o Iesu Keriso, amene. ■

FAAMATALAGA

1. Kalatia 3:27-28; ua faaopoopo le faamamafa.
2. Tagai i le Mataupu Faavae ma Feagaiga 20:37.
3. Tagai i le Mosaea 3:19.
4. Tagai i le Mosaea 18:8.
5. Tagai i le 1 Korinito 13.
6. Moronae 7:47.
7. Tagai i le Russell M. Nelson, “Auauna Atu i le Mana ma le Pule a le Atua,” *Liahona*, Me 2018, 68–75.
8. Tagai i le Mosaea 27:25.
9. 1 Peteru 2:9.
10. Tagai i le Mataupu Faavae ma Feagaiga 18:10.
11. Moronae 6:4; tagai foi “E Faapefea ona Matou Galulue ma Taitai o Siteki ma Uarota?” *Tala'i La'u Talalelei: O Se Taiala mo le Galuega Faafaifeautalai*, rev. ed. (2018), [lds.org/manual/missionary](https://www.lds.org/manual/missionary).
12. Tagai i le 1 Nifae 7:12.
13. Tagai i le Mamona 8:35.
14. Moronae 6:4–5.
15. Efeso 2:19.
16. 2 Nifae 31:20; faaopoopo le faamamafa.
17. Moronae 7:48.



Saunia e Elder Gerrit W. Gong

○ Le Korama a Aposetolo e Toasefululua

O La Tatou Afi o le Tolauapiga o le Faatuatua

Mo i latou o e saili, faataga, ma ola ai, o le tafa o ata o le faatuatua, o nisi taimi e faasolosolo malie lava ona oo mai po o le toe foi atu.

Uso e ma tuafafine pele, pe le ofo-fogia ea le mauaina o faaaliga faifai pea mai le lagi e ala mai ia Peresitene Russell M. Nelson ma o tatou taitai o le Ekalesia lea e valaaulia ai i tatou e ola i auala fou ma paia atu,¹ i le aiga ma le ekalesia, ma o tatou loto atoa, mafaufau ma le malosia?

Pe na e maua ea se avanoa e faia ai se mea lea sa e lagona le lē saunia po o

le lē atoatoa ae sa faamanuiaina oe mo le taumafai e fai?

Sa ou maua ai. O se faataitaiga e tasi lea.

I nai tausaga ua mavae, sa valaaulia ai ma le agalelei e Elder Richard G. Scott, o se sui o le Korama a Aposetolo e Toasefululua, “Gerrit, e te manao e vali ata ma a’u?”

Sa fai mai Elder Scott sa fesoasoani

le valiina o ata ia te ia e matau ma fatufatua’i ai. Sa ia tusia: “Taumafai ina ia fatufatua’i, e tusa lava pe feoloolo taunuuga. . . . O le fatufatua’i e mafai ona uunaia ai se agaga o le loto faafetai mo le olaga ma mo mea ua faamanuiaina ai oe e le Alii. . . . Afai e te filifili ma le atamai, o le a le faaaluina ai le tele o le taimi.”²

Na faamatala mai e Peresitene Henry B. Eyring ona mafaufauga na uunaia e “se lagona o le alofa,” e aofia ai “le alofa o se Foafoa e faamoemoe i Lana fanau ina ia avea e pei o Ia—ina ia fatufatua’i ma ia atia’e.”³ O galuega fatufatua’i a Peresitene Eyring ua tuuina mai ai se “vaaiga uigaese faaleagaga i le molimau ma le faatuatua.”⁴


O le faatufugaga a Peresitene Boyd K. Packer ua faaalua ai se savali taua o le talalelei: “O le Atua o le Foafoa o le lagi ma le lalolagi ma mea uma ua i ai, e molimau mai le natura atoa i lena foafoaga na faatonutonuina mai le lagi, ma o loo i ai se lotogatasi atoatoa i le va o le natura, saienisi, ma le talalelei a Iesu Keriso.”⁵

Ua molimau mai Alema, “Ua faa-iloa mai i mea uma o loo i ai se Atua.”⁶ E lagiina e o tatou tamaiti o le Peraimeri, “Pe a ou faalogo i manulele, pe ou te vaai i le lagi, . . . Ou te faafetai mo le lalolagi ua fai e le Tama mo au.”⁷ Ua viia e le Tusitala o Victor Hugo le “sootaga faavavega i le va o tagata ma mea i lena lalolagi tele, mai le la e oo i manunini’i. . . . O manufelelei uma e felelele e tofu ma se vaega o le faava-vau i o latou matiu’u . . . O se nepula (nebula) o se faaputuga o fetu.”⁸

Ma toe faafoi mai ai e lena mea i tatou i le valaaulia a Elder Richard G. Scott.

“Elder Scott,” sa ou tali atu ai, “Ou te manao ia ou atili mataala ma fatufatua’i. Ou te fiafia e vaai faalemafaufau i ata vali a le Tama Faalelagi i ao mafiafia ma lanu uma o le lagi ma le vai. Ae”—sa ou tu mo se taimi umi—“Elder Scott,” sa ou fai atu ai, “E leai so’u tomali e vali ai. Ou te popole ina ne’i e lē fiafia i lou taumafai e aoao a’u.”

Sa ataata Elder Scott ma fetuunai mo le ma feiloaiga. I le aso atofaina, sa ia saunia le pepa, o vali, ma pulumu. Sa ia



Campfire at Sunset, saunia e Elder Richard G. Scott

tosiina ni auivi ma fesoasoani e faasusū le pepa mo a'u.

Sa ma faaaogaina e fai ma faataitai-iga lana atavali matagofie e faaautuina *Afi o le Tolauapiga i le Lagoto*. A o ma valiina, sa ma talatalanoa e uiga i le faatuatua—i le auala tatou te vaai atu ai i le malamalama ma le mafanafana o se afi o le tolauapiga, tatou te le popole i le pogisa ma le lē mautinoa—i le auala e mafai ai ona aumaia i nisi taimi e la tatou afi o le tolauapiga le faamoemoe ma le faamautinoaga i ni po uumi ma tuuatoatasi. Ma e oo mai lava le tafa o ata. O la tatou afi o le tolauapiga o le faatuatua—o ō tatou manatuaga, o aafiaga, ma le talatuu o le faatuatua i le agalelei o le Atua ma le alofa mutimutivale agamalu i o tatou olaga—ua faamallosia ai i tatou i le po atoa.

O lau molimau e—mo i latou o e saili, faataga, ma ola ai—o le tafa o ata o le faatuatua, o nisi taimi e faasolosolo malie lava ona oo mai po o le toe foi atu. O le a oo mai le malamalama pe a tatou mananao i ai ma saili i ai, pe a tatou onosai ma usiusitai i poloaiga a le Atua, pe a tatou talia le alofa tunoa o le Atua, le faamalologa, ma feagaiga.

Ina ua amata ona ma valiina, sa faamallosia mai Elder Scott, “Gerrit, e oo lava i se lesona e tasi o le a e valia se mea e te manao e teu ma manatua.” Na sa’o lava Elder Scott. Ua ou teufatuina le atavali o le afi o le tolauapiga sa fesoasoani Elder Scott ia te a’u e vali. O lo’u tomai faatufugaga sa tumau ma o loo tumau pea le faatapulaaina, ae o le manatuaina o se afi o le tolauapiga o le faatuatua e mafai ona faamallosia ai i tatou i ni auala se lima.

Muamua, o se afi o le tolauapiga e mafai ona faamallosia ai i tatou ia maua le olioli i fatufatua’iga lelei.

O loo i ai le olioli i le vaai faalema-faufau, i le aoaoina, ma le faia o mea fou e aoga. E matuai moni lenei mea a o tatou faamallosia le faatuatua ma le faalagolago i le Tama Faalelagi ma Lona Alo, o Iesu Keriso. E le mafai ona lava lo tatou alolofa ia i tatou lava e faaolaina ai i tatou lava. Ae e sili atu ona alofa le Tama Faalelagi ia i tatou ma sili atu ona silafia i tatou nai lo lo tatou alolofa po o le iloina o i tatou



lava. E mafai ona tatou faalagolago atu i le Alii ae aua le faalagolago i lo tatou lava atamai.⁹

Pe sa i ai se patī o se aso fanau o se tasi sa na o oe lava na le’i valaauliaina?

Pe sa mulimuli ona filifilia oe, pe na le’i filifilia foi, pe a filifilia ni au?

Pe sa e saunia mo se suega a le aoga, se faatalanoaga o se galuega, se avanoa sa e manao ai lava—ae sa e lagona sa e toilalo?

Pe sa e tatalo mo se mafutaga ae, po o le a lava le mafuaaga, sa le’i tupu?

Pe sa e feagai ma se gasegase tumau, tuulafoaiina e se toalua, mafatia mo lou aiga?

E silafia e lo tatou Faaola o tatou tulaga. Pe a tatou faatino le faitalia na tuuina mai e le Atua ma faaoga o tatou tomai uma i le lotomauualalo ma le faatuatua, e mafai e lo tatou Faaola, o Iesu Keriso ona fesoasoani mai ia i tatou ia faafetaia’ia luitau ma fiafiaga o le olaga. O le faatuatua e aofia ai se manao ma se filifiliga ia talitonu. E oo mai foi le faatuatua mai le usitaia o poloaiga a le Atua, ua tuuina mai e faamanuiaina ai i tatou, a o tatou mulimuli atu i Lana ala o feagaiga.

Afai sa tatou lagonaina, pe o lagonaina, le lē mautinoa, tuuatoatasi, ita, teenaina, lē fiafia, po o le vavae ese mai le Atua ma Lana Ekalesia toefuataiina, atonu e manaomia se isi fuataga o taumafaiga ma le faatuatua e toe foi atu ai i Lana ala o feagaiga. Ae e tauia! Faamolemole o mai, po toe o mai, i le

Alii o Iesu Keriso! O le alofa o le Atua e sili atu ona malosi nai lo noataga o le oti—faaletino pe faaleagaga.¹⁰ O le Togiola a lo tatou Faaola e lē mafuatia ma e faavavau. E tofu i tatou uma ma masalosologa ma mea e toilalo ai. E i ai taimi tatou te ono se ese ai ma le ala. Ua faamautinoa mai ma le agaalofoa e le Atua ia i tatou, po o fea lava o tatou i ai, po o a foi mea sa tatou faia, e leai se mea e ta’u o le lē toefoi. E faatalitali mai o Ia e sauni e fusi i tatou.¹¹

Lua, o la tatou afi o le tolauapiga o le faatuatua e mafai ona faamallosia ai i tatou e auauna atu i auala fou, fatufatua’i faaleagaga, maualuga atu, ma paia atu e musuia e le Agaga.

O na auaunaga e aumaia ai vavega ma faamanuiaga o le i ai i le feagaiga—lea tatou te lagona ai le alofa o le Atua ma saili e auauna atu i isi i lena agaga.

Sa ma masani talu ai nei ma Sister Gong i se tamā ma se aiga na faamanuiaina e se uso perisitua faamaoni o lē na alu atu i lo latou epikopo ma fesili atu pe mafai e ia (le uso perisitua) ona avea ma soa o faiaoga o aiga ma le tamā. Sa le’i malosi le tamā ma sa le’i naunau e faia asiasiga faafaiaoga o aiga. Ae, a o suia le loto o le tamā, sa amata ona la asia ma lenei uso perisitua agaalofoa “o la’ua” aiga. I le maea ai o se tasi o nei asiasiga, o lona toalua—sa le auai o ia i lena taimi i le lotu—na fesili i lona toalua pe na ā mai. Sa tautino le tama, “Masalo sa ou lagona se mea”—ona alu lea i le umukuka e aumai se pia.¹²



Ae na sosoo le tasi mea ma le isi: o aafiaga mālū, tautua faaleaunaga, suia o loto, vasega faasauniuni mo le malumalu, auai i le lotu, faamauiina o se aiga i totonu o le malumalu paia. Mafaufau i le faafetai o le fanau ma fanau a fanau i lo latou tamā ma le tina ma i le uso o auaunaga na sau o se uo ma se soa ma lo latou tama ina ia auauna atu ma alolofa atu i isi.

O se afi lona tolu o le tolauapiga o le faamalosiaga o le faatuatua: o le olioli fatufatua'i ma faamanuiaga o le talalelei e oo mai pe a tatou saili i le alofa o le Atua ma isi ma o tatou loto ma agaga atoa.

Ua valaaulia i tatou e tusitusiga paia e tuu a tatou taumafaiga uma i luga o le fatafaitaulaga o le alofa ma le auaunaga. I le Feagaiga Tuai, ua fautua mai Teuteronomi ia i tatou ia “alofa atu ia Ieova lou Atua” ma lou loto, agaga, ma le malosi atoa.¹³ Ua apoapoi mai Iosua, “Alofa atu ia Ieova lo outou Atua, . . . savavali i ona ala uma, . . . anaana i ana poloaiga, . . . pipii lava ia te ia, ma . . . auauna ia te ia ma o outou loto atoa ma o outou agaga atoa.”¹⁴

I le Feagaiga Fou, sa ta'ua e le Faaola poloaiga sili e lua: “Ia e alofa atu i le Alii lou Atua ma lou loto atoa, ma lou agaga atoa, ma lou malosi atoa, ma, . . . i le lua te tuaoi ia pei o oe lava ia te oe.”¹⁵

I le Tusi a Mamona: O Se Tasi Molimau ia Iesu Keriso, sa galue le Tupu o Peniamina “ma le malosi atoa o lona tino ma le manatu atoa o lona agaga” ma faatuina le filemu i le lauele-ele.¹⁶ I le Mataupu Faavae ma Feagaiga, e pei ona silafia e faifeautalai uma, ua talosaga mai le Alii ina ia tatou auauna atu ia te Ia ma o tatou “loto, mafaufau, manatu, ma le malosi” atoa.¹⁷ Ina ua ulufale atu le Au Paia i le Itumalo o Siakisione, sa poloaiina e le Alii i latou ina ia tausua le paia o le Sapati e ala i le alofa atu “i le Alii lou Atua ma lou loto atoa, ma lou manatu atoa, mafaufau, ma le malosi; ma ia e auauna atu ia te ia i le suafa o Iesu Keriso.”¹⁸

Tatou te fiafia i le valaaulia ina ia tuuto atu o tatou agaga atoa e sailia auala maua atu ma paia atu e alofa ai i le Atua ma alofa ai ia i latou o siomia i tatou ma ia faamalosi lo tatou faatuatua i le Tama Faalelagi ma Iesu Keriso i o tatou loto ma i o tatou aiga ma i le ekalesia.

Fa, o la tatou afi o le tolauapiga o le faatuatua e uunaia i tatou ina ia atiae mamanu masani o le ola amiotonu lea e faamalosi ai le faatuatua ma le faaleagaga.

O nei mausa paia, uiga amiotonu, po o mamanu ma le agaga tatalo, e mafai ona aofia ai le tatalo; suesueina o tusitusiga paia; anapogi; manatuaina o lo tatou Faaola ma feagaiga e ala i le sauniga o le faamanatuga; faasoa atu o faamanuiaga o le talalelei e ala i faifeautalai, malumalu ma talafaasolopito o aiga, ma isi auaunaga; tausua o se api talaaga o mafaufauga faaleagaga; ma isi.

Pe a tuufaatasia mamanu amiotonu ma faanaunaga faaleagaga, e tuufaatasia le olaga nei ma le faavavau. E oo mai le malamalama ma le ola faaleagaga pe a aumaia e le tausiga faalelotu e le aunoa i tatou ia latalata atili i lo tatou Tama Faalelagi ma lo tatou Faaola, o Iesu Keriso. A tatou

fiafia i le agaga o le tulafono ma ona mataitusi, o mea o le faavavau e mafai ona to'a i luga o o tatou agaga e pei o le sau mai le lagi.¹⁹ Faatasi ai ma le usitai i aso uma ma le faafouina o le vai ola, tatou te maua tali, faatuatua, ma le malosi e faafetaia'ia ai luitau ma avanoa i aso uma i le onosai, vaaiga, ma le olioli i le talalelei.

Lima, a tatou tausua mamanu masani silisili a o sailia ni auala fou ma paia atu e alofa ai i le Atua ma auauna atu i le tasi ma le isi, o la tatou afi o le tolauapiga o le faatuatua e mafai ona uunaia i tatou ia manatua o le atoatoa o loo ia Keriso lea, e le o ia i tatou lava po o mea e manatu le lalolagi ua atoatoa.

O le valaaulia a le Atua e tumu i le alofa ma avanoa aua o Iesu Keriso o “le ala, ma le upu moni, ma le ola.”²⁰ Ia i latou o e lagona le mamafatu, ua Ia valaaulia e, “O mai ia te a'u,” ma ia i latou o e o mai ia te Ia, ua Ia folafola mai, “O a'u foi e malolo ai outou.”²¹ “O mai ia Keriso, ma faaatoatoaina ia te ia, . . . alolofa i le Atua ma o outou manatu atoa, mafaufau, ma le malosi atoa, ona lava lea o lona alofa tunoa mo outou, ma o lona alofa tunoa e mafai ai ona outou atoatoa ia Keriso.”²²

I lenei faamautinoaga “o lona alofa tunoa e mafai ai ona outou atoatoa ia Keriso” o le faamafanafanaga foi, filemu, ma le tautinoga lea e mafai ona tatou faaauau pea i luma ma le faatuatua ma le lototele i le Alii e tusa pe le tutupu ni mea e pei ona tatou faamoemoe i ai, mananao i ai, pe atonu e talafeagai, e ala i le leai o ni a tatou lava mea sese, pe a mavae foi ona tatou faia o le mea silisili.

I taimi ma auala eseese, tatou te lagona uma lava le lē atoatoa, lē mautinoaga, atonu o le lē agavaa. Ae i la tatou taumafaiga ina ia alofa i le Atua ma auauna atu i o tatou tuaoi, e mafai ona tatou lagona le alofa o le Atua ma le musumusuga e manaomia mo o latou olaga ma o tatou olaga i auala fou ma paia atu.

Faatasi ai ma le agaalofa, ua uunaia ma folafola mai lo tatou Faaola e mafai ona tatou “fetaomi atu i luma ma le tumau ia Keriso, ma se susulu atoatoa o le faamoemoe, ma le alofa i le Atua ma

tagata uma.”²³ O le mataupu faavae a Keriso, le Togiola a lo tatou Faaola, ma lo tatou usiusitai atoatoa i Lana ala o feagaiga e mafai ona fesoasoani ia tatou iloa Ana upumoni ma faasaoloto ai i tatou.²⁴

Ou te molimau atu o le atoaga o Lana talalelei ma Lana fuafuaga o le fiafia ua toefuatai mai ma aoaoina i Le Ekalesia a Iesu Keriso o le Au Paia o Aso e Gata Ai, i tusitusiga paia, ma e ala i perofeta mai le Perofeta o Iosefa Samita ia Peresitene Russell M. Nelson i le asō. Ou te molimau atu o Lana ala o feagaiga e taitai atu i le meaalofo silisili ua folafola mai e lo tatou Tama Faalelagi alofa: “O le a outou maua le ola e faavavau.”²⁵

Tau ina ia avea Ana faamanuiaga ma le olioli tumau ma a tatou faamanuiaga pe a tatou faamallosia o tatou loto ma faamoemoe ma le tautinoga i a tatou afi o le tolauapiga o le faatua-tua, ou te tatalo ai i le suafa mamalu ma le paia o Iesu Keriso, amene. ■

FAAMATALAGA

1. Tagai Russell M. Nelson, “Auaunaga,” *Liahona*, Me 2018, 100.
2. Richard G. Scott, *Finding Peace, Happiness, and Joy* (2007), 162–63; siiina mai i le *Elder Richard G. Scott Art Exhibit: A Self-Guided Tour* (pamphlet, 2010).
3. *A Visual Journal: Artwork of Henry B. Eyring* (booklet, 2017), 2.
4. *A Visual Journal*, 28.
5. Boyd K. Packer, *The Earth Shall Teach Thee: The Lifework of an Amateur Artist* (2012), ix.
6. Alema 30:44.
7. “E Alofa Lo’u Tama Faalelagi Ia Te A’u” *Tusipese a Tamaiti*, 16–17.
8. Victor Hugo, *Les Misérables*, trans. Julie Rose (New York: Random House, 2008), 728.
9. Tagai Faataoto 3:5–6.
10. Tagai Mataupu Faavae ma Feagaiga 121:44.
11. Tagai Luka 9:23.
12. Ua faatagaina le faaaogaina o le aafiaga.
13. Teuteronomie 6:5.
14. Iosua 22:5.
15. Luka 10:27.
16. Upu a Mamona 1:18.
17. Mataupu Faavae ma Feagaiga 4:2.
18. Mataupu Faavae ma Feagaiga 59:5.
19. Tagai Mataupu Faavae ma Feagaiga 121:45–46.
20. Ioane 14:6.
21. Mataio 11:28.
22. Moronae 10:32.
23. 2 Nifae 31:20.
24. Tagai Ioane 8:32.
25. 2 Nifae 31:20.



Saunia e Elder Paul B. Pieper

○ Le Fitugafulu

E Tatau i Tagata Uma ona Ave i ō Latou luga le Suafa ua Tuuina Mai e le Tamā

O le suafa o le Faaola e tulaga ese ma e i ai le mana taua. Ua na o le pau lea o le suafa e mafai ai ona faaolaina.

I ni nai vaiaso talu ai, sa ou auai i le papatisoga a ni nai fanau e tai valu tausaga le matutua. Sa amata ona latou aoaoina le talalelei a Iesu Keriso mai i ō latou matua ma faiaoga. O le fatu o lo latou faatua-tua ia te Ia sa amata ona tuputupu a’e. Ma ua latou mananao nei e mulimuli ia te Ia i totonu o le vai o le papatisoga e avea ma tagata o Lana Ekalesia toefuataiina.

Ao ou matamata atu i lo latou naunau, sa ou mafaufau i le tele o lo latou malamalama e uiga i se tasi o vaega taua o le latou feagaiga o le papatisoga: o le latou tautinoga ina ia ave i ō latou luga le suafa o Iesu Keriso.

Mai lava i le amataga, sa tautino mai e le Atua le silisiliese o le suafa o Iesu Keriso i Lana fuafuaga mo i tatou. Sa aoao e se agelu lo tatou ulua’i tama,



o Atamu, “Ia e faia mea uma e te faia i le suafa o le Alo, ma ia e salamo ma valaau atu i le Atua i le suafa o le Alo e faavavau.”¹

Sa aoao atu e le perofeta o le Tusi a Mamona o le Tupu o Peniamina lona nuu, “O le a lē i ai se isi igoa e tuuina mai po o se isi lava ala po o ni auala e mafai ona oo mai ai le olataga i le fanauga a tagata.”²

Na toe ta’ua e le Alii lenei upumoni i le Perofeta o Iosefa Samita: “Faauta, o Iesu Keriso o le suafa lea ua tuu mai e le Tamā, ma ua leai se isi igoa ua tuu mai e mafai ona faaolaina ai le tagata.”³

I ō tatou aso, na aoao mai e Peresitene Dallin H. Oaks e faapea “o i latou e faaoga le faatuatua i le suafa paia o Iesu Keriso . . . ma ulu atu i lana feagaiga . . . e mafai ona maua le taulaga togiola a Iesu Keriso.”⁴

E finagalo lo tatou Tama Faalelagi ina ia malamalama atoatoa o le suafa o Lona Alo, o Iesu Keriso, e lē na o se suafa e tasi mai le toatele. O le suafa o le Faaola e tulaga ese ma e i ai le mana taua. Ua na o le pau lea o le suafa e mafai ai ona faaolaina. E ala i le faamamafaina o lenei upumoni i tupulaga uma, ua faamautino mai e lo tatou Tama agaalofo i Lana fanau uma o loo i ai se ala e toe foi atu ai ia te Ia. Ae o le i ai o se ala mautinoa e lē faapea ai la e otometi le mautinoa o lo tatou toe foi atu. Ua ta’u mai e le Atua e manaomia le tatou faatinoga: “O le mea lea, e ao i tagata uma [ma tamaitai] ona latou *ave* i o latou luga le suafa ua tuu mai e le Tamā.”⁵

Ina ia mafai ona maua le mana faaola lea e na o le suafa o Iesu Keriso e oo mai ai, e ao ona “faalotomaua-laloina i [tatou lava] i luma o le Atua . . . ma o mai i luma ma loto momomo ma agaga salamo . . . ma [ia] loto e *ave* i o [tatou] luga le suafa o Iesu Keriso” ona agavaa ai lea, e pei o a’u uo laitiiti e valu tausaga, ina “ia talia i totonu o lana ekalesia e ala i le papatisoga.”⁶

O i latou uma o ē e mananao ma le faamaoni e ave i ō latou luga le suafa o le Faaola e tatau ona agavaa mo le ma talia le sauniga o le papatisoga o se molimau faaletino i le Atua mo lo latou faaiuga.⁷ Peitai, o le papatisoga ua na o se amataga.



O le upu *ave* e lē o le taliaina. O se upu faatino e i ai faauigaga e tele.⁸ E faapena foi, ona manaomia e lo tatou tautinoga e ave i o tatou luga le suafa o Iesu Keriso le faatinoga ma le tele o vaega.

Mo se faataitaiga, o se faauigaga e tasi o le upu *ave* o le *tagofia* po o le taliaina i totonu o le tino o se tasi, e pei o le taimi tatou te *tagofia* ai se mea inu. E ala i le tauaveina i o tatou luga o le suafa o Keriso, tatou te tautino atu e *ave* Ana aoaoga, o Ona uiga, ma mulimuli ane o Lona alofa faamaoni i ō tatou olaga ina ia mafai ona ave a latou ma vaega o ō tatou tagata. O le taua o le valaaulia a Peresitene Nelson i talavou matutua ina ia “[saili] ma le agaga tatalo ma le malosi e malamalama ai i le faauigaga patino o faalaniga ma suafa taitasi a [le Faaola] mo i [latou],”⁹ ma ia taumamafa fiafia i afioga a Keriso i tusitusiga paia, aemaise lava o le Tusi a Mamona.¹⁰

O se isi faauigaga o le upu *ave* o le taliaina o se tagata i se matafaioi faapi-toa po o le taliaina o se manatu po o se mataupu faavae. A tatou ave i o tatou luga le suafa o Keriso, tatou te talia o Ia o lo tatou Faaola ma faaauau pea ona mulimuli i Ana aoaoga o se taiala mo o tatou olaga. I faaiuga taua uma tatou te faia, e mafai ona tatou *ave* Lana talalelei ina ia ola ai ma le faamaoni ma usiusitai i ai ma o tatou loto atoa, mafaufau, manatu, ma le malosi.

O le upu *ave* e mafai foi ona faauigaina o le faaogatusa o se tasi ma se suafa po o se faamoemoega. O le toatele o i tatou ua i ai le tomai e *tauave ai* le tiutetauave i le galuega pe *tauave ai* se faamoemoega po o se faagasologa. A tatou ave i o tatou luga le suafa o Keriso, tatou te ave i o tatou luga tiutetauave o se soo moni, tatou te lagolagoina Lona faamoemoega, ma tatou te “tutu o ni molimau o [Ia] i taimi uma ma i mea uma, ma i nofoaga uma atonu [tatou te] i ai.”¹¹ Ua valaau mai Peresitene Nelson i “tamaitai talavou *uma* ma alii talavou *uma* . . . ia auai i le ‘autau a le autalavou a le Alii e fesoasoani e faapotopoto mai Isaraelu.”¹² Ma ua tatou faafetai uma e tauave le valaau faaperofeta e faaoga le suafa o Lana Ekalesia toefuataina e pei ona faaalai mai e le Faaola Lava Ia. O Le Ekalesia a Iesu Keriso o le Au Paia o Aso e Gata Ai.¹³

I le faagasologa o le ave i o tatou luga o le suafa o le Faaola, e tatau ona tatou malamalama o le faamoemoega o Keriso ma Lana Ekalesia e tasi ma e tutusa. E lē mafai ona māvavaeeseina i laua. E faapena foi, o lo tatou ave ma soo patino i le Faaola ma le auai malosi i Lana Talalelei e lē māvavaeeseina foi. Afai tatou te toilalo i la tatou tautinoga i le tasi, o la tatou tautinoga i le isi o le a faaitiitia, e mautinoa lava e pei o le po e mulimuli mai i le ao.

O nisi o tagata ua mumusu e tauave le suafa o Iesu Keriso ma Lana

faamoemoega aua latou te manatu i ai e matuā lē talafeagai, e faatapula'aina, ma o se mailei. O le mea moni, o le ave i o tatou luga o le suafa o Keriso e faasaolotoina ma faateleina. E fāgua le mana'o tatou te lagona pe a tatou taliaina le fuafuaga a le Atua e ala i le faatuatua i le Faaola. Faatasi ai ma lenei naunautaiga ola i ō tatou loto, e mafai ona tatou iloa le faamoemoega moni o ā tatou meaalofo faalelagi na tuuina mai ma taleni, aafia ai i Lona alofa faamamanaina, ma tuputupua'e i lo tatou popole mo le manuia o isi tagata. Ao tatou ave i o tatou luga le suafa o le Faaola, tatou te taofimau moni i mea lelei uma ma ave e faapei o Ia.¹⁴

E taua le manatua o le tauaveina o le suafa o le Faaola i o tatou luga o se feagaiga ua tuuto i ai—e amata i le feagaiga sa tatou osia i le papatisoga. Sa aoao mai Peresitene Nelson, “O lo [tatou] tuuto e mulimuli i le Faaola e ala i le osia o feagaiga ma Ia ona tausia lea o na feagaiga, o le a matala ai le faitotoa i faamanuiaga uma faaleagaga ma avanoa e maua.”¹⁵ O se tasi o avanoa faalelagi o le ave i o tatou luga o le suafa o le Faaola e ala i le papatisoga o le gafatia lea e na te tuuina mai i le sauniga e sosoo ai i luga o le ala o le feagaiga, o la tatou faamauga. Ina ua ou fesili i se tasi o a'u uo e valu tausaga i le uiga o le ave o le suafa o Keriso ia te ia, sa ia fai mai, “O lona uiga e mafai ona ou maua le Agaga Paia.” Na sa'o lava o ia.

E maua le meaalofo o le Agaga Paia e ala i le faamauga pe a mavae ona tatou mauaina sauniga o le papatisoga. O le meaalofo o le aia tatau ma le avanoa e maua ai le Agaga Paia o se soa tumau. Afai tatou te faalogo ma usitai i Lona leo filemu ma le itiiti, o le a Ia tausia i tatou i luga o le ala o feagaiga na tatou ulufia e ala i le papatisoga, lapataia i tatou pe a faasoosoina i tatou e o ese mai ai, ma uunaia i tatou e salamo ma fetuunai pe a tatau ai. O la tatou taulaiga pe a mavae le papatisoga o le faatumauina o le Agaga Paia ma i tatou i taimi uma ina ia mafai ona tatou faaauau pea ona agai i luma i le ala o feagaiga. E mafai ona faatasi mai le Agaga Paia mai i tatou i le tulaga tatou



te tausia ai o tatou olaga ia mamā ma saoloto mai le agasala.

Mo lenei mafuaaga, ua saunia e le Alii se ala mo i tatou e faaauau ai pea ona faafouina le aafiaga mamā o lo tatou papatisoga e ala i se isi sauniga—o le faamanatuga. E mafai i vaiaso taitasi ona tatou “molimau atu . . . [tatou] te *loto ina ia ave i o [tatou] luga le suafa o [le] Alo*”¹⁶ ma toe faia foi i le aapa atu ma *tagofia* faatusa o le tino ma le toto o le Alii i o tatou lima—o le areto ma le vai—ma *taumafaina* i totonu o tatou lava agaga. A tatou faia la tatou vaega, e faia e le Faaola Lana vavega i le toe faamamāina o i tatou ma faagavaa i tatou ia maua le uunaiga faifai pea a le Agaga Paia. Pe le o se molimau ea lenei o lona alofa tunoa e lē i'u e na'o le suafa o Iesu Keriso e maua ai? E pei ona ave i ō *tatou* luga Lona suafa, ua *Ia* ave ā tatou agasala ma faanoanoa i *Ona* luga, ae o Lona aao o le alofa tunoa o loo “faaloaloa mai pea”¹⁷ e siosiomia i tatou i aao o Lona alofa.¹⁸

O le faamanatuga o se faamanatu faalevaiaso o le *ave* i o tatou luga o le suafa o Iesu Keriso o se tautinoga ola ma faaauau pea, e le o se mea e tasi e tupu lea e na o le faatasi ona tupu i le aso o lo tatou papatisoga.¹⁹ E mafai ona tatou faaauau pea ma fafia so'o i “le taulaga paia; Lē malamalama; Le tino ma toto; magalo ai sala.”²⁰ E lē o se mea e ofo ai pe a malamalama le fanau a le Atua i faamanuiaga mamana, faaleagaga lea e mafai ona oo mai i le ave i ō latou luga o le suafa o Keriso, e olioli

pea o latou lagona ma lo latou manao ia ulufale atu pea i totonu o se feagaiga ma lo latou Atua.²¹

Ao tatou mulimuli i lenei ala o le feagaiga ua mamauina faalelagi, o lo tatou tuuto ma taumafaiga e ave i o tatou luga le suafa o Iesu Keriso o le a aumaia ia i tatou le malosī “ia tofi [Lona] suafa ia tusia pea i o [tatou] loto.”²² O le a tatou alolofa i le Atua ma o tatou tuaoi ma lagona se manao e auauna atu ia i latou. O le a tatou tausia Ana poloaiga ma mananao ia faalatalata atu ia te Ia e ala i le ulu atu i ni feagaiga faaopoopo ma Ia. Ma a tatou maua i tatou lava ua vaivai ma lē gafatia e faatino ā tatou manaoga amiotonu, o le a tatou augani atu mo le malosī e na o Lona suafa e oo mai ai, ma o le a Ia fesoasoani mai. Ao tatou tumau ai i le faamaoni, o le a oo mai le aso tatou te vaai ai ia te Ia ma faatasi ma Ia, ma o le a tatou iloa ua tatou ave e pei o Ia, ma tatou agavaa ai e toe foi atu i le afioaga o le Tamā.

Auā e moni folafolaga a le Faaola: ia i latou o ē “talitonu i le suafa o Iesu Keriso, ma tapuai atu i le Tamā i lona suafa, ma tumau i le faatuatua i lona suafa e oo i le iuga”²³ o le a faasaoina i le malo o le Atua. Faatasi ai ma outou, ou te olioli i le i ai o nei faamanuiaga le mafaatusalia e ala i le tauaveina i o tatou luga o le suafa o Iesu Keriso, o le e ona ma i lona suafa ou te molimau atu ai, amene. ■

FAAMATALAGA

1. Mose 5:8.
2. Mosaea 3:17.

3. Mataupu Faavae ma Feagaiga 18:23.
4. Dallin H. Oaks, “O Le Ave i o Tatou Luga O Le Suafa o Iesu Keriso,” *Ensign*, Iulai 1985, 76.
5. Mataupu Faavae ma Feagaiga 18:24; ua faaopoopo le faamamafa.
6. Mataupu Faavae ma Feagaiga 20:37; ua faaopoopo le faamamafa.
7. Na aoao mai Peresitene Dallin H. Oaks: “Tatou te ave i o tatou luga le suafa o le Faaola pe a ave i tatou ma uso o Le Ekalesia a Iesu Keriso o le Au Paia o Aso e Gata Ai. . . . I le avea ai o i tatou ma tagata talitonu moni ia Keriso, ma ave ma Kerisiano, ua tatou ave i tatou luga lona suafa (“O Le Ave i o Tatou Luga O Le Suafa o Iesu Keriso,” 80).
8. O loo lisiina i le lomifefiloi o le Merriam-Webster i le initoneti ni faauigaga eseese e 20 o le vaega fesootai o le veape o le *take*, o le vaega lea e faaoga ai le veape i le fuaitau “take upon us the name of Jesus Christ” (merriam-webster.com/dictionary/take).
9. Russell M. Nelson, “O Perofeta, Taitaiga, ma le Tulafono Faalelagi” (faigalotu i le lalolagi atoa mo talavou matutua, 8 Ian, 2017), broadcasts.lds.org.
10. Tagai i le Russell M. Nelson, “O Le Tusi a Mamona: Faamata e Faape’i Lou Olaga e aunoa ma Ia?” *Liahona*, Nov. 2017, 61, 63.
11. Mosaea 18:9.
12. Russell M. Nelson, “Faamoemoe o Israelu” (faigalotu a le autalavou i le lalolagi atoa, 3 Iuni, 2018), HopeofIsrael.lds.org.
13. “Sa uunaia ai e le Alii i lo’u mafaufau le taua o le igoa na Ia faaalai mo Lana Ekalesia, Le Ekalesia a Iesu Keriso o le Au Paia o Aso e Gata Ai. Ua ia i tatou galuega i o tatou luma e aumaia ai i tatou lava i le ogatusa ai ma Lona finagalo” (Russell M. Nelson, “The Name of the Churchstatement to the press, Aug. 16, 2018], mormonnewsroom.org).
14. Tagai i le Moronae 7:19.
15. Russell M. Nelson, “A’o Tatou Agai Faatasi Atu i Luma,” *Liahona*, Ape. 2018, 7.
16. Mataupu Faavae ma Feagaiga 20:77; faaopoopo le faamamafa.
17. 3 Nifae 9:14; tagai foi i le Alema 5:33–34.
18. Tagai i le 2 Nifae 1:15.
19. “Pe a tatou molimauina lo tatou *naunautai* e ave i o tatou luga le suafa o Iesu Keriso, o loo tatou ta’u atu la tatou tautinoga e faia mea uma tatou te mafai ia ausia ai le ola e faavavau i le malo o lo tatou Tama. O loo tatou faailoa atu lo tatou avea ma sui—lo tatou tauivi mo—le faaeaga i le malo selesitila. . . .
“. . . O mea tatou te molimauina e le o mea tatou te *ave* i o tatou luga lona suafa ae ua tatou *naunau* e faia. I lenei tulaga, o lo tatou avea ma molimau e faatatau i ni mea e tutupu i le lumanai po o tulaga e le ausia e le tagata lava ia, ae e faalagolago i le pule po o le taimua a le Faaola lava ia” (Dallin H. Oaks, “O Le Ave i o Tatou Luga O Le Suafa o Iesu Keriso,” 82–83).
20. “Le Atua, le Tama e,” Viiga, nu. 97.
21. Tagai i le Mosaea 5; 6; 18; 3 Nifae 19.
22. Mosaea 5:12.
23. Mataupu Faavae ma Feagaiga 20:29.



Saunia e Elder Dieter F. Uchtdorf

O Le Korama a Aposetolo e Toasefululua

Talitonu, Alofa, Faia

Tatou te ausia le ola atili e ala i le avea ma soo moni o Iesu Keriso—e ala i le mulimuli atu i Ona ala ma auai i Lana galuega.

O’u uso e ma tuafafine, o se taimi matagofie tele le faatasi ai ma outou i lenei sauniga ofoofogia o le konafesi aoao i le asō: o le faalogo atu i savali musuia; faalogo i lenei aufaipese mataina ma matagofie o faifeautalai o loo fai ma sui o le fia afe o faifeautalai i le lalolagi atoa—o o tatou afafine, o o tatou atalii—ma aemaise lava le faatasia ai i lo tatou faatuatuga i lenei aso, i le toe lagolagoina o lo tatou Peresitene ma perofeta pele, o Peresitene Russell M. Nelson, o le Au Peresitene Sili, ma Taitai Aoao o le Ekalesia. O se aso fiafia le faatasi ai ma outou i le asō.

O le Tupu o Solomona anamua o se tasi o tagata soifua sa matuā sili ona

faamanuiaina i le talafaasolopito.¹ Sa foliga mai na ia te ia mea uma—tupe, pule, faaaloalo, mamalu. Ae i le mavae ai o le tele o tausaga o le faamalieina o ona lava manao ma le tamaoiga, na faapefea ona aoteleina e le Tupu o Solomona lona olaga?

“E faatauva me mea uma lava,”² sa ia fai mai ai.

O lenei tagata, na ia te ia mea uma, na i’u i le faanoanoa, masalosalo, ma le le fiafia, e ui i mea uma sa ia te ia.³

E i ai se upu i le FaaSiamani, *Weltschmerz*. E faauigaina gofie, o lona uiga o se faanoanoaga e sau mai le mafaufau tele ma le le fiafia i le auala ua leaga tele ai le lalolagi nai lo le mea tatou te manatu e tatau ona i ai.

Masalo o loo i ai sina *Weltschmerz* (faanoanoaga) ia i tatou uma.

Pe a tolotolo malie mai faanoanoaga i o tatou olaga e aunoa ma le iloina. Pe a lofituina i tatou e faanoanoaga matuitui i le ao atoa ma le po. Pe a oo ia i tatou ni faalavelave ma faiga le tonu a nisi, e aofia ai ma olaga o i latou tatou te alolofa i ai. Pe a tatou lagoina e tele atu mea le lelei ma luitau e tutupu i o tatou lava olaga i lo isi, ma tatou le fiafia ai lava ae tatau ona tatou maua le filemu—e ono faaososoina ai i tatou e ioe faatasi ma Solomona e leai se aoga ma se uiga o le olaga.



O Le Faamoemoe Sili

O le tala fiafia, o loo i ai se faamoemoe. O loo i ai se vaifofo i le leai o se uiga, le aoga, ma le *Weltschmerz* o le olaga. O loo i ai se vaifofo i le matuā leai o ni lagona o le faamoemoe ma le lotovaivai e te ono lagonaina.

O lenei faamoemoe o loo maua i le mana liua o le talalelei a Iesu Keriso ma i le mana togiola o le Faaola e faamalolo ai i tatou mai i o tatou ma'i o le agaga.

“Ua ou sau,” sa tautino mai e Iesu, “ina ia latou maua le ola, ia maua atili ai lava.”⁴

Tatou te ausia lena ola atili e lē ona o le taulai atu i o tatou lava manaoga po o a tatou lava ausiaga ae e ala i le aveia ma soo moni o Iesu Keriso—e ala i le mulimuli atu i Ona ala ma auai i Lana galuega. Tatou te maua le ola atili e ala i le faagaloina o i tatou lava ia ma auai i le galuega tele a Keriso.

Ma o le a le galuega a Keriso? O le talitonu lea ia te Ia, alofa atu e pei ona Ia alofa, ma faia e pei ona Ia faia.

Sa “femaliuai Iesu ma agalelei.”⁵ Sa Ia savavali faatasi ma ē matitiva, o ē ua faaāunu'ua, o ē mama'i, ma ē maasi-asi. Sa Ia auuina atu i ē faatauvaā, o ē vaivai, ma ē ua leai ni uo. Sa Ia faaalu le taimi ma i latou; sa Ia talanoa ma i latou. “Ona faamalolo ai lea e ia o i latou uma.”⁶

Soo se mea na Ia feāfia'i ai, sa aoao atu lava e le Faaola le “tala fiafia”⁷ o le talalelei. Sa Ia faasoa atu upumoni e faavavau na faasoloto ai faaleagaga tagata faapea foi ma le faaletino.

O i latou e tuuto atu i latou lava i lenei lava galuega e tasi e mauaina le upumoni o le folafolaga a le Faaola: “A o le faamaumau lona ola ona o a'u e maua ai e ia.”⁸

O Solomona na sese, ou uso e ma tuafafine pele—o le olaga e lē “faatau-vaā.” I se isi itu, e mafai ona faatumulia i le faamoemoe, uiga, ma le filemu.

O le aao faamalolo a Iesu Keriso o loo aapa atu mo tagata uma e saili ia te Ia. Ua ou iloa e aunoa ma le masalosalo o le talitonu ma le alofa i le Atua ma taumafai e mulimuli ia Keriso e mafai ona suia ai o tatou loto,⁹ faamalu-luina ai o tatou tiga, ma faatumulia ai o tatou agaga i le “olioli tele.”¹⁰



Talitonu, Alofa, Faia

Ioe, e tatau ona tatou faia nisi mea nai lo le na ona i ai o se malamalamaaga faalemafaufau o le talalelei ina ia maua ai lenei aafiaga faamalolo i o tatou olaga. E tatau ona tatou faaoga ina i o tatou olaga—ia avea o se vaega o ō tatou tagata ma mea tatou te faia.

Sei ou fautua atu o le aveia ma soo e amata i upu faigofie e tolu:

Talitonu, alofa, ma faia.

O le talitonu i le Atua e taitai atu i le faatuatua ia te Ia ma le atiina ae o le faalagolago i Lana afioga. O le faatuatua e afua ai ona faateleina i o tatou loto lo tatou alolofa mo le Atua ma isi. A o faateleina lena alofa, e musuia i tatou e mulimuli i le Faaola ao tatou faaauu pea la tatou lava ia malaga i luga o le ala o le aveia ma soo.

“Ae,” e te fai mai, “ua e soona faa-faigofieina lena mea. O faafitauli o le olaga, e mautinoa lava o o'u faafitauli, e matuā faigata lava mo se faamatalaga faigofie. E le mafai ona e foiaina le *Weltschmerz* i ni upu faigofie se tolu: *Talitonu, alofa, faia.*”

E le o le tamai fasi fuaitau e aveesea ai le faanoanoa. O le alofa o le Atua e laveai ai, toe faafou ai, ma toe faaola ai.

E silafia e le Atua oe. O oe o Lana pele. E alofa o Ia ia te oe.

E tusa pe e te mafaufau e lē alofagia oe, e aapa mai o Ia ia te oe.

O le aso lenei—o aso uma—Na te aapa mai ia te oe, e finagalo e faamalolo oe, ia siitia oe i luga, ma suitulaga le gaogao i lou loto i se olioli tumau. E finagalo o Ia e tafiese le pogisa mai lou olaga ma faatumu lou agaga i le malamalama susulu faatupulaia ma paia o Lona mamalu.

Ua ou iloa lenei mea mo a'u lava ia.

Ma o la'u molimau o se Aposetolo a le Alii o Iesu Keriso o tagata uma e o mai i le Atua—tagata uma e *talitonu, alofa* ma *faia* moni—ia mafai ona lagonaina lea mea e tasi.

Matou te Talitonu

Ua aoao i tatou e tusitusiga paia e faapea “a leai se faatuatua e le mafai ona fiafia mai [le Atua]; aua e tatau i lē alu atu i le Atua ona talitonu.”¹¹

Mo nisi, o le faatinoga o le talitonu e faigata. O nisi taimi e faalavelave ai lo tatou faamaualuga. Masalo tatou te mafaufau faapena ona ua tatou atama-mai, aoaoina, pe ua i ai se potomasani, ua faigofie ai ona le talitonu i le Atua. Ma ua amata ai ona tatou tilotilo i tapu-aiga o se tumasani faavalevalea.¹²

I lo'u aafiaga, o le talitonuga e le o se atavali faagaetia tatou te matamata i ai ma faamemelo i ai ma tatou talanoaina ma faaaliali manatu i ai. E foliga o se palau tatou te ave i le fanua ma, e ala i le afu o o tatou mata, e galueaiina

ai atulaina o palapala e toto ai fatu ma fua mai ai ni fua lelei.¹³

Faalatalata atu i le Atua, ona faalatalata mai lea o Ia ia te outou.¹⁴ O le folafolaga lenei ia i latou uma o ē saili ia talitonu.

Tatou te Alolofa

Ua faaali mai e tusitusiga paia o le tele o lo tatou alolofa atu i le Atua ma Lana fanau, o le tele foi lena o lo tatou fialia e i ai.¹⁵ Peitai, o le alofa na fetalai i ai Iesu, e le o se kata faameaalofa mo na'o le taimi e tatau ai, e lafoai ese pe a uma le aoga, po o se alofa e me'i atu i isi mea pe a pasiā. E le o se alofa e tautalagaiaina ona faagalo lea. E le o se alofa foi na le "ta'u mai pe a i ai se mea e mafai ona ou faia".

O le alofa lea e fetalai i ai le Atua o le ituaiga lea e ulufia ia o tatou loto pe a tatou ala a'e i le taeao, tumau ia i tatou i le aso atoa, ma maena i totonu o o tatou loto a o tatou faaleo atua a tatou tatalo o le agaga faafetai i le faaiuga o le aso.

O le alofa le mafaamatalaina lena o loo i ai i lo tatou Tama Faalelagi mo i tatou.

O le agaalofo le muta lea e faatagaina i tatou e vaai manino atili i isi mo tagata o i ai i latou. E ala i le alofa mamā, tatou te vaai ai i tagata faitino o gafatia ma le taua lemafutia ma o ni atalii ma afafine faapelepele o le Atua Silisili Ese.

A tatou vaai atu i lena manino, e le mafai ona tatou manatu faatauva, faatauagavale, pe faailogalanu i soo se tasi.

Tatou te Faia

I le galuega a le Faaola, e tele lava o mea laiti ma faatauva e "faataunuu ai mea tetele."¹⁶

Ua tatou iloa e manaomia ai le faia pea o faataitaiga ina ia lelei i soo se mea. Pe o le iliina o se pu, kikiina o se polo i se neti, lipeaina o se taavale, pe oo lava i le aveina o se vaalele, e ala lava i faataitaiga e mafai ai ona tatou saga lelei atili.¹⁷

O le faalapopotoga na faatuina e lo tatou Faaola i le lalolagi—O Le Ekalesia a Iesu Keriso o le Au Paia o

Aso e Gata Ai—ua fesoasoani ia i tatou ia faia tonu lena mea. Na te ofo maia se nofoaga e faataitai ai ona ola i le ala na Ia aoa mai ma faamanuiaina ai isi i le ala na Ia faia.

I le avea ai ma tagata o le Ekalesia, ua tatou maua ai valaauga, tiutetauave, ma avanoa e aapa atu ai i le agaalofo ma auaunaga i isi.

Talu ai nei, na tuu ai e le Ekalesia se faamamafa faafouina i le auaunaga, po o le auauna atu, po o le alolofa atu i isi. Sa tele ni mafaufauga sa faia e fuafua ai po o le a se igoa e tatau ona tatou ta'u ai lenei faamamafa faapitoa.

O se tasi o igoa sa iloiloina o le *leoleo mamoe*, o se faasinoga talafeagai i le valaaulia a Keriso: "Fafaga a'u mamoe."¹⁸ Peitai, e tasi lava si ona lave: o le faaagaina o lena upu o le a avea ai a'u (ma isi e pei o a'u) ma se *leoleo mamoe Siamani*. O le mea lea, ua faamalieina a'u i le upu *auaunaga*.

O Lenei Galuega e mo Tagata Uma

Ioe, o lenei faamamafa e le fou. Ua ia aumaia se avanoa faafouina ma faaleleia mo i tatou e faataitai ai le poloaiga a le Faaola ia "fealofani."¹⁹ o se auala toe faaleleia e faatino ai ma faataitai le faamoemoega o le Ekalesia.

Mafaufau e uiga i le galuega faafai-feautalai; o le lototele, lotomauualalo, ma le mautinoa i le faasoaina atu o le

talalelei o se faataitaiga matagofie o le auaunaga i manaoga faaleagaga o isi, po o ai lava i latou.

Po o le faia o galuega faalemalu—sailiga o igoa o o tatou tuua ma ofo atu ia i latou faamanuiaga o le faavavau. E maeu lea auala paia o auaunaga.

Mafaufau i le faatinoga o le sailiga o ē matitiva ma lē tagolima, sii a'e o lima ua tautau i lalo, po o le faamanuiaina o ē mama'i ma puapugatia. Pe le o faatinoga tonu ea nei o le auaunaga na faataitai mai e le Alii a o Ia savalia ai le lalolagi?

Afai e le o oe o se tagata o le Ekalesia, ou te valaaulia oe ia sau ma matamata."²⁰ O mai ma auai ma i matou. Afai o oe o se tagata o le Ekalesia ae e te le o toe toaga i le taimi nei, ou te valaaulia oe: faamolemole foi mai. Matou te manaomia outou!

Sau, faaopoopo mai lou malosi i lo matou malosi.

Ona o au taleni tulagaese, tomam, ma uiga tausaaia, o le a e fesoasoani ai ia i matou ia lelei atili ma fialia atili. A e faia lenei mea, o le a matou fesoasoani atu ia te oe ia lelei atili ma fialia atili foi.

Sau, fesoasoani ia i matou e fausia ma faamalosia se aganuu o le faamalogaga, agalelei, ma le alofa mutimutivale i fanau uma a le Atua. Aua o loo tatou tauivi uma ina ia avea ma tagata fou lea



“ua mavae mea tuai” ma “ua faafouina . . . mea uma.”²¹ Ua faaali mai e le Faaola ia i tatou le itu e agai i ai—i luma ma luga. Ua fetalai o Ia, “Afai tou te alofa mai ia te au, ia outou tausii mai i a’u poloaiga.”²² Ia tatou galulue faatasi uma ia avea ma tagata ua faamoemoe le Atua mo i tatou e avea ai.

O le ituaiga lenei o aganuu faale-talalelei tatou te mananao e atiae i le Ekalesia atoa a Iesu Keriso. Tatou te saili ina ia faamalosia le Ekalesia o se nofoaga lea tatou te faamagalo ai i le tasi ma le isi. O le nofoaga tatou te tetee atu ai i le faaosoosoga o le sailiili masei, faitatala, ma le faalumaina o isi. O le nofoaga, nai lo le tusitusilima i measese, tatou te siitia i luga ma fesoa-soani i le tasi ma le isi ia avea ma tagata sili e mafai ona tatou avea ai.

Se’i o’u toe valaauliaina outou. Sau ma vaai. Auai faatasi ma i matou. Matou te manaomia outou.



Tagata e Lē Atoatoa

O le a e mauaina o lenei Ekalesia ua faatumulia i nisi o tagata sili ona lelei e te maua i lenei lalolagi. Latou te tusaafia, agaalofo, agalelei, ma faamaoni. Latou te galulue malolosi, naunau e ositaulaga, ma lotototoa i le tele o taimi.

Latou te le atoatoa foi ma le tiga.

Latou te faia ni mea sese.

I nisi o taimi latou te faaleo atu ni mea e lē tatau ona latou faia. Latou te faia ni mea latou te moomoo latou te le’i faia.

Ae latou te tutusa uma i le mea lenei—latou te mananao ia faaleleia ma faalatalata atili atu i le Alii, lo tatou Faaola, o Iesu Keriso.

O loo latou taumafai ina ia faia ia sa’o.

Latou te *talitonu*. Latou te *alolofa*. Latou te *faia*.

Latou te mananao ia faaititia le manatu faapito, faatele le agaalofo, faaleleia atili, ma avea atili e pei o Iesu.

O Le Mamanu mo le Fiafia

Ioe, e i ai taimi e faigata ai le olaga. E mautinoa lava e tofu i tatou ma ni taimi o faanoanoaga ma le lotovaivai.

Ae ua ofo mai e le talalelei a Iesu Keriso le faamoemoe. Ma, i le Ekalesia

a Iesu Keriso, tatou te auai faatasi ai ma isi o ē o loo saili i se nofoaga o le aiga ma le faauooga—o se nofoaga o le tuputupu a’e lea e mafai ai ona tatou *talitonu*, *alofa*, ma *faia*.

Po o a lava o tatou eseesega, tatou te saili ina ia taliaina le tasi ma le isi o ni atalii ma afafine a lo tatou Tama Faalelagi pele.

E matua le mafuatia lo’u lotofaafetai i le avea ai ma se tagata O Le Ekalesia a Iesu Keriso o le Au Paia o Aso e Gata Ai ma iloa ua lava le alofa o le Atua i Lana fanau e avatu ai ia i latou se mamanu mo le fiafia ma le uiga i lenei olaga ma se auala e lagona ai le olioli e faavavau i maota o le mamalu i le olaga a sau.

Ou te faafetai ua tuuina mai e le Atua ia i tatou se ala e faamalolo ai ma’i o le agaga ma le *Weltschmerz* (faanoanoaga) o le olaga.

Ou te molimau atu ma tuuina atu la’u faamanuiaga pe a tatou *talitonu* i le Atua, pe a tatou *alolofa* ia te Ia ma *alolofa* i Lana fanau ma o tatou loto atoa, ma ao tatou tauivi e *faia* e pei ona faatonuina ai i tatou e le Atua, o le a tatou maua le faamalologa ma le filemu, fiafia ma le uiga [o le olaga]. I le suafa paia o Iesu Keriso, amene. ■

FAAMATALAGA

1. I se saililiga a le msn.com na lisiina ai Solomona o le tagata lona lima aupito sili ona mauoa na soifua. “E tusa ma le Tusi Paia, sa pule le Tupu o Solomona mai le 970 TLM i le 931 TLM, ma i lena taimi sa faamatalaina ai na ia mauaina le 25 tone o auro mo tausaga taitasi o tausaga e 39 o lana nofoaiga, lea e faitau piliona talā lona tau i le 2016. Faatasi ai ma isi oa taugata faateleina mai lafoga ma fefaatauaiga, o le tamaoaga patino a le tupu o le tusi paia e ono pasia le \$2 kiliona talā i tupe o aso nei” (“The 20 Richest People of All Time,” Apr. 25, 2017, msn.com).
2. Tagai i le Failauga 1:1–2.
3. Tagai i le Failauga 2:17.
4. Ioane 10:10.
5. Galuega 10:38.
6. Mataio 12:15; tagai foi i le Mataio 15:30.
7. O le upu *gospel* e i ai ona a’a i le upu Eleni o lona uiga moni o le “tala lelei” (tagai i le Bible Dictionary, “Gospels”).
8. Mataio 16:25.
9. Tagai i le Esekiele 36:26; Ieremia 24:7.
10. 1 Nifae 8:12.
11. Eperu 11:6.
12. Tagai i le 2 Nifae 9:28.
13. Tagai Ioane 15:16.
14. Tagai i le Iakopo 4:8.
15. Tagai i le 4 Nifae 1:15–16.
16. Alema 37:6.
17. Sa talitonu Aristotle e faapea “e ala i le faia o faatinoga amiotonu e gaosi ai le tagata amiotonu” (*The Nicomachean Ethics*, trans. David Ross, rev. Lesley Brown [2009], 28).
18. Tagai i le Ioane 21:15–17.
19. Ioane 15:12.
20. Ioane 1:39.
21. 2 Korinito 5:17.
22. Ioane 14:15.



Saunia e Joy D. Jones

Peresitene Aoao o le Peraimeri

Mo Ia

I le iloaia o le o ai ma le aisea i le auauna atu i isi e fesoasoani ia i tatou ia malamalama o le faaaliga aupito sili ona maua luga o le alofa o le tuuto atu lea i le Atua.

I lenei po taua, ou te faailoa atu lou alofa ma le talisapaia o outou taitoa-tasi, o o'u uso pele. Po o le a lava lou matua, nofoaga, po o le tulaga, tatou te potopoto i lenei po i le lotogatasi, i le malosi, i le faamoemoe, ma i le moli-mau e alofagia ma taitaia i tatou e lo tatou Tama Faalelagi, lo tatou Faaola, o Iesu Keriso; ma lo tatou perofeta soifua, o Peresitene Russell M. Nelson.

Ao avea i ma'ua ma se ulugalii talavou, sa valaauina lo'u toalua ma a'u e lo matou epikopo e asiasi ma auauna atu i se aiga ua tele tausaga e le'i toe o mai i le lotu. Sa ma taliaina ma le nautai le tofiga ma o'atu i lo latou aiga i nai aso mulimuli ane. Sa vave ona manino ia i maua latou te le mananao i ni tagata asiasi mai i le Ekalesia.

O le isi la a ma asiasiga, sa ma o atu ma se ipu kuki mo i latou, ma le mautinoa o keke sukalati o le a ootia ai o latou loto. Ae leai. Sa talanoa mai le ulugalii ia i maua e ala i le faitotoa valavala, ma faamanino atili mai e le taliaina i maua. Ae a o ma tietie atu i le fale, sa ma mautinoa lelei atonu e ausia le manuia pe ana ma tuuina atu ni Krispies Alaia.

O le leai o se ma vaaiga mamao faaleagaga na faaopoopo ai taumafaiga le manuia faaosoi. O le teenaina e le

maua ai se toafimalie. I le aluga o taimi sa amata ona ma fesili ifo ia i maua lava, "Aisea ta te faia ai lenei mea? O le a le ma faamoemoega?"

Sa faapea mai Elder Carl B. Cook: "O le auauna atu i le Ekalesia, e mafai ona faigata pe a talosagaina i tatou e faia se mea tatou te fefefe ai, pe a tatou le lavava e auauna atu, pe afai ua valaauina i tatou e fai se mea tatou te lei muamua fuafua i ai."¹ Sa ma lagonaina le moni o upu a Elder Cook ina ua ma filifili e tatau ona ma sailia le taitaiga mai i se Tasi o i ai se vaaiga e sili atu i lo ma'ua.

O lea, i le mavae ai o le tele o le tatalo ma le suesuega, sa ma maua le tali i le aisea o le ma auaunaga. Sa ia i maua se suiga i la maua malamalama-aga, se liuga o le loto, e moni lava o se aafiaga faafaaaliga.² Ao ma saili atu mo le taitaiga mai i tusitusiga paia, sa aoao i maua e le Alii i le auala e faia ai le gasologa o le auauna atu i isi ia faigofie atu ma sili ona anoa. O le fuai-upu lea sa ma faitauina ma sa suia uma ai o maua loto ma la maua auala: "Ia e alofa atu i le Alii lou Atua ma lou loto atoa, ma lou manatu atoa, mafaufau, ma le malosi; ma ia e auauna atu ia te ia i le suafa o Iesu"³ E ui lava o lenei fuaiupu e masani tele i ai, ae na foliga

mai sa talanoa mai ia i maua i se auala fou ma taua.

Sa ma iloaia sa ma taumafai ma le faamaoni e auauna atu i lenei aiga ma ia auauna atu i la ma epikopo, ae sa tatau ona ma fesili ifo ia i maua lava pe na ma auauna moni atu ma le alofa i le Alii. Na faamanino mai e le Tupu o Peniamina lenei eeseega ina ua ia faapea mai, "Faa'uta ou te fai atu ia te outou ona ua ou fai atu ia te outou sa ou faa'aga o'u aso e auauna atu ai ia te outou, ou te le fia mitamitavale ona sa na o lo'u auauna atu lava lea i le Atua."⁴

O lea la, o ai sa auauna moni i ai le Tupu o Peniamina? O le Tama Faalelagi ma le Faaola. I le iloaia o le o ai ma le aisea i le auauna atu i isi e fesoasoani ia i tatou ia malamalama o le faaaliga aupito sili ona maua luga o le alofa o le tuuto atu i le Atua.

Ao faasolo ina sui la ma taulaiga, sa faapena foi a ma tatalo. Sa amata ona ma tulaia atu ma le fiafia i a maua asiasiga faatasi ma lenei aiga pele ona o le ma alolofa mo le Alii.⁵ Sa ma faia mo Ia. Sa Ia faia le tauiviga e le o se mamafatū. I le tele o masina o lo ma tutu ai i le fasitepu o le faitotoa, sa amata ona avatu maua i totonu e le aiga. Mulimuli ane, sa matou faia tatalo e le aunoa ma talanoaga faatasi faale-talalelei. Sa atia'e se faauōga umi ma tumau. Sa matou tapuai atu ma alolofa ia te Ia e ala i le alofa i Lana fanau.

E mafai ona e mafaufau i tua i se taimi sa e aapa atu ai ma le alofa ma se taumafaiga faamaoni e fesoasoani i se tasi na manaomia se fesoasoani ma lagonaina sa le amanaia au taumafaiga pe atonu sa le talisapaia pe sa le manaomia foi? I lenei taimi, sa e fesiligia le taua o lau auaunaga? Afai o lea, e faamoemoe o upu a le Tupu o Peniamina o le a suitulaga i ou masalosologa ma faapena foi le tiga: "Ua nao lo outou auauna atu lava lea i lo outou Atua."⁶

Nai lo le atiae o le ita, e mafai ona tatou fausia, e ala i le auaunaga, se sootaga sili atu atoatoa ma lo tatou Tama Faalelagi. O lo tatou alofa mo Ia ma le tuuto ia te Ia e aveese ai le manaomia o le viiga po o le talisapaia ma faataga Lona alofa e oo mai ia i tatou ma oo mai i totonu o i tatou.



O nisi taimi tatou te muamua auauna atu mai se lagona o le tiute po o le matafaioi, ae o lena lava auaunaga e mafai ona taitai atu ai i tatou e faa-aoga se mea e maua atu i totonu o i tatou, e taitai atu i tatou e auauna atu i “le ala silisili lava”⁷—e pei ona i ai le valaaulia a Peresitene Nelson i “se auala fou atu, ma paia atu e tausia ma auauna atu ai i isi.”⁸

A tatou taulai atu i mea uma na faia e le Atua mo i tatou, e faaosofia e lagona o le loto faafetai. Ao amata faaitiitia lo tatou popole e uiga i le faalauaiteina o i tatou e a tatou auu-naga, o le a tatou iloina o le taulaiga o la tatou auaunaga o le faamuamua lea o le Atua.⁹

Sa aoao mai Peresitene M. Russell Ballard, “Ua na o lo tatou alolofa lava i le Atua ma Keriso ma lo tatou loto atoa, manatu atoa, ma le mafaufau atoa ua mafai ai ona tatou faasoa atu lenei alofa i o tatou tuaoi e ala i galuega agaalofa ma le auauna atu.”¹⁰

O le [poloiga] muamua o Poloiga e Sefulu ua toe taua ai lenei malamalamaaga paia: “O a’u o Ieova lou Atua. . . . Aua nei e fai mo oe ni atua ese i o’u luma.”¹¹ O le faatulagaina o lenei poloiga e fesoasoani ia tatou malamalama ai *afai* tatou te avea o Ia ma o tatou faamuamua taua, o isi mea uma o le a faatulagaina lelei—e oo lava i a tatou auaunaga i isi. Afai Na te tau-aveina le tulaga sili ona taua i o tatou olaga e ala i a tatou filifiliga lelei, ona

mafai lea ona Ia faamanuiaina a tatou faatinoga mo lo tatou lelei ma mo le lelei o isi tagata.

Sa apoapoi mai le Alii, “Vaai mai ia te a’u i mafaufauga uma.”¹² Ma ua tatou osifeagaiga ai i vaiaso taitasi e faia lena mea—ia “manatua pea o ia.”¹³ E mafai ona faa-aoga lea taulaiga faaleatua i mea uma tatou te faia? E mafai ona avea le faia e oo lava i se galuega faatauvaa ma se avanoa e faatino ai lo tatou alolofa ma le tuuto ia te Ia? Ou te talitonu e mafai ma o le a mafai.

E mafai ona tatou avea mea taitasi i le tatou lisi o mea e fai ma se auala e faamamalu ai o Ia. E mafai ona tatou vaai i galuega taitasi o se faamanuiaga ma se avanoa e auauna atu ai ia te Ia, e tusa po o tatou i ai i le lotolotoi o mea e faagata, tiute, po o napekini leaga.

E pei ona fai mai Amona, “Ua tusa au nei ma le leai; o lo’u malosi foi ua ou vaivai ai; o le mea lea ou te le mitamita ai ia te au lava, ae peitai, ou te mitamita i lo’u Atua, aua o Lona malosi ou te mafaia ai mea uma.”¹⁴

Pe a avea le auauna atu i lo tatou Atua ma o tatou faamuamua taua i le olaga, tatou te faama’umau i tatou lava, ma mulimuli ane, tatou te maua ai i tatou lava.¹⁵

Na faigofie ma tuusao le aoaoina e le Faaola o lenei mataupu faavae: “O lea ia faasusulu atu ai lo outou malamalama i luma o lenei nuu, ina ia latou vaai ai ia outou galuega lelei ma *via lo outou Tamā* o i le lagi.”¹⁶

Ou te fia faasoa atu ma outou ni upu atamai lea na maua i luga o le puipui o se fale mo tamaiti ua leai ni matua i Calcutta, Initia: “A e agalelei, e mafai ona tuuaia oe i ni faamoemoega lilo ma manatu faapito. Ia agalelei pea. O mea sa e faaalu le tele o tausaga e te fausia, e mafai e se tagata ona faaleaga-ina i le po e tasi. Fausia pea. O le lelei e te faia i le asō, e masani ona galo i tagata i le aso a taeao. Ia faia pea le lelei. Tuu atu i le lalolagi le lelei silisili o ia te oe, ma atonu e le mafai ona lava. Tuu atu pea i le lalolagi le lelei silisili o ia te oe. E te iloina, i le taimi mulimuli, e i le va lava o oe ma lou Atua . . .”¹⁷

Uso e, e i le va lava o oe ma le Alii. E pei ona saunoa mai Peresitene James E. Faust: “‘O le a le manaoga silisili i le lalolagi?’ . . . ‘E lē o le manaoga silisili ea i le lalolagi atoa e mo tagata taitoatasi ina ia maua se sootaga patino, faifai pea, i aso taitasi, ma le Faaola.’ O le i ai o se sootaga faapena e mafai ai ona faaali mai le paia i totonu o i tatou, ma e leai se mea e faia se eseesega silisili i o tatou olaga pe a tatou iloa ma malamalama i la tatou sootaga paia ma le Atua.”¹⁸

E faapena foi, sa faamatala atu e Alema i lona atalii, “Ioe, tuu atu i le Alii au mea uma e fai, ma soo se mea e te alu i ai ia tuu atu i le Alii; ioe, ia tuu atu ou manatu uma i le Alii; ioe, ia tuu atu alofaaga o lou loto i le Alii e faavavau.”¹⁹

Ma sa faapena foi ona aoao mai i tatou e Peresitene Russell M. Nelson, “A tatou manatunatu i Lana Togiola ofo fua mai, soo se lagona lava o le ositaulaga i la tatou vaega e matua ufitia atoa e se lagona o le faafetai tele mo le avanoa paia e auauna atu ai ia te Ia.”²⁰

Uso e, ou te molimau atu afai e galue Iesu Keriso e ala i le mana o Lana Togiola, *ia i* tatou ma i *totonu* o i tatou, e amata ona Ia galue *e ala* ia i tatou e faamanuia ai isi. Tatou te auauna atu ia i latou, ae tatou te faia e ala i le alofa ma auauna atu ia te Ia. Tatou te avea ma mea ua faamatala mai e le mau: “E saili ai e tagata [ma tamaitai] taitoatasi le lelei o lē la te tuaoi, ma faia mea uma ma le manatu tasi i le mamalu o le Atua.”²¹

Masalo na silafia e la matou epikopo o le lesone lēna o le a ma aoaoina ma lo’u toalua mai i na taumafaiga muamua ma lelei, ae e lē atoatoa, e auauna atu ai i Ana atalii ma afafine pele. Ou te tuuina atu lau molimau patino ma le mautinoa i le agalelei ma le alofa Na te faasoa mai ia i tatou ao tatou taumafai e auauna atu mo Ia. I le suafa paia o Iesu Keriso, amene. ■

FAAMATALAGA

1. Carl B. Cook, “Auauna Atu,” *Liahona*, Nov. 2016, 110.
2. Tagai i le Mosaea 5:2.
3. Mataupu Faavae ma Feagaiga 59:5; ua faapoopo le faamamafa.
4. Mosaea 2:16; faapoopo le faamamafa.
5. Tagai 1 Nifae 11:22.
6. Mosaea 2:17.
7. 1 Korinito 12:31.
8. Russell M. Nelson, “Auaunaga,” *Liahona*, Me 2018, 100.
9. Tagai Mataio 6:1–4, 33.
10. M. Russell Ballard, “Mauaina o le Olioli e Ala i Auaunaga Alofa,” *Liahona*, Me 2011, 47.
11. Esoto 20:2–3.
12. Mataupu Faavae ma Feagaiga 6:36.
13. Mataupu Faavae ma Feagaiga 20:77, 79.
14. Alema 26:12.
15. Tagai i le Mataio 16:24–25.
16. 3 Nifae 12:16; faapoopo le faamamafa.
17. E masani ona tuuina ia Mother Teresa; tagai Kent M. Keith, *The Paradoxical Commandments* (1968).
18. James E. Faust, “A Personal Relationship with the Savior,” *Ensign*, Nov. 1976, 58.
19. Alema 37:36.
20. Russell M. Nelson, “O Le Togiola,” *Liahona*, Nov. 1996, 35.
21. Mataupu Faavae ma Feagaiga 82:19.



Saunia e Michelle D. Craig

Fesoasoani Muamua i le Au Peresitene
Aoao o Tamaitai Talavou

Lē Faamalieleina Faaleagaga

O le lē faamalieleina faaleagaga e mafai ona faaosofia i tatou e faatino i le faatuatua, mulimuli i valaaulia a le Faaola e fai ia mea lelei, ma tuu atu ma le faamaualalo o tatou olaga ia te Ia.

Ao ou i ai i le aoga tulagalua, sa matou savavali i le fale i se auala sopo simā e taamilo i tua ma luma agai i luga i le pito mauga. Sa i ai seisi auala sopo, e lē faasimāina, na ta’ua o le “auala a tama.” O le auala sopo a tama o se auala palapalā lea na alu atu sa’o i luga o le mauga. Sa puupuu atu ae sa fai si tu tele i luga. A o o’u teine talavou, sa ou iloa na mafai ona ou savali i luga i soo se auala sopo na mafai ona o ai tama. O le mea e sili ona taua, sa ou iloa ina sa ou ola i aso e gata ai ma o le a ou manaomia ona faia ni mea faigata, e pei ona faia e paionia—ma sa ou manao ai ina ia saunia. O lea la mai lea taimi i lea taimi, ou te faagesegese ai i tua o la’u vaega o uo i luga o le ala sopo simā, aveese o’u seevae, ma savali e leai ni seevae i luga o le ala sopo a tama. Sa ou taumafai e faamalolosi o’u vae.

A o avea ma se teineitiiti o le Peraimeri, o le mea lēna sa ou manatu e mafai ona ou faia e saunia ai. O lenei la ua ou iloa se isi mea! Nai lo le savali e leai ni seevae i luga o ala sopo o le mauga, ou te iloa e mafai ona ou saunia o’u vae e savali i luga o le ala o

feagaiga e ala i le tali atu i valaaulia a le Agaga Paia. Auā o le Alii, e ala i Lana perofeta, o loo valaau mai ia i tatou taitoatasi ina ia ola ma tausia [isi] i se “auala maua luga atu ma paia atu” ma ia “faia se la’a maua luga atu.”¹

O nei valaau faaperofeta e faatino, ua vaavaalua ma lo tatou lagona natura e mafai ona tatou faia ma ia sili atu, i nisi taimi e fatu ai i totonu o i tatou le mea na ta’ua e Elder Neal A. Maxwell o le “lē faamalieleina faaleagaga.”² E o’o



mai le le faamalieina faaleagaga pe a tatou faatusatusa le “tulaga o tatou *i ai* [i le] tulaga ua i ai le mana ia i tatou e *avea ai*.”⁵ O i tatou taitoatasi, pe afai tatou te faamaoni, e lagonaina se va i le tulaga o tatou i ai ma tagata o tatou i ai, ma i le tulaga ma tagata tatou te mananao e aveai. Tatou te naunau mo le gafatia patino sili atu. Tatou te maua nei lagona ona o i tatou o afafine ma atalii o le Atua, ua fananau mai ma le Malamalama o Keriso ae o loo ola i se olaga pa’ū. O nei lagona ua tuuina mai e le Atua ma e fatu ai se naunautiga e faatino.

E tatau ona tatou taliaina ni lagona o le lē faamalieina faaleagaga ia e valaau mai ia i tatou i se auala maualuga atu, ae ia iloa ma aloese mai mea taufaasese a Satani—e faavaivailoto. O se avanoa taua lenei e oso mai ai Satani e matua faavaivaia o tatou loto. E mafai ona tatou filifili e savavali i ala maualuluga atu ia e taitai atu ai i tatou e saili mo le Atua ma Lona filemu ma le alofa tunoa, ia po o lo tatou faalogo atu ia Satani, o lē e osofaia i tatou i savali ia o le a lē taitai lava le lelei: le lava le tamaoaga, le lava le atamai, le lava le matagofie, le lava i soo se mea. O lo tatou lē faamalieina e mafai ona faaleagaga—pe faataumaioi.

Faatino i le Faatuatua

O se tasi o auala e iloa ai le lē faamalieina faaleagaga mai mea taufaasese a Satani e faapea, o le lē faamalieina faaleagaga o le a taitai atu ai i tatou i faatinoga o le faatuatua. O le lē faamalieina faaleagaga e lē o se valaaulia e nofonofo ai i lo tatou tulaga mafanafana, pe taitai atu ai i tatou i le faanoanoa. Ua ou aoao pe a ou faatagaina ni lagona lē lelei o mea uma ou te lē aveai, ou te lē alualu i luma, ma ou te iloaia e sili atu ona faigata ona ou lagonaina ma mulimuli i le Agaga.⁴

A o aveai ma se alii talavou, sa silafia lelei e Iosefa Samita ona vaivaiga ma sa popole e uiga i “le manuia o [lona] agaga e faavavau.” I ana upu, “Na oo ina matua mafatia lo’u mafaufau, aua na oo ina ou lagonaina le maasiasi ona o a’u agasala, ma . . . na ou lagona ai lo’u matua faanoanoa mo a’u lava



agasala ma agasala a le lalolagi.”⁵ O lenei mea na taitai atu ai o ia e “manatunatu mamafa ma lē mautonu tele.”⁶ E masani ona e faalogo i lena faaupuga? O ‘e lē mautonu pe faanoanoa i ou vaivaiga?

Ia, sa *faia* e Iosefa se mea. Sa ia faasoa mai, “Sa masani ona ou fai ifo ia te a’u lava ia: O le a le mea e ao ona *fai*?”⁷ Sa faatino Iosefa i le faatuatua. Sa ia liliu atu i tusitusiga paia, faitau le valaaulia i le Iakopo 1:5, ma liliu atu i le Atua mo le fesoasoani. O le faaliga na o’o mai sa amata ai le Toefuataiga. Ou te matua’i faafetai i le lē faamalieina faaleagaga o Iosefa, o lona vaitaimi o le lē mautonu ma le fenumiai, na uunaia ai o ia e faatino i le faatuatua.

Mulimuli i Uunaiga e Fai Mea Lelei

E masani ona faaaoaga e le lalolagi se lagona o le lē faamalieina e fai ma ‘alofaga mo le manatu faapito, mo le liliu atu o ō tatou manatu ia i tatou lava ma i le tuana’i ma mafaufau ai le tagata ia te ia lava i le tagata o *o’u* i ai, o le tagata ua *ou* le aveai, ma mea *ou te* manao ai. O le lē faamalieina faaleagaga e faaosofia ai i tatou e mulimuli i le faataitaiga a le Faaola, o lē “sa femaliui ma agalelei.”⁸ A o tatou savalia le ala o le aveai ma soo, tatou te maua uunaiga faaleagaga e aapa atu i isi.

O se tala sa ou faalogo ai i le tele o tausaga ua mavae sa fesoasoani ia te a’u ia iloa ona faatino lea i luga o uunaiga mai le Agaga Paia. Sa faasoa mai e Sister Bonnie D. Parkin, sa aveai muamua ma Peresitene Aoao o le Aualofa, le tala lenei:

“O Susana . . . sa aveai ma tagata su’isu’i lelei. Sa nofo Peresitene [Spencer W.] Kimball i [lana] uarota. I se tasi o Aso Sa, sa matauina ai e Susana ua i ai se suti fou [a Peresitene Kimball]. Ae sa aumai talu ai nei e le tamā [o Susana] . . . ni ana ie silika matagofie tele. Sa mafaufau Susana o lena ie o le a fai ai se fusiua aulelei e fetaui ma le suti fou a Peresitene Kimball. Sa ia faia loa le fusiua i le Aso Gafua. Sa ia afifiina i se pepa vaivai ma savali atu i le auala i le maota o Peresitene Kimball.

“A o agai atu i le faitotoa i luma, sa faafuasei ona tu o ia ma mafaufau, ‘O ai a’u e faia ai se fusiua mo le perofeta? Masalo e tele na’ua ni ana fusiua.’ I lana faaiuga sa ia faia ai se mea sese, sa ia liliu e alu.

“Ae tatala mai loa e Sister Kimball le faitotoa i luma ma faapea mai, ‘Oi, Susana!’

“I lona popole tele, sa fai atu ai Susana, ‘Sa ou vaai ia Peresitene Kimball i lana suti fou i le Aso Sa. Na



faato'a aumai e Tamā ni ie silika mai Niu Ioka . . . ma o lea sa ou faia ai se fusiua mo ia.'

"A o lei mafai ona faaauau le tala a Susana, sa taofi o ia e Sister Kimball, tuu ona aao i ona tau'au, ma fai atu: 'Susana, 'aua lava ne'i teenaina se mafaufauga lelei.'"⁹

Ou te fialia i lena tala! "'Aua lava ne'i teenaina se mafaufauga lelei." O nisi taimi pe a ou maua se uunaiga e faia se mea mo se tasi, ou te mafaufau lava po o se musumusuga pe ua na o o'u lava mafaufauga. Ae ua faamanatu mai ia te a'u, "o le mea ua mai le Atua, e valaau ma faatosina mai ia faia mea lelei e le aunoa; o le mea lea, o mea uma e valaau mai ma faatosina mai ia faia mea lelei, ma alofa i le Atua, ma auauna atu ia te ia, ua musuia e le Atua."¹⁰

Pe o na manatu o ni uunaiga tuusa'o mai pe ua na o se lagona e fesoasoani atu, e lē ma'umauina se galuega lelei; aua "e lē uma le alofa"¹¹—ma e lē mafai ona avea ma se tali sesē.

E masani lava o le taimi e oo mai ai e faigata, ma e seāseā ona tatou iloa le aafiaga o a tatou faatinoga laiti o le auaunaga. Ae mai lea taimi i lea taimi, o le a tatou iloina lava na avea i tatou ma mea faigaluega i aao o le Atua ma o

le a tatou faafetai i le iloina o le galue o le Agaga Paia e ala atu ia i tatou o se faailoaga lea o le faamaoniga a le Atua.

Uso e, e mafai e oe ma a'u ona ōle atu mo le Agaga Paia e faaali mai ia i tatou "mea uma e tatau ona [tatou] faia,"¹² e tusa pe foliga mai ua tumu le lisi o a tatou mea e fai. Pe a uunaia ai, e mafai ona tatou tu'u ipu e lē fufulua po o isi mea o loo mananao isi tatou te faia ina ia faitau atu ai se tusi mo se tamaititi, asiasi i se uo, vaai le fanau a se tuaoi, pe auauna atu i le malumalu. 'Aua ne'i malamalama sesē ia te a'u—e fai foi a'u lisi; ou te fialia e kolosi ese mea ua uma ona fai. Ae e oo mai le filemu i le iloina o le *avea* ma tagata lelei atu e lē faapea e tutusa ma le *faia* o ni galuega se tele atu. I le tali atu i le lē faamalieina e ala i le filifili e mulimuli i uunaiga e suia ai le ala ou te mafaufau ai e uiga i "lo'u taimi," ma ou vaai atu ai i tagata e lē o ni faalavefau ae o se faamoemoega o lo'u olaga.

O Le Lē Faamalieina Faaleagaga e Taitai Atu ai i Tatou ia Keriso

O le lē faamalieina faaleagaga e taitai atu i le lotomauualalo, e lē o le faanoanoa ia te oe lava ia po o le lotovaivai lea e sau mai le faia o faatusasaga ia e lē lava ai lo tatou lelei i taimi uma. O tamaitai tasi feagaiga o ituaiga eseese; o latou aiga, o aafiaga o ō latou olaga, ma o latou tulaga e eseese uma.

Ioe, o le a le atoatoa i tatou uma mo lo tatou gafatia faalelagi, ma o loo i ai se upumoni i le iloina e faapea, *a tuua na o i tatou* ona le lava lea mo i tatou. Ae o le tala fialia o le talalelei e faapea o le alofa tunoa o le Atua, *e* lava ai mo i tatou. Faatasi ai ma le fesoasoani a Keriso, e mafai ai ona tatou faia mea uma.¹³ Ua folafola mai e tusitusiga paia o le a tatou "maua ai foi le alofa tunoa e fesoasoani mai i ona aso e tatau ai."¹⁴

O le upumoni e faate'ia ai e faapea o o tatou vaivaiga e mafai ona avea ma o tatou faamanuiaga pe a latou faalotomauualaloina i tatou ma liliu atu i tatou ia Keriso.¹⁵ O le lē faamalieina e avea ma mea paia pe a tatou o atu ma le lotomauualalo ia Iesu Keriso ma lo tatou manao, nai lo le taofia ona o le faanoanoa ia te oe lava ia.

O le mea moni, o vavega a Iesu e tele ina amata i se faailoaga o le manao, mea e manaomia, toilalo, po o ni lē atoatoa. Manatua ia areto ma i'a? O tusitala taitasi o Evagelia na tusia le auala na fafaga faavavega ai e Iesu le faitau afe o ē na mulimuli ia te Ia.¹⁶ Ae e amata le tala i le faailoa mai e soo o mea na latou lē maua; sa latou iloina sa na o "areto karite e lima, ma nai i'a iti e lua lau: a e aumā ea ia mea ia i latou e toatele?"¹⁷ Sa sa'o le 'au soo: sa *le'i* lava ni meaai na ia i latou, ae na latou avatu mea sa ia i latou ia Iesu ma sa *Ia* saunia ai le vavega.

Pe sa e manatu ea e lē lava au taleni ma meaalofo mo le galuega o i luma atu? Sa ou maua ai. Ae e mafai e oe ma a'u ona avatu mea ua ia i ta'ua ia Keriso, ma o le a Ia faateleina a tatou taumafaiga. O mea e te ofoina atu ua sili atu ona lava—e tusa po o a ou sesē ma vaivaiga—*pe afai* e te faalagolago i le alofa tunoa o le Atua.

O le mea moni o i tatou taitoatasi e tasi se tupulaga e mamao ai mai le Aiga Atua—o se afafine o le Atua.¹⁸ Ma e pei ona Ia faia i perofeta uma ma alii ma tamaitai faatauvaia i le gasologa o tausaga, e faapena foi ona faamoemoe le Tama Faalelagi e liua i tatou.

Sa faamatala e C. S. Lewis le mana e liua ai i le ala lena: "Mafaufau ia te oe lava o se fale o loo ola. Ua afio mai le Atua i totonu e toe fausia lena fale. I le taimi muamua, atonu, e mafai ona e malamalama i mea o loo Ia faia. Ua Ia faasa'osa'o ina ia talivai ma taofi ia tutulu o le tauluga ma isi mea faapena: na e iloa o na galuega sa manaomia ona fai ma o lea e te le o te'i ai. Ae o le taimi nei ua amata ona Ia tu'itu'i i le fale i se auala e matuā tiga ai. . . . [Ua e iloa,] o loo Ia fausia se fale e 'ese mai le fale na e mafau-fau i ai Sa e manatu o le a faia oe o se tamai faleoo manaia; ae o loo Ia fausia se maota tautupu telē. Ua faamoemoe o Ia e afio mai ma nofo ai o Ia lava i totonu."¹⁹

Ona o le taulaga togiola a lo tatou Faaola, ua mafai ai ona tatou maua le gafatia i galuega o loo i le humanai. Ua aao mai perofeta e faapea, a o tatou ā'ea le ala o le avea ma soo, e mafai

ona faapaiaina i tatou e ala i le alofa tunoa o Keriso. O le lē faamalieina faaleagaga e mafai ona faaosofia i tatou e faatino i le faatuatua, mulimuli i valaaulia a le Faola e fai ia mea lelei, ma tuu atu ma le faamaualalo o tatou olaga ia te Ia. I le suafa, o Iesu Keriso, amene. ■

FAAMATALAGA

1. Russell M. Nelson, i le Tad Walch, “The Lord’s Message Is for Everyone”: President Nelson Talks about Global Tour,” *Deseret News*, Apr. 12, 2018, deseretnews.com.
2. Neal A. Maxwell, “Becoming a Disciple,” *Ensign*, June 1996, 18.
3. Neal A. Maxwell, “Becoming a Disciple,” 16; faaopoopo le faamamafa.
4. “O le lotovaivai e faavaivaia ai lou faatuatua. Afai e te tuu faamaualaloina mea e te faamoemoeina, o le a tuutiitia foi le lelei o au taumafaiga, o le a vaivai lou naunau, ma o le a matuai faigata ai lava ia te oe ona mulimuli i le Agaga” (“O Le A Lo’u Faamoemoega i le Avea ai ma se Faifeautalai?” *Tala’i La’u Talalelei: O Se Taiala mo le Galuega Faafaifeautalai*, rev. ed. [2018], lds.org/manual/missionary).
5. *Aoaoga a Peresitene o le Ekalesia: Iosefa Samita* (2007), 28.
6. Iosefa Samita—Talafaasolopito 1:8.
7. Iosefa Samita—Talafaasolopito 1:10; ua faaopoopo le faamamafa.
8. Galuega 10:38.
9. Bonnie D. Parkin, “Personal Ministry: Sacred and Precious” (Brigham Young University devotional, Feb. 13, 2007), 1, speeches.byu.edu.
10. Moronae 7:13.
11. 1 Korinito 13:8.
12. 2 Nifae 32:5.
13. “Ou te mafaia mea uma lava i le faamalosi mai o Keriso ia te a’u” (Filipi 4:13).
14. Eperu 4:16.
15. “Ma afai e o mai tagata ia te au o le a ou faaali atu ia te i latou o latou vaivaiga. Ou te avatu i tagata ia vaivaiga ina ia faalotomauualalalo ai i latou; ma ua lava lou alofa tunoa mo tagata uma o e i latou te faalotomauualalalo i latou lava i ou luma; aua afai latou te faalotomauualalalo i latou lava i ou luma, ma faatuatua mai ia te au, ona ou faia lea o mea vaivai ia avea ma mea malolosi ia te i latou” (Eteru 12:27; ua faaopoopo le faamamafa).
16. Tagai i le Mataio 14:15–21; Mareko 6:31–44; Luka 9:10–17; Ioane 6:1–14.
17. Ioane 6:9.
18. Sa aoao mai Peresitene Boyd K. Packer: “Po o le a lava le tele o augatupulaga i lou augatuaa faaletino, po o le a foi le ituiga po o ni tagata e te tupuga mai ai, ae o le gafa o lou agaga e mafai ona tusia i se laina se tasi. O oe o se atalii/afafine o le Atua!” (“To Young Women and Men,” *Liahona*, Iulai 1989, 70).
19. C. S. Lewis, *Mere Christianity* (1960), 160.



Saunia e Cristina B. Franco

Fesoasoani Lua i le Au Peresitene Aoao o le Peraimeri

O Le Olioli o Auaunaga Lē Manatu Faapito

Ua tatou folafola atu i lo tatou Tama o i le Lagi o le a tatou auauna atu ia te Ia ma isi i le alofa ma faia Lona finagalo i mea uma.

na ua mavae le konafesi aoao talu ai, e toatele tagata na o mai ia te a’u ma le fesili lava e tasi: “E toafimalie na nofoa?” Na tutusa lava la’u tali i taimi uma: “E matuai toafimalie lava na nofoa pe afai e te lē lauga.” E sa’o, a ea? E le’i toafimalie lo’u nofoa i lenei konafesi, ae ou te matuai faafetai mo le faamanuiaga ma le avanoa e lauga atu ai ia te outou i lenei afiafi.



O nisi taimi a o tatou auauna atu, tatou te nonofo i ni nofoa eseese. O nisi e matuai toafimalie lava a o nisi e leai, ae ua tatou folafola atu i lo Tama o i le Lagi o le a tatou auauna atu ia te Ia ma isi i le alofa ma faia Lona finagalo i mea uma.

I nai tausaga ua mavae, na aoao ai le autalavou i le Ekalesia e faapea “[a e alu] atu i le galuega a le Atua’ [Mataupu Faavae ma Feagaiga 4:2], ua e auai i le faigamalaga sili ona maoae. Ua e fesoasoani i le Atua e faanatinati Lana galuega, ma o se aafiaga maoae, fiafia, ma le ofoofogia.”¹ O se faigamalaga o loo avanoa mo tagata uma—o soo se vaitausaga—ma o se faigamalaga foi e avatua i tatou i le mea na saunao mai ai lo tatou perofeta pele “o le ala o feagaiga.”²

Peitai, o le mea e leaga ai, o loo tatou ola i se lalolagi manatu faapito lea e fesili soo mai ai tagata, “O le a se mea o i ai mo a’u?” nai lo le fesili, “O ai e mafai ona ou fesoasoani i ai i le asō?” po o le “E mafai faapefea ona ou auauna atili i le Alii i lo’u valaauga?” po o le “O o’u tuuina atu ea a’u mea uma i le Alii?”

O se faataitaiga sili i lo’u olaga o le auaunaga lē manatu faapito a



Sister Victoria Antonietti. O Victoria sa avea ma se tasi o faiaoga Peraimeri i la'u paranesi a o o'u tuputupu a'e i Atenitina. O aoauli uma o Aso Lua, pe a matou potopoto mo le Peraimeri, na te aumaia mo i matou se keke sukalati. E fiala tamaiti uma i le keke—ia, o tamaiti uma vagana ai a'u. Ou te lē fiala i keke sukalati! Ma e ui foi na te taumafai e faasoa mai le keke ia te a'u, ou te teena lava lana ofa.

I se tasi aso ina ua uma ona ia faasoa mai le keke sukalati i tamaiti uma, sa ou fesili ia te ia, “Aisea e te lē aumaia ai se isi ituaiga—e pei o le moli po o le vanilla?”

Ina ua mavae sina 'ata itiiti, sa ia fesili mai ia te a'u, “Aisea e te lē taumafai ai e tofo sina fasi keke? E faapitoa mea o loo fai ai lenei keke, ma ou te folafola atu a e faataitai ona tofo i ai, o le a e fiala i ai!”

Sa ou tilotilo solo, ma i lo'u te'i, na foliga mai o loo fiala tamaiti uma i le keke. Sa ou ioe e faataitai ona tofo i ai. E te mate la o le a le mea na tupu? Na ou fiala i ai! O le taimi muamua lena na ou fiala ai i se keke sukalati.

Faatoa ou iloa i le tele o tausaga mulimuli ane le elemene faalilolilo lea sa i ai i totonu o le keke sukalati a Sister Antonietti. Matou te asiasi ma la'u fanau i lo'u tina i vaiaso taitasi. I se tasi o nei asiasiga, sa ma aai fiala ai ma tina i se fasi keke sukalati, ma sa ou faamatalaina ia te ia le ala na ou fiala

ai i le keke mo le taimi muamua. Ona ia faamalamalama mai lea ia te a'u le vaega na totoe o le tala.

“E te iloa, Cris,” o le tala lea a lo'u tina, “Sa le'i tele ni mea a Victoria ma lona aiga, ma o vaiaso taitasi na te filifili ai i le va o le totoigiina o le pasi e ave ai o ia ma lana fanau e toafa i le Peraimeri po o le faatauina o mea e faia ai le keke sukalati mo lana vasega Peraimeri. Na te filifilia lava i taimi uma le keke sukalati nai lo le pasi, ma sa latou savavali ma lana fanau i le silia ma le lua maila (3km) i le alu ma [le isi lua maila] le sau, po o le a lava le tulaga o le tau.”

O lena aso sa ou maua ai se lagona talisapaia sili atu mo lana keke sukalati. O le mea e taua atu, sa ou aoaoina o le elemene faalilolilo i le keke a Victoria o le alofa sa ia te ia mo i latou sa ia auauna atu i ai ma lana taulaga lē manatu faapito mo i matou.

O le toe mafaufau i tua i le keke a Victoria ua fesoasoani ia te a'u e manatua se taulaga lē manatu faapito i lesone taua na aoaoina e le Alii i Ona soo a o Ia savali atu i le mea e teu ai tupe o le malumalu. Ua tou silafia le tala. Na aoao mai e Elder James E. Talmage faapea e 13 pusa, “ma i nei pusa na lafo i ai e tagata a latou foi mo faamoemoega (eseese) na faailoga i tusiga i luga o pusa.” Na silasila atu Iesu i laina a tagata foi, na eseese uma lava ituaiga tagata. O nisi na tuuina mai a latou meaalofo

ma le “faamoemoega moni” a o isi na lafo i totonu “le tele o ario ma auro,” ma le faamoemoega ina ia vaaia, iloaia, ma viia ai mo a latou foi.

“Na filo ai i totonu o le toatele se fafine mativa ua oti lana tane, o le na . . . lafo i totonu o se tasi o pusa tupe o tupe iti e lua; o lana foi e itiiti ifo ma le afa sene i tupe Amerika. Ona fetalai atu lea o le Alii i Ona soo, ua faasino atu a latou taulaiga i le fafine mativa ua oti lana tane ma lana galuega, ma fetalai atu: ‘E moni, ou te fai atu ia te outou, o mea a lena fafine mativa ua oti lana tane, ua lafo i le mea e teu ai tupe, ua sili ia i a latou uma na lafo i ai; aua o i latou uma, ua latou lafo nisi mea mai a latou mea ua tele; a o ia ua mativa ua ia lafo ana mea uma sa ia te ia, o ana mea uma e ola i’ [Mareko 12:43–44].”³

Na foliga mai sa le'i umia e lenei fafine ua oti lana tane se tofiga lauiloa i le malo i lona taimi. Sa ia umia moni lava se mea na sili atu ona taua: sa mamā ona faamoemoega, ma sa ia foi atu mea uma sa ia te ia. Atonu sa itiiti atu mea sa ia foi nai lo isi, sili atu ona lē amana'iaina nai lo isi, ma ese atu nai lo isi. I le vaai a nisi, o mea sa ia foi atu sa lē taua, ae i fofoga o le Faaola, o le “faamasino foi i manatu ma filifiliga o le loto,”⁴ sa ia foi atu ana mea uma.

Uso e, o tatou foi atu ea a tatou mea uma e aunoa ma le faatali? O tatou ositaulagaina ea o tatou taimi ma taleni ina ia mafai ona aoao ai le tupulaga faiae ia alolofa i le Alii ma tausii Ana poloaiga? O tatou auauna atu ea ia i latou uma o siomiaina i tatou ma i latou ua tofia i ai tatou ia tausii ma le maelega—ositaulagaina o le taimi ma le malosi lea e mafai ona faaaoga i nisi auala? O tatou ola ea i poloaiga sili e lua—ia alofa atu i le Atua ma alofa atu i Ana fanau?⁵ O lena alofa e tele ina faaalai i se auaunaga.

Na aoao mai Peresitene Dallin H. Oaks: “Sa tuuina mai e le Faaola Ia lava i se auaunaga lē manatu faapito. Sa Ia aoao mai e tatau ia i tatou taitoatasi ona mulimuli atu ia te Ia e ala i le faafitia o i tatou lava mai mea e naunau i ai ma le faaloloto ina ia auauna atu ai i isi.”

Na ia faaaau:

“O se faataitaga masani o le lafo atu o i tatou lava i le auaunaga mo isi . . . o le osigataulaga e faia e matua mo a latou fanau. E mafatia tina i le tiga ma le ma’u-mauina o mea faamuamua ma le mafanafana e patino ia te ia lava ina ia fanauina ma tausia fanau taitasi. E fetuunai e tamā o latou olaga ma mea e faamuamua ina ia lagolagoina se aiga. . . .

“ . . . Tatou te olioli foi ia i latou o e tausia ni tagata o aiga e le atoatoa le malosi ma matua matutua. E leai ma se tasi o nei auaunaga e fesili mai, po o le a sa’u mea e maua ai? E manaomia e auaunaga uma le faataatia ese o le toafimalie o le tagata lava ia mo auaunaga lē manatu faapito. . . .

“[Ma] o nei mea uma ua faapupula mai ai le mataupu faavae e faavavau, e sili atu lo tatou fiafia ma sili atu le lotomalie, pe a tatou galulue ma auauna atu i mea tatou te foai atu, ae le mo mea tatou te maua.

“Ua aoaoina i tatou e lo tatou Faaola ina ia mulimuli ia te Ia e ala i le faia o osigataulaga e tatau ai ina ia lafo atu i tatou lava i auaunaga lē manatu faapito mo isi.”⁶

Na faapena foi ona aoao mai Peresitene Thomas S. Monson e faapea “atonu pe a tatou faafesagai ma lo



tatou Foafoa, o le a lē fesiligia i tatou, ‘Pe fia ni tofiga na e umia?’ ae, ‘E toa fia ni tagata na e fesoasoani i ai?’ O le mea moni, e le mafai lava ona e alofa i le Alii seiloga e te auauna atu ia te Ia e ala i le auauna atu i Ona tagata.”⁷

I nisi upu, uso e, o le a le afaina pe afai o tatou saofafai i nofoa toafimalie pe o tatou tauivi ia faauma se fonotaga i se nofoa faamoe elea i le laina pito i tua. O le a le afaina lava pe afai e manaomia ona tatou laa i totonu o se faapaologa e faanā se pepe o tagi. O le mea o le a taua e faapea, na tatou o mai ma se manao ia auauna atu, na

tatou matauina i latou o tatou auauna i ai ma faafeiloai fiafia i latou, ma na tatou faailoa atu i tatou lava ia i latou o tatou nonofo faatasi i atulaina o nofoa faamoe—ma aapa atu ma faauo i ai e ui sa *le’i* tofiaina i tatou e auauna atu ia i latou. Ma o le a mautinoa e taua lo tatou faia o mea uma o loo tatou faia i le elemene faapitoa o le auaunaga e vaavaalua ma le alofa ma le osigataulaga.

Ua ou iloaia tatou te lē tau faia se keke sukalati e avea ai ma se faiaoga manuia pe tuuto o le Peraimeri, aua sa lei faatatau i le keke. O le alofa na i tua atu o le faatinoga.

Ou te molimau atu o le alofa e faapaiaina e ala i le osigataulaga—le osigataulaga a se faiaoga ma nisi mea sili atu e ala i le taulaga silisili ma faavavau a le Alo o le Atua. Ou te molimau atu o loo soifua o Ia! Ou te alofa ia te Ia ma manao ia tuuese manaoga manatu faapitoa ina ia alofa ma auauna atu ai e pei ona Ia faia. I le suafa, o Iesu Keriso, amene. ■

FAAMATALAGA

1. Au Peresitene Aoao o Alii Talavou, “O Lenei Galuega Ofoofogia,” *Liahona*, Ian. 2015, 49.
2. Russell M. Nelson, “A’o Tatou Agai Faatasi Atu i Luma,” *Liahona*, Ape. 2018, 7.
3. James E. Talmage, *Jesus the Christ* (1916), 561.
4. Mataupu Faavae ma Feagaiga 33:1.
5. Tagai Mataio 22:37–39.
6. Dallin H. Oaks, “Auaunaga ma le Le Manatu Faapito,” *Liahona*, Me 2009, 93, 96.
7. Thomas S. Monson, “Great Expectations” (Brigham Young University devotional, Jan. 11, 2009), 6, speeches.byu.edu.





Saunia e Peresitene Henry B. Eyring
Fesoasoani Lua i le Au Peresitene Sili

O Tamaitai ma le Aoaoina o le Talalelei i le Aiga

O le Faaola o lou faataitaiga atoatoa lea o le auala o le a e faia ai se vaega tele i Lana fuafuaga e tuu le faamamafa sili i le aoaoina o le talalelei i totonu o le aiga.

O u tuafafine pele, e matagofie le faatasi ai ma outou. O se taimi mataina leni i Le Ekalesia a Iesu Keriso o le Au Paia o Aso e Gata Ai. O loo sasaina mai e le Alii le malamalama i luga o Lana Ekalesia e pei ona Ia folafola mai o le a Ia faia.

E te manatua Lana fetalaiga: “O le a le umi e mafai ona tumau ai vai e tafe i le eleelea? O le a le mana e taofia ai le lagi? E pei ona lē mafai e le tagata ona faaloaloa atu lona lima faatauva e taofi ai le vaitafe o le Misuri i lona ala faatonuina, pe toe liliu ai i tua lona tafe, ua faapena ona lē mafai ona taofia le Malosi Aoao mai le sasaa mai i lalo o le malamalama mai le lagi i luga o ulu o le Au Paia o Aso e Gata Ai.”¹

O se vaega o le faasoaina mai e le Alii o le malamalama i le taimi nei e faatatau i le faatelevaveina o Lana sasaa atu i fafo o le upumoni e faavavau i luga o ulu ma i loto o Lona nuu. Ua Ia faamanino mai o afafine o le Tama Faalelagi o le a faia se matafaioi taua i lena faatelevavega faavavega. O se tasi

o faamaoniga o le vavega o Lona taitaia lea o Lana perofeta soifua ina ia faamamafa atili atu le aoaoina o le talalelei i totonu o le fale ma i totonu o le aiga.

Atonu e te fesili ifo, “E faapefea ona avea ia tuafafine faamaoni ma se malosiaga autu e fesoasoani i le Alii e sasaa mai le malamalama i luga o Lana

Au Paia?” Ua tuuina mai e le Alii le tali i le “O Le Aiga: O Se Folafolaga i le Lalolagi.” E te manatua ia upu, ae atonu o e vaai i se uiga fou ma iloa ai na muai silafiaina e le Alii nei suiga faagaetiaina, lea o loo tutupu nei. I le folafolaga, na Ia tuuina mai ai i tuafafine le tiute e avea ma faiaoga muamua o le talalelei i le aiga i upu nei: “O le uluai matafaioi a tina o le faafaileleina lea o a latou fanau.”² E aofia ai ii le faafailele i upumoni o le talalelei ma le malamalama.

Na faaaauau le folafolaga: “E ao i tamā ma tina ona fesoasoani le tasi i le isi o se paaga tutusa.”³ O se paaga tutusa i la’ua, e tutusa i o la’ua faamoe-moega mo le tuputupu ae faaleagaga ma mo le mauaina o le malamalama, ma o lea ua tuufaatasia ai e fesoasoani le tasi i le isi. E tutusa i la’ua i o la’ua taunuuga paia ina ia faaeaina faatasi. O le mea moni, e le mafai ona faaeaina alii ma tamaitai na o se tagata e toatasi.

Aisea la, ua maua ai e se afafine o le Atua i se sootaga tuufaatasia ma tutusa le tiutetauave muamua e faafai-lele i niuterani sili ona taua ia e tatau i tagata uma ona maua, o se malamalama o le upumoni e sau mai le lagi? E tusa ai ma lo’u iloa, o le ala lava lea a le Alii talu mai ona foafoaina aiga i leni lalolagi.

Mo se faataitaiga, o Eva lea na mauaina le malamalama lea na manao-mia e Atamu e ‘ai ai le fua o le laau e iloa ai le lelei ma le leaga ina ia la tausia ai poloaiga uma a le Atua ma





foafoaina ai se aiga. Ou te le iloa pe aisea na auala muamua mai ai ia Eva, ae sa tuufaatasia atoatoa Atamu ma Eva i le taimi na sasaa mai ai le malamalama ia Atamu.

O le isi faataitaiga o le faaaogaina e le Alii o meaalofo a tamaitai o le faafaileleina o le ala na Ia faamallosia ai atalii o Helamana. E ese lava o'u lagona pe a ou faitau i le tala ma manatua ai upu filemu o le faamautinoaga a lo'u foi tina ina ua ou tuua le aiga mo le tautua faamiliteli.

Na tusia e Helamana:

“Sa aoaoina i latou e o latou tina, e faapea afai latou te le masalosalo, o le a laveaiina i latou e le Atua.

“Ma sa latou faamatala mai ia te au upu a o latou tinā, fai mai: Matou te le masalosalo lava sa mautinoa lena mea e o matou tinā.”⁴

E ui ou te le iloa uma mafuaaga a le Alii mo le tuuina atu o le uluai tiute-tauave mo le faafaileleina o le aiga i tuafafine faamaoni, ae ou te talitonu e faatatau i lou gafatia e alofa atu. E manaomia ai le alofa sili e lagona ai manaoga o se isi nai lo ou lava manaoga. O le alofa le pona lena o Keriso mo le tagata o loo e faafaileleina. O lena lagona o le alofa mama e sau mai le tagata na filifilia ia avea ma tagata faafailele i le agavaa ai mo aafiaga o le Togiola a Iesu Keriso. O le anavatau a le Aualofo, lea na faataitaia e lo'u lava

tina, na foliga mai ia te a'u na musuia: “E Le Uma le Alofa.”

I le avea ai ma afafine o le Atua, ua ia te outou se malosiaaga masani ma le maoae e lagona ai manaoga o isi ma alolofa atu ai. O lena mea, o le a sili atu ai ona e gauai atu i musumusuga a le Agaga. Ona mafai lea ona taialaina e le Agaga mea e te mafaufau i ai, mea e te tautala ai, ma mea e te faia e faafailele ai tagata ina ia mafai ai ona sasaa mai e le Alii le malamalama, upumoni, ma le lototoa i luga o i latou.

O outou tuafafine o loo faalogologo mai i lo'u leo ua outou i ai taitoatasi i se nofoaga tulaga ese i la outou faigamalaga i le olaga. O nisi, o teineiti laiti ua i ai i se sauniga aoao mo tamaitai mo le uluai taimi. O nisi, o tamaitai talavou o loo sauniuni e avea ma tagata faafailele o loo finagalo le Atua e avea ai i latou. O nisi, o tamaitai faatoa faaipoipo e lei maua ni fanau; o isi o ni tina talavou e toatasi pe sili atu [ni fanau]. O nisi, o ni tina o ni fanau talavou ma o isi o loo i ai fanau i le misiona. O nisi o loo i ai fanau ua amata ona vaivai i le faatuatua ma ua mamao ese mai le aiga. O nisi o loo nonofo na o i latou ae leai se soa faamaoni. O nisi o ni tinamatutua.

Ae, po o le a lava lou tulaga faale-tagata, o oe o se vaega—o se vaega autu—o le aiga o le Atua ma lou lava aiga, pe i le lumanai, i lena lalolagi, po o le lalolagi o agaga. O lou tiute mai le

Atua o le faafaileleina lea o le toatele o Ana fanau ma tagata o lou lava aiga i le mea e te mafaia i lou alofa ma lou faatuatua i le Alii o Iesu Keriso.

O lou luitau masani lava o le iloina po o ai e faafailele, pe faapefea, ma o afea. E te manaomia le fesoasoani a le Alii. E silafia e Ia loto o isi, ma e Na te silafia le taimi ua saunia ai latou e talia lau faafailelega. O lau tatalo o le faatuatua o le ki lea i lou tulaga manuia. E mafai ona e faalagolago atu i le mauaina o Lana taitaiga.

Na Ia tuuina mai lena faamalosiaga: “Ole atu i le Tama i lo'u igoa, i le faatuatua ma le talitonu o le a oulua maua, ma o le a oulua maua ai le Agaga Paia, lea na te faaali atu mea uma e tatau mo le fanauga a tagata.”⁵

E faaopoopo atu i le tatalo, o le sutesue faamaoni i tusitusiga paia o le a avea ma vaega o lou mana faatupulaia e faafailele. O le folafolaga lena: “Pe tou te mafaufau muamua foi po o a tou te fai atu; ae ia teu i o outou mafaufau e lē aunoa afiga o le ola, ma o le a tuu atu ia te outou i lea lava itula le vaega lena o le a fua atu i tagata taitoatasi.”⁶

O lea la o le a e faaaluina ai le taimi sili atu e tatalo ai, mafaufau loloto ai, ma manatunatu i mea faaleagaga. O le a e maua le malamalama o le upumoni o loo sasaa mai i ou luga ma tuputupu ae i lou mana e faafailele ai isi i totonu o lou aiga.



O le a i ai taimi e te lagona ai le tele-
gese o lou alualu i luma i le aoaoina
o auala lelei atu e faafailele ai. O le a
manaomia ai le faatuatua e tumau ai.
Na auina mai ia te oe e le Faaola lenei
faamalosiaga.

“O le mea lea aua le faavaivai i le
faia o mea lelei ona o loo oulua faataa-
tiaina le faavae o se galuega tele. Ma o
mea iti e tutupu mai ai mea tetele.

“Faauta, e manaomia e le Alii le loto
ma le mafaufau malie; ma o e e loto
malilie ma usiusitai o le a 'aia le lelei o
le laueleele o Siona i aso nei e gata ai.”⁷

O lou auai mai i lenei po o se
faaamoniga ua e naunau e talia le
valaaulia a le Alii e faafailele isi. E
moni lenei mea e oo lava i le teneitiiti
sili ona laitiiti o loo i ai iinei i lenei po.
E mafai ona e iloa po o ai e faafaile-
leina i lou aiga. Afai e te tatalo ma le
manatu moni i ai, o le a oo mai i lou
mafaufau se igoa po o se foliga. Afai
e te tatalo ia iloa le mea e fai po o a
tala e fai atu, o le a e lagona se tali. O
taimi uma e te usitai ai, o le a tupu-
tupu ae lou mana e faafailele ai. O le a
e saunia mo le aso o le a e faafailele ai
lau lava ia fanau.

E mafai ona tatalo tina o tupulaga
talavou ia iloa le ala e faafailele ai se
atalii po o se afafine ua foliga mai ua
le ano mai i le faafailelega. Atonu e te
tatalo ia iloa po o ai o i ai le faatosinaga
faaleagaga e manaomia ma o le a talia-
ina e lau tama. E faafofoga ma tali mai
le Atua i tatalo faamaoni a tina popole,
ma e Na te auina mai le fesoasoani.

Ma le isi, atonu o lagonaina e se tina-
matua o i ai iinei i lenei po le lototiga
na mafua ona o mafatiaga ma faigata o
lana fanau ma fanau a fanau. Atonu e
te mauaina le lototele ma le taitaiga mai
aafiaga o aiga i tusitusiga paia.

Mai le taimi o Eva ma Atamu, e oo
atu ia Tama Isaraelu, ma oo atu i aiga
uma i le Tusi a Mamona, e tasi lava se
lesona mautinoa e uiga i le mea e fai i
faanoanoaga a fanau le faamoemoeina:
aua le taofia le alofa.

Ua tatou maua le faataitaga faama-
losiau a le Faaola a o Ia faafaileleina
fanau agaga fouvale a Lona Tama
Faalelagi. E ui lava ina latou ma tatou
faatupuina le tiga, ae o loo faaloaloa
mai pea le aao o le Faaola.⁸ Na Ia
fetalai mai i le 3 Nifae e uiga i Ona
tuafafine ma uso faaleagaga ia na Ia
taumafai e faafailele ae sa le'i manuia:
“E, outou e tagata . . . o le aiga o
Isaraelu, ua faafia ea ona ou faapotopo-
toina o outou e pei ona ofaofatai mai
e se matuamoa lana toloai i lalo o ona
apaau, ma tausia outou.”⁹

Mo tuafafine i tulaga uma o le faiga-
malaga o le olaga, i tulaga uma faale-
aiga, ma aganuu uma, o le Faaola o lou
faataitaga atoatoa lea o le auala o le a
e faia ai se vaega tele i Lana fuafuaga e
tuu le faamamafa sili i le aoaoina o le
talalelei i le fale ma aiga.

O le a e aumaia ou lagona loloto
o le alofa mama i suiga i gaoiiga ma
faiga masani i totonu o lou aiga. O le
a aumaia e lenei mea le tuputupu ae
sili faaleagaga. Pe a e tatalo faatasi ma

[tatalo foi] mo tagata o le aiga, o le a
e lagonaina lou alofa ma le alofa o le
Faaola mo i latou. O le a avea atili lenei
mea ma au meaalofo faaleagaga a o e
sailiina. O le a lagonaina e tagata o lou
aiga a o e tatalo ma se faatuatua tele atu.

Pe a potopoto le aiga e faitau leotele
tusitusiga paia, ua uma lava ona e fai-
tauina ma tatalo e uiga i ai e saunia ai oe
lava ia. O le a e mauaina ni taimi e tatalo
ai mo le Agaga e faamalamalama atu i
lou mafaufau. A oo la i lou taimi e faitau
ai, o le a lagona e tagata o le aiga lou
alofa mo le Atua ma mo Ana afioga. O le
a faafaileleina i latou e Ia ma Lona Agaga.

E mafai ona oo mai lenei lava sasaa
tele i soo se faatasiga faaleaiga pe a
e tatalo ma fuafua i ai. Atonu e alu ai
se taumafaiga ma le taimi, ae o le a
aumaia ai ni vavega. Ou te manatua
se lesona na aoa mai e lo'u tina a o
ou laitiiti. E mafai ona ou vaaia pea
i lo'u mafaufau le faafanua valivali sa
ia faia o faigamalaga a le Aposetolo o
Paulo. Ou te ofo pe faapefea ona ia
maua le taimi ma le malosi e faia ai
lenei mea. Ma e oo mai i lenei aso ua
faamanuiaina a'u i lona alofa mo lenei
Aposetolo faamaoni.

O le a maua e outou taitoatasi ni
auala e saofagā ai i le sasaina atu o
upumoni i totonu o o outou aiga i le
Ekalesia toefuataina a le Alii. O le a
taitoatasi outou ma tatalo, suesue, ma
mafaufau loloto ia iloa po o le a lou
sao tulagaese o le a fai. Ae o le mea
lenei ou te iloa: o outou taitoatasi, i
le tou amoina faatasi ai ma atalii o le
Atua, o le a avea ma se vaega tele o se
vavega o le aoaoina o le talalelei ma
ola ai lea o le a faanatinatiina ai le faa-
potopotoina o Isaraelu ma o le a saunia
ai le aiga o le Atua mo le toe afio mai
ma le mamalu o le Alii o Iesu Keriso. I
le suafa paia o Iesu Keriso, amene. ■

FAAMATALAGA

1. Mataupu Faavae ma Feagaiga 121:33.
2. “O Le Aiga: O se Folafoaga i le Lalolagi,”
Liahona, Me 2017, 145.
3. O Le Aiga: O Se Folafoaga i le Lalolagi,”
129.
4. Alema 56:47–48.
5. Mataupu Faavae ma Feagaiga 18:18.
6. Mataupu Faavae ma Feagaiga 84:85.
7. Mataupu Faavae ma Feagaiga 64:33–34.
8. Tagai 2 Nifae 19:12, 21.
9. 3 Nifae 10:4.



Saunia e Peresitene Dallin H. Oaks
Fesoasoani Muamua i le Au Peresitene Sili

Matua ma Fanau

E ta’u atu e le fuafuaga sili o le fiafia a lo tatou Tama Faalelagi ia te oe po o ai oe ma le faamoemoega o lou olaga.

O’u tuafafine pele, e ma’eu le matagofie o le i ai o lenei sauniga fou o le konafesi aoao mo tamaitai o le Ekalesia e ta’i valu tausaga ma matutua atu. Ua tatou faalogo i savali musuia mai taitai tamaitai ma mai ia Peresitene Henry B. Eyring. Ma te fiafia lava ma Peresitene Eyring e galulue i lalo o le taitaiga a Peresitene Russell M. Nelson, ma ua tatou tulimatai atu i lana malelega faaperofeta.

I.

O fanau o le tatou meaalofa aupito sili lea ona taua mai le Atua—o lo tatou

uluola e faavavau. Ae ua tatou ola i se taimi ua toatele ai tamaitai e moomoo e leai sana vaega i le fanauina ma le faafaileleina o fanau. E toatele talavou matutua ua faatuai ona faaipoipoga seia faamalieleina manaoga faaletino. O le averesi o le tausaga e faaipoipo ai tagata o le Ekalesia ua siitia i le silia ma le lua tausaga, ma o le aofai o pepe e fananau mai i tagata o le Ekalesia ua pa’u i lalo. O le Iunaite Setete ma nisi o malo ua feagai ma se lumanai o le toalaite o taimaiti e tutupu ma avea ma tagata matutua e lagolago ai le aofai o tagata matutua e litaea.¹ E silia ma le 40

pasene pepe e fananau mai i totonu o le Iunaite Setete e tina e le faaipoipo. O na fanau e lamatiaina. O nei faiga taitasi ua le tusa ai ma le fuafuaga paia o le faaolataga a lo tatou Tama.

II.

Ua malamalama tamaitai o le Au Paia o Aso e Gata Ai o le avea ma se tina o lo latou faamuamua silisili lea, lo latou olioli sili. Sa saunoa Peresitene Gordon B. Hinckley e faapea: “O tamaitai mo le tele o vaega e vaai i lo latou faamalieleina aupito silisili, lo latou fiafiaga aupito silisili i le fale ma le aiga. Ua totoina e le Atua i totonu o tamaitai se mea paia lea na te faamatalaina mai ia lava i le malosiaga leleoa, i le faaleleiga, i le filemu, i le lelei, i le amio mama, i le upumoni, i le alofa. Ma o nei uiga auau mama ofoofogia uma, e maua ai lo latou faailoaga sili ona moni ma sili ona faamalieleina i le tulaga faatina.”

Sa faaaauu lana saunoaga, “O le galuega aupito silisili o le a faia e soo se tamaitai o le a faia lea i le faafaileleina ma le aoaoina ma le ola ai ma le uunaiaina ma le tausiga o lana fanau i le amiotonu ma le upumoni. E leai ma se isi lava mea o le a faatusalia i lena, e tusa lava po o a ana mea e fai.”²

Tina, tuafafine pele, matou te alofofa ia te outou mo tagata ua avea ai outou ma le mea o loo outou faia mo i matou uma.

I lana malelega taua i le 2015 ua faaulutalaina “O Se Talosaga i O’u Tuafafine,” sa saunoa ai Peresitene Russell M. Nelson:

“E le mafai ona atoa le malo o le Atua ma e le mafai lava ona atoa e aunoa ma tamaitai o e osia feagaiga paia ona tausia lea, o tamaitai o e e mafai ona tautatala atu ma le mana ma le pule a le Atua!

“O le asō, . . . tatou te manaomia ni tamaitai o ē iloa le ala e faia ai mea taua ia tutupu e ala i lo latou faatuatua, ma o ē e puipuia ma le lotototoa le ola mama ma aiga i se lalolagi ua tumu i le agasala. Tatou te manaomia ni tamaitai o ē o tuuto atu i le leoleoina o fanau a le Atua i le ala o feagaiga agai atu i le faaeaga; o tamaitai e iloa le ala e maua





“Fanau ua Leoleo Mai le Atua.” O le fuaiupu muamua lenei ua tatou usuina uma ma talitonu i ai:

*Fanau ua Leoleo Mai le Atua,
Ia outou i ao ma po
Ma la faamanuia outou
Pe a tonu mea tou te fai.*⁵

E lua ni aoaoga i lena fuaiupu: Muamua, e latalata mai lo tatou Tama Faalelagi ia i tatou ma leoleo i tatou i ao ma po. Mafaufau i ai! E alofa le Atua ia i tatou, e latalata mai o Ia ia i tatou, ma e leoleo e Ia i tatou. Lua, e fiafia o Ia e faamanuia i tatou pe a “tonu mea [tatou] te fai.” E maeu lea faamafanafanaga i le lotolotoi o o tatou popolega ma faigata!

Ioe, tamaitai talavou, ua faamanuiaina outou ma e ofoofogia outou, ae ua pei outou o fanau uma a le Tama Faalelagi i lo outou manaomia ona “tauivi e fai le mea sa’o.”

E mafai lava ona ou tuu atu iinei fautuaga i le tele o mea eseese, ae ua ou filifili e talanoaina na o ni mea se lua.

O la’u fautuaga muamua lava e faata-
tau i telefoni feaveai. I se sailiiliga talu ai nei faalemalo na maua ai e silia ma le afa o talavou i le Iunaite Setete na fai mai o loo latou faaaluina le tele o taimi i a latou telefoni feaveai. E silia ma le 40 pasene na fai mai sa latou lagonaina le popole ina ua tuueseina a latou telefoni mai ia i latou.⁶ E sili atu ona taatele le mea leni i teine nai lo tama. O’u tuafafine talavou—ma tamaitai matutua foi—o le a faamanuiaina o outou olaga pe afai tou te faatapulaaina lou faaaoa-
ina ma le faalagolago i telefoni feaveai.

O la’u fautuaga lona lua e sili atu le taua. Ia agalelei i isi. O le agalelei o se mea e toatele a tatou talavou o loo faia. O nisi o vaega o talavou i nisi o atunuu ua faaali maia le auala mo tatou uma. Ua musuia i tatou e faatinoga o le agalelei a o tatou tagata talavou ia i latou o e manaomia le alofa ma le fesoasoani. I le tele o auala, e te avatu ai lena fesoasoani ma faaali atu lena alofa i le tasi ma le isi. Matou te moomoo ia mulimuli tagata uma i la outou faataitaiga.

I le taimi lava e tasi, ua tatou iloa ua faaosooso ai e le fili tatou uma ia

ai faaaliga patino, o ē malamalama i le mana ma le filemu o faaeega paia o le malumalu; o tamaitai o ē iloa pe faapefea ona valaau atu i mana o le lagi e puipui ma faamalolosia fanau ma aiga; o tamaitai o ē aoao atu ma le lē fefefe.”³

O nei aoaoga musuia e faatatau uma i le “O Le Aiga: O Se Folafofaga i le Lalolagi,” lea e toe faamautu ai e leni Ekalesia toefuataiina le aoaoga faavae ma faiga masani e totonugalemu i le fuafuaga a Le Foafoa a o lei foafoaina e Ia le lalolagi.

III.

Ia o le a ou talanoa atu nei i le vaega talavou ifo o leni aofia. O’u tuafafine talavou pele, ona o lo outou malamalama o le talalelei toefuataiina a Iesu Keriso, ua tulagaese ai outou. O lo outou malamalama o le a mafai ai ona outou tutumau ma faatoilaloina faigata o le tuputupu ae. Mai lou talavou, ua e auai ai i ni galuega faatino ma polokalama ua atiaeina ai au taleni, e pei o le tusitusi, tautala, ma fuafuaga. Ua e aoaoina e nafa oe ma au amioga ma le auala e tetee atu ai i faaosoosoga o le pepelo, faimamago, gaoi, po o le faa-
aoga o ava malosi ma fualaau faasaina.

O lo outou tulagaese sa iloina i se suesuega a le Iunivesite o Karolaina i

Matu e uiga i talavou Amerika ma tapuaiga. Sa i ai i se tusiga a le *Charlotte Observer* le ulutala, “E sili atu ona taulimaina e talavou Mamona: Ua maua i suesuega e sili i latou i talavou i le taulimaina o tulaga faatagata matua.” Sa faai’uina leni tusiga e faapea “E sili le Au Mamona i le aloese mai amioga lamatia, lelei tulaga i a’oga ma le lelei o uiga faaaliga e faatatau i le lumanai.” O se tasi o tagata sailiili i le suesuega, sa faatalanoaina le toatele o a tatou talavou, sa saunoa, “I le salafa o vaega uma sa matou tilotilo i ai, sa i ai se mamanu manino: E muamua lava Mamona.”⁴

Aisea e sili ai ona outou taulimaina faigata o le tuputupu ae? Tamaitai talavou, o le mafuaaga ona ua outou malamalama i le fuafuaga sili o le fiafia a lo tatou Tama Faalelagi. E ta’u atu e leni mea po o ai oe ma le faamoemoega o lou olaga. O talavou e i ai lena malamalamaa e muamua i le foiaina o faafitauli ma e muamua foi i le filifiliina o le sa’o. Ua e iloa e mafai ona e mauaina le fesoasoani a le Alii i le faatoilaloina o faigata uma o le tuputupu ae.

O le isi mafuaaga e sili ona outou mataalia ai ona tou te malamalama o outou o fanau a se Tama Faalelagi e alofa ia te outou. Ou te mautinoa ua outou masani i la tatou viiga matagofie



O Au Pulega Aoao ma Taitai Aoao o Le Ekalesia a Iesu Keriso o le Au Paia o Aso e Gata Ai

O LE AU PERESITENE SILI



Dallin H. Oaks
Fesoasoani Muamua



Russell M. Nelson
Peresitene



Henry B. Eyring
Fesoasoani Lua

O LE KORAMA A APOSETOLO E TOASEFULULUA



M. Russell Ballard



Jeffrey R. Holland



Dieter F. Uchtdorf



David A. Bednar



Quentin L. Cook



D. Todd Christofferson



Neil L. Andersen



Ronald A. Rasband



Gary E. Stevenson



Dale G. Renlund



Gerrit W. Gong



Ulisses Soares

O LE AU PERESITENE O FITUGAFULU



L. Whitney Clayton



Patrick Kearon



Carl B. Cook



Robert C. Gay



Terence M. Vinson



José A. Teixeira



Carlos A. Godoy

AU PULEGA AOA O FITUGAFULU

(i le faasologa faaala'apeta)



Marcos A. Alubalcis



Jose L. Alonso



Wilford W. Andersen



Ian S. Arden



Steven R. Bangert



W. Mark Bassett



David S. Baxter



Randall K. Bennett



Shayne M. Bowen



Mark A. Bragg



Matthew L. Carpenter



Yoon Hwan Choi



Craig C. Christensen



Kim B. Clark



Weatherford T. Clayton



Lawrence E. Corbridge



Valeri V. Cordin



J. Devin Cornish



Claudio R. M. Costa



Joaquin E. Costa



LeGrand R. Curtis Jr.



Massimo De Feo



Benjamin De Hoyos



Edward Dube



Kevin R. Duncan



Timothy J. Dyches



David E. Evans



Enrique R. Febella



Bradley D. Foster



Randy D. Funk



Eduardo Gavaret



Jack N. Gerard



Taylor G. Goboy



Christoffel Golden



Walter F. Gonzalez



O. Vincent Haleck



Brook P. Hales



Donald L. Hallstrom



Kevin S. Hamilton



Allen D. Haynie



Mathias Held



David P. Homer



Paul V. Johnson



Larry S. Kacher



Jorg Klasingat



Joni L. Koch



Erich M. Kopischke



Hugo E. Martinez



James B. Martino



Richard J. Maynes



Kyle S. McKay



Peter F. Meurs



Hugo Montoya



Marcus B. Nash



K. Brett Nattress



S. Gifford Nielsen



Brent H. Nielson



Adrian Ochao



S. Mark Palmer



Adilson de Paula Parralla



Kevin W. Pearson



Anthony D. Perkins



Paul B. Pieper



John C. Pifgree Jr.



Rafael E. Pino



Michael T. Ringwood



Lynn G. Robbins



Gary B. Sablin



Evan A. Schmutz



Joseph W. Shati



Steven E. Snow



Vern P. Stanfill



Brian K. Taylor



Michael John U. Teh



Juan A. Uceda



Arnulfo Valenzuela



Juan Pablo Villar



Takashi Wada



Taniela B. Waiolo



Scott D. Whiting



Jorge F. Zaballós



Chi Hong (Sam) Wong



Kazuhiko Yamashita



Gerald Causse



W. Christopher Viadelli



Pulefaamalualu

O LE AU EPIKOPO PULEFAAMALUALU

TAITAI AOA



Devin G. Durant
Fesoasoani Muamua




Tad R. Callister
Peselele



Brian K. Ashton
Fesoasoani Lua




Michelle D. Craig
Fesoasoani Muamua



Bonnie H. Gordon
Peselele



Becky Craven
Fesoasoani Lua



Sharon Eubank
Fesoasoani Muamua




Jean B. Bingham
Peselele




Reyna L. Aburno
Fesoasoani Lua



Lisa L. Hakkrass
Fesoasoani Muamua



Joy D. Jones
Peselele



Cristina B. Franco
Fesoasoani Lua



Douglas D. Holmes
Fesoasoani Muamua



Stephen W. Owen
Peselele



M. Joseph Brough
Fesoasoani Lua



Alii Talavou

PERAIMERI

AUALOFA

TAMAITAI TALAVOU



agaleaga atu, ae o loo tele pea faataitai-
iga o lenei mea, e oo lava i fanau ma le
autalavou. O le agaleaga faifai pea ua
lauiloa i le tele o igoa, e pei o le sauā,
taupulepule faatasi e faasaga i se tasi,
po o le auau faatasi e tetee i isi. O nei
faataitai e faatupu ai ma le iloa le tiga
i tagata o vasega po o uo. O'u tuafafine
talavou, e le fialia le Alii pe a tatou
faatiga pe agaleaga i isi.

O se faataitai lenei. Ou te iloa se
alii talavou, o se tagata sulufa'i iinei i
Iuta, sa taufaalili i ai [tagata] ona o le
ese o ia, e aofia ai i nisi taimi le faatai-
taiina o le tautatala i le gagana moni [a
le tama talavou]. Sa sauaina o ia e se
kegi o talavou e tulaga lelei atu seia oo
ina tali atu i ai o ia i se ala na mafua ai
ona falepuipui o ia mo le silia ma le 70
aso a o iloiloaina mo le tipoti atu i lona
atunuu. Ou te le iloa po o le a le mea
na faaosofia ai lenei vaega o talavou, o
le toatele o i latou o le Au Paia o Aso e
Gata Ai e pei o outou, ae e mafai ona
ou vaaia le aafiaga o lo latou agaleaga,
o se aafiaga matautia ma lamatia ai se
tasi o fanau a le Atua. O ni faatinoga
iti o le agaleaga e mafai ona oo ai i ni
taunuuga matautia.

Ina ua ou faalogo i lenei tala, sa ou
faatusaina i le mea sa saunoa i ai lo
tatou perofeta, Peresitene Nelson, i lenei
faigalotu talu ai nei mo le autalavou i le
lagolagi atoa. I le talosagaina o outou
ma isi uma talavou e fesoasoani i le faa-
potopotoina o Isaraelu, sa ia saunoa ai:
"Ia tulaga ese; ia ese mai le lalolagi. Ua
e iloa ma ou iloa e tatau ona avea oe o
se malamalama i le lalolagi. O le mea
lea, ua manaomia oe e le Alii ia foliga
e pei, ia leo e pei, amio e pei, ma laei e
pei o se soo moni o Iesu Keriso."⁷

O le autau a le autalavou lea na
valaaulia outou e Peresitene Nelson ia
auai ai o le a le *agaleaga* i le tasi ma le
isi. O le a latou mulimuli i le aoaoga a
le Faaola e aapa atu ma ia agaalofo ma
manatu mo isi, e oo lava i le liliu atu
o le isi alafau pe a tatou lagonaina ua
agaleaga mai se tasi ia i tatou.

I se saunoaga o se konafesi aoao e
uiga i le taimi lenei ua toatele outou ua
fananao mai ai, sa viia ai e Peresitene
Gordon B. Hinckley "tamaitai tala-
vou lalelei o ē o loo tauivi e ola i le



talalelei." Sa ia faamatalaina i latou, e
pei ona ou lagona e faamatala ai outou:

"E agalelei i latou i le tasi ma le isi.
Latou te saili e faamalosi e le tasi le isi. O
i latou o se faamamaluga i o latou matua
ma aiga latou te o mai ai. O loo latou
latalata atu i le tulaga faatamaitai ma o
le a tauave i o latou olaga atoa ia tulaga
lelei ia e uunaia i latou i le taimi nei."⁸

I le avea ai ma se auauna a le
Alii, ou te fai atu ia te outou tamaitai
talavou, o loo manaomia e le lalolagi
lo outou lelei ma le alofa. Ia agalelei i
le tasi ma le isi. Na aoao mai Iesu ia i
tatou ia tatou fealofani ma ia taulimaina
isi e pei ona tatou mananao e taulima-
ina ai i tatou. A tatou tauivi e agalelei
atu, tatou te latalata atili atu ai ia te Ia
ma Lana faatosinaga alofa.

O'u tuafafine pele, afai o loo e auai
i soo se agaleaga po o le vaaia maua-
lalo—na o oe pe faatasi ma se vaega—
ia filifili nei loa e sui ma uunaia isi ia
sui foi. O la'u fautuaga lenei, ma ou te
tuu atu ia te outou o se auauna a le Alii
o Iesu Keriso ona na uunaia a'u e Lona
Agaga e tautala atu ia te outou i lenei
mataupu taua. Ou te molimau atu o

Iesu Keriso, o lo tatou Faaola, o le na
aoao mai i tatou ia fealofani e pei ona
Ia alofa mai ia i tatou. Ou te tatalo o le
a faapea lava ona tatou faia, i le suafa
o Iesu Keriso, amene. ■

FAAMATALAGA

1. Tagai i le Sara Berg, "Nation's Latest Challenge: Too Few Children," AMA Wire, June 18, 2018, wire.ama-assn.org.
2. *Teachings of Gordon B. Hinckley* (1997), 387, 390; tagai foi i le M. Russell Ballard, "Tina ma Afafine," *Liahona*, Me 2010, 18 (i le *O Afafine i Lo'u Malo: O Le Talafaasolopito ma le Galuega a le Aualofa* [2011], 156).
3. Russell M. Nelson, "O Se Talosaga i O'u Tuafafine," *Liahona*, Nov. 2015, 96; tagai foi i le Russell M. Nelson, "Fanau o le Feagaiga," *Liahona*, Me 1995, 33.
4. O le suesuega na lolomiina e le Fale Lomitusi a le Iunivesite o Oxford o le lomiga a Christian Smith ma Melinda Lundquist Denton, *Soul Searching: The Religious and Spiritual Lives of American Teenagers* (2005).
5. "Fanau, ua Leoleo mai le Atua," *Viiga*, nu. 180.
6. Tagai i le "In Our Opinion: You Don't Need to Be Captured by Screen Time," *Deseret News*, Aug. 31, 2018, deseretnews.com.
7. Russell M. Nelson, "Faamoemoe o Isaraelu" (faigalotu a le autalavou i le lalolagi atoa, 3 Iuni, 2018), 8, HopeofIsrael.lds.org.
8. Gordon B. Hinckley, "O Le Manaoga mo le Agalelei Sili Atu," *Liahona*, Me 2006, 60–61.



Saunia e Peresitene Russell M. Nelson

Auai o Tuafafine i le Faapotopotoina o Isaraelu

Ou te tuuina atu se aioiga faaperofeta ia te outou, o tamaitai o le Ekalesia, ia mamanuina le lumanai e ala i le fesoasoani e faapotopoto Isaraelu ua faataapeapeina.

Emaeu le matagofie o le faatasi ai ma outou, o'u tuafafine pele ma taua. Masalo o se aafiaga talu ai nei o le a outou maua ai se vaaiga i o'u lagona e uiga ia te outou ma tomai faalelagi ia ua faaee atu ia te ouotu.

I se tasi aso a o lauga atu i se faapotopotoga i Amerika i Saute, sa ou matuai fiafia lava i la'u autu, ma i se taimi taua lava, sa ou fai atu ai, "I le avea ai o a'u ma se *tina* e toa sefulu le fanau, e mafai ona ou ta'u atu ia te outou e faapea . . ." Ona faaauau ai lea ona faamaea la'u savali.

Ou te le'i iloaia sa ou fai atu le upu *tina*. Sa manatu la'u faaliliu upu, sa sese na 'ou ta'uina, ma sui le upu *tina* i le *tama*, o lea sa le'i iloa ai e le faapotopotoga sa ou faasino ia te a'u lava ia o se *tina*. Ae sa faalogo i ai lo'u toalua o Wendy, ma sa fiafia o ia i la'u measese sa le'i mafaufauina.

I lena taimi, o le faananau loloto o lo'u loto ia faia se eseesega i le lalolagi —e pei e na o tina latou te faia—sa maena mai i lo'u loto. I le gasologa o

tausaga, soo se taimi lava e fesiligia ai a'u pe aisea na ou *filifili* ai e avea ma se fomai, sa tutusa la'u tali i taimi uma: "Ona sa le mafai ona ou *filifili* e avea ma se tina."

Faamolemole ia manatua soo se taimi lava ou te faaagaina ai le upu

tina ou te le o talanoa atu na o tamaitai ua fanauina pe vaetamaina ni fanau i lenei olaga. O loo ou talanoa atu i afafine matutua *uma* a o tatou Matua Faalelagi. O tamaitai *uma* o se tina e tusa ma lona natura paia e faavavau.

O le po nei la, i le avea ai ma se *tama* o le fanau e toa 10—*toa iwa afafine* ma le atalii e toatasi—ma i le avea ai ma Peresitene o le Ekalesia, ou te tatalo ai ia outou lagonaina le loloto o o'u lagona e uiga ia te outou—e uiga i tagata e i ai outou ma mea lelei uma o loo outou faia. E leai se tasi e mafai ona faia le mea e mafai ona faia e se tamaitai amiotonu. E leai ma se tasi e mafai ona faaluaina le faatosinaga a se tina.

E mafai ma e tele ina fesootai atu e alii le alofa o le Tama Faalelagi ma le Faaola i isi. Ae ua i ai i tamaitai se meaalofo faapitoa mo lena mea—o se meaalofo ua faaee mai le lagi. Ua ia te oe le malosiaga e lagona ai mea o loo manaomia e se tasi—ma le *taimi* e manaomia ai e ia. E mafai ona e aapa atu, faamafanafana, aoao atu, ma faamallosia se tasi i ona taimi o mafatiaga.

E ese le vaai a tamaitai i mea nai lo alii, ma oka so matou manaomiaina o la outou vaaiga! O lo outou natura e taitai atu ai outou e mafaufau *muamua* i isi, ia mafaufau i le aafiaga o soo se faatinoga o le a i ai i luga o isi.

E pei ona ta'ua e Peresitene Eyring, o lo tatou Tina mamalu o Eva—faatasi ma lana vaai mamao i le fuafuaga a lo



tatou Tama Faalelagi—na amatalia le mea ua tatou ta'ua “o le Pa'u.” O lana filifiliga atamai ma le lototele ma le faaiuga lagolagosua a Atamu na agai ai i luma le fuafuaga o le fiafia a le Atua. O i la'ua na mafai ai mo i tatou taitoatasi ona o mai i le lalolagi, ia maua se tino, ma faamaonia atu o le a tatou filifili e tutū atu mo Iesu Keriso i le taimi *nei* pei lava ona tatou faia i le muai olaga.

O'u tuafafine pele, ua ia te outou ni meaalofo faaleagaga ma ni uiga faapitoa. Ou te uunaia outou i le po nei, faatasi ma le faamoemoe uma o lo'u loto, ia tatalo ina ia malamalama i au *meaalofo faaleagaga*—e atiae, faaoga, ma faalatele i latou, ia matua sili atu nai lo se isi lava taimi. O le a e suia le lalolagi a o e faia lea mea.

I le avea ai ma tamaitai, e te musuiaina isi ma faatu se tagāvai agavaa o faataitaiga. Se'i o'u avatua sina faamatalaga e uiga i ni faasilasilaga tetele se lua sa faia i le tatou konafesi aoao talu ai. O outou, o'u tuafafine pele, sa avea ma ki i faasilasilaga taitasi.

Muamua, auauunaga. O le tulaga faatonuina silisili mo le auauunaga sa taulai i lo tatou Faaola, o Iesu Keriso. O le mea e masani ai, o tamaitai lava, e latalata atu i taimi uma i lenei tulaga faatonuina nai lo alii. Afai e te auaua moni atu, e te muimuli i ou lagona e fesoasoani atu i se tasi ia lagonaina atili le alofa o le Faaola. O le lagona masani e auaua atu e taua lea i tamaitai amio-tonu. Ou te iloa o tamaitai e tatalo i aso uma, “O ai e finagalo Lau Afio ou te fesoasoani i ai i le asō?”

A o le'i faia le faasilasilaga ia Aperila 2018 e uiga i le auala maualuga atu ma paia atu o le tausiga o isi, o le lagona o nisi o alii o le kolosi ese lea o a latou asiasiga faaleaiga ua “maea” ma me'i atu i le isi galuega.

Ae a *outou* lagonaina se tuafafine sa outou asia na manaomia se fesoasoani, tou te tali vave atu lava i ai ma fesoasoani i le masina atoa. O lea la, o le *auala* na tou faiaoga asiasi ai na musuia ai la tatou siitaga i luga i le auauunaga.

Lua, i le konafesi aoao ua mavae, sa toe faatulaga ai korama a le Au Perisitua Mekisateko. Ina ua matou

tauivi pe faapefea ona fesoasoani i alii o le Ekalesia ia mataalia atili i o latou tiutetauave, sa matou iloilo ina ma le toto'a le faataitaiga a le Aualofa.

I le Aualofa, e feiloai faatasi tamaitai o vaitausaga ma tulaga eseese o le olaga. O tulaga taitasi o le olaga e aumaia ni luitau tulagaese, ae, o loo *outou* i ai iina, i lea vaiaso ma lea vaiaso, e miō faatasi, tuputupu ae ma aoao faatasi i le talalelei, ma faia se eseese moni i le lalolagi.

I le taimi nei, i le mulimuli ai i la outou faataitaiga, o ē umiaina le Perisitua Mekisateko o ni uso o le korama a toeaina. O nei alii e mai le 18 i le 98 tausaga (atonu e sili atu), faatasi ai ma ni aafiaga eseese faaleperisitua ma faaleEkalesia. Ua mafai nei e nei uso ona fatua'i ni sootaga faaleuso malolosi atu, aoao faatasi, ma sili ona faamanuia mataalia ai isi.

Tou te manatua ia Iuni ua mavae, sa ma lauga atu ai ma Sister Nelson i le autalavou o le Ekalesia. Sa ma valaaulia i latou ia auai i le 'autau talavou a le Alii e fesoasoani e faapotopoto Isaraelu i itu uma e lua o le veli. O lenei faapotopotoina o le “lu'i *aupito silisili*, le mafuaaga *aupito silisili*, ma le galuega *aupito silisili* i le lalolagi i le taimi nei”!¹

O se galuega ua matua manaomia ai tamaitai, ona o tamaitai latou te mamanuina le lumanai. O le po nei la ou te tuuina atu ai se aioiga faaperofeta ia te outou, o tamaitai o le Ekalesia, ia mamanuina le lumanai e ala i le fesoasoani e faapotopoto Isaraelu ua faataapepeina.

O fea e mafai ona e amata ai?

Sei ou ofoina atu ni *valaaulia se fa*:

Muamua, ou te valaaulia oe ia auai i se anapogi 10 aso mai ala faasalalau faaagafesootai ma mai soo se isi lava ala faasalalau na te aumaia ni mafaufauga lē lelei ma lē mama i lou mafaufau. Tatalo ia iloa po o a faatosinaga e aveese i le taimi o lau anapogi. O le aafiaga o lau anapogi 10 aso e mafai ona faateia ai oe. O le a se mea e te matauina i le mavae ai o se malologa mai vaaiga o le lalolagi ia na faamanualia ai lou agaga? O i ai ea se suiga i le mea ua e manao *nei* e faaalu ai lou taimi ma le malos? Ua suia ea se



tasi o au faamuamua—e tusa lava pe na o sina mea? Ou te uunaia oe e faamaumau ma mulimuli i uunaiga taitasi.

Lua, ou te valaaulia outou ia faitau le Tusi a Mamona i le va o le taimi nei ma le faaiuga o le tausaga. I le faigata ai e pei foi ona i ai i mea uma o loo e taumafai e pulea i lou olaga, afai o le a e taliaina lenei valaaulia ma se faamoemoeaga atoa o le loto, o le a fesoasoani atu le Alii ia te oe ia maua se auala e ausia ai. Ma, a e suesueina ma le agaga tatalo, ou te folafola atu o le a matala le lagi mo oe. O le a faamanuiaina e le Alii oe i musumusuga ma faaaliga faateleina.

A o e faitauina, ou te uunaia oe ia faailoga fuaiupu taitasi o loo talanoa pe o loo faasino i le Faaola. Ona, talanoa lea ma le manatu i ai e uiga i le tautala-tala e uiga ia Keriso, olioli ia Keriso, ma talai atu Keriso faatasi ma o outou aiga ma uo.² O le a outou latalata atili atu i le Faaola e ala i lenei faagasologa. Ma o suiga, e oo lava i vavega, o le a amata ona tutupu.

I lenei taeao sa faia ai le faasilasilaga e faatatau i le faatulagaga fou o sauniga i Aso Sa ma le mataupu aoaoina e faatotonugalemu i le aiga ma lagolagoina e le Ekalesia. O outou, o'u tuafafine, o le ki lea i le manuia o lenei taumafaiga



fou, paleni, ma felagolagomai o le aoaoina atu o le talalelei. Faamolemole ia aoao atu i latou o ē tou te alolofa i ai i mea tou te aoaoina mai tusitusiga paia. Aoao i latou i le auala e liliu atu ai i le Faaola mo Lona mana faamalolo ma faamama pe a latou agasala. Ma aoao i latou i le auala e utuvai ai mai Lona mana faamalosiāu i aso uma o o latou olaga.

Tolu, ia faamautu se mamanu o le auai e le aunoa i le malumalu. Atonu o le a manaomia e lenei mea sina osigataulaga laitiiti i lou olaga. O le tele o lou taimi e alu soo i le malumalu o le a faatagaina ai le Alii e aoao oe i le auala e te utuvai ai ma Lona mana o le perisitua lea na faaee atu ia te oe i totonu o Lona malumalu. Mo nisi o outou o e e le nonofo latalata i se malumalu, ou te valaaulia outou ia suesue ma le agaga tatalo e uiga i malumalu o loo i totonu o tusitusiga paia ma i upu a perofeta soifua. Saili ia *iloa* atili, ia *malamalama* atili, ia *lagona* atili e uiga i malumalu nai lo se isi lava taimi muamua na e oo i ai.

I la tatou faigalotu mo le autalavou i le lalolagi atoa ia Iuni talu ai, sa ou lauga ai e uiga i se alii talavou lea na suia lona olaga ina ua faafesuiai e ona matua lana telefoni poto i se telefoni faamoe e leai se initoneti. O le tina o lenei alii talavou o se tamaitai le fefe o le faatuatua. Sa ia vaaia le see ese atu o lona atalii i filifiliga sa ono taofia o ia mai le auauna atu i se misiona. Sa ia avatu ana olega i le malumalu ia iloa pe faapefea ona fesoasoani atu i lona atalii i se auala sili atu. Ona ia mulimuli lea i uunaiga uma.

Sa ia fai mai: “Sa ou lagona le taialaina o a’u e le Agaga e siaki le telefoni a lo’u atalii i taimi patino e maua ai ni mea patino. Ou te le iloa pe faapefea ona fealuai i nei telefoni poto, ae sa taiala a’u e le Agaga i ala faasalalau faaagafesootai uma ia ou te le faaagaina! Ou te iloa e fesoasoani le Agaga i matua o loo saili atu i le taitaiga ina ia puipuia a latou fanau. [I le taimi muamua] sa ita tele lo’u atalii ia te a’u. . . . Ae i le mavae ai na o le tolu aso, sa ia faafetai mai ia te a’u! Sa mafai ona ia lagonaina le eseese.”

Sa matua suia amioga ma uiga a lona atalii. Sa fesoasoani atili i le fale, laumata fiafia atili, ma sili ona gauai i

O Le Faamoemoega o le Aualofa

O le Aualofa e saunia tamaitai mo faamanuiaga o le ola e faavavau a o latou:

- Faateleina le faatuatua i le Tama Faalelagi ma Iesu Keriso ma Lana Togiola.
- Faamalosiā o tagata taitoatasi, aiga, ma le auaiga e ala i sauniga ma feagaiga.
- Galulue i le lotogatasi e fesoasoani ia i latou e manaomia le fesoasoani.

E mafai ona maua kopi i le [lds.org/callings/relief-society/purposes](https://www.lds.org/callings/relief-society/purposes) po o le [store.lds.org](https://www.lds.org/store).

le lotu. Sa ia fiafia e auauna atu mo se taimi i le vai papatiso o se malumalu ma saunia mo lana misiona.

O la’u valaaulia lona fa, mo outou ua lava le matutua, o le auai lea ma le atoatoa i le Aualofa. Ou te uunaia outou e suesue le faamatalaga o le faamoemoega o le Aualofa o loo i ai nei. E musuiaina. Atonu e mafai ona taialaina ai outou i le atiaeina o lau lava faamatalaga o le faamoemoega mo lou lava olaga. Ou te talosagaina foi outou ia olioli i upumoni o loo i le tautinoga a le Aualofa na faasalalauina i le toetoe 20 tausaga talu ai.³ O se kopi ua faavaaina o lenei tautinoga o loo tautau i le puipui i totonu o le ofisa o le Au Peresitene Sili. E faagaetiaina lava a’u i taimi *uma* ou te faitauina ai. O loo faamatalaina ai po o ai oe ma le tagata e finagalo le Alii e avea ai oe i lenei taimi *tonu* a o e faia *lau* vaega e fesoasoani ai e faapotopoto Isaraelu ua faataapeapeina.

O’u tuafafine pele, matou te manao-mia *outou*! Matou te “manaomia lo *outou* malosi, lo *outou* liua, lo *outou* talitonuga maumaututu, lo *outou* tomiai e taitai, lo *outou* atamai, ma o *outou* leo.”⁴ E le mafai lava ona matou faapotopotoina Isaraelu e aunoa ma outou.

Ou te alofa ma faafetai atu ia te outou ma ou te faamanuia nei outou i le tomiai e tuuese ai le lalolagi a o outou fesoasoani mai i lenei galuega taua ma le faanatinati. E mafai ona tatou faia faatasi mea uma ua manao-mia mai e lo tatou Tama Faalelagi tatou te faia e saunia ai le lalolagi mo le Afio Mai Faalua o Lona Alo Pele.

O Iesu o le Keriso. O Lana Ekalesia lenei. Ou te molimau atu ai i nei mea, i le suafa o Iesu Keriso, amene. ■

FAAMATALAGA

1. Russell M. Nelson, “Faamoemoe o Isaraelu,” (faigalotu a le autalavou i le lalolagi atoa, 3 Iuni, 2018), [HopeofIsrael.Lds.org](https://www.hopeofisrael.lds.org).
2. Tagai i le 2 Nifae 25:26.
3. O loo maua nei pepa o faamatalaga i le initoneti. Mo le faamatalaga o le faamoemoega a le Aualofa, tagai [lds.org/callings/relief-society](https://www.lds.org/callings/relief-society). Mo le tautinoga a le Aualofa, tagai Mary Ellen Smoot, “Rejoice, Daughters of Zion,” *Liahona*, Jan. 2000, 111–14.
4. Russell M. Nelson, “O Se Talosaga i O’u Tuafafine,” *Liahona*, Nov. 2015, 96; ua faapoopo le faamamafa.



Sauniga i le Taeao o le Aso Sa | 7 Oketopa, 2018

Saunia e Elder M. Russell Ballard

Sui Peresitene o le Korama a Aposetolo e Toasefululua

O Le Faaaliga o le Togiolaina o Ē ua Maliliu

Ou te molimau atu o le faaaliga na maua e Peresitene Iosefa F. Samita e moni. Ou te molimau atu e mafai e tagata uma ona iloa e moni.

O'u uso e ma tuafafine, sa saunia la'u lauga i se taimi a o le'i maliliu si o'u toalua pele o Barbara. Matou te faafetai tele lava ma lo'u aiga mo lo outou alolofa ma le tou aapa mai ma le agalelei. Ou te tatalo ia faamanuia a'u e le Alii a o o'u talanoa atu ia te outou i lenei taeao.

Ia Oketopa 1918, 100 tausaga talu ai, sa maua ai e Peresitene Iosefa F. Samita se faaaliga mamalu. I le mavae ai toe-toe 65 tausaga o le auunaga tuuto i le Alii i le Ekalesia a Iesu Keriso o le Au Paia o Aso e Gata Ai, ma toe o nai vai-aso ae maliliu o ia i le aso 19 o Novema, 1918, sa ia nofonofo ai i lona potu ma mafaufau loloto i le taulaga togiola a Keriso ma faitauina le faamatalaga a le Aposetolo o Peteru e uiga i le galuega a le Faaola i le lalolagi o agaga ina ua mavae Lona Faasatauroga.

Na ia tusia: "Ao ou faitau sa matuai faagaetia a'u. . . . A'o 'ou mafau-fau loloto i luga o nei mea . . . , sa tatalaina mata o lo'u malamalama, ma sa to'a i o'u luga le Agaga o le Alii, ma sa 'ou vaai i 'au o e ua oti."¹ O le anotusi atoa o le faaaliga o loo faa-maumuina i le Mataupu Faavae ma Feagaiga vaega 138.

Se'i o'u tuuina atu sina talaaga ina ia talisapaia atoatoa atili le olaga o sauniuniga a Iosefa F. ina ia maua lenei faaaliga ofoofogia.

Ina ua avea o ia ma Peresitene o le Ekalesia, sa asia ai Navu i le 1906 ma mafaufau i se manatuaga na ia maua ina ua lima ona tausaga. Sa ia saunoa: "O le vaega tonu lenei sa ou tu ai ina ua ui mai [Iosefa, le uso o lo'u tama, ma lo'u tama, o Ailama] e o atu ai i Karefaasi. E aunoa ma le oso ese mai lana solofanua sa punou mai ai lo'u tama mai le nofoa o le solofanua ma sii atu a'u i luga mai le palapala. Sa ia sogi faatofa mai ia te a'u ma toe tuu a'u i lalo ma ou matamata atu a o ia tietie ese atu."²

O le isi taimi na sosoo ai na toe vaai ai Iosefa F. ia i la'ua, o le taimi na sii ai o ia i luga e lona tina, o Mary Filitia Samita, e vaai i tino maliufasia o taooto faatasi i le mavae o le fasiotiga faamatu-ro i le Falepuipui i Karefaasi i le aso 27 o Iuni, 1844.

Lua tausaga mulimuli ane, na tuua ai e Iosefa F., faatasi ma lona aiga ma lona tina faatuatua, o Mary Filitia Samita lona aiga i Navu mo Uinita Kuota. E ui sa le'i atoa le 8 tausaga le matua, ae sa

manaomia Iosefa F. e ave se tasi o vaega o manu mai Montrose, Iowa, i Uinita Kuota ma mulimuli ane i le Vanu o Sate Leki, ma taunuu ai i le toeititi atoa lona 10 tausaga. Ou te faamoemoe o loo faalogo mai outou tamaiti ma alii talavou ma o le a iloaia le tiutetauave ma le faamoemoega na tuu i luga o Iosefa F. i le taimi o lona tamaititi.

I le na o le fa tausaga mulimuli ane, i le 1852, ina ua 13 ona tausaga, sa maliliu ai lona tina pele—ma tuua ai Iosefa ma ona tei o ni matuaoti.³

Sa valaauina Iosefa F. e auuna atu i se misiona i Atumotu o Hawaii i le 1854 a o 15 ona tausaga. O lenei misi-on, lea na sili atu ma le tolu tausaga le umi, sa amatalia ai se olaga o auunaga i totonu o le Ekalesia.

I lona taunuu atu i Iuta, sa faaipoipo ai loa Iosefa F. i le 1859.⁴ Mo isi tausaga na sosoo ai, sa faatumulia ai lona olaga i galuega, tiute faaleaiga, ma ni misiona faaopoopo se lua. I le aso 1 o Iulai, 1866, i le 27 o tausaga, sa matua suia ai e faavavau e Iosefa F. lona olaga ina ua faauuina o ia o se Aposetolo e Polika Iaga. Ia Oketopa o le tausaga na sosoo ai, sa ia faatumuina ai se avanoa i le Aufono a le Toasefululua.⁵ Sa ia auuna atu o se fesoasoani ia Polika Iaga, Ioane Teila, Uilifoti Uutilafi, ma Lorenisio Senoa a o le'i avea o ia lava ma Peresitene i le 1901.⁶

Sa faafeiloai e Iosefa F. ma lona faletua o Julina le la ulumatua, o





I se faaaliga mamalu na mauaina ia Oketopa 1918, sa vaai ai Peresitene Iosefa F. Samita i lona tama, o Ailama, ma le Perofeta o Iosefa Samita.

Mercy Josephine, i le aiga.⁷ Sa na o le lua ma le afa ona tausaga ae malii o ia. Sa le'i pine ae tusia e Iosefa F. e faapea, "Ua tasi nei le masina ananafi talu ona malii la'u . . . pele ia Josephine. E! ma'i mau pe a na mafai ona ou laveai o ia e ola ae e ave ma tamaitai matua. Ua ou misia lava o ia i aso uma ma ua tuua na o a'u. . . . Ia faamagalo o'u vaivaiga e le Atua pe afai e sese le alofa atu i a'u fanau iti e pei ona ou alofa ai ia i latou."⁸

I le soifuaga atoa o Peresitene Samita sa malii ai lona tama, lona tina, tasi le uso, lua tuafafine, lua avā, ma le fanau e toa sefulutolu. Sa masani lelei o ia ma faanoanoaga ma le malilii o ē pele.

Ina ua malii lona atalii o Albert Jesse, sa tusi atu ai Iosefa F. i lona tuafafine o Martha Ann e faapea sa ia aioi atu i le Alii e laveai o ia ma fesili ai, "Aisea lava ua faapea ai? E, le Atua e, aisea ea ua faapea ai?"⁹

E ui i ana tatalo i lona taimi, ae sa le'i maua e Iosefa F. se tali i lenei mataupu.¹⁰ Sa ia ta'u atu ia Martha Ann e faapea "[e foliga mai e pei] le lagi o se apamemea ua ufitia ai o matou ulu" i le mataupu o le oti ma le lalolagi o

agaga. Ae ui i lea, o lona faatuatua i folafolaga e faavavau a le Alii sa tumau ma mausali.

I le taimi tatau ai a le Alii, o tali faaopoopo, mafanafana, ma le mala-malama e uiga i le lalolagi o agaga sa sailia e Peresitene Samita na oo mai ia te ia e ala i le faaaliga ofoofogia na ia maua ia Oketopa 1918.

O lona tausaga sa matua patino le tiga mo ia. Sa ia lotofaavau i le malilii o le anoano i le Taua Tele a le Lalolagi lea na faaauau ona oo atu i le silia ma le 20 miliona tagata na fasiotia ai. Ma le isi, sa pepesi foi le faama'i o le fulū i le lalolagi atoa na ma'umau ai ola o le toatele pe 100 miliona tagata.

I le gasologa o le tausaga, sa malilii ai foi isi tagata faapelepele o le aiga o Peresitene Samita. O Elder Ailama Maki Samita o le Korama a Aposetolo e Toasefululua, o lona atalii ulumatua lea ma o lo'u tama matua lea, sa malii faafuasei i le faaletonu o le pitogaau.

Sa tusia e Peresitene Samita: "Ua ou lē magagana—[gūgū] i le lotofaavau! . . . Ua nutimomoia lo'u fatu; ma tau manuō ai i le fiaola! . . . E! Ou te alofa ia te Ia! . . . O le a ou alofa ia te ia e faavavau pea. Ma e faapena lava ma

o le a faapea foi i o'u atalii ma afafine uma, ae o ia o lo'u atalii ulumatua, o le na muamua aumaia le olioli ma le faamoemoe o se igoa mamalu i tagata. . . . Mai le ta'ele o lo'u agaga ou te faafetai ai i le Atua mo ia! Ae . . . Oka! Sa ou manaomia o ia. Tatou te manaomia uma o ia! Sa sili ona aogā o ia i le Ekalesia. . . . Ma o lenei . . . E! o le a se mea e mafai ona ou faia! . . . E! Le Atua e, fesoasoani mai ia te a'u!"¹¹

O le masina na sosoo ai, sa malii ai le atalii faaletulafono o Peresitene Samita, o Alonzo Kesler, i se faalavelave matautia faafuasei.¹² Sa tusia e Peresitene Samita i lana apitalaaga, "O lenei faalavelave sili ona matautia, faataumaoi ma lotofaavau, ua matua toe faavau ai foi lo matou aiga atoa."¹³

Fitu masina mulimuli ane, ia Setema 1918, na malii ai le afafine faaletulafono o Peresitene Samita ma o lo'u tinamatua lea, o Ida Bowman Samita, i le mavae ai ona ia fanauina o lana pepe lona lima, o lo'u uncle o Ailama.¹⁴

Ma o lea la, i le aso 3 o Oketopa, 1918, i le lagonaina ai o le faanoanoa tele i le faitau miliona na malilii i le lalolagi e ala i taua ma faama'i faapea ai foi ma le malilii o tagata o lona lava aiga, sa maua ai e Peresitene Samita le faaaliga faalelagi ua lauiloa "o le faaaliga o le togiolaina o ē ua malilii."

Sa ia ta'u lea faaaliga i le aso na sosoo ai i le sauniga amata o le konafesi aoao ia Oketopa. Sa faasolo vaivai le malosi o Peresitene Samita, ae sa ia saunoa puupuu lava: "O le a ou le, ma ou te le taumafai e amata faamatala atu le tele o mea o loo i ai i lo'u mafaufau i lenei taeao, ma e tatau ona ou tolopoina seia i ai se taimi i le lumanai, e tusa ma le finagalo o le Alii, lo'u taumafai e ta'u atu ia te outou nisi o mea o loo i ai i lo'u mafaufau, ma o loo i ai i lo'u loto. Ou te le'i nofo na o a'u i nei masina e lima [ua mavae atu]. Sa ou mafuta i le agaga o le tatalo, o aioiga, o le faatuatua ma le naunautaiga; ma sa faia ni a'u fesoataiga faifai pea ma le Agaga o le Alii."¹⁵

O le faaaliga na ia maua i le aso 3 o Oketopa na faamafanafanaina ai lona loto ma maua ai tali i le tele o ana fesili. E mafai foi ona faamafanafanaina i tatou

ma aoao atili e uiga i o tatou lava lumanai pe a tatou feoti ma e pele ia i tatou ma o atu i le lalolagi o agaga e ala i le sutesueina o lenei faaaliga ma mafaufau loloto i lona taua i le auala o loo tatou ola ai i o tatou olaga i aso taitasi.

Faatasi ai ma le tele o isi mea sa vaai i ai Peresitene Samita, o le asiasiga a le Faaola i ē faatuatua i le lalolagi o agaga i le mavae ai o Lona lava maluu i luga o le satauro. Ou te sii mai le faaaliga:

“Ae faauta, sa faatutu e ia mai totonu o e amiotonu, ana ‘au ma tofia avefeau, ua faaofuina i le mana ma le pule, ma sa tofia i latou e o atu ma avatu le malamalama o le talalelei ia te i latou o e sa i ai i le pouliuli, i agaga lava o tagata uma;¹⁶ ma sa faapea ona talai atu o le talalelei i e ua oti. . . .

“Sa aoao atu ia te i latou le faatuatua i le Atua, le salamo mai agasala, le sui papatisoga mo le faamagaloina o agasala, le meaalofo o le Agaga Paia e ala i le faaee o lima,

“Ma isi mataupu autu uma o le talalelei sa tataua ia te i latou ona iloa ina ia latou agavaa ina ia mafai ona faamasino i latou e tusa ma tagata i le tino, ae ola i le Atua i le agaga. . . .

“Aua sa vaai e ua maliliu i le umi o le tuueseaa o o latou agaga mai i o latou tino, o se pologa.

“O i latou ia na aoaoina e le Alii, ma tuu atu ia te i latou le mana e tutulai mai ai, pe a mavae lona toetu mai i le oti, e ulu atu i le malo o lona Tamā, e faapaleina iina i le ola pea ma le ola e faavavau,

“Ma faaauau pea mai le taimi lena i luma a latou galuega e pei ona sa folafolaina e le Alii, ma avea ma e e tofusua i faamanuiaga uma sa faapolopolo mo i latou o e alolofa ia te ia.”¹⁷

I le faaaliga, sa vaai ai Peresitene Samita i lona tama, o Ailama, ma le Perofeta o Iosefa Samita. Ua atoa le 74 tausaga talu mai le taimi mulimuli na ia vaai ai ia i la’ua a o tamaitiiti lava i Navu. E mafai na ona tatou mafaufau i lona olioli i le vaai atu i lona tama pele ma le uso o lona tama. Masalo sa musuia o ia ma faafanafanaina ia iloa e faatumauina e agaga uma o latou lava foliga e pei ona i ai i le tino faaletino ma o loo



latou faatalitali ma le naunautai i le aso o lo latou toetutu ua folafolaina. Ua faaaliga atili i le faaaliga le loloto ma le lautele atoatoa o le fuafuaga a le Tama Faalelagi mo Ana fanau ma le alofa togiola o Keriso ma le mana le mafaatusalia o Lana Togiola.¹⁸

I lenei aso faamanatu faapitoa lona 100, ou te valaaulia ai outou ina ia faitau maeaea lelei ma le manatunatu i lenei faaaliga. A o outou faia lea mea, ia faamanuia le Alii ia te outou ina ia malamalama atoatoa atili ma talisapaia le alofa o le Atua ma Lana fuafuaga o le faaolataga ma le fiala mo Ana fanau.

Ou te molimau atu o le faaaliga na maua e Peresitene Iosefa F. Samita e moni. Ou te molimau atu e mafai ona faitauina e tagata uma ma iloa ai e moni. O i latou e le mauaina lenei malamalama i lenei olaga, o le a mautinoa lava le iloa ina o lona moni pe a taunuu atu tagata uma i le lalolagi o agaga. O iina, o le a alolofa ai ma viia e tagata

uma le Atua ma le Alii o Iesu Keriso mo le fuafuaga sili o le faaolataga ma le faamanuiaga o le Toetutu folafolaina pe a toe faatasi le tino ma le agaga ma lē toe tuueseeseina ai lava.¹⁹

E ma’eu lo’u lotofaafetai i le iloa o le mea ua i ai nei la’u pele o Barbara ma o le a ma toe faatasi ma lo ma aiga mo le faavavau atoa. Ia tausia i tatou e le filemu o le Alii i le taimi nei ma le faavavau o la’u tatalo faamaualalo lea, i le suafa o Iesu Keriso, amene. ■

FAAMATALAGA

1. Mataupu Faavae ma Feagaiga 138:6, 11.
2. Joseph F. Smith, in Preston Nibley, *The Presidents of the Church* (1959), 228.
3. Tagai i le Joseph Fielding Smith, *Life of Joseph F. Smith* (1938), 12.
4. Sa ia faaipoipo atu ia Levira Clark i le 1859, Julina Lambson i le 1866, Sarah Richards i le 1868, Edna Lambson i le 1871, Alice Kimball i le 1883, ma Mary Schwartz i le 1884.
5. Sa valaauina Iosefa F. Samita o se fesoasoani faapoopo i le Au Peresitene Sili (Polika Iaga, Heber C. Kimball ma Daniel H. Wells). Sa ia auauna atu foi

o se fesoasoani lua i le Au Peresitene Sili i Peresitene o le Ekalesia e toatolu, Peresitene Ioane Teila, Uilifoti Uutilafi, ma Lorenisio Senoa.

6. Sa auauna atu Iosefa F. Samita o se fesoasoani i le Au Peresitene Sili i le taimi o le pulega a Polika Iaga ma sa auauna atu o se Fesoasoani Lua i le Au Peresitene Sili i le taimi o le pulega a Ioane Teila, Uilifoti Uutilafi, ma Lerinisio Senoa. O ia le uluai Peresitene o le Ekalesia na auauna atu i le Au Peresitene Sili a o le'i valaauina e avea ma Peresitene.
7. O Mercy Josephine, le ulumatua a Iosefa F., sa fanau i le aso 14 o Aokuso, 1867, ae malui i le aso 6 o Iuni, 1870.
8. Apitalaaga a Iosefa F. Samita, Iulai 7, 1870, Potutusi o Talafaasolopito a le Ekalesia, O Le Ekalesia a Iesu Keriso o le Au Paia o Aso e Gata Ai, Aai o Sate Leki, Iuta.
9. Joseph F. Smith to Martha Ann Smith Harris, Aug. 26, 1883, Church History Library; see Richard Neitzel Holzapfel and David M. Whitchurch, *My Dear Sister: The Letters between Joseph F. Smith and His Sister Martha Ann* (2018), 290–91.
10. I le tele o taimi, na taitaina ai e le Alii Iosefa F. Samita i lona soifuaga faaletagata lava ia ma i lana galuega auauna atu o se Aposetolo ma le Peresitene o le Ekalesia e ala i miti, faaaliga, ma vaaiga mamao musuia. O le tele o taimi o nei meaalofo taua mai le Alii na tusia i ana apitalaaga, saunoaga, toe manatunatuga, ma faamaumauga aloaia a le Ekalesia.
11. Joseph F. Smith, journal, Jan. 23, 1918, Church History Library; spelling and capitalization modernized; see Joseph Fielding Smith, *Life of Joseph F. Smith*, 473–74.
12. Tagai i le “A. [P.] Kesler Is Killed in Fall from a Building,” *Ogden Standard*, Feb. 5, 1918, 5.
13. Iosefa F. Samita, apitalaaga, Fep. 4, 1918, Potutusi o Talafaasolopito o le Ekalesia.
14. Tagai i le “Ida Bowman Smith,” *Salt Lake Herald-Republican*, Sept. 26, 1918, 4.
15. Iosefa F. Samita, i le Conference Report, Oct. 1918, 2.
16. Tagai i le maufaasino i lo “tatou Tinā mamalu o Eva” ma “fanau tamaitai faamaoni o e na . . . tapuai atu i le Atua moni ma soifua” (Mataupu Faavae ma Feagaiga 138:39.).
17. Mataupu Faavae ma Feagaiga 138:30, 33–34, 50–52.
18. O le tusiga o le faaaliga na muai lomiai le aso 30 o Novema, 1918, lomiga a le *Deseret News*, 11 aso talu ona mavae le malui o Peresitene Samita, i le aso 19 o Novema. Sa lolomiina i le *Improvement Era* ia Tesema faapea ma lomiga ia Ianuari 1919 o le *Relief Society Magazine*, le *Utah Genealogical and Historical Magazine*, le *Young Women's Journal*, ma le *Millennial Star*.
19. E ui o le a toetutu atalii o le malaia, ae latou te le tuu atu le alofa ma viiga i le Tama Faalelagi ma Iesu Keriso e pei o le a faia e i latou e mauaina se malo o le mamalu. Tagai i le Alema 11:41; Mataupu Faavae ma Feagaiga 88:32–35.



Sister Bonnie H. Cordon
Peresitene Aoao o Tamaitai Talavou

Avea ma se Leoleo Mamoe

Ou te faamoemoe o i latou e te auauna atu i ai o le a vaai ia te oe o se uo ma iloina, o totonu ia te oe, ua i ai se latou siamupini, ma se tasi latou te talanoa i ai.

I le tausaga talu ai, sa aumaia ai e se tamaitiiti Peraimeri sa ou feiloai i ai i Chile se ‘ata’ata i o’u foliga. “Talofa,” na ia fai mai ai, “O a’u o Tavita. E mafai ona e talanoa e uiga ia te a’u i le kona-fesi aoao?”

I taimi lē leoa, ou te mafaufau ai i le faafeiloai e le’i mafaufauina a Tavita. Tatou te mananao uma lava ina ia iloa-ina. Tatou te mananao ina ia faatāuaina, ina ia manatuaina, ma ia lagonaina le alofagia.

Uso e ma tuagane, e taua outou taitoatasi. E tusa pe lē talanoaina oe i le konafesi aoao, e silafia oe ma alofagia oe e le Faaola. Afai o e mafaufau pe moni lena mea, tau lava o lou mafaufau ua Ia “togitogia [oe] i luga o [Ona] alofilima.”¹

I le iloina e alofa le Faaola ia i tatou, atonu tatou te mafaufau, pe mafai faapefea ona sili atu lo tatou faa-ali atu o lo tatou alolofa mo Ia.

Na fesili le Faaola ia Peteru, “Pe e te alofa mai ia te au . . . ?”

Sa tali Peteru, “Toe, le Alii e, ua e silafia ou te alofa ia te oe. Ona fetalai atu lea o ia ia te ia, Ia e fafaga i au tamai mamoe.”

Ina ua fesiligia faalua ma faatolu lenei fesili “Pe e te alofa mai ia te au?” Na faanoanoa Peteru, peitai na faa-mautu atu lona alofa: “Le Alii e, ua e silafia, ou te alofa ia te oe. Ona fetalai atu lea o Iesu ia te ia, *Ia e fafaga i a’u mamoe.*”²

Pe le’i faamaonia ea e Peteru o ia lava o se [tasi] e mulimuli ma le alofa ia Keriso? Mai le latou feiloaiga muamua i



luga o le matafaga, sa ia tuua “loa lea” o lana upega ae mulimuli atu i le Faaola.³ Na avea Peteru ma faifaiva moni i tagata. Sa ia malaga faatasi ma le Faaola i Lana galuega patino ma fesoasoani e aoao isi i le talalelei a Iesu Keriso.

Ae ua silafia nei e le Alii toetu e lē toe i ai o Ia i autafa o Peteru, e faaali atu ia te ia le auala ma po o afea e tatau ai ona ia auauna atu. I le toesea ai o le Faaola, o le a manaomia e Peteru ona saili le taitaiga mai le Agaga, maua e ia lava faaaliga, ona maua lea o le faatuatua ma le lototele e galue ai. I le taulai atu i Ana mamoe, sa finagalo le Faaola ia faia e Peteru le mea Na te faia pe ana i ai o Ia iina. Sa Ia fai atu ia Peteru ia avea ma se leoleo mamoe.

Ia Aperila ua tuanai atu, sa tuuina mai e Peresitene Russell M. Nelson se valaaulia e talitutusa ia i tatou ina ia fafaga mamoe a le Tama i se auala paia atu ma ia faia lea e ala i le auaunaga.⁴

Ina ia mataalia le taliaina o lenei valaaulia, e tatau ona tatou atiae se loto a se leoleo mamoe ma malamalama i manaoga o mamoe a le Alii. E faapefea ona tatou avea ma leoleo mamoe lea e manaomia e le Alii ona tatou avea ai?

E pei lava o fesili uma, e mafai ona tatou vaai atu i lo tatou Faaola, o Iesu Keriso—le Leoleo Mamoe Lelei. Sa iloa ina ma faitauina mamoe a le Faaola, sa vaavaaia i latou, sa faapotopoto i latou i totonu o le lafu o le Atua.

Iloaina ma Faitauina

Ao tatou tauivi e mulimuli i le faa-taitaiga a le Faaola, muamua, e tatau ona tatou muamua iloa ina ma faitauina Ana mamoe. Ua faapatinoina le tofiaina o i tatou i tagata taitoatasi ma aiga ina ia vaavaaia ina ia tatou mautinoa o lafu uma a le Alii e manatuaina ma e leai se tasi e faagaloina. Ae peitai, o le faitauina, e le o faatatau i fuainumera; e faatatau i le faamautinoaina ua lagona e tagata *taitoatasi* le alofaina e le Faaola e ala i se tasi o loo auauna atu *mo* Ia. I lena auala, e mafai ai e tagata uma ona iloa ina ua silafia i latou e se Tama oi le Lagi agaalofa.

Sa ou feiloai talu ai nei i se tamaitai talavou o lē sa tofia e auauna atu i se uso toetiiti faalimaina lona matua.



Faatasi ai, sa la iloa ina e ia i laua uma se fiafia mo le musika. Pe a asiasi atu lenei tamaitai talavou, la te usuina faatasi pese, ma faasoa mea la te fiafia i ai. La te fatufatua’i se faigauo lea e faamanuia uma ai o laua olaga.

Ou te faamoemoe o i latou e te auauna atu i ai o le a vaai ia te oe o se uo ma iloa ina, o totonu ia te oe, ua i ai se latou siamupini, ma se tasi latou te talanoa i ai—se tasi e nofouta i o latou tulaga ma lagolagoina i latou i o latou faamoemoega ma sini.

Talu ai nei, sa ou maua ai se tofiga e auauna atu i se uso e lē masani lelei i ai la’u soa ma a’u. Ao ou fefautuaai faatasi ma Jess, lo’u uso o auaunaga e 16 tausaga le matua, sa ia fautua mai ma le atamai, “E manaomia ona ta iloa ina o ia.”

Sa vave loa ona ma filifili o se selfie ma se tesi faalauiloa sa tatau ona faagasolo. Sa ou uuina le telefoni, ma sa oomi e Jess le ki e pu’e ai le ata. O le ma avanoa muamua e auauna atu ai sa o se taumafaiga faalesoa.

I le ma asiasiga muamua, sa ma fesili ai i lo ma uso pe sa i ai se mea e mafai ona ma faafofia i ā maua tatalo mo ia. Sa ia faasoa ina mai se luitau patino ma fai mai na te taliaina ā maua tatalo. O lona faamaoni ma le talitonuga na aumaia ai se sootaga vave o le alofa. Oka se faamanuiga matagofie o le manatuaina o ia i a’u tatalo i aso uma.

Ao e tatalo, o le a e lagonaina le alofa o Iesu Keriso mo i latou e te

auauna i ai. Faasoa atu lena alofa ma i latou. O le a le auala sili e fafaga ai Ana mamoe nai lo le fesoasoani ia latou lagona lona alofa—*e ala ia te oe?*

Leoleo i Luga [o i Latou]

O se auala lona lua e atiina ae ai le loto o le leoleo mamoe o le leoleo lea i luga o Ana mamoe. I le avea ai ma tagata O Le Ekalesia a Iesu Keriso o le Au Paia o Aso e Gata Ai, e mafai ona tatou gaoioi, faasa’o, faaleleia, ma toe fausia toetoe lava o so’o se mea. E vave ona tatou taulimaina se manaoga ma se lima fesoasoani po o se ipu kuki. Ae o i ai nisi mea?

O silafia e a tatou mamoe o loo tatou leoleo i luga o i latou ma le alofa ma o le a tatou galulue e fesoasoani atu?

I le Mataio 25 tatou te faitau ai:

“O mai ia, o outou ua faamanuiaina e lo’u Tama, ia fai mo outou tofi le malo ua saunia mo outou . . . :

“Aua na ou fia ‘ai ona outou avane ai lea ni mea ou te ‘ai ai; na ou fia inu, ona outou avane ai lea ni vai ou te inu ai, sa fai a’u ma tagata ese, ona outou talia lea o a’u: . . .

“Ona tali mai ai lea ia te ia o e amiotonu, e faapea mai, Le Alii e, o anafea ua matou *iloa* ai oe ua fia ai ma matou fagina oe? po o fia inu, ma matou avane e te inu ai?

“O anafea foi na matou *iloa* ai oe o le tagata ese, ma matou talia oe?”⁵

Uso e ma tuagane, o le upu sili ona taua o le *iloa*. Sa iloa ina e ē amiotonu

i latou na manaomia le fesoasoani aua sa latou leoleo ma matauina. E mafai foi ona tatou mataala ina ia fesoasoani ma faamafanafana, ina ia faamanatu ma vaai gafatia o isi. Ma a o tatou galulue, e mafai ona faamautinoaina i tatou i le folafolaga i le Mataio: “Auā na faia e outou i le tasi o e aupito itiiti o o’u uso nei . . . , o a’u lea na outou faia i ai.”⁶

O se uo—o le a tatou faaigoia ia Ioane—sa faasoa mai le mea e mafai ona tupu pe a vaaia se manaoga tau le iloa a se tasi: “Sa taumafai se tuafafine i la’u uarota e pule i lona ola. I le mavae ai o le lua masina, sa ou iloina e leai se tasi o la’u korama na alu atu i lona toalua e talanoa i lenei mea matautia na tupu. O le mea e faanoanoa ai, ou te le’i faatinoa foi. Mulimuli ane, na ou talosagaina le tane mo se ‘aiga o le aoauli. O ia o se alii e matamuli, e masani ona filemu. Ae peitai ina ua ou fai atu, ‘Sa taumafai lou toalua e pule i le ola. O se mea lofituina lea mea mo oe. E te fia talanoa e uiga i ai?’ sa ia tagi masūsū. Sa ma maua se talanoaga alofa ma mafanafana ma atiaeina se vavalalata ofoofogia ma le faatuatuaia i totonu o nai minute.”

Na faapoopo mai Ioane, “Ou te manatu o la matou naunautaga e tau lava o le aumaia o kuki enaena, nai lo le mafaufau pe faapefea ona taulimaina lena taimi ma le faamaoni ma le alofa.”⁷

Atonu o loo tiga, leiloloa, faapea foi ona sē ese ma le loti i ai a tatou mamoe; i le avea ai o ni leoleo mamoe, e mafai ona tatou lolotolotoi ai i tagata e muamua ona vaai i o latou manaoga. E mafai ona tatou faalogo ma alofa atu e aunoa ma le faamasino atu ma ofa atu le faamoemoe ma le fesoasoani faatasi ai ma le taitaiga iloaitino a le Agaga Paia.

Uso e ma tuagane, ua sili atu ona faatumulia le lalolagi i le faamoemoe ma le olioli ona o galuega musuia o le agalelei o loo outou faatinoaina. Ao outou sailia le taitaiga a le Alii i le auala e faailoa atu ai Lona alofa ma vaai i manaoga o i latou e te auauna atu i ai, o le a matala o outou mata. E tuuina atu e lau tofiga paia o le auaunaga ia te oe le aia tatau faalelagi i musumusuga. E mafai ona e sailia lena musumusuga ma le mautinoa.



Faapotopoto i totonu o le Lafu a le Atua

Tolu, tatou te mananao ina ia faapotopoto mai a tatou mamoe i totonu o le lafu a le Atua. O le faia o lenei mea, e tatau ona tatou mafaufau po o fea o latou i ai i le ala o feagaiga ma ia naunau e savavali faatasi ma i latou i le latou faigamalaga o le faatuatua. O loo ia i tatou se avanoa paia ina ia iloina o latou lagona ma taitai i latou i le latou Faaola.

Sa faigata ia Sister Josivini i Fiti ona vaaia lona agai i luma i luga o le ala o feagaiga—e moni lava. Sa vaaia e lana uo le tauivi o Josivini ia iloa lelei ia tusitusiga paia ina ia faitau ai. Sa ia saunia mo Josivini se matatioata fou e faitau ai ma se peni samasama sesega e maka ai le ta’uaina o Iesu Keriso i le Tusi a Mamona. O le mea na amataina o se manao faigofie e auauna atu ma fesoasoani i le suesueina o tusitusiga paia na mafua ai ona auai Josivini i le malumalu mo le ulua’i taimi 28 tausaga talu ona papatiso o ia.

Pe malolosi pe vaivai a tatou mamoe, fiafia pe mafatia, e mafai ona tatou mautinoa e leai se tasi e lagona le tuutoatasi. E mafai ona tatou alolofa ia i latou po o fea lava o latou i ai faaleagaga ma ofa atu le lagolago ma le faamalosiaga mo leisi laasaga i luma. Ao tatou tatalo ma saili ina ia malamalama i o latou loti, ou te molimau atu o le a taitaia i tatou e le Tama Faalelagi ma o le a faatasi mai Lona Agaga mai tatou. Ua ia i tatou le avanoa e avea ai

ma “‘au agelu e si’o faataamilo i latou ao ia muamua atu ia i latou.”⁸

Ua valaaulia i tatou e le Alii ina ia fafaga i Ana mamoe, ma ia tausia Ana lafu e pei ona ia faia. Ua ia valaaulia i tatou ina ia avea ma leoleo mamoe i malo uma, i atunuu uma. (Ma ioe, Elder Uchtdorf, matou te alolofa ma manaomia leoleo mamoe Siamani.) Ma ua ia finagalo i Ana tagata talavou e auai faatasi i le galuega.

E mafai ona avea a tatou talavou ma nisi o a tatou leoleo mamoe malolosi. O i latou, e pei ona saunoa mai Peresitene Russell M. Nelson, “o tagata sili ona lelei *ua* auina mai e le Alii i lenei lalolagi.” O i latou o ni “agaga tamalii,” o a tatou “tagata taaalo sili ona lelei” o ē mulimuli i le Faaola.⁹ E mafai ona outou vaai faalemafaufau i le mana e aumaia e leoleo mamoe faapena a o latou tausia Ana mamoe? O le auauna atu faatasi ma nei talavou, tatou te vaaia ai mea ofoofogia.

Tamaitai talavou ma alii talavou, matou te manaomia outou! Afai e lē o i ai sau tofiga o le auaunaga, talanoa i lau peresitene o le Aualofa po o le korama a toeaina. O le a latou fiafia i lou naunautai ina ia mautinoa o loo iloina ma faitauina Ana mamoe, leoleo, ma faapotopoto mai i totonu o le lafu a le Atua.

A oo mai le aso tatou te tootutuli ai i aao a lo tatou Faaola pele, ua faafaileleina Lana lafu, ou te tatalo ina ia mafai ona tatou tali atu e pei o Peteru: “Ioe, le Alii e, ua e silafia, ou te alofa ia te oe.”¹⁰ O Au mamoe nei, ua *alofagia* i latou, ua *saogalemu* i latou, ma ua latou i ai i le *aiga*. I le suafa, o Iesu Keriso, amene. ■

FAAMATALAGA

- 1 Nifae 21:16.
2. Tagai i le Ioane 21:15–17; faapoopo le faamamafa.
3. Tagai i le Mataio 4:20.
4. Tagai Russell M. Nelson, “Auaunaga,” *Liahona*, Me 2018, 100.
5. Mataio 25:34–35, 37–39; faapoopo le faamamafa.
6. Mataio 25:40.
7. Tusitusiga patino.
8. Mataupu Faavae ma Feagaiga 84:88.
9. Russell M. Nelson, “Faamoemoe o Isaraelu” (faigalotu a le autalavou i le lalolagi atoa, 3 Iuni, 2018), *HopeofIsrael*.lds.org.
10. Ioane 21:15.



Saunia e Elder Jeffrey R. Holland

○ Le Korama a Aposetolo e Toasefululua

○ Le Galuega o le Faaleleiga

Ou te molimau atu e uiga i le filemu o le agaga lea o le a aumaia e le faaleleiga ma le Atua faapea ma le tasi ma le isi pe afai e lava lo tatou agamalu ma le lototele e saili ai.

○ Aperila talu ai, ina ua faalauiloa mai ai e Peresitene Russell M. Nelson le mataupu o le auau-naga, sa ia faamamafa mai o se auala e tausi ai le poloaiga sili o le alofa atu i le Atua ma le tasi ma le isi.¹ I le aveai ai ma taitai o le Ekalesia, ua matou patipatia aloaia ma faamalo atu ia te outou i le tali ofoofogia o le tou amataina o lena vaega. Matou te faafetai atu ia te outou mo le mulimulitai i lo tatou perofeta pele i lenei galuega matagofie ma fautua atu ia aua tou te faatali mo nisi faatonuga e tele. Na o le puna lava i totonu o le vaitaele ma aau loa. Agai atu ia i latou e le tagolima. Aua le tau na o le faaopeopea ma mafaufau pe tataua ona aau e ū i ai lou tua po o le aau pisipisi pei se taifau. Afai tatou te mulimuli i mataupu faavae autu ua aoaoina, tumau le ogatusa ma ki o le perisitua, ma saili atu i le Agaga Paia e taiala i tatou, e le mafai ona tatou toilalo.

O lenei taeao ou te fia talanoa ai e uiga i se vaega e sili ona patino o le auau-naga lea e le o se tofiga, e le aofia ai se faatalanoaga ua faakalenaina, ma e leai se laina o lipoti vagana ai o le tali atu i le lagi. Se'i o'u faasoa atua se

faataitaiga faigofie se tasi o lena ituaiga o auau-naga.

O Kurene Moreli Pouena o se tane ma se tama galue malosia ma tuuto o lē, e pei o le toatele na maua tupe mai le fanua, sa i ai se faaletonu tau tamao-aiga ina ua faaletonu le faatoaga pateta i le lotoifale. O lea sa galulue ai o ia ma lona toalua o Noma i isi galuega, mulimuli ane sa masii atu i se isi aai, ma amata ai ona toe foi i le tulaga lelei o le tamao-aiga. Peitai, i se mea le lelei ma pagatia na tupu, na matua tiga tele ai Uso Pouena, i se faatalanoaga o le

pepa malumalu, sa fai sina le talitonuina o le epikopo i le tautinoga a Moreli o ia e totogi atoa le sefuluai.

Ou te le iloa po o ai o alii nei sa sili ona sa'o ana faamaumauga i lena aso, ae ou te iloa sa savali ese mai Tuafafine Pouena mai lena faatalanoaga ma lana pepa faataga o le malumalu ua sainia, ae savali ese mai Uso Pouena ma le ita na aveesea ai o ia mai le Ekalesia mo le 15 tausaga.

E le afaina po o ai sa sa'o e uiga i le sefuluai, ae na manino lava sa galo uma ia Moreli ma le epikopo le polo-aiga a le Faaola ia “vave ona oulua lelei ma [lou fili]”² ma le fautuaga a Paulo ia “aua ne'i goto le la o ita pea outou.”³ O le mea moni sa le'i lelei i la'u ma sa o'ina goto le la o ita pea Uso Pouena mo ni aso, ona sosoo lea ma vaiaso, ma tausaga, ma faamaonia ai le manatu sa faia e se tasi o tagata atamai o Roma anamua, lea na fai mai, “O le ita, a lē puleaina, e tele lava ina sili atu ona [faataumaoia] nai lo le manu'a na mafua ai.”⁴ Ae o le vavega o le faaleleiga o loo avanoa pea mo i tatou, ma ona o le alofa mo lona aiga ma le Ekalesia sa ia iloa lava e moni, sa toe foi mai ai Moreli Pouena ma toe toaga i le Lotu. Sei ou ta'u atu faapuupuu pe na faapefea ona tupu lena mea.

O le atalii o Uso Pouena, o Brad, o se ma uo lelei ma o se Fitugafulu Eria tuuto o loo auau-naga atu i Idaho i saute. Sa 11 tausaga le matua o Brad i le taimi na tupu ai lea mea, ma mo le 15 tausaga sa ia vaaia ai le faaitiiti o le tuuto faalelotu o lona tama, o se molimau i le selesalega pagatia ua





selesele mai le mea sa luluina ai le ita ma le le femalamalamaai. Na manao-mia le faia o se mea. O lea la ina ua tulata i le aso malolo o le Aso Faafetai i le 1977, o Brad, le tamaitiiti aoga 26 tausaga i le Iunivesite o Polika Iaga; o lona toalua, o Valerie; ma le pepe tama fou, o Mic, na uta a latou mea i totonu o le latou tamai taavale ma, e ui i le leaga o le tau, sa malaga atu pea i Billings, Montana. E oo lava i se lavea i se faaputuga aisa e latalata i West Yellowstone sa le mafai ona taofia le toatolu lenei mai le latou auaunaga e feiloai ma Uso Pouena Matua.

I le taunuu atu ai, sa talosagaina e Brad ma lona tuafafine o Pam sina taimi paganoa ma lo la tama. “O oe o se tama lelei tele,” sa amata ai Brad ma se lagona ootia, “ma e matou te iloa lava le tele o lou alofa ia i matou. Ae o loo i ai se mea o sese, ma ua i ai mo se taimi umi lava. Ona sa faatasi ona e tiga, ua tiga ai lenei aiga mo le tele o tausaga. Ua nutimomoia i tatou, ma e na o oe lava e mafai ona toe faaleleia. Faamolemole, faamolemole i le mavae ai o lenei taimi atoa, e mafai ona e mauaina i lou loto e faataatia ese lenei mea le lelei na tupu ma lenei epikopo ae toe taitai lenei aiga i le talalelei e pei ona sa e faia muamua?”

Sa matua são atoa. Ona tepa a’e lea o Uso Pouena i le toalua lea, o lana fanau, o le ivi o ona ivi ma le aano o

ona aano,⁵ ma fai atu lemu, “Ioe. Ioe, o le a ou faia.”

I le faagaetia ma le maofa i le tali sa lei mafaufauina, sa matauina ai e Brad Pouena ma lona aiga lo latou tama ma le tane o alu atu i lana epikopo i lenei taimi i se agaga o le faaleleiga ina ia toe faatulaga sa’o mea i lona olaga. I se tali atoatoa i lana asiasiga lototele sa lei mafaufauina, sa opo ai e le epikopo sa tele ni ana valaaulia faisoo ia Uso Pouena e foi mai, ia Moreli ma fusi o ia i se opo umi lava.

I le na o ni nai vaiaso—e lei umi—sa auai atoatoa ma toaga ai Uso Pouena i le Ekalesia ma toe faagavaaina o ia lava e toe foi atu i le malumalu. Sa le’i pine ae ia taliaina le valaauga e pulefaamalumalu i se tamai paranesi e 25 tagata sa tauivi lava, ma faatupulaia i se aulotu malosi e silia ma le 100. O nei mea na tutupu i le toetiiti afa seneturi talu ai, ae o le taunuuga o le aioiga faaleauaunaga a se atalii ma se afafine i lo la’ua lava tama atoa ai ma le naunautaiga o le tama ia faamagalo ma agai i luma e ui i ni le atoatoa o isi na aumai ai faamanuiaga ia o loo oo mai pea—ma o le a faavavau ona mai—i le aiga o Pouena.

Uso e ma tuafafine, ua fetalai mai Iesu ia tatou “nonofo faatasi i le alofa”⁶ ma ia “leai ni finauga i totonu ia te outou.”⁷ “O le e i ai le agaga o le finauga ua le mai ia te au o ia,” sa Ia

lapataia ai sa Nifaē.⁸ O le mea moni, i se tulaga maoae, o lo tatou sootaga ia Keriso o le a fuafuaina—pe aafia foi—i a tatou sootaga i le tasi ma le isi.

“Afai tou te . . . mananao e o mai ia te au,” sa Ia fetalai ai, “ma e manatua ua i ai i lou uso se mea e faasaga ia te oe—

“Ia e alu atu i lou ala i lou uso, ma muamua ona e faalelei [ia te ia], ma ona e sau ai lea ia te au ma le faamoemoe atoa o le loto, ma o le a ou taliaina oe.”⁹

E mautinoa lava e tofu i tatou ma le anoanoa i ituaiga eseese o manu’aga ua leva ma faanoanoaga ma manatuaga tiga e faamatala lea o loo olopalaina ai lava i lenei taimi le filemu i le loto o se tasi po o le aiga po o le tuaoi. Pe na tatou faatupuina lenei tiga pe na tatou tiga foi, o na manu’aga e manaomia ona faamaloloina ina ia mafai ai ona tauia le olaga e pei ona faamoemoeina ai e le Atua. E pei o meaai i totonu o lau pusaaisa lea e siaki ma le faateete e lau fanau a fanau po o lelei mo oe, o na tiga ua leva ma ua le tataua ona toe faatiga ia te oe. Faamolemole aua ne’i toe ma’umaua ai se avanoa taua i lou agaga i na mea. E pei ona fai atu ai Prospero ia Alonso faanoanoa i le ata *The Tempest*, “Aua ne’i o ta faanoanoa i mea ua tuanai aua e leai se uiga e toe faanoanoa ai.”¹⁰

“Faamagalo atu, ona faamagaloina ai lea o outou,”¹¹ sa aoao mai ai Keriso i le vaitaimi o le Feagaiga Fou. Ma i o tatou aso: “O A’u, o le Alii, Ou te faamagalo i lē o le a Ou faamagaloina, ae o outou ua poloaiina ia faamagalo atu i tagata uma.”¹² Peitai, e taua mo soo se tasi o outou o loo ola i le tiga moni e matau mea sa le’i fetalai ai o Ia. Sa le’i fetalai mai o Ia, “E le faatagaina outou e lagonaina le tiga moni po o faanoanoaga moni mai aafiaga matuitui na e oo i ai ona o le isi tagata.” Pe na Ia fetalai foi, “Ina ia mafai ona faamagalo atu atoatoa e ao ona e toe faia se sootaga faatiga pe toefoi atu i se tulaga faasaua ma faataumaai.” Ae e ui i ni faatiga sili ona matuitui e ono oo mai ia i tatou, e mafai lava ona tatou tutulai ae i o tatou tiga pe afai tatou te savavali i luga o le ala i le faamalologa moni. O lenei ala o le ala o le faamagaloga sa savalia e



Iesu o Nasareta, lea o loo valaau mai ia i tatou taitoatasi, “Sau, mulimuli mai ia te a’u.”¹³

I lea lava valaaulia e avea ma Ona soo ma taumafai e faia e pei ona sa Ia faia, o loo augani mai ai Iesu ia i tatou ia avea ma meafaigaluega o Lona alofa-tunoo—ia avea ma “savali a Keriso” i “le galuega o le [faa]lleleiga,” e pei ona faamatala ai e Paulo i tagata Korinito.¹⁴ O Lē faamaloloina manu’a uma, o Lē e faasa’oina mea sese uma, ua augani mai ia i tatou ia galulue faatasi ma Ia i le galuega faigata o le faatupuina o le filemu i se lalolagi o le a le maua ai le filemu i se isi lava ala.

E pei la ona tusia e Phillips Brooks: “O oe lena e te faatagaina le malama-lamasese pagatia e alu pea mai lea tausaga i lea tausaga, ma le faamoemoe e foiaina i se aso; o oe lena e te faa-olaolaina pea finauga ona e le o mafai ona e maua se tonu i lou mafaufau, o le aso nei lava e ao ona ositaulagaina ai lou faamaualuga ma [foia] na mea; o oe lena e te fepasia’i ma tagata i luga o le auala, e le talanoa ia i latou ona o le fiatagata . . . ; o oe lena e te iloina . . . [se tasi] o loto mafatia ae e te le fia fai atu i ai se upu talisapaia pe faamafanafana, lea e te faamoemoe se’i i ai . . . se aso, . . . alu nei lava ma faia lena mea

ina ne’i e le toe mauaina se isi avanoa e faia ai.”¹⁵

O’u uso e ma tuafafine, ou te molimau atu o le lotofaamagalo ma le lafoai o le faatiga atu, fou pe ua leva, e totonugalemu i le mamalu o le Togiola a Iesu Keriso. Ou te molimau atu i le iuga, o lena lava faaleleiga faale-agaga e mafai ona oo mai ae ua na o lo tatou Togiola paia lava e oo mai ai, o Lē e faataalise mai i lo tatou laveai “ma le faamalologa i ona apaau.”¹⁶ Tatou te faafetai ia te Ia, ma lo tatou Tama Faalelagi o le na auina maia o Ia, lena faafouga ma le toefanauina, o se saolotoga i le lumanai mai faanoanoaga tuai ma measese o le tuanai, e le gata e mafai ae ua maea ona latou faatauina, totogiina, mo se tau tiga tele ua faailo-gaina i le toto o le Tamai Mamoe lea na faamaligiina.

Faatasi ai ma le pule faaaposetolo ua faamatuu mai ia te a’u e le Faaola o le lalolagi, ou te molimau atu e uiga i le filemu o le agaga lea o le a aumaia e le faaleleiga ma le Atua faapea ma le tasi ma le isi pe afai e lava lo tatou agamalu ma le lototele e saili ai. “Tuu le fefinauai [o le tasi] ma le isi,” na fetalai mai ai le Faaola.¹⁷ Afai e te iloina se manu’a ua leva, ia faaleleia. Ia tausi e le tasi le isi i le alofa.

A’u uo pele, i la tatou galuega fai faatasi o le faaleleiga ou te talosagaina ai outou ia avea ma se faatupu filemu—ia fiafia i le filemu, ia saili le filemu, ia fatuina le filemu, ma ia faatauaina le filemu. Ou te faia lena talosaga i le suafa o le Aloalii o le Filemu, e silafia-ina mea uma e uiga i le “manua ai i le fale o [Ana] uo,”¹⁸ ae o loo maua pea le malosi e faamagalo ai ma faagalo—ma faamalolo—ma ia fiafia. Mo lena mea ou te tatalo ai, mo oe ma a’u, i le suafa o le Alii o Iesu Keriso, amene. ■

FAAMATALAGA

1. Tagai Mataio 22:36–40; Luka 10:25–28.
2. Mataio 5:25.
3. Efeso 4:26.
4. Seneca, in Tryon Edwards, *A Dictionary of Thoughts* (1891), 21.
5. Tagai i le Kenese 2:23.
6. Mataupu Faavae ma Feagaiga 42:45.
7. 3 Nifae 11:22; tagai foi i le 3 Nifae 11:28.
8. 3 Nifae 11:29.
9. 3 Nifae 12:23–24; faaopoopo le faamamafa.
10. William Shakespeare, *The Tempest*, act 5, scene 1, line 199.
11. Luka 6:37.
12. Mataupu Faavae ma Feagaiga 64:10.
13. Luka 18:22.
14. Tagai i le 2 Korinito 5:18–20.
15. Phillips Brooks, *The Purpose and Use of Comfort* (1906), 329.
16. Malaki 4:2; tagai foi i le 2 Nifae 25:13; 3 Nifae 25:2.
17. Mataupu Faavae ma Feagaiga 136:23.
18. Sakaria 13:6; tagai foi i le Mataupu Faavae ma Feagaiga 45:52.



Saunia e Elder Shayne M. Bowen

○ Le Fitugafulu

O Le Matafaioi a le Tusi a Mamona i le Liuaina

O loo tatou faapotopotoina Isaraelu mo le taimi mulimuli ma o loo faia e ala i le Tusi a Mamona, o se tasi o meafaigaluega sili ona mamana o le liuaina.

O le toatele o tagata i aso nei o loo mafau e uiga i le tulaga moni o le Atua ma lo tatou sootaga ma Ia. O le toatele e itiiti lava pe leai foi se silafia e uiga i Lana fuafuaga sili o le fiafia. I le silia ma le 30 tausaga ua tea, na matauina ai e Peresitene Ezra Taft Benson faapea ua “teena e le toatele o le lalolagi . . . o ona po nei le paia o le Faaola. Ua latou fesiligia Lona soifua mai faavavega, le atoatoa o Lona soifuaga, ma le moni o Lona toetu mamalu.”¹

I o tatou aso, o fesili ua taulai atu e le gata i lo tatou Faaola ae faapea foi i Lana Ekalesia—O Le Ekalesia a Iesu Keriso o le Au Paia o Aso e Gata Ai—lea na Ia toefuataiina e ala mai i le Perofeta o Iosefa Samita. O nei fesili e tele ina taulai atu i le talafaasolopito, aoaoga, po o faiga masani o le Ekalesia a le Faaola.

O Le Tusi a Mamona ua Fesoasoani ia i Tatou ia Tuputupu Ae i le Molimau

Mai le *Tala'i La'u Talalelei*, ua tatou faitau ai: “Ia manatua o lo tatou malamalamaaga [i le Tama Faalelagi ma Lana fuafuaga o le fiafia] e sau mai

perofeta o ona po nei—o Iosefa Samita ma i latou na suitulaga atu ia te ia—o e na maua ia faaaliga tuusao mai le Atua. O lea la, o le fesili muamua lava e tali e se tagata sailiili, pe o Iosefa Samita o se perofeta a le Atua, ma e mafai e ia ona tali lenei fesili e ala lea i le faitau ma tatalo e uiga i le Tusi a Mamona.”²

O la'u molimau i le valaauga paia o le Perofeta o Iosefa Samita na faamalosia i le suesue ma le agaga tatalo o le Tusi a Mamona: O Se Tasi Molimau ia Iesu Kersio. Na ou faatinoina le

valaaulia a Moronae ina ia “ole atu i le Atua, le Tama Faavavau, i le suafa o Iesu Keriso,” ina ia iloa le moni o le Tusi a Mamona.³ Ou te molimau atu ua ou iloa e moni. Ua oo mai lena malamalama ia te a'u, e pei ona oo atu ia te outou, “e ala i le mana o le Agaga Paia.”⁴

Ua ta'ua i le faatomuaga o le Tusi a Mamona: “O i latou o e e mauaina lenei molimau paia mai le Agaga Paia o le a latou iloa foi e ala i lea lava mana o Iesu Keriso o le Faaola o le lalolagi, o Iosefa Samita o lana talifaaaliga ma lana perofeta i aso nei e gata ai, ma O Le Ekalesia a Iesu Keriso o le Au Paia o Aso e Gata Ai o le malo o le Alii ua toefaatuina i luga o le lalolagi, e saunia ai mo le Afio Mai Faalua o le Mesia.”⁵

I le avea ai ma se faifeautalai talavou e alu i Chile, sa ou aoaoina se lesona malosi e uiga i le mana faaliliu o le Tusi a Mamona. Na auuina atu Mr. Gonzalez i se tofiga faamamaluina i lana ekalesia mo le tele o tausaga. Sa tele ana aoaoga faalelotu, e aofia ai se tikeri faalelotu. Sa matua mitamita o ia i lona atamai faaletusipaia. Na manino ia i matou o ia o se tagata atamai faalelotu.

Sa ia malamalama lelei e uiga i faifeautalai O Le Ekalesia a Iesu Keriso o le Au Paia o Aso e Gata Ai ao latou galulue i lona nuu o Lima, Peru. Sa ia manao lava e feiloai ia i latou ina ia mafai ona ia aoaoina i latou i le Tusi Paia.

I se tasi aso, toetoe lava a pei o se meaalofa mai le lagi, o lona manatu lea,





na taofi o ia e ni faifeautalai se toalua i le auala ma fesili pe mafai ona la o atu i lona fale ma faasoa atu ni mau ia te ia. O lana miti lea ua taunuu! Na tali mai ana tatalo. O le a iu lava, ina mafai ona ia faasa’oina nei tama talavou ua taitai seseina. Sa ia ta’u atu ia i la’ua na te fiafia la te o mai i lona fale e talanoa i tusitusiga paia.

Sa tau le mafai ona ia faatali mo lona taimi faatulagaina. Sa ia saunia e faaoga le Tusi Paia e faamaonia ai le sese o a la talitonuga. Sa ia mautinoa o le a faamanino ma faailoa moni atu e le Tusi Paia mea sese o a la’ua aoaoga. Na oo mai le po tuupoina, ma sa tuitui mai faifeautalai i lona faitotoa. Sa tau le ma nofo o ia. Na iu lava ina oo mai lona taimi.

Sa ia tatalaina le faitotoa ma valaaulia faifeautalai i totonu o lona fale. Sa tuuina atu ia te ia e se tasi o faifeautalai se tusi lanumoana ma tuuina atu se molimau faamaoni lea na iloa lelei ai e le faaifeautalai o loo i ai i le tusi le afioga a le Atua. Na faaopoopo atu e le faifeautalai lona lua lana molimau malosi e uiga i le tusi, molimau atu na faaliliuina e se perofeta a le Atua i nei ona po, e suafa ia Iosefa Samita, ma e

aoao atu e uiga ia Keriso. Na faamavae faifeautalai ma la tuua ai lona fale.

Sa matuai le fiafia Mr. Gonzalez. Peitai sa ia tatalaina le tusi ma amata ona susue ona itulau. Sa ia faitauina le itulau muamua. Sa ia faitauina lea itulau ma lea itulau ma e lei taofi seia oo i le aoauli o le aso na sosoo ai. Sa ia faitauina le tusi atoa ma iloaia ai e moni. Na ia iloa le mea e tatau ona ia faia. Sa ia valaau atu i faifeautalai, mauaina lesone, ma lafoai le olaga sa ia iloaia ma avea ai ma se tagata O Le Ekalesia a Iesu Keriso o le Au Paia o Aso e Gata Ai.

O lena tamalii lelei sa avea ma a’u faiaoga o le NAF i Provo, Iuta. O le tala o le liuga o Brother Gonzales ma le mana o le Tusi a Mamona sa tele se aafiaga ia te a’u.

Ina ua ou taunuu i Chile, sa valaauliaina i matou e lo matou peresitene o le misiona, o Peresitene Ryoden J. Glade, e faitau le molimau a le Perofeta o Iosefa Samita na tusia i le Iosefa Samita—Talafaasolopito i vaiaso taitasi. Na ia aoao mai ia i matou o se molimau o le Uluai Faaaliga o le a maua ai se faasa’oga sa’o ia tatou lava molimau e uiga i le talalelei ma le Tusi a Mamona.

Sa ou matuai faatauaina lana valaaulia. Sa ou faitauina tala o le Uluai Faaaliga; sa ou faitauina le Tusi a Mamona. Sa ou tatalo e pei ona faatonuina e Moronae ma aioi atu i le “Atua, le Tama Faavavau, i le suafa o Iesu Keriso”⁶ pe moni le Tusi a Mamona. Ou te molimau atu ia te outou i le asō ou te iloa o le Tusi a Mamona, e pei ona saunoa mai le Perofeta o Iosefa Samita, o se “tusi aupito sili ona sa’o i soo se isi lava tusi i luga o le lalolagi, o le maa’au’au foi lea o la tatou tapuaiga, e sili foi ona latalata atili atu o le tagata i le Atua i lona ola ai i ona mataupu, nai lo se isi lava tusi.”⁷ Na tautino mai foi e le Perofeta o Iosefa e faaapea “A aveese la le Tusi a Mamona ma faaaliga, o fea la le tatou lotu? Ua leai se mea.”⁸

Liua Patino

Ao atili ona tatou malamalama po o ai i tatou ma faamoemoega o le Tusi a Mamona, e faalolotoina lo tatou liua ma faamautinoaina atili. E faamalosi i tatou i la tatou tautinoga e tausia feaiga sa tatou osia ma le Atua.

O le faamoemoega autu o le Tusi a Mamona o le faapotopotoina lea o Isaraelu ua faataapepeina. O lenei



faapotopotoina e aumaia i fanau uma a le Atua le avanoa e ulu atu ai i ala o feagaiga ma, i le faamamaluina o na feagaiga, toe foi atu i le afioaga a le Tama. Ao tatou aoao atu le salamo ma papatiso ia tagata liliu mai, ua tatou faapotopotoina Isaraelu ua faataapeapeina.

O le Tusi a Mamona e 108 mau faasino i le aiga o Isaraelu. I le amataga o le Tusi a Mamona, na aoao mai ai Nifae, “Ona o le atoatoa o lo’u faamoe-moe ia mafai ona ou faatauina tagata ia o mai i le Atua o Aperamo, ma le Atua o Isaako, ma le Atua o Iakopo, ma faaolaina.”⁹ O le Atua o Aperamo, Isaako, ma Iakopo o Iesu Keriso lea, o le Atua o le Feagaiga Tuai. Ua laveaiina i tatou pe a tatou o mai ia Keriso e ala i le ola ai i Lana talalelei.

Mulimuli ane, na tusia e Nifae:

Ioe, sa tele mea sa tautala mai ai lo’u tamā e uiga i Nuuese, ma e uiga foi i le aiga o Isaraelu, e faatusaina i latou i se laau olive, o le a fa’i ese ona lala ma o le a faataapeapeina i luga o le lalolagi atoa. . . .

“Ma a mavae ona faataapeape o le aiga o Isaraelu o le a toe faapotopoto faatasi i latou; po o lona uiga, a mavae ona maua e Nuuese le atoatoaga o le Talalelei, o lala moni o le laau olive, po o le toe vaega o le aiga o Isaraelu, o le a sulu i totonu, pe o le a o mai i le

malamalama o le Mesia moni, lo latou Alii ma lo latou Togiola.”¹⁰

E faapena foi, i le faaiuga o le Tusi a Mamona, ua toe faamanatu maia ia i tatou e le perofeta o Moronae, “Ina ia le toe faafelilonaiina oe, ina ia mafai ona faataunuina o feagaiga a le Tamā Faavavau na faia e ia ia te oe, le aiga e o Isaraelu.”¹¹

O Feagaiga a le Tama Faavavau

O a “feagaiga a le Tama Faavavau” o loo faatatau i ai Moronae? Tatou te faitau i le tusi a Aperamo:

“O lo’u igoa o Ieova, ma ua Ou iloa le iuga mai le amataga; o lea o le a i ai lo’u lima i luga o oe.

“Ma o le a Ou faia mai ia te oe se atunuu tele, ma o le a Ou faamanuiaina oe e lē mafuaina, ma faasilisili lou igoa i totonu o atunuu uma, ma o le a avea oe ma se faamanuiaga i au fanau e mulimuli mai pe a mavae atu oe, ina ia latou tauaveina i o latou lima lenei auunaga ma le Perisitua i atunuu uma.”¹²

Sa aoao mai e Peresitene Russell M. Nelson i se faasalalauga i le lalolagi atoa mai faapea “o aso nei e gata ai, ma ua faanatinati e le Alii Lana galuega e faapotopoto Isaraelu. O lona faapotopotoina o le mea aupito sili lea ona taua o loo tupu i le lalolagi i le taimi nei. E leai se isi mea e faatusalia i lona maoae, e leai se isi mea e faatusalia i le taua, e

leai se isi mea e faatusalia i le malualii. Ma afai e te filifili e, pe afai e te manao ai, e mafai ona avea oe o se vaega taua o lona mea. E mafai ona avea oe o se vaega tele o se mea tele, se mea maoae, se mea e malualii!

“Pe a tatou talanoa i le *faapotopotoina*, ua na ona tatou fai atu lava o lenei upumoni faalefaavae: o tagata uma o fanau a lo tatou Tama Faalelagi, i itu uma o le veli, e tataua ona faalogo i le savali o le talalelei toefuataiina a Iesu Keriso. Latou te filifili mo i latou lava pe latou te mananao e iloa atili.”¹³

O le mea lenei o loo tatou faia i le avea ai ma tagata o Le Ekalesia a Iesu Keriso o le Au Paia o Aso e Gata Ai: o loo tatou saili e aumaia le lalolagi i se malamalamaaga o le—ma se liuga i le—talalelei a Iesu Keriso. O i tatou o “tagata faapotopoto o aso e gata ai.”¹⁴ Ua manino la tatou misiona. Uso e ma tuafafine, ia iloga i tatou e pei o i latou o e na faamaoni i le folafolaga a Moronae, tatalo ma mauaina se tali ia iloa ai e moni le Tusi a Mamona, ona faasoa atu lea o lona malamalama i isi i le upu ma le, mea sili ona taua, i galuega.

O Le Matafaioi a le Tusi a Mamona i le Liuaina

Ua maua i le Tusi a Mamona le atoatoaga o le talalelei a Iesu Keriso.¹⁵ E taitaiina atu i tatou i feagaiga ma le Tama, lea afai e tausia e faamautinoa mai ia i tatou Lana meaalofo silisili—o le ola e faavavau.¹⁶ O le Tusi a Mamona o le maa’au’au i le liuaina o atalii ma afafine uma o le Tama Faalelagi.

O le toe siilina mai o se upusii mai ia Peresitene Nelson: “Ao e . . . faitau i aso taitasi mai le Tusi a Mamona, o le a e aoao i aoaoga faavae o le faapotopotoina, upumoni e uiga ia Iesu Keriso, Lana Togiola, ma le atoaga o Lana talalelei e le o maua i le Tusi Paia. O le Tusi a Mamona o le totonugalemu lea o le faapotopotoina o Isaraelu. O le mea moni, afai e leai se Tusi a Mamona, o le a le tupu le faapotopotoina folafolaina o Isaraelu.”¹⁷

Sei ou faaiu atu i le fetalaiaga a le Faaola ao Ia aoao atu sa Nifae e uiga i faamanuiaga folafolaina: “O outou o fanau a perofeta; ma o outou o lo

le aiga o Isaraelu; ma o outou o lo feagaiga lea na faia e le Tama ma o outou tama, na fetalai atu ai ia Aperamo: Ma o lau fanau o le a manuia ai aiga uma o le lalolagi.”¹⁸

Ou te molimau atu o i tatou o atalii ma afafine a le Atua, o fanau a Aperamo, o le aiga o Isaraelu. O loo tatou faapotopotoina Isaraelu mo le taimi mulimuli ma o loo faia e ala i le Tusi a Mamona—o se tusi, pe a tuufaatasia ma le Agaga o le Alii, o se meafaigaluega sili ona mamana o le liuaina. Ua taitaiina i tatou e le perofeta a le Atua, o Peresitene Russell M. Nelson, o le o loo taitaiina le faapotopotoina o Isaraelu i o tatou aso. E moni le Tusi a Mamona. Na suia ai lo’u olaga. Ou te folafola atu, e pei o Moronae ma le tele o perofeta i le aluga o vaitausaga, e mafai ona suia ai foi lou [olaga].¹⁹ I le suafa, o Iesu Keriso, amene. ■

FAAMATALAGA

1. *Aoaoga a Peresitene o le Ekalesia: Ezra Taft Benson* (2014), 145.
2. “O Le A le Matafaioi a le Tusi a Mamona?” *Tala’i La’u Talalelei: O Se Taiata mo le Galuega Faafaifeautalai*, rev. ed. (2018), lds.org/manual/missionary.
3. Moronae 10:4.
4. Moronae 10:4.
5. O Le Faatomuaga i le Tusi a Mamona.
6. Moronae 10:4.
7. Faatomuaga i le Tusi a Mamona.
8. *Aoaoga a Peresitene o le Ekalesia: Iosefa Samita* (2007), 208.
9. 1 Nifae 6:4.
10. 1 Nifae 10:12, 14.
11. Moronae 10:31.
12. Aperamo 2:8–9.
13. Russell M. Nelson, “Faamoemoe o Isaraelu” (faigalotu a le Autalavou i le Lalolagi Atoa, 3 Iuni, 2018), 4, HopeofIsrael.lds.org.
14. Tagai Iakopo 5:72.
15. Na aoao mai e Peresitene Ezra Taft Benson, “Ua fetalai mai le Alii lava Ia o loo i le Tusi a Mamona le ‘atoaga o le talalelei a Iesu Keriso’ (MF&F 20:9). E le faapea o loo i ai aoaoga ma mataupu uma lava ua faaalua mai. Ae o lona uiga, o loo i le Tusi a Mamona le atoaga o mataupu tatou te maua ai le olataga. Ma ua aoao manino ai i ni auala faigofie e oo i fanau laiti e mafai ona latou aoao ia iloa ai ala i le faaolataga ma le faaeaga” (*Aoaoga: Ezra Taft Benson*, 147).
16. Tagai Mataupu Faavae ma Feagaiga 14:7.
17. Russell M. Nelson, “Faamoemoe o Isaraelu,” 7.
18. 3 Nifae 20:25.
19. Tagai, mo se faaitaiga, Henry B. Eyring, “O Le Tusi a Mamona o le a Suia ai Lou Olaga,” *Liahona*, Fep. 2004, 12–16.



Saunia e Elder Neil L. Andersen

O Le Korama a Aposetolo e Toasefululua

Manu’a

I faigata o tofotofoga faalelalolagi, ia agai i luma ma le onosai, ma o le a aumaia ia te oe e le mana faamalolo a le Faaola le malamalama, malamalamaaga, filemu, ma le faamoemoe.

I le aso 22 o Mati, 2016, a o le’i taina le 8 i le taeao, e lua ni pomu a le au faatupu faalavelave na pāpā i le malaevaalele o Brussels. Na ave e Elder Richard Norby, Elder Mason Wells, ma Elder Joseph Empey ia Sister Fanny Clain i le malaevaalele mo le malaga i lana misiona i Cleveland, Ohio. E tolusefulu lua tagata na maliliu ai, ma na manunu’a uma faifeautalai.

O le faifeautalai na sili ona ogaoga le manu’a o Elder Richard Norby, e 66 tausaga le matua, na auauna atu ma lona faletua, o Sister Pam Norby.

Sa toe mafaufau Elder Norby i lena taimi:



O loo faasolosolo manuia Richard Norby i le falema’i.

“Sa vave ona ou iloa le mea na tupu.

“Sa ou taumafai e tamo’e mo le saogalemua, ae sa vave ona ou pa’u i lalo.

... Sa mafai ona ou iloa atu sa matua’i manu’a lo’u vae agavale. Sa ou [mataui] se pauta uliuli o tautau ifo i o’u lima e lua toeitiiti lava pei o se upega apogāleveleve. Sa ou tosaina lemu, ae sa ou iloa ai sa lē o se pauta ae o lo’u pa’u lea na mu. Sa lanu mumu lo’u ofutino mai se manu’a i lo’u tua.

“Ina ua ou iloina mea na faato’a tutupu ua faatumulia ai lo’u mafaufau, sa ou [maua] se manatu malosia lava: ... sa silafia e le Faaola le mea sa ou i ai, le mea na faato’a tupu, ma le [mea] sa ou o’o i ai i lena taimi.”¹

Sa i ai ni aso faigata i luma atu mo Richard Norby ma lona faletua, o Pam. Sa avatu ia te ia ni fualaau e faagase ai o ia i se koma, sosoo ai ma taotoga, faama’i, ma le lē mautonu tele.

Sa faasaoina Richard Norby, ae o lona olaga o le a lē toe tutusa lava. I le lua ma le afa tausaga mulimuli ane, o loo faamaloloina pea ona manu’a; o se fusi o loo suia ai le vaega o lona vae ua toesea; o laa taitasi ua ‘ese nai lo le taimi muamua i lena malaevaalele o Brussels.

Aisea na tupu ai lenei mea ia Richard ma Pam Norby?² Sa la



Richard ma Pam Norby.

faamaoni i a la feagaiga, auauna atu talu ai i le misiona o Ivory Coast, ma sa tausia se aiga matagofie. E mafai ona faapea mai se tasi ma le malamalama lelei, “E lē fea! E lē sa’o lenei mea! Sa la tuuto atu o laua ola mo le talalelei a Iesu Keriso; e mafai faapefea ona tupu lenei mea?”

O Le Olaga Faaletino Lenei

E ui o le a eseese ia faamatalaga, o faalavelave, o tofotofoga ma suega e le’i faamoemoeina, faaletino uma ma faaleagaga, e oo mai ia i tatou taitoatasi ona o le olaga faaletino lenei.

Ao ou mafaufau i lenei taeao i failauga o le sauniga lenei o le konafesi, na ou iloa ai e toalua ua maliliu fanau ma le toatolu ua maliliu fanau a fanau o e na faafuasei ona toe faafoi atu i lo latou aiga faalelagi. Sa leai se tasi sa faasaoina mai le ma’i ma le faanoanoa, ma e pei ona laugaina, o le vaiaso lava lenei, sa maliu ai se agelu i le lalolagi tatou te alolofa uma i ai, o Sister Barbara Ballard, ua laa filemu atu i le veli. Peresitene Ballard, o le a lē galo ia i matou lau molimau i lenei taeao.

Tatou te saili mo le fiafia. Tatou te moomoo mo le filemu. Tatou te faamoemoe mo le alofa. Ma e faamanuia i tatou e le Alii i le anoanoai o faamanuiaga ofoofogia. Ae faatasi ai ma le olioli ma le fiafia, e tasi le mea e mautinoa: o le a i ai taimi, o itula, o aso, o nisi taimi o le tele o tausaga o le a lagona ai e lou agaga le manu’a.

Ua aoao mai tusitusiga paia o le a tatou oo uma i taimi tiga ma taimi fiafia³ ma o le a i ai le “faafeagai o mea uma.”⁴ Na fetalai mai Iesu, “[O lo outou

Tama] e na te faaoso i lona la i e ua amio leaga atoa ma e ua amio lelei, ua ia faatoto ifo foi le ua i e ua amiotonu ma e ua amioletonu.”⁵

O manu’aga o le agaga e le tulaga ese i le mauoa po o le mativa, se aganuu se tasi, se malo se tasi, po o se tupulaga se tasi. O [manu’a] e oo mai i tagata uma ma o se vaega o le aoaoina tatou te maua mai i lenei aafiaga faaletino.

E Le’o Tuusaunoaina E Amiotonu

O la’u savali i le asō e faapitoa ia i latou o ē o tausia poloaiga a le Atua, tausia a latou folafolaga i le Atua, ma, e pei o le au Norbys ma le toatele o isi alii, tamaitai, ma fanau i lenei aofia i le lalolagi atoa, o loo fetalai’i ma tofotofoga ma luitau sa le’i fuafuaina tiga.

O o tatou manu’a atonu e oo mai i se mala faalenatura po o se faalavelave e lē talafeagai. E ono oo mai mai se tane po o se avā e lē faamaoni, ua matuā faaleagaina ai le olaga mo se toalua amiotonu ma le fanau. E ono oo mai ni manu’a mai le pogisa ma le le fiafia o faanoanoaga, mai se gasegase e le’i faamoemoeina, mai mafatiaga po o le maliu talavou o se tasi tatou te alolofa i ai, mai le faanoanoa o se tagata o le aiga ua tuua lona faatuatua, mai le tuutoatasi pe a le aumaia e tulaga se soa e faavavau, pe mai isi mau faigata faavaivailoto ma tiga “[faanoanoaga] ua lē ma va’aia.”⁶

Ua tatou malamalama uma o faigata o se vaega o le olaga, ae pe a latou oo patino mai ia i tatou lava ia, e mafai

ona tatou ofo ai. E aunoa ma le fefe, e manaomia ona tatou saunia. Na fai mai le Aposetolo o Peteru, “Aua tou te ofo i le tofotofoga pei o le afi, ua oo ia te outou, peiseai o se mea fou ua oo ia te outou.”⁷ Faatasi ai ma lanu sesega o le fiafia ma le olioli, ua lalaga mau atu i ai ma fasi ie pa’a’uli o tofotofoga ma faigata i le ie tele o le fuafuaga a lo tatou Tama. O nei tauiviga, e ui e faigata, ae masani lava ona avea ma a tatou lesona silisili ona taua.⁸

A faamatalaina le tala faavavega o fitafita talavou e 2,060 a Helamana, tatou te fiafia i lenei mau: “E tusa ma le agalelei o le Atua, ma lo matou ofo tele, ma le olioli foi o la matou autau atoa, sa leai se tagata e toatasi o i latou na fano.”

Ae e faaaauu pea le fuaiupu: “Pe sa i ai foi se tagata e toatasi i totonu o i latou sa lei oo i ai ni manua e tele.”⁹ Na maua e [fitafita] taitoatasi e 2,060 manu’a e tele, ma o i tatou taitoatasi o le a manunu’a i le taua o le olaga, pe faaletino, pe faaleagaga, po o mea uma e lua.

O Iesu Keriso o lo Tatou Leoleo Mamoe Lelei

Aua le fiu—po o le a lava le loloto o manu’a o lou agaga, po o le a lava lo latou mafuaaga, po o fea ae po o le a foi le taimi e tupu ai, ma po o le a lava le puupuu po o le umi e tumau ai, e le o faamoemoeina oe ina ia fano faaleagaga. Ua faamoemoeina oe ina ia e sao mai faaleagaga ma fua mai i lou faatuatua ma faalagolago i le Atua.



E le'i foafoaina e le Atua o tatou agaga ina ia ola e aunoa ma Ia. O lo tatou Faaola ma le Alii, o Iesu Keriso, e ala i le meaalofo e lēmafaamatalaina o Lana Togiola, e le gata ina laveai ai i tatou mai le oti ma ofo mai ai ia i tatou, e ala i le salamo, faamagaloga mo a tatou agasala, ae ua tu saunia foi o Ia e laveai i tatou mai faanoanoaga ma tiga o ō tatou agaga ua manu'a.¹⁰

O le Faaola o lo tatou Samaria Agalelei,¹¹ na auina mai "e faamalolo i e loto momomo."¹² E afio mai o Ia ia i tatou pe a pasi ifo isi ma matamata mai. Ma le agaalofo, e tuu e Ia Lona aao faamalolo i luga o ō tatou manu'a ma fusi i ai. E tauave e Ia i tatou. E popole o Ia mo i tatou. Ua Ia fetalai mai ia i tatou, "O mai ia te au . . . ma o le a ou faamaloloina [outou]."¹³

"Ma o [Iesu] o le a . . . [mafatia] i tiga ma puapuaga ma faaososoga o ituaiga eseese uma; . . . ia . . . [mafai ai] e ia ona ave i ona luga tiga ma ma'i o ona tagata. . . [ave i Ona luga o tatou] vaivaiga, [i le] faatumuina . . . i le alofa mutimutivale."¹⁴

*O mai, outou ua faanoanoa, po o fea lava o outou vaivai ai;
O mai i le nofoa o le alofa, ia tootutuli ma le naunautai.
Aumai iinei o outou loto ua manu'a;
ta'u mai iinei o outou tiga.
E leai se faanoanoaga i le lalolagi e lē mafai e le lagi ona faamaloloina.*¹⁵

I se taimi o mafatiaga tele, na ta'u atu ai e le Alii i le Perofeta o Iosefa, "O nei mea uma e te maua ai le poto masani, ma o le avea mo ou lelei."¹⁶ E mafai faapefea e manu'a tiga ona avea ma ō tatou lelei? I faigata o tofotofoga faalelalolagi, ia agai i luma ma le onosai, ma o le a aumaia ia te oe e le mana faamalolo a le Faaola le malamalama, malamalamaaga, filemu, ma le faamoemoe.¹⁷

Aua Lava Nei Fiu

Tatalo ma lou loto atoa. Faamallosia lou faatuatua ia Iesu Keriso, i Lona moni a'ia'i, i Lona alofa tunoa. Taofimau i Ana afioga, "O lo'u nei alofa tunoa e lava lea e fesoasoani ia

te oe, aua o le vaivai e faaatoatoaina ai lo'u mana."¹⁸


Manatua, o le salamo o se vailaau mamana faaleagaga.¹⁹ Tausi poloaiga ma ia agavaa mo Lē Faamafanafana, ia manatua o le folafolaga a le Faaola, "Ou te le tuua outou o mātuaoti, ou te sau ia te outou."²⁰

O le filemu o le malumalu o se pulu pasama malū i le agaga ua manu'a. Toe foi atu i le maota o le Alii faatasi ai ma lou fatu ua manu'a ma igoa o lou aiga i le faatele e mafai ai. E fesoasoani le malumalu ia tatou malamalama i le mea e tupu i le taimi puupuu o lo tatou olaga faaletino mai i se vaaiga e faavavau.²¹

Toe tepa i tua, ma manatua sa e faamaonia atu lou agavaa i lou muai olaga. O oe o se atalii po o se afafine toa o le Atua, ma e faatasi ai ma Lana fesoasoani, e mafai ona e manumalo i taua a lenei lalolagi pa'ū. Sa e faia mua-mua, ma e mafai ona e toe faia.

Tepa i luma. O outou mafatiaga ma faanoanoaga e moni lava, ae o le a lē tumau e faavavau.²² O le a aveese lou po pogisa, ona "[ua toetu mai] le Atalii . . . ma le faamalologa i ona apaau."²³

Sa ta'u mai e le au Norbys ia te a'u, "E fai a ma oo mai le lē fiafia i lea taimi ma lea taimi ae ma te lē faata-gaina e nofomau."²⁴ Sa saunoa mai le Aposetolo o Paulo, "Ua puapuagatia i matou . . . a e le faaatuatuvaleina; ua fememeai, a e le matuā fememeai; ua sauaina, a e le tuulafoaiina; ua lafotuina i lalo, a e le fano."²⁵ Atonu e te vaivai, ae aua lava ne'i fiu.²⁶



I le konafesi aoao ia Aperila 1995, i le saunoa atu ai e uiga i le malii talu ai nei o lona afafine o Emily, sa molimau atu ai Peresitene Russell M. Nelson o loo umia e Iesu Keriso ki o le Toetu.

E o'o lava i ou lava manu'a tiga, o le a e aapa atu i isi, ma faatuatua i le folafolaga a le Faaola: "A o le faamāumau lona ola ona o a'u, e maua ai e ia."²⁷ O ē manunu'a o loo togafitia manu'aga o isi, o agelu ia a le Atua i le lalolagi.

I ni nai minute, o le a tatou faalogologo atu ai i lo tatou perofeta pele, o Peresitene Russell M. Nelson, o se tamalii e tumu i le faatuatua ia Iesu Keriso, o se tamalii o le faamoemoe ma le filemu, e alofagia e le Atua ae sa le'i saoloto mai manu'aga o le agaga.

I le 1995 o lona afafine o Emily, a o maitaga i se pepe, sa maua i le kanesa. Sa i ai ni aso o le faamoemoe ma le fiafia ina ua fanau mai lana pepe malosi. Ae sa toe foi mai le kanesa, ma na tuua e le latou pele o Emily lenei olaga i le lua vaiaso i le maea ai o lona aso fanau lona 37, tuua ai lona toalua agaalofo ma le fanau laiti e toailima.



"E ala i le tausia o poloaiga a le Atua, e mafai ona tatou maua le olioli i le lotolotoi o o tatou tulaga sili ona leaga," na saunoa atu ai Peresitene Nelson i le Au Paia i Puerto Rico.



I le konafesi aoao, i le mavae ai o lona malii, sa ta'u mai e Peresitene Nelson: "O o'u loimata o le faanoanoa sa maligi faatasi ma moomooga maimau pe ana mafai ona ou faia nisi mea mo lo ma afafine. . . . A na faapea e ia te a'u le mana o le toetu, semanu e faaosoosoina a'u e toe faafoi mai [o ia]. . . . [Ae] e umia e Iesu Keriso na ki ma o le a faaogaina mo Emily . . . ma mo tagata uma i le taimi a le Alii." ²⁸

I le masina ua te'a, a o asiasi atu i le Au Paia i Puerto Rico ma manatuaina le Afā faataumaoi o Maria, sa saunoa atu ai Peresitene Nelson ma le alofa ma le agalelei:

"O se vaega [lenei] o le olaga. O le mafuaaga lea ua tatou i ai iinei. Ua tatou i ai iinei ina ia maua se tino ma ina ia tofotofoina ma suesueina. O nisi o na suega e faaletino; o nisi e faaleagaga, ma o o outou tofotofoga iinei o mea uma e lua o le faaletino ma le faaleagaga." ²⁹

"Tou te le'i faavaivai lava. Ua matou mitamita [tele] ia te outou. O outou o Au Paia faatuatua ua tele mea ua ma'umuina, ae e ala i nei mea uma, ua outou atiaeina ai lo outou faatuatua i le Alii o Iesu Keriso." ³⁰

"E ala i le tausia o poloaiga a le Atua, e mafai ona tatou maua le olioli i le lololotoi o o tatou tulaga sili ona leaga." ³¹

O Le A Soloieseina Loimata Uma

O'u uso ma tuafafine, o la'u folafolaga ia te outou o le faateleina o lo outou faatuatua i le Alii o Iesu Keriso o le a aumaia ai ia te oe le malosi faaopopoina ma le faamoemoe sili atu. Mo outou, o ē amiotonu, o le Fomai o ō tatou agaga, i Lana lava taimi ma i Lana lava ala, o le a faamalolo i o outou manu'a uma. ³² E leai se amioletonu, leai se sauaga, leai se tofotofoga, leai se faanoanoa, leai se lototiga, leai se mafatiaga, leai se manu'a—po o le a le loloto, po le a le lautele, po o le a le tiga—o le a taofia mai le faamafanafanaga, filemu, ma le faamoemoe tumau ia te Ia e ona aao mafola ma aao sa manu'a o le a faafeiloaia mai i tatou i Lona afioaga. I lona aso, ua molimau mai ai le Aposetolo o Ioane, o ē amiotonu "e [o mai] nai le puapuaga tele" ³³ o le a laulaututū "ua faasinasinaina o latou ofu . . . i luma o le nofoalii o le Atua." O le Tamai Mamoe o le a "ia te i [tatou] . . . e sōloieseina foi e le Atua o loimata uma nai o [outou] mata." ³⁴ O le a oo mai lenei aso. Ou te molimau atu ai i le suafa o Iesu Keriso, amene. ■

FAAMATALAGA

1. Personal conversation, Jan. 26, 2018.
2. I se talanoaga i le amataga o lenei tausaga, sa faapea mai Richard Norby ia te au, "Tatou te tali atu i mea ua tuuina mai ia i tatou." Na ia faasoaina mai lenei mea mai i lana api o talaaga: "O suega ma tofotofoga e oo mai ia i tatou e aumaia ai le avanoa ma le faamanuiga e iloa atili ai le Faaola ma malamalama i faamatalaga taua o lana taulaga togiola. O ia lea o loo tatou faalagolago i ai. O ia lea o loo tatou sailia. O ia lea o loo tatou faamoemoe i ai. O ia lea o loo tatou talitonu ai. O ia lea ua tatou alolofa i ai ma o tatou loto atoa, e aunoa ma le masalosalo. Ua faamalolo e le Faaola tiga uma faaletino ma faalelagona o se vaega o le olaga faaletino. Ua Ia aveesela le tiga mai ia i tatou. Na te taliaina o tatou faanoanoaga."
3. Tagai i le Mataupu Faavae ma Feagaiga 29:39.
4. 2 Nifae 2:11.
5. Mataio 5:45.
6. "Faaola e Ia Ou Alofa," *Viiga*, nu. 150.
7. 1 Peteru 4:12.
8. Ma o le a tatou faataitai ai i latou, ia iloa ai, pe latou te fai mea uma e poloaia ai i latou e le Alii lo latou Atua" (Aperaamo 3:25; tagai foi Mataupu Faavae ma Feagaiga 101:4–5).
9. Alema 57:25.
10. Sa tusi mai se uo ia te a'u: "O se taua toetiiti atoa le lima tausaga ma le faalelagona 'pogisa ma faanoanoa' i vaega eseese e ave oe i le faatausiusiuga

o ou gafatia, tautinoga, faatuatua ma le onosai. I le mavae ai o aso o le 'mafatiā' e te vaivai. I le mavae ai o vaiaaso o le 'mafatiā,' e te lēlavā. I le mavae ai o masina o le 'mafatiā,' e amata ona e vaivai. I le mavae ai o tausaga o le 'mafatiā,' e te gauai atu i le filifili e te lē toe manuia lava. E ave le faamoemoe ma meaalofo sili ona faapelepele ma faigata ona maua o meaalofo uma. I le aotelega, ou te le mautinoa pe na faapefea ona ou sao mai i lenei tofotofoga, sei vagana ai [o le Faaola]. Ua na o le pau lea o le faamatalaga. Ou te leiloa pe mafai faapefea ona ou iloa lenei mea, ae ou te iloina. Ona o Ia, sa ou mafai ai ona sao i lenei mafatiaga."

11. Tagai i le Luka 10:30–35.
12. Luka 4:18; tagai foi Isaia 61:1.
13. 3 Nifae 18:32.
14. Alema 7:11–12. "Ia afio ifo o ia i lalo o mea uma, lea na malamalama ai o ia i mea uma" (Mataupu Faavae ma Feagaiga 88:6).
15. "Come, Ye Disconsolate," *Hymns*, no. 115.
16. Mataupu Faavae ma Feagaiga 122:7.
17. "Ua e iloa le silisiliese o le Atua; ma o le a ia faapaiaina ou puapuaga mo ou manuia" (2 Nifae 2:2). "Ona ua ou iloa o ai lava e tuu atu lo latou faalagolago i le Atua e lagolagoina i o latou tofotofoga, ma o latou faalavelave, ma o latou puapuaga, ma o le a sii ae i latou i luga i le aso gataaga" (Alema 36:3).
18. 2 Korinito 12:9.
19. Tagai i le Neil L. Andersen, "The Joy of Becoming Clean," *Ensign*, Apr. 1995.
20. Ioane 14:18.
21. "Afai ua gata i lenei olaga mea tatou te faamoemoe i ai ia Keriso, ua sili lo tatou malaia i tagata uma lava" (1 Korinito 15:19).
22. I le fuaiupu muamua o le Tusi a Mamona, ua faamatala mai ai e Nifae faapea na ia, "vaai i puapuaga e tele i le gasologa o [ona] aso" (1 Nifae 1:1). Mulimuli ane, na faapea mai Nifae, "E ui i lea, sa ou tepa taulai a'e i lo'u Atua, ma sa ou viia o ia i le aso atoa; ma sa ou le muimui e faasaga i le Alii ona o o'u puapuaga" (1 Nifae 18:16).
23. 3 Nifae 25:2.
24. Personal conversation, Jan. 26, 2018.
25. 2 Korinito 4:8–9.
26. Na fesiligia Peresitene Hugh B. Brown, ao asiasi atu i Isaraelu, pe aisea na poloaia ai Aperaamo e osi atu le taulaga i lona atalii. Sa ia tali atu, "sa manaomia ona aoao e Aperaamo se mea e uiga ia Aperaamo" (i le Truman G. Madsen, *Joseph Smith the Prophet* [1989], 93).
27. Mataio 16:25.
28. Russell M. Nelson, "O Fanau o le Feagaiga," *Liahona*, Iulai 1995, 32.
29. Russell M. Nelson, i le Jason Swensen, "Better Days Are Ahead for the People of Puerto Rico," *Church News*, Sept. 9, 2018, 4.
30. Russell M. Nelson, in Swensen, "Better Days Are Ahead," 3.
31. Russell M. Nelson, in Swensen, "Better Days Are Ahead," 4.
32. Tagai i le Russell M. Nelson, "Iesu Keriso—o le Fomai o Fomai," *Liahona*, Nov. 2005, 85–87.
33. Faaaliga 7:14.
34. Tagai i le Faaaliga 7:13, 15, 17.



Saunia e Peresitene Russell M. Nelson

O Le Igoa Sa'o o le Ekalesia

Sa faatonuina i tatou e Iesu Keriso e faaigoa le Ekalesia i Lona suafa ona o Lana Ekalesia, ua faatumulia i Lona mana.

O'u uso e ma tuafafine pele, i lenei aso Sapatati matagofie ua tatou olioli ai faatasi i o tatou faamanuiaga e tele mai le Alii. Matou te faafetai atu mo a outou molimau e uiga i le talalelei toefuataiina a Iesu Keriso, mo osigataulaga ua outou faia ia tumau ai pe toe foi atu ai i luga o Lana ala o feagaiga, atoa ai ma la outou auunaga faapaiaina i Lana Ekalesia.

O le aso ou te lagona le unaiga malosi e talanoa atu ia te outou i se mataupu e matua taua tele. I nai vaiaso talu ai, sa ou faalauiiloa atu ai se faamatalaga e faatatau i le faasa'oga o le igoa o le Ekalesia.¹ Sa ou faia lenei mea ona sa uunaia ai e le Alii i lo'u mafaufau le taua o le igoa na Ia folafolaina mo Lana ekalesia, Le Ekalesia a Iesu Keriso o le Au Paia o Aso e Gata Ai.²

E pei ona outou faamoemoeina, o tali i lenei faamatalaga ma i le taiala i le sitaili toeiloiloina³ sa fefiloi lava le lelei ma le faalelelei. E toatele tagata o le ekalesia sa faasa'oina vave lava le igoa o le Ekalesia i a latou poloka ma itulau o ala faasalalau faaagafesootai. O isi sa tuufesili pe aisea, faatasi ai ma mea uma o loo tutupu i le lalolagi, sa tatau ai ona faamamafa se "mea faatauva"

tele." Ma sa fai mai nisi e le mafai ona faia, aisea la e taumafai ai fua? Se'i o'u faamalamalama atua le mafuaaga tatou te popole tele ai i lenei faafitauli. Ae muamua lava se'i o'u faamamafa atua o lenei taumafaiga *e le o se*:

- E le o se suiga o le igoa.
- E le o se toe mamauina.
- E leo se toe faamatagofieina.

- E leo se suiga faafuasei ma faapa'ole.
- Ma e leo se mea faatauva.

Ae, o se faasa'oga. O se poloaiga a le Alii. Sa le'i faaigoaina e Iosefa Samita le Ekalesia toefuataiina ia te ia; po o Mamona. O le Faaola lava Ia na fetalai, "Aua e faapea lava ona ta'ua la'u ekalesia i aso e gata ai, O Le Ekalesia a Iesu Keriso o le Au Paia o Aso e Gata Ai."⁴

E oo lava i le taimi anamua, i le TA 34, sa tuu atu ai e le Alii toetu le faatonuga lava e tasi i tagata o Lana Ekalesia ina ua Ia asiasi atu ia i latou i Amerika. I lenei taimi sa Ia fetalai ai:

"Ia outou faaigoa ai le ekalesia i lo'u igoa. . . .

"Pe faapefea ona fai ma'u ekalesia, sei iloga ua faaigoaina i lo'u igoa? Aua afai e faaigoaina se ekalesia i le igoa o Mose o lona uiga o le ekalesia lea a Mose; pe afai e faaigoaina i le igoa o se tagata o lona uiga o le ekalesia lea a le tagata; ae afai e faaigoaina i lo'u igoa o lona uiga o la'u ekalesia lea."⁵

O lea la, e le fetuunaia ai le igoa o le Ekalesia. Ina ua ta'ua ma le manino e le Faaola le igoa e tatau ona faaigoa ai Lana Ekalesia, lea na muamua lava i Lana ta'utinoga, "E faapea lava ona ta'ua o la'u ekalesia," e mamafa ia te Ia. Ma afai tatou te faatagaina ni igoa valaau e faaigoaga ma vaetamaina pe lagolagoina na igoa valaau e i tatou lava ia, e tiga o Ia.





O le a se taua o se igoa, po o i lenei tulaga, o se igoa valaau? A oo mai i igoa valaau o le Ekalesia, e pei o le “LDS Church,” le “Ekalesia Mamona,” po o le “Ekalesia a le Au Paia o Aso e Gata Ai,” o le aveesega sili ona manino o le *aveesea* o le suafa o le Faaola. O le aveesega o le suafa o le Alii mai le Ekalesia a le Alii o se manumalo tele lea mo Satani. A tatou *aveesea* le suafa o le Faaola, ua tatou *lafoaiese* lemu mea uma na faia e Iesu Keriso mo i tatou—e oo lava i Lana Togiola.

Mafaufau i le mea lenei mai Lana silafaga: O Ia o Ieova, o le Atua o le Feagaiga Tuai. I lalo o le taitaiga a Lona Tama, o Ia o le Foafoa o lenei lalolagi ma isi lalolagi.⁶ Sa Ia filifili e usitai i le finagalo o Lona Tama ma faia se mea mo fanau uma a le Atua lea e leai ma se tasi e mafai ona faia! I le tuua ai o Lona mamalu ma afio mai i le lalolagi o le Alo e Toatasi na Fanaua e le Tama i la le tino, sa inosia, tauemuina, tuufefanua i ai, ma sasaina ma le alofa o Ia. I le Faatoaga i Ketesemane, sa ave ai e lo tatou Faaola i Ona lava luga tiga *uma* agasala *uma* ma mafatiaga ma puapuaga *uma ua* outou oo ma ou oo i ai faapea ai ma tagata uma ua soifua ma o le a soifua mai. I lalo o le mamafa o lena avega tiga matuitui, na maligi

ai Lona toto mai pu ninii uma.⁷ O nei mafatiaga uma sa matua faateteleina a o faasatauroina ma le alofa o Ia i luga o le satauro i Kalevario.

E ala i nei aafiaga matuitui tiga ma Lona Toetu na sosoo ai—Lana Togiola Lē l’u—sa Ia aumaia ai le tino ola pea i tagata uma ma togiolaina ai tatou uma taitoatasi mai aafiaga o le agasala i tuutuuga o lo tatou salamo.

Na sosoo ai ma le Toetu o le Faaola ma le maliliu o Ana Aposetolo, sa oo ai le lalolagi i seneturi o le liliuese tele. Ona oo lea i le tausaga 1820, na faaali mai ai le Atua le Tama ma Lona Alo, o Iesu Keriso, i le Perofeta o Iosefa Samita e amatalia le Toefuataiga o le Ekalesia a le Alii.

I le mavae ai o mea uma na Ia onosaia—i le mavae ai o mea uma na Ia faia mo tagata soifua—ua ou iloa ai ma le maasiasi tele o loo tatou taliaina e aunoa ma le iloaia o le mea ua faia i le Ekalesia toefuataiina a le Alii le valaauina i isi igoa, ia ua aveesea uma ai le suafa paia o Iesu Keriso!

O Aso Sa uma a o tatou aai ma feinu ma le agavaa i le faamanatuga, tatou te faafouina la tatou folafolaga paia i lo tatou Tama Faalelagi o loo tatou loto e ave i o tatou luga le suafa o Lona Alo, o Iesu Keriso.⁸ Ua tatou folafola atu e

mulimuli ia te Ia, salamo, taus i Ana poloaiga, ma manatua *pea* o Ia.

A tatou aveesea Lona suafa mai Lana Ekalesia, ua tatou aveesea o *Ia* o le tau-laiga tutotonu o o tatou olaga e aunoa ma le manatu i ai.

O le aveina o le suafa o le Faaola i o tatou luga e aofia ai le tautino atu ma le molimau atu i isi—e ala i a tatou amioga ma a tatou upu—o Iesu o le Keriso. Pe sa tatou fefefe tele ne’i faatiga i se tasi na valaauina tatou o “Mamona” na ala ai ona tatou le pui-puia le Faaola lava Ia, e tu atu ai mo Ia i le igoa ua faaigoaina ai Lana Ekalesia?

Afai e ao ia i tatou o se nuu ma o ni tagata taitoatasi ona mauaina le mana o le Togiola a Iesu Keriso—e faamama ma faamalolo ai tatou, e faamallosia ma faalauteleina ai tatou, ma mulimuli ane faaeaina ai i tatou—e tatau ona tatou faamamaluina ma le manino o Ia o le puna o lena mana. E mafai ona tatou amata i le valaauina o Lana Ekalesia i le igoa na Ia folafola mai.

Mo le toatele o le lalolagi, o loo latou iloaia sese le Ekalesia a le Alii i le taimi nei o le “Ekalesia Mamona.” Ae o i tatou i le aveai ai ma tagata o le Ekalesia a le Alii, ua iloaia le o loo tu i le ulu: o Iesu Keriso lava Ia. Ae paga lea, o le toatele e faalogo i le upu Mormon e ono manatu o loo tatou tapuai ia Mamona. E leai! Tatou te faamamaluina ma faaaloalogiaina lena perofeta Amerika maoae anamua.⁹ Ae e leo tatou o ni soo o Mamona. O i tatou o soo o le Alii.

I le popofou o le Ekalesia toefuataiina, o upu e pei o le *Ekalesia Mamona* ma le *Au Mamona*¹⁰ sa tele ina faaigoa o ni igoa valaau—o ni faaupuga lē lelei, upu sauā—na mamaluina e nana ai faatosinaga a le Atua i le toefuataiina o le Ekalesia a Iesu Keriso i nei aso e gata ai.¹¹

Uso e ma tuafafine, e tele lava finauga faalelalolagi e faasaga i le toefuataiina o le igoa sa’o o le Ekalesia. Ona o le lalolagi faaonapo nei ua tatou ola ai, faatasi ai ma sailiga i masini faamoemoeina ua fesoasoani ia i tatou uma ia maua faamatalaga tatou te manaomia vave—e aofia ai ma faamatalaga e uiga i le Ekalesia a le Alii—fai

mai le au faitio o se faasa'oga i lenei lava taimi ua le atamai. E lagona e isi ona ua tatou lauiloa tele o ni "Mamona" ma le "Ekalesia Mamona," e tataua ona tatou taliaina ma ola ai.

Afai o se talanoaga lenei e uiga i le mamanuina o se faalapopototoga e fai e tagata, e ono manumalo la na finauga. Ae i lenei mataupu taua tele, tatou te vaai atu ai ia te Ia e ana le Ekalesia lenei ma faamamaluina, o ala a le Alii, e lē, ma o le a lē avea lava ma ala o tagata. Afai o le a tatou onosai ma faia la tatou vaega ia lelei, o le a taitai e le Alii i tatou e ala i lenei galuega taua. I le mavae o mea uma, ua tatou iloa lava e fesoasoani mai le Alii ia i latou e saili e fai Lona finagalo, e pei lava ona Ia fesoasoani ia Nifae e faataunu le galuega o le fauina o se vaa e asa ai le vasa.¹²

O le a tatou mananao ina ia faaaloalo ma onosai i a tatou taumafaiga e faasa'o nei mea sese. O ala o faasalalauga fitoitonu o le a malamalama i le tali mai i la tatou talosaga.

I se konafesi aoao talu ai, sa saunoa ai Elder Benjamín De Hoyos e uiga i mea faapena na tupu. Sa Ia saunoa:

"I ni nai tausaga ua mavae, a o ou galue ai i le ofisa o le va i fao o le Ekalesia i Mekisiko, sa valaaulia [maua ma se soa] e auai i se polokalama o le talanoa i luga o le leitio. [Sa fesili mai

se tasi o faatonu o le polokalama] ia i [ma'ua], 'Aisea ua matuai umi ai le igoa o le Ekalesia? . . .

"Sa ma ataata atu ma la'u soa i le maoae o le fesili ona ma faamatala atu lea e faapea, o le igoa o le Ekalesia sa le'i filifilia e se tagata. Sa tuuina mai e le Faaola. . . Na vave ona tali mai ma le faaaloalo le faatonu o le polokalama, 'O le a matou toe ta'ua ma le agaga fiafia tele.'"¹³

O lena lipoti na aumai ai se mamanu. E taitoatasi lava, o a tatou taumafaiga o ni tagata taitoatasi o le a manaomia e faasa'o ai mea sese ia na taliaina i le gasologa o tausaga.¹⁴ Atonu o le a mulimuli pe leai foi le lalolagi i la tatou ta'imua i le valaauina o i tatou i le igoa sa'o. Ae o se le faamaoni mo i tatou le le fiafia pe afai e valaau e le toatele o le lalolagi le Ekalesia ma ona tagata i igoa sese ae o loo tatou faia foi lea mea e tasi.

Ua aoga la tatou taiala o le sitaili ua toe iloiloia. Ua ta'ua: "I le maufaasino muamua, o le igoa atoa o le Ekalesia ua filifilia: 'O Le Ekalesia a Iesu Keriso o le Au Paia o Aso e Gata Ai.' Afai e manaomia se maufaasino puupuu [lona lua], o faaupuga 'o le Ekalesia' po o le "Ekalesia a Iesu Keriso" e uunaia [e faaaoga]. O le 'Ekalesia toefuataiina a Iesu Keriso' e sa'olele foi ma e uunaia [e faaaoga]."¹⁵

Afai e fesili mai se tasi, "O oe o se Mamona?" e mafai ona e tali atu i ai, "Afai o loo e fesili mai pe o a'u o se tagata o Le Ekalesia a Iesu Keriso o le Au Paia o Aso e Gata Ai, ioe, o lea lava!"

Afai e fesili mai se tasi, "O oe o se Au Paia o Aso e Gata Ai?"¹⁶ e mafai ona e tali atu, "Ioe, o lea lava. Ou te talitonu ia Iesu Keriso ma o a'u o se tagata o Lana Ekalesia toefuataiina."

O'u uso e ma tuafafine, ou te folafola atu afai o le a tatou faia le mea sili tatou te mafaia e toefuatai ai le igoa sa'o o le Ekalesia a le Alii, o le a liligi mai e Ia o le e ana le Ekalesia Lona mana i lalo ma faamanuiaga i luga o ulu o le Au Paia o Aso e Gata Ai,¹⁷ i auala tatou te lei vaaia lava. O le a tatou maua le poto ma le mana o le Atua e fesoasoani ai ia i tatou e avatu faamanuiaga o le talalelei toefuataiina a Iesu Keriso i malo uma, ituaiga, gagana, ma nuu ma ia saunia le lalolagi mo le Afio Faalua Mai o le Alii.

O lea la, o le a le taua o se Igoa? A oo mai i le igoa o le Ekalesia a le Alii, o le tali o "Mea Uma!" Sa faatonuina i tatou e Iesu Keriso e faaigoa le Ekalesia i Lona suafa ona o Lana Ekalesia, ua faatumulia i Lona mana.

Ou te iloa o loo soifua le Atua. O Iesu o le Keriso. O loo Ia taitaia Lana Ekalesia i aso nei. Ou te molimau atu ai i le suafa o Iesu Keriso, amene. ■

FAAMATALAGA

1. "Sa uunaia ai e le Alii i lo'u mafaufau le taua o le igoa na Ia faaalua mo Lana Ekalesia, Le Ekalesia a Iesu Keriso o le Au Paia o Aso e Gata Ai. E i ai sa tatou galuega i o tatou luma ia ogatusa ai i tatou lava ma Lona finagalo. I vaiaaso talu ai nei, sa amatalia ai e taitai ma matagaluega eseese o le Ekalesia ona faia laasaga talafeagai e faia ai lea mea. O faamatalaga faaopoopo e uiga i lenei mataupu taua o le a maua i masina a sau" (Russell M. Nelson, "O Le Igoa o le Ekalesia" [malelega aloaia, 16 Aok., 2018], mormonnewsroom.org).
2. Sa faia foi e Peresitene o le Ekalesia na muamua atu lea lava talosaga e tasi. Mo se faataitaiga, sa saunoa Peresitene Siaosi Alapati Samita: "Aua le tuuina i lalo le Alii e ala i le valaauina o lenei ekalesia o le Ekalesia Mamona. Na te le'i faaigoaina i le Ekalesia Mamona" (i le Conference Report, Apr. 1948, 160).
3. Tagai i le "Taiala o le Sitaili—O Le Igoa o le Ekalesia," mormonnewsroom.org.
4. Mataupu Faavae ma Feagaiga 115:4.



5. 3 Nifae 27:7–8.
6. Tagai i le Mose 1:33.
7. Tagai i le Mataupu Faavae ma Feagaiga 19:18.
8. Tagai i le Moronae 4:3; Mataupu Faavae ma Feagaiga 20:37, 77.
9. O Mamona o se tasi o tusitala iloga e toafa o le Tusi a Mamona, o isi e i ai Nifae, Iakopo, ma Moronae. O i latou uma o ni molimau na vaaitino i le Alii, faapea ai ma lona faaliliu upu musuia, le Perofeta o Iosefa Samita.
10. E oo lava i le upu *Mormonites* sa i ai faatasi i faaupuga faalumaluma ia na faaogaina (tagai i le *Talafaasolopito o le Ekalesia*, 2:62–63, 126).
11. O isi igoa valaau sa foliga mai na i ai i taimi o le Feagaiga Fou. I le taimi o le faamasinoga o le Aposetolo o Paulo i luma o Filiki, sa fai mai ai o Paulo “o le taitai i le itu aiga o le au Nasareta” (Galuega 24:5). E faatatau i le faaogaina o le faasuiatua “o le au Nasareta,” sa tusia ai e se tasi o tagata faiaup: “O le igoa lenei sa masani ona ave i Tagata Kerisiano e faailoa ai le le faaaloalo. Sa ta’ua i latou faapena ona o Iesu o se Nasareta” (Albert Barnes, *Notes, Explanatory and Practical, on the Acts of the Apostles* [1937], 313).
 Sa faapena foi ona ta’ua e se isi tagata faiaup: “A o valaauina ma le le faaaloalo lo tatou Faaola ‘O le Nasareta’ (Mataio 26:71), o lea na faasino ai Iutaia i ona soo o le ‘au Nasareta.’ Sa latou le tautino o i latou o ni Kerisiano, o lona uiga, o soo o le Mesia” (*The Pulpit Commentary: The Acts of the Apostles* ed. H. D. M. Spence and Joseph S. Exell [1884], 2:231).
 Sa faapena foi ona matauina e Elder Neal A. Maxwell: “E ala i le talafaasolopito faatusitusiga paia, ua tatou vaai ai i taumafaiga faifai pea e faalumaluma perofeta ina ia aveesea i latou—e faailoga i latou ina ia faaititia i latou. Peitai, o le tele lava e le amanaiaina i latou e o latou lava augatupulaga ma e ala i talafaasolopito faalelalogi. I le mavae o mea uma, sa ta’ua lava Kerisiano anamua “o itu aiga o le au Nasareta.” (Galuega 24:5.)” (“Out of Obscurity,” *Ensign*, Nov. 1984, 10).
12. Tagai i le 1 Nifae 18:1–2.
13. Benjamin De Hoyos, “Valaauina e Avea ma Tagata Paia,” *Liahona*, Me 2011, 106.
14. E ui e leai se tatou pule i le igoa e valaau ai i tatou e isi tagata, ae tatou te pule atoa i le auala tatou te faasino ai ia i tatou lava. E faapefea ona tatou faamoemoeina isi e faamamalu le igoa sa’o o le Ekalesia pe afai e le mafai ona faia e i tatou lava o ona tagata?
15. “Taiala o le Sitaili—O Le Igoa o le Ekalesia,” *mormonnewsroom.org*.
16. O le faaupuga *au paia* e tele ina faaoga i le Tusi Paia. I le Tusi a Paulo i Efeso, mo se faataitaiga, na ia faaoga ai le upu *au paia* e le itiiti ifo ma le faatasi i mataupu uma. O se tagata o le au paia e talitonu ia Iesu Keriso ma taumafai e mulimuli ia te Ia.
17. Tagai i le Mataupu Faavae ma Feagaiga 121:33.



Saunia e Peresitene Henry B. Eyring
Fesoasoani Lua i le Au Peresitene Sili

Taumafai

O loo tuuina e le Faaola Lona suafa i o outou loto. Ma o loo outou lagonaina le alofa mamā o Keriso mo isi ma mo oe lava ia.

O’u uso e ma tuafafine, ou te faafetai mo le avanoa e lauga atu ai ia te outou. Ua uunaia ma faagaetia a’u i lenei konafesi. O musika na lagiina ma upu na saunoaina ua aveina atu i totonu o o tatou loto e le Agaga Paia. Ou te tatalo o upu ou te tautala atu ai o le a auina atu ia te outou e lena lava Agaga e tasi.

I le tele o tausaga ua mavae, sa avea ai a’u ma se fesoasoani muamua i se peresitene o se itu i sasae o le Iunaitete Setete. Na sili atu ma le faatasi, ao matou tietie atu i la matou tamai paranesi, na ia fai mai ai ia te a’u: “Hal, pe a feiloai i se tagata, taulimaina i latou

e peiseai ua latou i ai i se faafitauli ogaoga, ma o le a sili atu ona e sa’o nai lo le afa o le taimi.” E le gata na sa’o o ia, ae sa ou aoaoina i le aluga o tausaga ua maualalo tele lana fua faatatau. I le asō, ou te fia faamalosiua atu ia te outou i luitau o feagai ma outou.

Ua mamauina o tatou olaga faitino e se Atua alofa e avea ma tofotofoga ma puna o le tuputupu ae mo i tatou taitoatasi. Ua tou manatua afioga a le Atua e faatatau i Lana fanau i le Fofoaga o le lalolagi: “Ma o le a tatou tofotofoina ai i latou, e vaai pe latou te faia mea uma o soo se mea e poloaiina ai i latou e le Alii lo latou Atua.”¹

Talu mai le amataga, sa lei faigofie ia tofotofoga. O le a tatou fetaiai ma luitau lea e sau mai le mauaina o ni tino faitino. Ua tatou ola a’e uma i se lalolagi lea ua faasolosolo malosi ai le tau faasagatau mai o Satani i le mea moni ma lo tatou fiafia patino. E mafai ona foliga mai ia te oe le lalolagi ma lou olaga patino ua faateleina le vevesi.

O la’u faamautinoaga e faapenei: ua mamauina e le Atua alofa o lē na faatagaina nei tofotofoga mo outou se auala mautinoaga ia manumalo ai. E alofa tele le Tama Faalelagi i le lalolagi ua Ia auina mai ai Lona Alo Pele e fesoasoani ia i tatou.² Na foai mai e Lona Alo, o Iesu Keriso, Lona soifua mo i tatou. Na





tauave e Iesu Keriso i Ketesemane ma luga o le satauro le mamafa o a tatou agasala uma. Sa Ia oo i faanoanoaga uma, tiga, ma aafiaga o a tatou agasala ina ia mafai ai ona Ia faamafanafana ma faamalosia i tatou e ala i tofotofoga uma i le olaga.³

Tou te manatuaina le fetalaiga a le Alii i Ana auaua:

“O le Tamā ma A’u ua tasi” Ua i ai A’u i le Tamā ma ua i ai le Tamā ia te A’u; ma talu ai ona ua outou talia a’u, ua outou i ai ia te a’u ma ua Ou i ai ia te outou.

“O le mea lea, ua Ou i ai i lo outou lotolotoi, ma o A’u o le leoleo mamoe lelei, ma le maa o Isaraelu. O ia o lē e ati a’e i luga o lenei papa o le a lē pa’ū lava.”⁴

Na tuuina mai foi e lo tatou perofeta, o Peresitene Russell M. Nelson lena lava faamautinoaga e tasi. Ma le isi, na ia faamatalaina se auala tatou te ono atiae ai i luga o lena papa ma tuu le suafa o le Alii i luga o o tatou loto e taialaina i tatou e ala atu i o tatou luitau.

Na ia saunoa mai: “O oe lena atonu o le a le fiafia i se taimi, manatua, o le olaga e lē o se mea faigofie. E tatau ona tauaveina tofotofoga ma onosaia faanoanoaga i le aluga o le ala. E pei ona e manatuaina ‘e leai se mea e le mafaia

e le Atua’ (Luka 1:37), ia silafia o Ia o lo outou Tama. O oe o se atalii po o se afafine, ua foafoaina i Lona faatusa, ua e agavaa i le mauaina o faaaliga e fesoasoani i au taumafaiga amiotonu. E mafai ona e aveina i ou luga le suafa paia o le Alii. E mafai ona e agavaa e ta’ua le suafa paia o le Atua (tagai MF&F 1:20).”⁵

O le saunoaga a Peresitene Nelson ua faamanatu maia ia i tatou le folafolaga o loo maua i le tatalo o le faamanatuaga, o se folafolaga e faataunuu e lo tatou Tama Faalelagi pe a tatou faia mea na tatou folafola atu tatou te faia.

Faalogi i upu: Le Atua e, le Tamā Faavavau, matou te ole atu ia te oe i le suafa o lou Alo, o Iesu Keriso, ia e faamanuiaina ma faapaia lenei areto i agaga o i latou uma o e e fetagofi i ai, ina ia latou taumamafa i le faamanatuina o le tino o lou Alo, ma molimau atu ia te oe, le Atua e, le Tamā Faavavau, latou te loto ina ia ave i o latou luga le suafa o lou Alo, ma manatua pea o ia ma tasi i ana poloaiga ua ia tuuina mai ia te i latou; ina ia latou maua pea lona Agaga e faatasi ma i latou. Amene.”⁶

O taimi uma tatou te ta’ua ai le upu *amene* pe a tuuina atu lena tatalo mo i tatou, tatou te tauto atu o le ‘aai i le areto ua tatou loto e ave i o tatou luga

le suafa paia o Iesu Keriso, manatua pea o Ia, ma tasi Ana poloaiga. I le isi itu, ua folafola mai ia i tatou, tatou te maua pea Lona Agaga e faatasi ma i tatou. Ona o nei folafolaga, o le Faaola o le papa lea e mafai ai ona tatou tutu saogalemu ma aunoa ma le fefe i soo se afā e fetaiai ma i tatou.

Ao o’u mafaufau loloto i upu o le feagaiga ma faamanuiaga fesootai ua folafola mai, ou te mafaufau po o le a le uiga o le loto e ave i o tatou luga o le suafa o Iesu Keriso:

Na faamalamalama mai e Peresitene Dallin H. Oaks: “E taua tele pe a tatou aai ma feinu i le faamanatuga tatou te le molimau atu tatou te *aveina i o tatou luga* le suafa o Iesu Keriso. Tatou te molimau atu ua tatou *loto* e faia. (Tagai MF&F 20:77.) O le mea moni e faapea ua na ona tatou molimau atu i lo tatou naunautai e faapea e i ai se isi mea e tatau ona tupu ae tatou te lei tauaveina tonu lena suafa paia i o tatou luga i le uiga aupito sili ona taua.”⁷

O le faaupuga ua tatou “loto ina ia ave i o [tatou] luga” Lona suafa ua tau maia ia i tatou e ui sa tatou tauaveina Lona suafa ina ua tatou papatiso, o le aveina o Lona suafa e lē gata i le papatisoga. E tatau ona tatou galulue faifaiepea e tauave Lona suafa i o tatou olaga atoa, e aofia pe a tatou faafouina



feagaiga i le laulau faamanatuga ma osia feagaiga i malumalu paia a le Alii.

O fesili taua la e lua mo i tatou taitoatasi o le “O le a le mea e tatau ona ou faia e ave ai i o’u luga Lona suafa?” ma le “E faapefea ona ou iloa pe o ou alualu i luma?”

O le faamatalaga a Peresitene Nelson ua fautuaina atu ai se tali aogā. Na ia saunoa mai e mafai ona tatou aveina i o tatou luga le suafa o le Faaola ma mafai ona tatou tautatala mo Ia. A tatou tautatala atu mo Ia, ua tatou auauna atu ia te Ia. “Aua pe faapefea ona iloa e se tagata le matai e lei auauna i ai o ia, ma o se foi o se tagata ese ia te ia, ma ua mamao mai mafaufauga ma faamoemoega o lona loto?”⁸

O le tautala atu mo Ia e manaomia ai se tatalo o le faatuatua. E manaomia ai se tatalo faatauanau i le Tama Faalelagi e aoao ai po o a upu e mafai ona tatou tautatala ai e fesoasoani ai i le Faaola i Lana galuega. E tatau ona tatou agavaa mo le folafolaga: “Pe i lou lava leo po o i le leo o a’u auauna, ua tutusa lava.”⁹

Ae, e manaomia ai le tautatala mo Ia ina ia ave i o tatou luga Lona suafa. E tatau ona i ai ni lagona i o tatou loto ia agavaa ai o ni Ana auauna.

Na faamatala e le perofeta o Mamona ia lagona ia e faagavaaina i tatou ma mafai ai ona tatou ave i o tatou luga Lona suafa. O nei lagona e aofia ai le faatuatua, faamoemoe, ma

le alofa mutimutivale, o le alofa mamā lea o Keriso.

Sa faamalalamalama mai e Mamona:

“Ona ua ou matauina ua outou faatuatua ia Keriso ona o lo outou agamalu; ona a na fai tou te le faatuatua ia te ia po ua outou le agavaa e faitaulia i totonu o tagata o lana ekalesia.

“O lenei foi, ou uso pele e, ou te fia tautala atu ia te outou e uiga i le faamoemoe. E mafai faapefea ona outou maua o le faatuatua, vagana ai ua ia te outou le faamoemoe?

“Ma o le a le mea tou te faamoemoe i ai? Faauta ou te fai atu ia te outou, tou te faamoemoe, e ala i le togiola a Keriso ma le mana o lona toetu, ia faatutu mai outou i le ola faavavau, ma o le pogai ona o lo outou faatuatua ia te ia e tusa ma le folafolaga.

“O le mea lea, afai ua i ai se tagata le faatuatua e tatau ona i ai ia te ia le faamoemoe; ona a aunoa ma le faatuatua e le mafai ona i ai se faamoemoe.

O lenei foi, faauta ou te fai atu ia te outou e le mafai ona i ai ia te ia le faatuatua ma le faamoemoe, vagana ai ua agamalu, ma maualalo o ia i le loto.

“Afai e faapea, ua le aoga lona faatuatua ma le faamoemoe, ona e lei se tasi e ono talia i luma o le Atua, vagana ai i latou o e ua agamalu ma maualalalo i le loto; ma afai e agamalu ma maualalalo se tagata i le loto, ma tautino atu i le mana o le Agaga Paia o Iesu o le Keriso, e ao ina i ai ia te ia le alofa mama; aua afai e le i ai ia te ia le alofa mama, o se mea noa o ia; o le mea lea e ao ai ina i ai ia te ia le alofa mama.”

Ina ua uma ona faamalalamalama mai le alofa mama, sa faaaauu pea Mamona:

“Ae o le alofa mama o le alofa le pona lea o Keriso, ma e tumau e faavavau; ma o soo se tasi e maua ua i ai ia te ia i le aso gataaga, o le a lelei ia te ia.

“O le mea lea, ou uso pele e, ia outou tatalo atu i le Tamā ma le malosi atoa o le loto, ina ia faatumulia outou i lenei alofa, lea ua ia faaee mai i luga o i latou uma o e o soo moni o lona Alo, o Iesu Keriso; ina ia mafai ona avea o outou ma atalii o le Atua; a oo ai ina afio mai o ia o le a tatou faapei o ia, ona o le a tatou vaai ia te ia e pei ona

i ai o ia; tau ina ia tatou maua lenei faamoemoe; tau ina ia mafai ona faamamaina i tatou e pei lava ona mama o ia. Amene.”¹⁰

Ou te molimau atu o loo tuuina e le Faaola Lona suafa i totonu o outou loto. O le toatele o outou, ua faateleina lo outou faatuatua ia te Ia. Ua outou lagonaina atili le faamoemoe ma o le a lelei mea uma. Ma ua outou lagonaina le alofa mama o Keriso mo isi ma mo oe lava ia.

Ou te vaai i ai i faifeautalai o loo auauna atu i le lalolagi atoa. O loo tautatala atu tagata o le ekalesia ia latou uo ma tagata o aiga e uiga i Le Ekalesia a Iesu Keriso o le Au Paia o Aso e Gata Ai. O loo auauna atu alii, tamaitai, tupulaga talavou, ma e oo lava i fanau iti ona o le alofa mo le Faaola ma mo o latou tuaoi.

I le muai lipotia mai o faalavelave i le salafa o le lalolagi, e faia e tagata o le ekalesia ni fuafuaga e o atu e laveai, o nisi taimi e sopoia ai le vasa, e aunoa ma le fesiligia. O nisi taimi e faigata ai ia i latou ona faatali seia mafai e nofoaga mafatia ona taliaina i latou.

Atonu o nisi o outou o faalogologo mai i le asō ua lagonaina le faatoilaloina o lo outou faatuatua ma le faamoemoe e a outou faafitauli. Ma e atonu e te manao ia lagona le alofa.

Uso e ma tuafafine, ua i ou autafa avanoa a le Alii ia lagona ai ma faasoa atu Lona alofa. E mafai ona e tatalo ma le mautinoa mo le Alii e taitaiina oe ia alofa atu i se tasi mo Ia. E tali mai o Ia i tatalo a volenitia agamalu e pei o oe. O le a e lagonaina le alofa o le Atua mo oe ma mo le tagata o e auauna i ai mo Ia. Ao e fesoasoani atu i fanau a le Atua i o latou luitau, o le a foliga mamasagia a oe lava luitau. O le a faamallosia lou faatuatua ma lou faamoemoe.

O au o se molimau o lena upumoni. I le gasologa o le olaga, na talanoa lo’u toalua mo le Alii ma auauna atu i tagata mo Ia. E pei ona ou ta’ua muamua, na fai mai se tasi o a matou epikopo ia te a’u “Ou te ofo. O taimi uma ou te faalogologo ai i se tagata i le uarota o mafatia, ou te faanatinati atu e fesoasoani. Ae o le taimi ou te taunuu ai, e foliga mai ua i ai lava lou toalua iina.” E moni lena

mea i nofoaga uma sa matou nonofo ai mo le 56 tausaga.

I le taimi nei na o ni nai upu e mafai ona ia tautala ai i le aso. E asia o ia e tagata sa ia alofa i ai mo le Alii. O po ma taeao uma ou te usuusu pese ia te ia ma ma tatalo. E tatau ona ou faaleoa ia tatalo. O nisi taimi e mafai ona ou vaaia lona memuina o upu o pese. E fiafia o ia i pese a tamaiti. O lagona ia e foliga mai e siili ona ia fiafia i ai o loo aoteleina lea i le pese “O Loo Ou Taumafai e Avea e Pei o Iesu.”¹¹

I le isi aso, ina ua uma ona usuina upu o le tali: “Ia fealofani e pei o Iesu. Agalelei i mea uma e fai,” sa ia fai mai lemu, ae na manino, “Taumafai.” Ou te manatu o le a ia mauaina, pe a ia vaai ia te Ia, ua tuu e lo tatou Faaola Lona suafa i totonu o lona loto ma ua avea o ia e pei o Ia. O loo Ia tauaveina o ia e ala atu i ona luitau i le taimi nei, e pei ona Ia tauaveina outou e ala atu i a outou [luitau].

Ou te tuuina atu lau molimau e silafia ma e alofa le Faaola ia te outou. Na te silafia lou igoa e pei ona e silafia Lona [suafa]. Na te silafia ou luitau. Na Ia oo i ai. E ala atu i Lana Togiola, ua Ia manumalo ai i le lalolagi. O le tou loto e ave i ò outou luga Lona suafa, o le a outou siitiaina ai avega o le lemafaitauina o isi. Ma o le a outou mauaina le sili atu o lo outou silafiaina o le Faaola ma sili atu lou alofa ia te Ia. O le a i ai Lona suafa i ò outou loto ma tamau i tou mafaufau. O le suafa lea o le a valaauina ai oe. Ou te molimau atu ai, ma le agaga faafetai mo Lona alofa-agalelei ia te a’u, i e pele ia te a’u, i le suafa o Iesu Keriso, amene. ■

FAAMATALAGA

1. Aperaamo 3:25.
2. Tagai i le Ioane 3:16–17.
3. Tagai i le Alema 7:11–12.
4. Mataupu Faavae ma Feagaiga 50:43–44.
5. Russell M. Nelson, “E Leai se Mea e Le Mafaia e le Atua,” *Liahona*, Iulai 1988, 35.
6. Mataupu Faavae ma Feagaiga 20:77.
7. Dallin H. Oaks, “O Le Ave i o Tatou Luga O Le Suafa o Iesu Keriso,” *Liahona*, Iulai 1985, 79.
8. Mosaea 5:13.
9. Mataupu Faavae ma Feagaiga 1:38.
10. Moronae 7:39–44, 47–48.
11. Tagai “O Loo Ou Taumafai e Avea e Pei o Iesu,” *Tusipese a Tamaiti*, 40–41.



Saunia e Brian K. Ashton

Fesoasoani Lua i le Au Peresitene Aoao o le Aoga Sa

O Le Tamā

I le avea ai ma atalii ma afafine agaga o le Atua, ua tofua i tatou taitoatasi ma le gafatia e avea ai e pei o le Tama. Ina ia faia lea mea, e tatau ona tatou tapuai atu i le Tama i le suafa o le Alo.

Mo lona olaga atoa, o lo’u toalua, o Melinda, sa taumafai ma lona loto atoa ina ia avea ma se soo faamaoni o Iesu Keriso. Ae, i le amataga o lona talavou, sa ia lagona le le agavaa mo le alofa o le Tama Faalelagi ma faamanuiaga ona sa ia malamalama sese i le natura [o le Atua]. O le mea na lelei ai, sa faaauau pea ona tausi e Melinda poloaiga e ui i le faanoanoa sa ia lagonaina. I nai tausaga talu ai, sa ia oo i se soloaiga o aafiaga na fesoasoani ia te ia e malamalama lelei ai i le natura o le Atua, e aofia ai Lona alofa mo Ana fanau ma Lona lotofaafetai mo a tatou taumafaiga e ui e le atoatoa, e fai Lana galuega.

Na ia faamatala mai le auala na faatosinaina ai o ia e lenei mea: “Ua ou lagonaina nei le mautinoa e aogā le fuafuaga a le Tama, o loo saofagā o Ia lava i lo tatou tulaga manuia, ma o loo Ia saunia mo i tatou ni lesonea ma ni aafiaga tatou te manaomia e toe foi atu ai i Lona afioaga. Ua ou vaai atili nei ia te a’u lava ia ma isi e pei ona silasila mai ai le Atua ia i tatou. Ua mafai ona ou tausi, aoao atu, ma auauna atu ma le alofa atili ma le fefe laitiiti. Ou te lagona le filemu ma le talitonuga mautu nai lo le atuavale ma le le mautonu. Nai lo le lagonaina o le faamasinoina, ou te lagonaina le lagolagoina. Ua



mautu atili lo'u faatuatua. Ou te lagona-ina e le aunoa ma loloto atili le alofa o lo'u Tama."¹

O le i ai "o se manatu sa'o e uiga i uiga faaletagata, uiga atoatoa, ma uiga paia o le [Tama Faalelagi]" e taua lea i le faatinoina o le faatuatua ia lava e maua ai le faaeaga.² O se malamalamaaga sa'o e uiga i uiga faaletagata o le Tama Faalelagi e mafai ona suia ai le auala tatou te vaai ai ia i tatou lava ma isi ma fesoasoani ai tatou te malamalama i le alofa na'ua o le Atua mo Lana fanau ma Lona finagalo sili e fesoasoani mai ia tatou ave e faapei o Ia. O se manatu lē sa'o e uiga i Lona natura e mafai ona tatou lagonaina ai e peiseai o le a matuā le mafai lava ona tatou toe foi atu i Lona afioaga.

O lo'u faamoemoega i le asō o le aoao atu lea o ni manatu autu faaleao-aoga faavae e uiga i le Tama lea o le a mafai ai e i tatou taitoatasi, aemaise lava i latou o loo tuufesili pea pe alofa le Atua ia i latou, ina ia malamalama atili ai i Lona uiga faaletagata moni ma faatino ai le faatuatua tele ia te Ia, Lona Alo, ma Lana fuafuaga mo i tatou.

O Le Muai Olaga

I le muai olaga, na tatou fananau ai o ni agaga i ni Matua Faalelagi ma ola faatasi ma i La'ua o se aiga.³ Sa la'ua silafiaina i tatou, aoao i tatou, ma alolofa ia i tatou.⁴ Sa tatou matua manao lava ia ave e pei o lo tatou Tama

Faalelagi. Peitai, o le faia o lea mea, na tatou iloa ai e ao ia i tatou ona:

1. Maua ni tino faitino faamamaluina ma ola pea;⁵
2. Ia faaipoipo ma fai ni aiga e ala i le mana faamau o le perisitua;⁶ ma
3. Maua le poto uma, mana, ma uiga paia.⁷

O le mea lea, na foafoa ai e le Tama se fuafuaga lea o le a faataga ai i tatou i ni tuutuuga patino,⁸ ia maua ni tino faitino ia o le a ola pea ma faamamaluina i le Toetutu; faaipoipo ma fai ni aiga i le olaga faaletino pe, mo ē faamaoni sa le'i maua le avanoa, pe a mavae le olaga faaletino;⁹ alualu i luma agai atu i le atoatoa; ma mulimuli ane toe foi atu i o tatou Matua Faalelagi ma ola faatasi ma i La'ua ma o tatou aiga i se setete o le faaeaga ma le fiafia e faavavau.¹⁰

Ua ta'ua e tusitusiga paia lenei mea o le ata o le faaolataga.¹¹ Sa tatou faafetai tele mo lenei fuafuaga lea, ina ua tuuina mai ia i tatou, sa tatou alalaga ma le olioli.¹² Sa tatou taliaina uma tuutuuga o le fuafuaga, e aofia ai aafiaga ma luitau o le olaga faaletino ia o le a fesoasoani ia i tatou e atiae ia uiga paia.¹³

Olaga Faaletino

I le olaga faaletino, ua tuuina mai ai e le Tama Faalelagi ia i tatou ni tuutuuga tatou te manaomia e alualu ai i luma i totonu o Lana fuafuaga. Na

fanauina e le Tama ia Iesu Keriso i la le tino¹⁴ ma tuuina mai ia te Ia le fesoasoaniga faalelagi e faataunuu ai Lana misiona i la le tino. O le a faapena foi ona fesoasoani mai le Tama Faalelagi ia i tatou taitoatasi pe afai o le a tatou taumafai e tausi Ana poloaiga.¹⁵ Ua foi mai e le Tama ia i tatou le faitalia.¹⁶ O o tatou ola ua i ai i Ona aao, ma ua "iloa [o tatou] aso" ma "o le a le faitauina itiiti."¹⁷ Ma ua Ia faamautinoa mai o le a i'u lava ina galulue mea uma mo le lelei o i latou e alolofa ia te Ia.¹⁸

O le Tama Faalelagi lea e foi mai ia la tatou areto o le aso,¹⁹ lea e aofia ai uma meaai tatou te aia ma le malosi tatou te manaomia e tausi ai Ana polo-aiga.²⁰ E foi mai e le Tama meaalofo lelei.²¹ E faafofoga mai o Ia ma tali mai i a tatou tatalo.²² E laveai e le Tama Faalelagi i tatou mai le leaga pe a tatou faatagaina o Ia.²³ E tutulu o Ia mo i tatou pe a tatou puapugatia.²⁴ O le tumutumuga lava, o o tatou faamanuiaga uma e sau mai le Tama.²⁵

E talialaina ma tuu mai e le Tama Faalelagi ia i tatou aafiaga tatou te manaomia e fua i lo tatou malosi, vaivaiga, ma filifiliga ina ia mafai ona tatou fua maia ni fua lelei.²⁶ E aoi'i e le Tama i tatou pe a tatau ai ona e alofa o Ia ia i tatou.²⁷ O Ia o se "Tagata Fautua,"²⁸ o le a fautua mai ia i tatou pe a tatou ōle atu.²⁹

O le Tama Faalelagi lea na te auina mai uma faatosinaga ma meaalofo a le Agaga Paia i o tatou olaga.³⁰ E ala mai i le meaalofo o le Agaga Paia, o le mamalu—po o le atamai, malamalama, ma le mana—o le Tama e mafai ona mau ia i tatou.³¹ Afai o le a tatou taumafai e faateleina le malamalama ma le upumoni seia oo ina tatou manatu tasi i le mamalu o le Atua, o le a auina mai e le Tama Faalelagi le Agaga Paia o le Folafolaga e faamaufaailogaina i tatou i le ola e faavavau ma faaali mai Ona fofoga ia i tatou—a le o le olaga nei po le olaga a sau.³²

Pe a Mavae le Olaga Nei

I le lalolagi o agaga pe a mavae le olaga nei, e faaauau ai ona auina mai e le Tama Faalelagi le Agaga Paia ma auina mai faifeautalai ia i latou e manaomiaina le talalelei. E tali mai o



Ia i tatalo ma fesoasoani ia i latou e le'i mauaina sauniga ia maua sauniga faaola mo i latou.³³

Na faatu a'e e le Tama Faalelagi Iesu Keriso ma tuu atu ia te Ia le mana e aumai ai le Toetu,³⁴ aua o le auala lea tatou te maua ai ni tino ola pea. O le Togiola ma le Toetu o le Faaola tatou te toe foi atu ai i le afioaga o le Tama, lea o le a faamasinoina ai tatou e Iesu Keriso.³⁵

O i latou e faalagolago "i galuega, ma le alofa mutimutivale, ma le alofa tunoa o le Mesia Paia"³⁶ o le a mauaina ni tino faamamaluina e pei o le Tama³⁷ ma mau faatasi ma Ia "i se tulaga o le fiafia e lē gata."³⁸ O iina, o le a soloia ai e le Tama o tatou loimata uma³⁹ ma fesoasoani ia i tatou ia faaauau pea i tatou malaga e avea e faapei o Ia.

E pei ona e iloina, o loo i ai e le aunoa le Tama Faalelagi iina mo i tatou.⁴⁰

O Le Uiga Faaletagata o le Tama

Ina ia avea e pei o le Tama, e tatau ona tatou atiae Ona uiga faaletagata. O uiga atoatoa ma uiga paia o le Tama Faalelagi e aofia ai mea nei:

- O le Tama e "Lē Gata ma Faavavau."⁴¹
- O Ia e amiotonu atoatoa, alofa mutimutivale, agalelei, loa-ona-talitiga, ma e finagalo mo le mea silisili mo i tatou.⁴²
- O le Tama Faalelagi o le alofa lava Ia.⁴³
- E tausi e Ia Ana feagaiga.⁴⁴
- E le sui o Ia.⁴⁵
- E le mafai ona pepelo o Ia.⁴⁶
- E le faailoga tagata le Tama.⁴⁷
- E silafia e Ia mea uma—tuanai, taimi nei, ma le lumanai—mai le amataga.⁴⁸
- E sili atu le atamai o le Tama Faalelagi⁴⁹ nai lo tatou uma.⁵⁰
- Ua i ai i le Tama le mana uma⁵¹ ma faia mea uma e finagalo o Ia e fai.⁵²

Uso e ma tuafafine, e mafai ona tatou faatuatua ma faalagolago atu i le Tama. Ona e i ai se vaaiga e faavavau ia te Ia, ua mafai ai e le Tama Faalelagi ona silafia mea e le mafai ona tatou iloa. O Lona olioli, galuega ma le



mamalu o le aumaia lea o lo tatou tino ola pea ma le faaeaga.⁵³ O mea uma e faia e Ia e mo lo tatou manuia. E "finagalo [o Ia mo lo tatou] fiafia e faavavau e sili atu nai lo le [tatou] manao."⁵⁴ Ma Na te "le manaomia [i tatou] ona oo i se taimi e faigata atu i lo le mea tonu e manaomia mo [lo tatou] manuia pe mo le manuia o i latou [tatou te] alolofa i ai."⁵⁵ I se taunuuga, e taulai o Ia e fesoasoani mai ia i tatou ia alualu i luma, e le o le faamasinoina ma le ta'usalaia o i tatou.⁵⁶

Avea e Pei o Lo Tatou Tama

I le avea ai ma atalii ma afafine agaga o le Atua, ua tofi i tatou taitoatasi ma le gafatia e avea ai e pei o le Tama. Ina ia faia lea mea, e tatau ona tatou tapuai atu i le Tama i le suafa o le Alo.⁵⁷ Tatou te faia lenei mea e ala i le taumafai e usiusitai i le finagalo o le Tama, e pei ona sa faia e le Faaola,⁵⁸ ma e ala i le salamo faifai pea.⁵⁹ A tatou faia nei mea, tatou te "maua le alofa tunoa mo le alofa tunoa" seia oo ina tatou maua le atoatoa o le Tama⁶⁰ ma faaee mai ai "ona uiga faaletagata, uiga atoatoa, ma uiga paia."⁶¹

I le malamalama ai i le eseesea i le va o tagata faitino ua tatou i ai ma le tagata ua avea ai le Tama Faalelagi, e le o se mea e faate'ia ai le lagonaina e nisi o le avea e pei o le Tama e le mafai ona ausia. E ui i lea, o loo manino lava tusitusiga paia. Afai o le a tatou pipii atu i le faatuatua ia Keriso, salamo, ma saili atu i le alofa tunoa o le Atua e ala

i le usiusitai, o le a avea lava i tatou e pei o le Tama i se taimi mulimuli. Ou te mafanafana lava i le mea moni e faapea o i latou o e taumafai ia usiusitai o le a "*maua* le alofa tunoa mo le alofa tunoa" ma e mulimuli ane "*maua* lona atoatoaga."⁶² I nisi upu, o le a tatou le mafaia na o i tatou ona avea e pei o le Tama.⁶³ Ae, o le a oo mai e ala i mea-alofa o le alofa tunoa, o nisi e tetelē ae o le tele lava e laiti, ia e atiae i luga o le tasi ma le isi seia oo ina maua se atoatoaga. Ae, uso e ma tuafafine, o le a oo mai!

Ou te valaaulia outou ia faatuatua ina o loo silafia e le Tama Faalelagi le auala e faaeaina ai outou; saili atu i lana fesoasoani tumau i aso uma, ma fetaomi atu i luma ma le faatuatua ia Keriso e tusa lava pe e te le lagonaina le alofa o le Atua.

E tele mea tatou te le malamalama i ai e uiga i le avea e pei o le Tama.⁶⁴ Ae e mafai ona ou molimau atu ma le mautinoa o le taumafai ia avea e pei o le Tama e tauia ai osigataulaga uma.⁶⁵ O osigataulaga ia tatou te faia iinei i le olaga faaletino, po o le a lava le tele, e matua le mafaatusalia lava i le olioli, fiafia, ma le alofa lemafuaiaina o le a tatou lagonaina i le afioaga o le Atua.⁶⁶ Afai o loo e tauivi e talitonu e tauia ai osigataulaga o loo talosagaina oe e fai, o loo valaau mai le Faaola ia te oe, e faapea, "Tou te lei malamalama lava i le tetele o faamanuiaga o i ai i le Tamā . . . ua saunia mo outou; . . . e lē mafai ona outou gafatia mea uma i le taimi nei; e ui i lea, ia fiafia, ona o le a Ou taitaia outou i le ala."⁶⁷

Ou te molimau atu e alofa lo outou Tama Faalelagi ia te outou ma e finagalo ia outou toe mau faatasi ma Ia. I le suafa, o Iesu Keriso, amene. ■

FAAMATALAGA

1. E umia e le tusitala ia faamatalaga; tagai foi i le D. Melinda Ashton, "The Holy Ghost: Direction, Correction, and Warning" (Brigham Young University Women's Conference, Apr. 28, 2016), byutv.org.
2. *Lectures on Faith* (1985), 38.
3. Tagai i le "O Le Aiga: O Se Folafulaga i le Lalolagi," *Liahona*, Me 2017, 145; "Mother in Heaven," Gospel Topics, topics.lds.org.
4. Sa faailoa mai e le Aposetolo o Paulo sa tatou iloina lelei lava Tama lea o loo faananau atu pea o tatou agaga e valaau o ia ia *Ava (Abba)*, o lona uiga "Daddy,"

- o se upu ua faapolopolo mo tama tatou te masani tele i ai (tagai i le Roma 8:15).
5. Tagai i le Mataupu Faavae ma Feagaiga 130:22.
 6. Tagai i le Mataupu Faavae ma Feagaiga 132:19–20.
 7. Tagai i le Mataio 5:48; tagai foi i le 2 Peteru 1:3–8.
 8. O nei tuutuuga e aofia ai le tausiga o lo tatou uluai esetete (tagai i le Aperaaamo 3:26) ona oo mai lea i le olaga faaletino ia faatinoina le faatuatua ia Iesu Keriso ma Lana Togiola, salamo, ia papatisoina i le faatofuina e se tasi o loo umiaina le pule o le perisitua a le Atua, mauaina o le meaalofo o le Agaga Paia, ma le tumau e oo i le iuga (tagai i le 3 Nifae 27:16–20).
 9. Sa aoao mai Peresitene Dallin H. Oaks: “E i ai nisi ua faafofoga mai i lenei savali ua faapea ane, ‘Ae a la a’u?’ Ua matou iloa e toatele uso ma tuafafine lelei ma agavaa o le Au Paia o Aso e Gata Ai ua latou le maua i le taimi nei avanoa lelei ma mea taua o loo manaomia mo lo latou alualu i luma. O le nofotoatasi, lē fanau, malui, ma le tete’a ma le toalua ua le taulau ai faamoemoega ma tolopo ai le faataunuuga o faamanuiaga folafolaina. . . . Ae o nei toatuga e le tumau. Ua folafola mai le Alii e faapea i le faavavau, e leai se faamanuiaga o le a teena mai i ona atalii ma afafine o e latou te tausia poloaiga, ma faamaoni i a latou feagaiga, ma mananao i mea e sa’o” (“O le Fuafuaga Tele o le Fiafia,” *Liahona*, Ian. 1994, 87–88).
 10. Tagai i le Mosaea 2:41.
 11. Tagai i le Alema 42:5; ua ta’ua foi o le fuafuaga o le togiola (tagai, mo se faataitaiga, Iakopo 6:8) ma le fuafuaga o le fiafia (tagai i le Alema 42:8,16).
 12. Tagai i le Iopu 38:4–7.
 13. Tagai, mo se faataitaiga, Eperu 5:8; 12:11; Eteru 12:27. Ae soia ia o le mea muamua lava, o nisi o luitau o tatou feagai ai i le olaga faaletino e ono foliga mai i lo tatou malamalamaaga faatapulaina o le a taofia i tatou mai le mauaina o nisi o o tatou faamanuiaga folafolaina sili ona faamoemoe i ai. E ui e foliga mai e feteenai nei mea, ae o le a foai mai lava e le Atua faamanuiaga folafolaina uma pe afai tatou te tumau faamaoni.
 14. Tagai i le Luka 1:31–35; Ioane 1:14; 1 Nifae 11:18–21; Taiala i Tusitusiga Paia, “Iesu Keriso,” scriptures.lds.org.
 15. Tagai i le Mataupu Faavae ma Feagaiga 93:4–5, 16–17, 19–20.
 16. Tagai i le Mose 7:32.
 17. Mataupu Faavae ma Feagaiga 122:9.
 18. Tagai i le Roma 8:28.
 19. Tagai i le Mataio 6:11.
 20. Tagai i le N. Eldon Tanner, “The Importance of Prayer,” *Ensign*, May 1974, 50–53.
 21. Tagai i le Luka 11:10–13; Iakopo 1:17.
 22. Tagai i le Luka 11:5–10; Faaliliuga a Iosefa Samita, Luka 11:5–6 (i le Luka 11:5, vaefaamatalaga a); 3 Nifae 13:6.
 23. Tagai i le Mataio 6:13.
 24. Tagai i le Mose 7:31–40.
 25. Tagai i le Iakopo 1:17.
 26. Tagai i le Ioane 15:1–2; Mataupu Faavae ma Feagaiga 122:6–7.



27. Tagai i le Eperu 12:5–11; Mataupu Faavae ma Feagaiga 95:1.
28. Mose 7:35.
29. Tagai i le Alema 37:12, 37.
30. Tagai i le Ioane 14:26; 2 Nifae 31:12.
31. Tagai i le Ioane 17:21–23, 26; Mataupu Faavae ma Feagaiga 93:36.
32. Tagai i le Mataupu Faavae ma Feagaiga 76:53; 88:67–68.
33. Tagai i le 1 Peteru 4:6. Sa saunoa Elder Melvin J. Ballard i le mafuaaga na ia papatisoina ai se alii ma auai ai i le Ekalesia, fai mai, “Sa faailoa mai ia te a’u o ona tuua i le lalolagi o agaga ua leva ona latou taliaina le Talalelei ma sa tatalo ia i ai se tasi o lo latou aiga i le lalolagi e tatalaina le faitotoa mo i latou, ma sa taliaina a latou tatalo ma taitai atu ai e le Alii faifeautalai i le faitotoa o lenei alii” (i le Melvin R. Ballard, *Melvin J. Ballard, Crusader for Righteousness* [1966], 250).
34. Tagai i le Mamona 7:5–6; tagai foi i le Ioane 5:21, 26; 1 Korinito 6:14; 2 Nifae 9:11–12; Alema 40:2–3; 3 Nifae 27:14.
35. Tagai i le Ioane 5:22; Iakopo 6:9; Alema 11:44; Helamana 14:15–18. Ua faatoilaloina e le Togiola a Keriso aafiaga uma o le Pa’u o Atamu, e aofia ai uma le oti faaletino ma faaleagaga, lea e tatau ona faatoilaloina uma e faataga ai i tatou e toe foi atu i le afoaga o lo tatou Tama Faalelagi. O i latou ua salamo i a latou agasala o le a mau faatasi ma le Tama ma le Alo i le faavavau. Peitai, o i latou e le salamo o le a puapuagatia i le oti faalua, lea ua mafua ona o a latou lava agasala (tagai i le Helamana 14:15–18).
36. 2 Nifae 2:8.
37. Tagai i le Mataupu Faavae ma Feagaiga 76:53; 88:67–68.
38. Mosaea 2:41.
39. Tagai i le Faaaliga 7:17.
40. Tagai i le Mose 1:39. E faaaauu pea ona leoleo e le Tama Faalelagi ma tausi i latou i le malo teresitila e ala i auunaga a Iesu Keriso ma isi tagata selesitila (tagai i le Mataupu Faavae ma Feagaiga 76:77, 87) ma i latou i le malo teresitila e ala i auunaga a le Agaga Paia ma agelu (tagai i le Mataupu

- Faavae ma Feagaiga 76:86, 88).
41. Mose 7:35; tagai foi i le Salamo 90:2.
 42. Tagai i le Salamo 103:6–8; Luka 6:36; Mose 7:30.
 43. Tagai i le 1 Ioane 4:16.
 44. Tagai i le Mataupu Faavae ma Feagaiga 84:40.
 45. Tagai i le Iakopo 1:17.
 46. Tagai i le Numeru 23:19.
 47. Tagai i le Galuega 10:34–35.
 48. Tagai i le 1 Nifae 9:6; Mataupu Faavae ma Feagaiga 130:7.
 49. Ua faauigaina e le Dictionary.com le *intelligence (atamai)* o le “gafatia mo le aoaoina, mafaufau, malamalama, ma mamamu faigofie o gaoioiga faalemafaufau; tomiai e malamalama ai i upumoni, sootaga, mea moni, uiga, ma isi.” ma le “iloa.”
 50. Tagai i le Aperaaamo 3:19. O Iesu Keriso i le avea ai ma se tagata faamamaluina ma atoatoa e sili atu ona atamai nai lo i latou uma.
 51. Tagai i le Faaaliga 21:22.
 52. Tagai i le Aperaaamo 3:17.
 53. Tagai i le Mose 1:39.
 54. Richard G. Scott, “Faalagolago i le Alii,” *Liahona*, Ian. 1996, 19.
 55. Richard G. Scott, “Faalagolago i le Alii,” 17.
 56. Tagai i le Ioane 5:22; Mose 1:39. O Satani faapea ma i tatou lava ia, tatou te ta’usalaia i tatou (tagai i le Faaaliga 12:10; Alema 12:14).
 57. Tagai i le Ioane 4:23; Mataupu Faavae ma Feagaiga 18:40; 20:29.
 58. Tagai i le 3 Nifae 11:11; Mataupu Faavae ma Feagaiga 93:11–19.
 59. O le salamo o le faagasologa lea tatou te suia ai o tatou natura ina ia mafai ona tatou avea e pei o le Atua. O lea, e tatau ai ona tatou salamo pea lava pea, e le na o le salamo pe a tatou “faia se mea sese.”
 60. Tagai i le Mataupu Faavae ma Feagaiga 93:19–20.
 61. *Lectures on Faith*, 38; tagai foi i le Moronae 7:48; 10:32–33; Mataupu Faavae ma Feagaiga 76:56, 94–95; 84:33–38.
 62. Mataupu Faavae ma Feagaiga 93:39; ua faapoopo le faamamafa.
 63. Tagai i le Moronae 10:32–33; Mataupu Faavae ma Feagaiga 76:69, 94–95.
 64. Aisea e le mafai ai pe o le a le faaaliga mai ai e le Atua nisi mea se tele atu e uiga i le faagasologa o le avea e pei o Ia? Ou te faamaoni lava ou te le iloa uma ni mafuaaga. Ae pe na o se lua ni mafuaaga ou te malamalama i ai. O le mafuaaga muamua o nisi mea e le mafai ona malamalama i ai i lo tatou tulaga faaletino (tagai i le Mataupu Faavae ma Feagaiga 78:17). E ono faatusatusa i le taumafai e faamalalama le initoneti i se tasi na ola i le Seneturi lona sefulu. O le aano ma le vaaliga e le o i ai iina. Ma o le mafuaaga lona lua, o meaalofo o le alofa tunoa e tele ina o mai tonu ia i tatou ona e tatau ona tatou tigaina ma tauivi e ala i le le iloa o se mea.
 65. O osigataulaga ua talosagaina i tatou e fai atonu e taua i le ausiaina o le atoatoa (tagai i le Eperu 11:40 [i le Eperu 11:40, vaefaamatalaga a]).
 66. Tagai i le Roma 8:18.
 67. Mataupu Faavae ma Feagaiga 78:17–18.



Saunia e Elder Robert C. Gay
 O Le Au Peresitene o Fitugafulu

Ave i o Tatou Luga le Suafa o Iesu Keriso

Ou te tatalo o le a tatou tauaveina ma le faamaoni i o tatou luga le suafa o Iesu Keriso—e ala i le vaai e pei ona la silasila mai, i le auauna atu e pei na la auauna atu ai, ma i le faatuatuaina ua lava Lona alofa tunoa.

O'u uso e ma tuafafine talu ai nei, ao o'u mafaufau loloto i le poloaiga a Peresitene Russell M. Nelson e valaau le Ekalesia i lona igoa faaalua, sa ou sue i le mea lea na faatonuina ai sa Nifae e le Faaola e uiga i le igoa o le Ekalesia.¹ Ao o'u faitau i upu a le Faaola, sa taia a'u i le ala na la fetalai atu ai i tagata “ina ia ave i o latou luga le suafa o Keriso.”² O lenei mea na mafua ai ona ou tilotilo ia te a'u lava ma fesili, “O o'u tauaveina ea le suafa o le Faaola e pei ona la finagalo ou te faia?”³ Ou te fia faasoa atu i le asō nisi o musumusuga sa ou mauaina i se tali i la'u fesili.

Muamua, ina ia ave i o tatou luga le suafa o Keriso o lona uiga tatou te tauivi ma le faamaoni e vaai e pei ona silasila mai le Atua.⁴ E faapefea ona silasila mai le Atua? Na saunoa mai Iosefa Samita, “A o faamasinoina ma tausailaina e le tasi vaega o tagata le isi e aunoa ma le alofa tunoa, ua silasila mai le Matua Sili o le vanimonimo i luga o le aiga atoa o tagata ma se popole faatama ma le manatu faamatua” aua “o Lona alofa e le mafuatiaina.”⁵

O ni nai tausaga ua mavae, na malii ai lo'u tuafafine matua. Sa faigata lona

olaga. Sa ia tauivi ma le talalelei ma e lei malosi moni foi [i le lotu]. Na lafoai e lona toalua le la faaipoipoga ma tuua o ia e tausua se fanau laiti e toafa. I le afiafi na ia malii ai, i se potu faatasi ai ma lana fanau, sa ou faia sona faamanuiaga ia toe foi filemu atu ai i le aiga. I lona taimi na ou iloa ai ua masani

ona ou faamatalaina le olaga o lo'u tuafafine i tulaga o ona faafitauli ma le lē toaga. A o ou tuuina ou lima i luga o lona ulu i lona afiafi, na ou mauaina se aoaiga malosi mai le Agaga. Sa matua faailoa mai lava ia te a'u ma faataga a'u ina ia ou vaai atu ia te ia e pei o silasila mai le Atua ia te ia—e le pei o se tasi o le na tauivi ma le talalelei ma le olaga ae o se tasi na taulimaina ni faafitauli faigata ou te lei mauaina. Sa ou vaai ia te ia o se tina matagofie o le, e ui i faafitauli maoae, na tausua se fanau aulelei ma ofoofogia e toafa. Sa ou vaai ia te ia o se uo i lo matou tina lea na faaaluina se taimi e vaaia ai ma avea ma se soa ia te ia ina ua malii lo matou tama.

I le taimi o lona afiafi mulimuli ma lo'u tuafafine, ou te talitonu na talosagaina a'u e le Atua, “E le mafai ona e vaai atu i tagata uma o siomiaina oe o se tagata paia?”

Na aoao mai Polika Iaga:

“Ou te fia uunaia le Au Paia . . . ina ia malamalama i alii ma tamaitai i le tulaga o latou i ai, ae le o le malamalama ia i latou i le tulaga o e i ai.”⁶

“Ua faafia ona faia le tala lenei—‘Ua faia e sea tagata se mea sese ma e le mafai ona ia avea ma se tagata o le Au Paia.’ . . . Tatou te faalogo i ni nai palauvale ma pepelo . . . [pe] ua solia le Sapati. . . . Aua le faamasinoina ia tagata, aua e te le iloina le fuafuaga





a le Alii mo i latou. . . [Ae,] ia onosai ia i latou.”⁷

E mafai e se tasi o outou ona vaai faalemafaufau atu i lo tatou Faaola o tuuina oe ma au avega e pasia o Ia e aunoa ma Lona silafiaina? Na silasila atu le Faaola i le Samaria, le tagata mulilua, le ao lafoga, le lepela, tagata e le atoatoa le malosi o le mafaufau, ma le tagata agasala i fofoga lava e tasi. O i latou uma o ni fanau a Lona Tama. Ua togiolaina i latou uma.

E mafai e se tasi ona vaai faalemafaufau atu o Ia liliuese mai se tasi ma le masalosalo i lo latou nofoaga i le malo o le Atua pe mai soo se tasi o mafatia i soo se tulaga?⁸ Ou te le mafaia. I fofoga o Keriso, e taua tele agaga taitasi. E leai se tasi na muai faauuina ia toilalo. O le ola e faavavau e mo tagata uma.⁹

Mai le aoaiga a le Agaga i autafa o le moega a lo’u tuafafine, sa ou aoaoina ai se lesonea maoae: pe a tatou vaai e pei ona Ia silasila mai, o le a tatou manumalo faalua—faaolaina o i latou tatou te pai atu i ai ma faaolaina i tatou lava.

Lua, ina ia ave i o tatou luga o le suafa o Keriso, e le gata i lo tatou vaai e pei ona silasila mai le Atua, ae e tatau ona tatou faia Lana galuega ma auauna atu e pei ona Ia auauna mai. O loo tatou ola i poloaiga sili e lua, gauai atu i le finagalo o le Atua, faapopototo Isaraelu, ma “faasusulu atu” lo tatou malamalama “i luma o tagata.”¹⁰ Ua tatou maua ma ola i feagaiga ma sauniga o Lana Ekalesia toefuataiina.¹¹ A tatou faia lenei mea, e faaee mai e le Atua i o tatou luga le mana e faamanuia ai i tatou lava, o tatou aiga, ma olaga o isi.¹² Fesili ifo ia te oe lava ia, “O o’u iloa ea se tasi e lē manaomia ni mana o le lagi i o latou olaga?”

O le a faia e le Atua mea ofoofogia i totonu o i tatou pe a tatou faapaiaina i tatou lava.¹³ Tatou te faapaiaina i tatou lava e ala i le faamamaina o o tatou loto.¹⁴ Tatou te faamamaina o tatou loto pe a tatou faalogo atu ia te Ia,¹⁵ salamo ia tatou agasala,¹⁶ ia liua,¹⁷ ma alofa atu e pei ona Ia alofa mai.¹⁸ Na fesili mai le Faaola ia i tatou, “Aua afai tou te alolofa

atu i e ua alolofa mai ia te outou, se a ea se tau i tou te maua ai?”¹⁹

Sa ou iloina talu ai nei e uiga i se aafiaga i le soifuaga o Elder James E. Talmage lea na mafua ai ona ou tu ma mafaufau i le auala o o’u alofa ma auauna atu ai ia i latou o siomiaina a’u. I le avea ai ma se polofesa talavou, ao lei avea o ia ma se Aposetolo, i le taimi o le matuai pepesi o le faama’i o le diphtheria o le 1892, na iloa ai e Elder Talmage se aiga e le masani ai, e le o ni tagata o le Ekalesia, o e nonofo lata ane ia te ia ma o e na mafatia i le faama’i. Sa leai se tasi na mana o tuu i latou i se tulaga lamatia i le o i totonu o le fale ua pisia. Peitai, na vave lava ona agai atu Elder Talmage i le fale. Sa ia mauaina ni tamaiti se toafa, o se lua ma le afa tausaga ua maliu i luga o le moega, o se lima tausaga ma le sefulu tausaga o loo matua mafatia i tiga, ma se sefulutolu tausaga ua vaivai. Na mafatia foi matua i le faanoanoa ma le vaivai.

Na faaofuina e Elder Talmage le ua maliu ma e o loo ola pea, salu ia potu, ave i fao ofu palapala, ma susunu ia ieie ua aafia i le faama’i. Sa ia galue i le aso atoa ona toe foi mai lea i le taeao na sosoo ai. Na maliu le [tamaitiiti] sefulu tausaga i le po. Sa ia siiina le teineitiiti lima tausaga. Sa tale toto o ia ma aafia ai foliga ma lavalava [o Elder Talmage]. Sa ia tusia, “Sa le mafai ona ou tuuese atu o ia mai ia te a’u,” ma sa ia siiina o ia seia oo ina maliu o ia i ona lima. Sa ia fesoasoani e tanuina tamaiti uma e toatolu ma faatulaga ia meaai ma lavalava mama mo le aiga faavavau. I lona toe foi atu i le fale, na tiaiese e Elder Talmage ona ofu, faamālū i se vailaau o le zinc, aveese mai o ia mai lona aiga, ma sa mafatia i sina vaega o le faama’i.²⁰

E toatele soifua o siomiaina i tatou o loo aafia. E tauave e le Au Paia le suafa o le Faaola i o latou luga e ala i le avea ma tagata paia ma auauna atu i tagata uma po o fea lava ae po o ai foi i latou—e faasaoia ola pe a tatou faia lenei mea.²¹

Mulimuli, ou te talitonu o le ave i o tatou luga o Lona suafa e tatau ona tatou faalagolago atu ia te Ia. I se fonotaga sa ou auai ai i se tasi Aso Sa,

na fesili ai se tamaitai talavou i se mea faapenei: “Na faauma talu ai nei i ma’ua ma la’u uo tama, ma sa ia filifili e tuua le Ekalesia. Sa ia ta’u mai ia te a’u e lei i ai se taimi sili ona ia fafia ai e pei o lenei. “E faapefea ona tupu lenei mea?”

Na tali e le Faaola lenei fesili ina ua Ia fetalai atu ia sa Nifae, “Ae afai ua le atiae [lou olaga] i luga o la’u talalelei, ma ua atiae i luga o galuega a tagata, po o luga o galuega a le tiapolo, e moni ou te fai atu ia te outou [o le a outou] maua le olioli ia [outou] galuega mo se tau, ma e toe itiiti ane oo mai le iuga.”²² E leai lava se olioli tumau i fafo atu o le talalelei a Iesu Keriso.

Ae peitai, i lenei fonotaga sa ou mafaufau ai e uiga i le toatele o tagata lelei ou te iloa na tauivi ma ni faafitauli maoae ma ni poloaiga lea sa matuai faigata lava mo i latou. Sa ou fesili ia te a’u lava ia, “O le a se isi mea e ono fetalai atu ai le Faaola ia i latou?”²³ Ou te talitonu Na te fesili atu, “E te [faatuatuaina] a’u?”²⁴ I le fafine na maua i le puna toto, na Ia fetalai atu ai, “Ua e ola i lou faatuatua; ina alu ia oe ma le manuia.”²⁵

O se tasi o mau e sili ona ou fafia i ai o le Ioane 4:4, lea e faitauina, “E ao ina ui atu o ia i Samaria.”

Aisea ou te fafia ai i lenei mau? Ona e lei *manaomia* e Iesu ona malaga i Samaria. E le fafia tagata Iutaia i Ona aso i tagata Samaria ma faimalaga i se

auala faataamilo i Samaria. Peitai na filifili Iesu e malaga atu iina e folafola atu i luma o le lalolagi atoa mo le uluai taimi o Ia o le Mesia folafolaina. Mo lenei savali, e le gata na Ia filifilia se vaega ua lafoaia, ae o se fafine foi—ma e le na o soo se fafine ae o se fafine o loo ola i le agasala—o se tagata na mafaufauina i lenei taimi e sili ona le taualoa. Ou te talitonu na faia e Iesu lenei mea ina ia mafai e i tatou taitoatasi ona malamalama e le aunoa o Lona alofa e sili atu nai lo o tatou popolega, o tatou manu’aga, o tatou vaisu, o tatou masalosalogaga, o tatou faaososoga, a tatou agasala, o tatou aiga ua malepelepe, o tatou faanoanoaga ma atuavalega, o tatou ma’i tigiaina, lo tatou mativa, lo tatou sauaina, lo tatou faavavau, ma lo tatou tuuatoatasi.²⁶ E finagalo o Ia i tagata uma ia iloa e leai se mea ma e leai se tasi e le mafai ona Ia faamaloloina ma aumai i le olioli tumau.²⁷

Ua lava Lona alofa tunoa.²⁸ Na o Ia lava na afio ifo i lalo o mea uma. O le mana o Lana Togiola o le mana lea e faatoilalo ai soo se avega i o tatou olaga.²⁹ O le savali a le fafine i le vaieli e faapea na Ia silafia o tatou tulaga faalesoifuaga³⁰ ma e mafai ona tatou savavali faatasi ma ia e le aunoa e tusa lava po o fea o tatou tutu ai. Ia te ia ma mo i tatou taitoatasi, ua Ia fetalai mai ai, “A o se inu i le vai ou te avatu ia te ia,

e le toe fia inu ia e faavavau; a o le vai ou te avatu ia te Ia, e avea i totonu ia te ia o le vaipuna, e puna i luga i le ola e faavavau.”³¹

I soo se malaga lava o le olaga, aisea o le a e fia liliu ese ai mai le Faaola e toatasi o le ua i ai le mana uma e faamalolo ai ma laveaiina oe? Po o le a lava le tau e tatau ona e totogiina ina ia faatuatua atu ai ia te Ia ua talafeagai lava. O’u uso e ma tuafafine, sei o tatou filifili ia faatele lo tatou faatuatua i le Tama Faalelagi ma lo tatou Faaola, o Iesu Keriso.

Mai le taele o lo’u agaga, ou te molimau atu ai O Le Ekalesia a Iesu Keriso o le Au Paia o Aso e Gata Ai o le Ekalesia a le Faaola, o loo taitaiina e le Keriso soifua e ala i se perofeta moni. Ou te tatalo o le a tatou tauaveina ma le faamaoni i o tatou luga le suafa o Iesu Keriso—e ala i le vaai e pei ona Ia silasila mai, i le auauna atu e pei na Ia auauna atu ai, ma i le faatuatuaina ua lava Lona alofa tunoa e aveina atu ai i tatou i le aiga ma le olioli tumau. I le suafa, o Iesu Keriso, amene. ■

FAAMATALAGA

1. Tagai 3 Nifae 27:3–8.
2. Tagai i le 3 Nifae 27:5–6; tagai foi Mataupu Faavae ma Feagaiga 20:77 ma feagaiga o le faamanatuga.
3. Tagai i le Dallin H. Oaks, *His Holy Name* (1998) mo se suesuga auilili e uiga i le tauaveina i o tatou luga ma avea ma molimau o le suafa o Iesu Keriso.
4. Tagai i le Mosaea 5:2–3. O se vaega o le liua tele o loto i totonu o le nuu o le Tupu o Peniamina o e na ave i o latou luga le suafa o Keriso ona sa tatala o latou mata i “vaaiga tetele.” O i latou o e mautofi i le malo selesitila o ni tagata e “vaai e pei ona vaaia i latou” (Mataupu Faavae ma Feagaiga 76:94).
5. *Aoaga a Peresitene o le Ekalesia: Iosefa Samita* (2007), 39.
6. Brigham Young, i le *Journal of Discourses*, 8:37.
7. *Discourses of Brigham Young*, sel. John A. Widtsoe (1954), 278.
8. Tagai i le 3 Nifae 17:7.
9. Tagai i le Ioane 3:14–17; Galuega 10:34; 1 Nifae 17:35; 2 Nifae 26:33; Mataupu Faavae ma Feagaiga 50:41–42; Mose 1:39. Na aoao mai foi e Elder D. Todd Christofferson: “Faatasi ai ma le mautinoa tatou te molimau atu o le Togiola a Iesu Keriso ua faamoemoeina, ma, i le iuga, o le a tauia ai mea uma na le’i mauaina, ma le toilalo o i latou na liliu atu ia te Ia. E leai se tasi na muai fuafuaina faapea e itiiti mea na te maua nai lo mea uma o i le Tama mo Ana fanau” (“Aisea e Faaipoipo Ai, Aisea e





- Fai ai se Aiga,” *Liahona*, Me 2015).
10. Tagai i le Mataio 5:14–16; 22:35–40; Mosaea 3:19; Mataupu Faavae ma Feagaiga 50:13–14; 133:5; tagai foi i le Russell M. Nelson, “O Le Faapotopotoina o Isaraelu Ua Faataapeapeina,” *Liahona*, Nov. 2006, 79–81.
 11. Tagai i le Levitiko 18:4; 2 Nifae 31:5–12; Mataupu Faavae ma Feagaiga 1:12–16; 136:4; Mataupu Faavae o le Faatuatuaga 1:3–4.
 12. Tagai i le Mataupu Faavae ma Feagaiga 84:20–21; 110:9.
 13. Tagai i le Iosua 3:5; Mataupu Faavae ma Feagaiga 43:16; tagai foi Ioane 17:19. Na faapaiaina e le Faaola Ia Lava ina ia mauaina le mana e faamanuaina ai i tatou.
 14. Tagai i le Helamana 3:35; Mataupu Faavae ma Feagaiga 12:6–9; 88:74.
 15. Tagai i le Iosefa Samita—Talafaasolopito 1:17, o le uluai poloaiga na tuuina atu e le Atua i se faaaliga i le Perofeta o Iosefa Samita; tagai foi 2 Nifae 9:29; 3 Nifae 28:34.
 16. Tagai i le Mareko 1:15; Galuega 3:19; Alema 5:33; 42:23; Mataupu Faavae ma Feagaiga 19:4–20. Ia mafaufau loloto foi i nei manatu e lua i le agasala. Muamua, na tusia e Hugh Nibley: “O le agasala o se faamaumau taimi. O le faia lea o se mea e tasi ae e tatau ona e faia nisi mea ma sili atu lea ua ia te oe le tomai” (*Approaching Zion*, ed. Don E. Norton [1989], 66). O le tina o John Wesley, o Susanna Wesley, sa tusi atu i lona atalii: “Faalogo i lenei tulafono. Soo se mea e faavaivaia ai lou mafaufau, faaleagaina le agamalu o lou lotofuatiaino, punitia lou lagona o le Atua, pe aveese lou fiafia i mea faaleagaga; . . . soo se mea e faateleina le . . . puleaina e lou tino o lou mafaufau; o lona mea o se agasala ia te oe, e tusa po o le a le ta’umamaina o ia lava” (*Susanna Wesley: The Complete Writings*, ed. Charles Wallace Jr. [1997], 109).

17. Tagai i le Luka 22:32; 3 Nifae 9:11, 20.
18. Tagai Ioane 13:2–15, 34. I le afiafi o Lana Togiola, sa mulumulu ai e le Faaola vae o se tasi na faalataina o Ia, o le isi o le na teenaina o Ia, ma o isi o e sa momoe i le taimi na sili ona Ia manaomia ai i latou. Ona Ia aoao atu lea, “O le poloaiga fou ou te tuu atu ai ia te outou, ia outou fealofani; faapei ona ou alofa atu ia te outou.”
19. Mataio 5:46.
20. Tagai John R. Talmage, *T he Talmage Story: Life of James E. Talmage—Educator, Scientist, Apostle* (1972), 112–14.
21. Tagai Alema 10:22–23; 62:40.
22. 3 Nifae 27:11.
23. I le Mataio 11:28–30, na fetalai atu ai le Alii: “Ia outou o mai ia te au, o outou uma o e tigaina ma mafatia i avega, o au foi e malolo ai outou. . . . Aua e ave gofie la’u amo, o la’u avega foi e mama ia.” Mafaufau foi i le 2 Korinito 12:7–9: Ua faamatala ai e Paulo mafatiaga o se “mea [matua] matuitui i le tino”, lea na ia tatolo ina ia aveesea. Na fetalai atu Keriso ia te ia, “O lo’u nei alofa tunoa e lava lea e fesoasoani ia te oe, aua o le vaivai e faaatoatoaina ai lo’u mana.” Tagai foi Eteru 12:27.
24. Tagai Mosaea 7:33; 29:20; Helamana 12:1; Mataupu Faavae ma Feagaiga 124:87.
25. Tagai Luka 8:43–48; Mareko 5:25–34. O le fafine sa maua i le punatoto sa matuai atuatuvaale ma leai se isi filifiliga. Sa ia mafatia mo le 12 tausaga, sa faaaluina ana mea uma i foma’i, ma ua faateleina [le ma’i]. Faateaeese mai ona tagata ma lona aiga, sa ia fuafua ma le faamoemoe e ui atu i se motu o tagata toatele ma tuu atu o ia lava i le Faaola. Sa ia talitonu ma faatuatua atoatoa i le Faaola, ma sa ia lagonaaina lona pa’i atu i le pito o Lona ofu. Mai lona faatuatua sa ia faamaloloina vave ma atoatoa o ia. Ona ia valaau lea o ia o lona “afafine.” Sa lei toe ave a ia o se tagata ua faateaeese ae o se tagata o le aiga

o le Atua. O lona faamalologa sa faaletino, faaagafesootai, faalelagona, ma faaleagaga. O luitau e ono oo atu mo le tele o tausaga po o le olaga atoa, ae o Lana folafolaga o le faamalologa e mautinoa ma atoatoa.

26. Tagai Luka 4:21; Ioane 4:6–26. O Luka, ae le o Ioane, na tusia lona mea i le amataga o le galuega talai a Iesu, sa Ia afio atu i lona malumalu i Nasareta, faitau se fuaitau ma ia Isaia o loo vavalo atu ai e uiga i le Mesia, ona folafola atu lea, “Ua faataunuuna lenei mau i o outou taliga i lenei aso.” O le uluai taimi tusitusia lea na fetalai atu ai le Faaola e uiga ia te Ia Lava o se Mesia. Peitai, i le vaieli a Iakopo, na tusia ai e Ioane le uluai taimi na tautino atu ai e Iesu Lona tulaga FaaMesia i se tulaga faitele. I lenei nofoaga, talu ai sa lei mafaufauina tagata Samaria o ni tagata Iutaia, sa aoao atu foi e Iesu o Lana talalelei e mo tagata uma, Iutaia ma Nuuese. O lenei tautinoga na tupu i le “itula lona ono,” po o le aoauli, ina ua maua e le lalolagi lona malamalama atoatoa mai le Ia. O le vaieli a Iakopo e i ai foi i le vanu lea e lata ane i le nofoaga tonu lava lea na osifeagaiga ai le fanauga a Isaraelu anamua ma le Alii ina ua uma ona ulufale atu i le laueleele o le folafolaga. O le mea mataina, i le isi itu o le vanu o loo i ai se mauga matutu ae o le isi itu o loo i ai se mauga e tumu i vaipuna e puna mai ai le vai.
27. Na aoao e Elder Neal A. Maxwell: “Pe a tatou atuatuvaale tatou te mafaufau faapea pe o i ai se isi mea i totonu o i tatou tatou te tuuina atu, e mafai ona faamafanafanaina i tatou i le iloina o loo silafia e le Atua o tatou gafatia atoatoa, ma tuuina i tatou iinei ina ia manuia. E leai se tasi na muai faauuina ia toilalo pe amioleaga. . . . Pe a tatou lagonaina le lofituina, sei o tatou toe manatua le faamautinoaga faapea e le soona faatulagaina i tatou e le Atua” (“Meeting the Challenges of Today” [Brigham Young University devotional, Oct. 10, 1978], 9, speeches.byu.edu).
28. Na aoao mai Peresitene Russell M. Nelson: “I se aso o i luma, o le a tou tuuina atu outou lava i luma o le Faaola. O le a lofituina outou e oo atu i le tulaga o le fetagisi i le i ai i Lona afioaga paia. O le a tou tauivi ia maua ni upu e faafetai atu ai ia te Ia mo le tofogiina o a outou agasala, mo le faamagaloga o oe i soo se upu le lelei agai i isi, mo le faamaloloina o oe mai ni manuaga ma faigata o lenei olaga. “O le a e faafetai atu ia te Ia mo le faamallosia o oe e faia mea faigata, mo le liliuina o ou vaivaiga i malosia, ma mo le mafai ai e oe ona lua toe nonofo faatasi ma Ia mo lou aiga e faavavau. O Lona faasinoga, Lana Togiola, ma Ona uiga o le a avea ma tagata patino ma moni ia te oe” (“O Perofeta, Taitaiga, ma le Tulafono Faalelagi” [faigalotu i le lalolagi atoa mo talavou matutua, Ian. 8, 2017], broadcasts.lds.org).
29. Tagai Isaia 53:3–5; Alema 7:11–13; Mataupu Faavae ma Feagaiga 122:5–9.
30. Tagai i le Iosefa Samita—Talafaasolopito 1:17; Elaine S. Dalton, “Na Te Silafia Oe i Lou Igoa,” *Liahona*, Me 2005, 109–11.
31. Ioane 4:14.



Saunia e Elder Matthew L. Carpenter

○ Le Fitugafulu

E Te Fia Malolo Ea?

Ona o le Togiola a Iesu Keriso, afai tatou te filifili e salamo ma liliu atoa atu o tatou loto i le Faaola, o le a la faamaloloina i tatou faaleagaga.

I ni nai masina i totonu o lana misiona, sa faamaea ai e lo ma atalii laitiiti ma lana soa faifeautalai a laua suesuega ina ua lagona e lo ma atalii se tama'i tiga i lona ulu. Na ia lagona se mea e 'ese tele; i le taimi muamua na ia lē toe lagonaina se mea i lona lima agavale, sosoo ai ma le gase o lona laulaufaiva. Na amata ona faanounou ifo le itu agavale o ona foliga. Na faigata ia te ia ona tautala. Na ia iloina sa i ai se mea sa faaletonu. O le mea na te lei iloina sa ia i ai i le ogatotonu o se pepē o le tino matautia i vaega e tolu o lona faiai. Sa amata oo mai le fefe ao amata ona le mafai ona gaoioi [se vaega o lona tino]. O le vave e maua ai e se tagata e pepē le tino le tausiga e mafai ona i ai se aafiaga maoae i le tele o lona faamalologa. Sa galue ma le naunautai lana soa faifeautalai faamaoni. I le mavae ai o le valaau atu o le 911, sa ia tuuina atu ia te ia se faamanuiaga. O se vavega lava, sa na o le lima minute le mamao o le taavale falema'i.

I le mavae ai ona faananati atu lo ma atalii i le falemai, sa vave iloiloina e tagata faigaluega o le falemai le tulaga ma iloa ai e ao ona latou tuuina atu se vailaau i lo ma atalii lea e faamoemoe e mafai ona toe suia ai aafiaga o le pepē o le tino i le aluga o taimi.¹ Ae peitai, afai e le o maua le ma atalii i se pepē

o le tino, e mafai ona i ai taunuuga matautia o le vailaau, e pei o le piliki i le faiai. Sa tatau ai la ona filifili lo ma atalii. Sa ia filifili e taliaina le vailaau. Ao manaomia ai isi taotoga ma le tele o masina e faamaloloina atoatoa ai, sa iu lava ina toe foi atu le ma atalii ma faamaeaina lana misiona i le mavae ai o suiga tele o aafiaga o le pepē o le tino.

O lo tatou Tama Faalelagi e mamana ma e silafia mea uma. E silafia e Ia o tatou tauiviga faaletino. E silafia e Ia o tatou tiga faaletino ona o le ma'i, faama'i, matua, faalavelave faafuase'i, po

o le lē atoatoa i le fanau mai. E silafia e Ia tauiviga faalelagona e fesootai ma le atuatuvaale, tuuatoatasi, faanoanoa, po o gasegase faalemafaufau. E silafia e Ia tagata taitoatasi o ē ua mafatia i faamasinoga lē tonu po o e na sauaina. E silafia e Ia o tatou vaivaiga ma amioga ma faaososoga o tatou tauivi ai.

I le olaga nei e suesueina i tatou e vaai ai pe tatou te filifili le lelei mai le leaga. Mo i latou o e tausii Ana polo-aiga, o le a latou mau faatasi ma Ia "i se tulaga o le fiafia e lē gata."² Ina ia fesoasoani i la tatou agai i luma e ave e faapei o Ia, ua tuuina mai e le Tama Faalelagi mana uma ma le malamalama i Lona Alo, o Iesu Keriso, le Foma'i Sili. E leai se gasegase faaletino, faalelagona, pe faaleagaga e lē mafai e Keriso ona faamalolo.³

I le taimi o le galuega faaletino a le Faaola, ua faamatala ai e tusitusiga paia le tele o mea na tutupu faavavega lea na faaoga ai e Iesu Keriso Lona mana paia e faamalolo ai i latou na mafatia faaletino.

O le Evagelia a Ioane na toe faamatala ai le tala i se tagata na onosaia se gasegase mo le 38 tausaga.

"Ua silasila atu Iesu ia te ia o taoto, ua silafia foi ua loa ona ia te ia o le ma'i, ua fetalai atu ia te ia, E te fia malolo ea?"

Ua tali atu le tagata vaivai, e leai se tasi e fesoasoani ia te ia pe a sili ona ia manaomiaina.





“Ua fetalai atu Iesu ia te ia, Ina tu ia i luga, ma ave lou moega, ma ia e savali.

“Ona malolo *loa lea* o le tagata; ua ave lona moega, ma ua savali.”⁴

Faamolemole matau le faatusatusaga o le umi na mafatia ai lenei tagata na o ia—38 tausaga—ma le vave ona oo mai o le faamalologa ina ua faaafia ai le Faaola. Sa “*vave*” le faamaloloina.

I se isi tulaga, o se fafine sa ia te ia le puna toto mo le 12 tausaga, “ua uma atu ana mea i fomai, . . . ua alu ane ia i ona tua, ma pa’i ane i le tuupao o lona ofu: ona utu *loa lea* o lona puna toto na [*muta*] ai lona puna toto. . . .

“Ona fetalai ane lea o Iesu, Na pa’i mai lava se tasi ia te a’u: aua ua ou iloa ua alu atu le mana nai ia te a’u.

“Ua iloa e le fafine ua le lilo o ia, ona alu atu lea o ia . . . ma faamatala mai ia te ia i luma o le nuu uma . . . le faamaloloina *loa* o ia.”⁵

E ala i Lana galuega, sa aoao atu e Keriso o loo ia te Ia le mana i le tino faaletino. E le mafai ona tatou puleaina pe o afea e tupu ai le taimi o le faamalologa a Keriso i o tatou ma’i faaletino. E tupu le faamalologa e tusa ai ma Lona finagalo ma le atamai. I tusitusiga paia, sa mafatia nisi mo le tele o tausaga; o isi, o ò latou olaga faaletino atoa. O gasegase faaletino, e mafai ona faamamaina ai tatou ma faamalosia ai lo tatou faalagolago atu i le Atua. Ae a tatou faatagaina Keriso ina ia faaafia ai, e Na te faamalosia pea i tatou faaleagaga ina ia tatou maua le gafatia silisili e onosaia ai o tatou avega.

I le iuga, tatou te iloa o ma’i faaletino uma, gasegase, po o ni lē atoatoa o le a faamaloloina i le Toetu. O se meaalofo lenei i tagata uma e ala i le Togiola a Iesu Keriso.⁶

E mafai e Iesu Keriso ona faamalolo isi [vaega] i lo na o ò tatou tino faaletino. E mafai ona Ia faamalolo foi o tatou agaga. I tusitusiga paia tatou te aoao ai le ala na fesoasoani ai Keriso ia i latou na vaivai o latou agaga ma faamaloloina i latou.⁷ Ao tatou mafaufau loloto i nei mea na tutupu, e faateleina lo tatou faamoemoe ma le faatuatua i le mana o le Faaola e faamanuia ai o tatou olaga. E mafai e Iesu Keriso ona suia o tatou loto, faamalolo i tatou mai i aafiaga o le faamasinoga le tonu po o le sauaina tatou te ono aafia ai, ma faamalosia lo tatou gafatia e gafataulimaina ai le toesea ma le loto tiga, aumaia ia i tatou le filemu e fesoasoani ia i tatou e onosaia tofotofoga o ò tatou olaga, ma faamaloloina i tatou faalelagona.

E mafai foi e Keriso ona faamalolo i tatou pe a tatou agasala. Tatou te agasala pe a tatou solia ma le iloa se tasi o tulafono a le Atua.⁸ A tatou agasala, e lē mamā o tatou agaga. E leai se mea e lē mama e mafai ona nofo i le afioaga o le Atua.⁹ “O le faamamaina mai le agasala [o le] faamaloloina lea faaleagaga.”¹⁰

Ua silafia e le Atua le Tama o le a tatou agasala, ae ua Ia saunia le ala mo i tatou ina ia togiolaina. Na aoao mai Elder Lynn G. Robbins: “O le salamo e le o [se] fuafuaga faaleoleo [a le

Atua] lea pe a te’i ua tatou toilalo. O le salamo o Lana fuafuaga lea, ma le silafiaina o le a tatou toilalo lava.”¹¹ A tatou agasala, tatou te maua le avanoa e filifili ai le lelei mai le leaga. Tatou te filifili le lelei pe a tatou salamo i le mavae ai ona tatou agasala. E ala atu ia Iesu Keriso ma Lana taulaga togiola, ua mafai ai ona togiolaina i tatou mai a tatou agasala ma toe aumaia i le afioaga o le Atua le Tama pe afai tatou te salamo. O le faamalologa faaleagaga e le tasi se itu—e manaomia ai le mana togiola a le Faaola ma le salamo faamaoni o le vaega a le tagata agasala. Mo i latou o ò filifili ina ia lē salamo, ua latou teenaina le faamalologa e ofa mai e Keriso. Mo i latou, ua pei lava e leai se togiola na faia.¹²

Ao ou fefautuaai ma isi o loo saili ina ia salamo, sa ou maofa i tagata sa ola i le agasala sa faigata ona [latou] faia ni faaiuga sa’o. E tuua i latou e le Agaga Paia, ma e masani lava ona latou tauivi e faia filifiliga lea e atili ona latalata ai i le Atua. Latou te tauivi mo le tele o masina e oo lava i le tele o tausaga, māasiasi pe fefefe i taunuuga o a latou agasala. E masani lava ona latou lagonaina e le mafai lava ona latou sui pe faamagaloina. E masani ona ou faalogo o latou faasoaina lo latou fefefe pe afai e silafia e tagata e pele ia i latou mea sa latou faia, o le a latou lē toe alolofa ia i latou pe tuua i latou. Pe a latou maua i na mafaufauga, e tonu ia i latou ina ia ffilemu ma tolopo lo latou salamo. Latou te maua le lagona sese e sili atu ona lelei le lē salamo i le taimi nei ia latou lē toe faatiga ai i latou e alolofa i ai. Latou te mafaufau e sili atu ona pagatia pe a mavae lenei olaga i lo le faia o le faagasologa o le salamo i le taimi nei. Uso e ma tuafafine, e le o se manatu lelei lava le tolopoina o loo salamo. E masani ona faaagaina e le fili le fefe e taofia ai i tatou mai le vave faatino i luga o lo tatou faatuatua ia Iesu Keriso.

Pe a fetaiai i latou o ò pele ma le mea moni e uiga i se amioga agasala, e ui latou te lagonaina le ootia o le tiga, e masani lava ona latou mananao e fesoasoani atu i le tagata agasala ua salamo ina ia sui ma faaleleia ma le

Atua. E moni lava, e faateleavaveina le faamalologa faaleagaga pe a ta'uta'u atu e le tagata agasala ma o loo siomia e i latou e alolofa ia i latou ma fesoasoani ia i latou e lafoai a latou agasala. Faamolemole ia manatua o Iesu Keriso e silisili ese i le ala Na te faamalolo ai tagata le sala ua aafia fua i le agasala o ē liliu atu ia te Ia.¹³

Na saunoa Elder Boyd K. Packer: “E faatamaia o tatou agaga pe a tatou faia ni mea sese ma faia ni agasala. Ae e le faapei o le tulaga o o tatou tino faaletino, a oo ina maea le faagasologa o le salamo, e le toe i ai ni ma'ila e totoo ona o le Togiola a Iesu Keriso. O le folafolaga o le: ‘Faauta, o le ua salamo i ana agasala e faamagaloina o ia, ma o au le Alii, ou te le toe manatua lava’ [Mataupu Faavae ma Feagaiga 58:42].”¹⁴

A tatou salamo “ma le faamoemoe atoa o le loto”¹⁵ o le taimi “*nei lava* o le a faataunu ai le fuafuaga tele o le togiolaina” i o tatou olaga.¹⁶ O le a faamalolo i tatou e le Faaola.

O le soa faifeautalai ma tagata tomiai faafomai o e na fesoasoani i lo ma atalii na mafatia i le pepē o le tino i le misiona na vave ona galulue. Sa filifili e lo ma atalii ina ia maua le vailaau e taofia ai le pepē o le tino. O aafiaga pipili o lona tino pepē lea na semanu e aafia ai lona olaga faaletino na totoo na suia. E faapena foi, o le vave ona tatou salamo ma aumaia le Togiola a Iesu Keriso i o tatou olaga, o le vave foi lea ona faamaloloina i tatou mai i aafiaga o le agasala.

Na ofa mai e Peresitene Russell M. Nelson lenai valaaulia: “Afai ua e laa ese mai le ala, . . . ou te fia valaaulia oe . . . ia faamolemole toe foi mai. Po o a lava ou atugaluga, po o a lava ou luitau, o loo i ai se faamoemoga mo oe i lenai, le Ekalesia a le Alii. O le a faamanuiaina oe ma augatupulaga e lei faananau mai e ala i au galuega i le taimi nei ina ia toe foi mai i le ala o feagaiga.”¹⁷

E manaomia e lo tatou faamalologa faaleagaga lo tatou gauai atu o i tatou lava i tulaga ua faatulaga mai e lo tatou Faaola. E le tatau ona tatou faatuai! E tatau ona tatou galulue i le asō! Galue i le taimi nei ina ia le taofia e le pipili faaleagaga lou alualu i luma e faavavau.



Ao ou talanoa atu, afai sa e lagona le manaomia o le talosagaina o le faamagaloga a se tasi ua e sese i ai, ou te valaaulia oe e faatino. Ta'u i ai mea sa e faia. Talosaga atu mo lo latou faamagaloga. Afai ua e solia se agasala lea e aafia ai lou agavaa mo le malumalu, ou te valaaulia oe e fefautuaai ma lou epikopo—i le asō. Aua nei faatuai.

O'u uso e ma tuafafine, o le Atua o lo tatou Tama oi le Lagi agaalofa. Ua Ia tuuina atu mana uma ma le malamalama i Lona Alo Pele, o Iesu Keriso. Ona o Ia, o le a i ai se aso o le a faamalolo ai tagata uma mai ma'i faaletino e faavavau. Ona o le Togiola a Iesu Keriso, afai tatou te filifili e salamo ma liliu atoa atu o tatou loto i le Faaola, o le a Ia faamalolo i tatou faaleagaga. E mafai ona amata loa lena faamalogaga. O le filifiliga e a tatou lea. *E te fia malolo ea?*

Ou te molimau atu na totogi e Iesu Keriso le tau ina ia tatou malolo ai. Ae e tatau ona tatou filifili ai e talia le vailaau faamalolo ua Ia ofa mai. Talia i le aso lenai. Aua nei faatuai. I le suafa, o Iesu Keriso, amene. ■

FAAMATALAGA

1. Sa ta'ua le vailaau o le tPA (tissue plasminogen activator).
2. Mosaea 2:41.
3. Tagai i le Mataio 4:24. Sa alu atu Keriso ma faamalolo tagata mamai uma, e faapena foi i latou na maua i “faama'i esee,” tiga, “o loo i ai temoni,” ma “i latou na mama'i faalemafaufau.”

4. Tagai i le Ioane 5:5–9; faapoopo le faamamafa.
5. Tagai i le Luka 8:43–48; faapoopo le faamamafa.
6. Tagai i le Alema 34:17; Helamana 14:13.
7. Tagai i le Luka 5:20, 23–25; tagai foi i le Faaliliuga a Iosefa Samita, Luka 5:23 (i le Luka 5:23, vaefaamatalaga a): “Mata e manaomia ai se isi mana e faamagaloina ai agasala i lo le faatulai a'e o e mamai ma savavali?”
8. Tagai i le 1 Ioane 3:4.
9. Tagai 3 Nifae 27:19.
10. “O Le Talalelei a Iesu Keriso,” *Tala'i La'u Talalelei: O Se Taiala mo le Galuega Faafai'feautalai*, rev. ed. (2018), lds.org/manual/missionary.
11. Lynn G. Robbins, “Seia Fitugafulu ni Fitu,” *Liahona*, Me 2018, 22.
12. Tagai i le Mosaea 16:5.
13. I le tele o taimi na ou molimauina le faamaloloina vave o tagata taitoatasi pe a faapotopoto tagata o le aiga i se tasi na solia tautoga o le faamaoni a'ia'i ma le faatuatuaga, ma fesoasoani atu ia i latou ia liliu atu ma le atoatoa atili i le Faaola mo Lona mana faamalolo i o latou olaga. Afai e saili atu e le tagata ua salamo faamaoni ina ia sui, o tagata o le aiga e fesoasoani ia i latou i suesuega faaletalalelei, tatalo faamaoni, ma auunaga FaaKeriso e le gata e fesoasoani i le tagata agasala ina sui ae latou te tatala foi le faitotoa mo le faateleina o le faamalologa mai le Faaola i o latou olaga. O tagata mama o e tumau i le agavaa o le malumalu e mafai ona fesoasoani i le tagata agasala e ala i le sailia o le taitaiga faalelagi i mea e ao ona suesue faatasi i ai, le ala e auuna atu ai, ma le ala e faaafia ai tagata o le aiga e lagolago ma faamalolosia le agaga salamo ina ia sui ma manuia mai le mana togiola a Iesu Keriso.
14. Boyd K. Packer, “O Le Fuafuaga o le Fiafia,” *Liahona*, Me 2015, 28.
15. 3 Nifae 18:32.
16. Alema 34:31; faapoopo le faamamafa.
17. Russell M. Nelson, “A'o Tatou Agai Faatasi Atu i Luma,” *Liahona*, Ape. 2018, 7.



Saunia e Elder Dale G. Renlund

○ Le Korama a Aposetolo e Toasefululua

Ina Filifili ia o Outou i le Aso Nei

O le taunuuga sili o lo tatou fiafia e faavavau e faalagolago lea i le filifiliina o le Atua soifua ma auai faatasi ma Ia i Lana galuega.

O le tagata fatu o Mary Poppins o se tausitama masani i Egelani—e fai maneta.¹ Na lele mai o ia mai le matagi i sasae e fesoasoani i ie aiga atuatuvaale o le au Banks lea na nonofo i le Numera 17, Auala o Cherry Tree, i Edwardian Lonetona. Sa tuu atu ia te ia le vaaiga o tamaiti, o Jane ma Michael. I se tulaga malosi ae agalelei, sa amata ona ia aoao atu ia i la'ua ni lesona taua i se auala tulagaese ma faamaneta.

Na tele le alualu i luma o Jane ma Michael, ae ua filifili Mary ua oo i le taimi e aluese ai. I le faatinoga o le tala, na taumafai ai le uo a Mary, o Bert, lea e salua ālaāsu e taofi o ia mai le alu. Sa ia finau atu, “Ae o ni tamaiti lelei i la'ua, Mary.”

Na tali mai Mary, “Mata ou te popole ia i la'ua pe ana faapea la te le lelei? Ae e le mafai ona ou fesoasoani ia i la'ua pe afai la te le faatagaina a'u, ma e leai se tasi e sili ona aoao gatā nai lo se tamaitiiti na te iloa mea uma.”

Na fesili Bert, “Ia e ā la?”

Na tali Mary, “E tatau lava ona la faia le isi mea e i la'ua lava.”²

Uso e ma tuafafine, e pei o Jane ma Michael Banks, o i tatou o ni “fanau

lelei” o ē taua ona popole i ai. E finagalo lo tatou Tama Faalelagi e fesoasoani mai ma faamanuia i tatou, ae tatou te le faatagaina o Ia i le tele o taimi. O nisi taimi, tatou te amio ai e pei ua tatou iloa mea uma. Ma e tatau foi ona tatou faia “le isi vaega” e i tatou lava. O le mafuaaga lena na tatou o mai ai i le lalolagi mai se aiga faalelagi i le



muai olaga. O la tatou “vaega” e aofia ai le faia o filifiliga.

O le sini a lo tatou Tama Faalelagi i tulaga faamatua, o le le tuu atu lea i Ana fanau ia *faia* le mea sa'o; ae o le tuu atu lea i Lana fanau e *filifili* e fai le mea sa'o ma mulimuli ane avea e faapei o Ia. Afai e na'o Lona finagalo lava ia tatou usiusitai atu, o le a Ia faaoga ina tauai ma faasalaga vave e uunaia ai a tatou amioga.

Ae e le naunau le Atua i Lana fanau e avea ma ni “fagafao” aoaoina ma usiusitai o e e le ūina Ona seevae i le potu malolo selesitila.³ Leai, e finagalo le Atua i Lana fanau ia tuputupu ae faaleagaga ma auai faatasi ma Ia i le pisinisi faaleaiga.

Na faavaeina e le Atua se fuafuaga lea e mafai ona tatou avea ai ma suli i Lona malo, o se ala o le feagaiga lea e taitai atua i tatou ia avea e faapei o Ia, maua le ituaiga olaga ua Ia maua, ma nonofo e faavavau o ni aiga i Lona afioaga.⁴ O le filifiliga a le tagata lava ia sa—ma e—taua i lenei fuafuaga, lea na tatou aoaoina i lo tatou muai olaga. Na tatou taliaina le fuafuaga ma filifili e o mai i le lalolagi.

Ina ia mautinoa o le a tatou faatinoina le faatuatua ma aoao e faaoga ma le tatau lo tatou faitalia, na tosoina ai se veli o le galo o mea i o tatou mafaufau ina ia tatou le manatuaina le fuafuaga a le Atua. A aunoa ma lena veli, o le a le mafai ona ausia faamoemoega a le Atua aua e le mafai ona tatou alualu i luma ma avea ma suli faatuatua ina ia finagalo o Ia e avea ai i tatou.

Na ta'ua e le perofeta o Lia: “O le mea lea, na tuuina mai ai e le Alii le Atua i le tagata ia tatau ona ia fai mo ia lava. O le mea lea, e lē mafai e le tagata ona ia fai mo ia lava vagana ai ua faatosina o ia e le tasi po o le isi.”⁵ I se tulaga faafaavae, o le tasi o filifiliga o loo suitulaga ai Iesu Keriso, o le Ulumatua a le Tama. O le isi filifiliga o loo suitulaga ai Satani, o Lusifelo, o le na manao e faaumatia le faitalia ma fāoa le mana.⁶

Ia Iesu Keriso, “o ia te i tatou le fautua i luma o le Tama.”⁷ Ina ua maea Lana taulaga togioala, na “toe afio atu [Iesu] i le lagi . . . e maua mai i le Tama ana aia o le alofa mutimutivale lea ua



ia te ia mo le fanauga a tagata.” Ma i le mauaina ai o aia tatau o le alofa mutimutivale, “ua fautuaina ai e ia le faamoemoe o le fanauga a tagata.”⁸

O le fautua ai o Keriso i le Tama mo tatou e le o tetee atu [i le fuafuaga]. O Iesu Keriso, o le na faatagaina Lona finagalo ia tofatumoanaina i le finagalo o le Tama,⁹ e le lagolagoina soo se mea nai lo le finagalo o le Tama talu mai le amataga. E tapuā’ia ma patipatia ma le le masalosalo e le Tama Faalelagi o tatou tulaga manuia.

O le fautua ai o Keriso, i ni vaega, o le faamanatu mai lea ia i tatou ua Ia totogia a tatou agasala ma e leai se tasi e le aofia i le alofa mutimutivale o le Atua.¹⁰ Mo i latou e talitonu ia Iesu Keriso, salamo, ma ua papatisoina, ma tumau e oo i le iuga—o se faagasologa e tau atu i le faaleleiga¹¹—e faamagalo e le Faaola, faamalolo, ma fautua atu. O Ia o lo tatou fesoasoani, faamafanafana, ma le puluvaga—e faailoa atu ma faamaonia atu lo tatou faaleleiga ma le Atua.¹²

I se eseese tonu lava, o Lusifelo o se tagata fai moliaga pe faasagatau mai. Na faamatala e Ioane le Talifaaaliga le toilalo faaiu o Lusifelo: “Ma sa ou faalogo i se leo tele ua faapea mai i le lagi, O lenei ua oo mai le faaolataga, ma le malosia, ma le malo o lo tatou

Atua, ma le mana o lona Keriso.” Aisea? Aua ua lafo ifo i lalo “lē na molia o tatou uso, o lē na molia i latou i luma o lo tatou Atua i le ao ma le po. Aua ua latou manumālō ia te ia e ala i le toto o le Tamai Mamoe, ma i le upu a la latou molimau.”¹³

O Lusifelo o le tagata fai moliaga. Na ia tautala faasagatau mai ia i tatou i le muai olaga, ma e faaauau pea ona ia ta’usalaina i tatou i lenei olaga. Na te saili e toso ifo i tatou i lalo. Na te manao ia tatou oo i le malaia e le gata. O ia lea na ta’u maia ia i tatou lo tatou le atoatoa, na ta’u mai ia i tatou e le lava lo tatou lelei, na ta’u mai e le mafai ona toe faaleleia mai se mea sese. O ia o se tagata sili ona sauva, o le na te faatiga ia i tatou i taimi o tatou mafatiaga.

Afai o Lusifelo lea o loo aoaoina se tamaitiiti e savali ae pa’ū le tamaitiiti, na te faataio atu i le tamaitiiti, faasala o ia, ma fai atu i ai e aua le toe taumafai. O auala a Lusifelo e aumaia ai le lotovaivai ma le faanoanoa—i se taimi mulimuli ma taimi uma. O lenei tamā o pepelo o le tagata e sili ona faasalalaua mea sese¹⁴ ma e galue i togafiti e faasese ma faalavelave ia i tatou, “ona ua saili o ia ia pagatia tagata uma e pei o ia lava.”¹⁵

Afai o Keriso lea o loo aoaoina se tamaitiiti e savali ae pa’ū le tamaitiiti, Na te fesoasoani e faatu le tamaitiiti i luga ma faamalosiāu o ia i laasaga e sosoo ai.¹⁶ O Keriso o le fesoasoani ma le faamafanafana. O Ona ala e aumaia ai le olioli ma le faamoemoe—i se taimi mulimuli ma taimi uma.

O le fuafuaga a le Atua e aofia ai faatonuga mo i tatou, o loo faatatau i ai tusitusiga paia o ni poloaiga. O nei poloaiga e le o ni tulafono e faafiafia ai pe o se faaputuga o faasalaga o tulafono ua faamalosiā mai ia ua faamoemoe e na o le aoaoina ai o i tatou ia usiusitai. Latou te fesootea ma lo tatou atiinaeina o uiga paia faaleatua, toe foi atu i le Tama Faalelagi, ma le mauaina o le olioli tumau. E le tauaso lo tatou usiusitai i Ana poloaiga; tatou te filifili ma le iloa le Atua ma Lana ala i le aiga. O le mamanu mo i tatou e tutusa lelei ma Atamu ma Eva, lea “na tuu mai ai e le Atua poloaiga ia te i latou, ina ua uma ona ia faaali mai ia te i latou le fuafuaga o le togiolaina.”¹⁷ E ui e finagalo le Atua ia tatou i ai i luga o le ala o feagaiga, ae Na te tuu mai ia i tatou le mamalu o le filifiliga.

O le mea moni, e finagalo le Atua, faamoemoe, ma faatonu mai ina ia filifili Ana fanau taitasi mo i latou lava.

O le a Ia le fosa i tatou. E ala atu i le meaalofo o le faitalia, ua faatagaina ai e le Atua Lana fanau e “fai mo i latou lava ae le faamalosia.”¹⁸ O le faitalia e faatagaina i tatou e filifili ia i ai i luga o le ala, pe leai. E faatagaina i tatou e o ese, pe leai. E pei lava ona le mafai ona faamalosia i tatou ia usiusitai, e le mafai foi ona faamalosia i tatou ia lē usiusitai. E leai se tasi e mafai, e aunoa ma lo tatou maliega, ona aveesea i tatou mai le ala. (E le tatau ona fenumia’ia le mea lenei ma i latou ua solia lo latou faitalia. E le o ō ese i latou i le ala; o i latou ua aafia ai. Latou te mauaina le malamalamaaga, alofa ma le agaalofa o le Atua.)

Pe a tatou o ese mai le ala, ua faanoanoa le Atua aua Na te silafia o lenei mea e mulimuli ane, ae masani ai, ona oo atu i le faaitiitia o le fiafia ma aveesea ai faamanuiaga. I tusitusiga paia, o le aluese mai le ala ua ta’ua o le agasala, o le faaitiitia o le fiafia ma le aveesea o faamanuiaga ua ta’ua o le faasalaga. I lenei tulaga, e le o faasalaina i tatou e le Atua; o le faasalaga o se taunuuga lea o a tatou filifiliga, ae le o Ia.

Pe a tatou iloa ua tatou o ese mai le ala, e mafai ona tatou tumau ai iina, a le o lena, ona o le Togiola a Iesu Keriso, e mafai ai ona tatou filifili ina ia toe liliu o tatou laa ma toe foi mai i luga [o le ala]. I tusitusiga paia, o le faagasologa o le filifili ia suia ma toe foi mai i le ala e faasino atu lea i le salamo. O le le mafai ona salamo o lona uiga ua tatou filifili e faalēagavaaina i tatou lava mai faamanuiaga ua finagalo le Atua e tuuina mai. Afai tatou te “le loto e olioli i mea semanu [tatou] te maua,” o le a tatou “toe foi atu . . . i lo [tatou] lava nofoaga, e olioli i mea ua [tatou] loto e talia”¹⁹—o la tatou lava filifiliga, e le o le [finagalo] o le Atua.

E tusa lava pe o le a le umi tatou te lei i ai i le ala pe o le a foi le mamao na tatou oo i ai, o le taimi lava tatou te filifili ai ia suia, e fesoasoani mai le Atua ia tatou toe foi mai.²⁰ Mai le silafaga a le Atua, o le salamo faamaoni ma le fetaomi atu i luma ma le tumau ia Keriso, pe a tatou toe foi mai i luga o le ala, o le a pei lava na tatou le’i o ese.²¹ Na totogi e le Faaola a tatou agasala ma



faasaoloto i tatou mai le faaali faaitiitia i le fiafia ma faamanuiaga. O loo faasino atu lenei mea i tusitusiga paia o le faa-magaloga. I le mavae o le papatisoga, e see ese uma lava tagata mai le ala—o nisi o i tatou e fepuna ese. O le mea lea, o le faatinoina o le faatuatua ia Iesu Keriso, salamo, mauaina o le fesoasoani mai ia te Ia, ma faamagaloina, e le o ni mea e tutupu i le taimi e tasi ae o ni faagasologa o le olaga, faagasologa lea e fai soo ma faifaiepea. O le ala lea tatou te “tumau ai e oo i le iuga.”²²

E tatau ona tatou filifili po o ai tatou te auauna i ai.²³ O le taunuuga sili o lo tatou fiafia e faavavau e faalagolago lea i le filifiliina o le Atua soifua ma auai faatasi ma Ia i Lana galuega. A tatou tau-mafai e “faia le isi vaega” e i tatou lava, tatou te faaitaia le faaaogaina ma le sa’o o lo tatou faitalia. E pei ona saunoa Peresitene Aoao e toalua ua mavae atu o le Aualofa, e le tatau ona avea i tatou ma ni “pepe e manaomia le gauai atu i ai ma tau faasa’o i taimi uma.”²⁴ Leai, e finagalo le Atua ia avea i tatou ma tagata matutua ma pulea i tatou lava.

O le filifili e mulimuli i le fuafuaga a le Tama ua na o le pau lea o le ala e mafai ai ona tatou mautofi i Lona malo; e na o le pau lea o le mea e mafai ona Ia faatuatua ina i tatou ia aua lava nei

fesili atu mo mea e feteenai ma Lona finagalo.²⁵ Ae e tatau ona tatou manatua “e leai se tasi e sili ona aoao gatā nai lo se tamaitiiti ua iloa mea uma.” O lea la e tatau ai ona tatou naunau ia aoaoina i tatou i ala o le Alii e le Alii ma Ana auauna. E mafai ona tatou faatuatua ina o i tatou o ni fanau faapelepele a ni Matua Faalelagi²⁶ ma e tatau ai le “popole i ai” ma ia mautinoa “o le faia e i tatou lava ia” e le faapea ai ua “tuua na o i tatou.”

E pei on saunoa mai le perofeta o le Tusi a Mamona o Iakopo, ou te fai atu faatasi ma ia:

“O le mea lea, ia fiafia o outou loto, ma ia manatua ua outou saoloto e fai mo outou lava—e filifili le ala o le oti tumau-faavavau, po o le ala o le ola e faavavau.

“O le mea lea, o’u uso [ma tuafafine] pele e, ia outou faaleleia outou lava ma le finagalo o le Atua, ae lē ma le loto o le tiapolo . . . ; ma ia manatua, pe a uma ona outou faalelei ma le Atua, ua nao i le alofa tunoa ma ala i le alofa tunoa o le Atua, e faaolaina ai outou.”²⁷

O lea, filifili le faatuatua ia Keriso; filifili le salamo; filifili ia papatiso ma talia le Agaga Paia; filifili ia saunia ma le loto i ai ina ia taumamafa ma le agavaa i le faamanatuga; filifili ia osia feagaiga i le malumalu; ma filifili e auauna atu i le Atua soifua ma Lana fanau. O a tatou filifiliga e fuafua ai le tagata tatou te i ai ma tagata o le a tatou avea ai.

Ou te faamae’a atu i le vaega o totoe o le faamanuiaga a Iakopo: “O le mea lea, talosia ia faatutu mai outou e le Atua mai le . . . oti e faavavau e ala i le mana o le togiola, ina ia mafai ona talia o outou i le malo e faavavau o le Atua.”²⁸ I le suafa, o Iesu Keriso, amene. ■

FAAMATALAGA

1. O le tagata fatu o Mary Poppins na fatuaina e ala mai i tusiga a P.L. Travers. O ana tusi na saunia ai le faavae mo se ata tifaga faamusika i le 1984, na gaosia e Walt Disney, ma se fetuunaiga tele i le tulaga o le ata.
2. O le faatinoina o le tala na aafia ai ni vaega o loo faamatalaina. Tagai i le *Libretto to Mary Poppins: The Broadway Musical*, 70.
3. Tagai i le Spencer W. Kimball, i le Konafesi a le Eria i Peresipeni 1976, 19.

Na taumatemate mai e Peresitene Kimball: “O le mea muamua lava ao lei amataina lo tatou lalolagi iinei, na fetalai mai le Alii, ‘O le a ou tuuina atu ia te outou la outou filifiliga saoloto. Ou te manao i alii ma tamaitai e malolosi aua e talafeagai le malolosi. Ou te le manao i ni tagata vaivai o e amiotonu ona e tataua ona latou amiotonu.”

4. Tagai, mo se faaitaiga, Russell M. Nelson, “A o Tatou Agai Faatasi Atu i Luma,” *Liahona*, Ape. 2018, 7. O le ala o feagaiga e faatatau foi i le fuafuaga o le fiafia (tagai Alema 42:8, 16) ma le fuafuaga o le togiolaina (tagai Alema 12:25–35).
5. 2 Nifae 2:16.
6. Tagai i le Mose 4:3.
7. 1 Ioane 2:1–2; tagai foi i le Faaliliuga a Iosefa Samita, 1 Ioane 2:1 (i le 1 Ioane 2:1, vaefaamatalaga a).
8. Moronae 7:27, 28.
9. Tagai i le Mosaea 15:7.
10. Tagai i le 1 Ioane 2:2.
11. Tagai i le 2 Korinito 5:16–21; 2 Kolose 1:19–23; 2 Nifae 10:24.
12. O le upu faaEleni mo le fautua (*para-klētōs*) o lona uiga fautua, fesoasoani, faamafanafana, po o le faufautua (tagai i le 1 Ioane 2:1, vaefaamatalaga e; *The New Strong's Expanded Exhaustive Concordance of the Bible* [1984], Greek dictionary section, 55; 2 Nifae 10:23–25; Mataupu Faavae ma Feagaiga 45:3–5).
13. Faaaliga 12:10–11.
14. Tagai i le Eteru 8:25.
15. 2 Nifae 2:27; tagai foi 2 Nifae 2:6–8, 16, 26.
16. Tagai i le Fiona and Terryl Givens, *The Christ Who Heals* (2017), 29, 124. Mo lenei upusii, tagai i le Anthony Zimmerman, *Evolution and the Sin in Eden* (1998), 160, citing Denis Minns, *Irenaeus* (2010), 61.
17. Alema 12:32.
18. 2 Nifae 2:26; tagai foi 2 Nifae 2:16.
19. Mataupu Faavae ma Feagaiga 88:32.
20. Tagai i le Alema 34:31.
21. Tagai i le 2 Nifae 31:20; Mosaea 26:29–30; Mataupu Faavae ma Feagaiga 58:42–43; Boyd K. Packer, “O Le Fuafuaga o le Fiafia,” *Liahona*, Me 2015, 28. Na saunoa mai Peresitene Packer, “A oo ina maea le faagasologa o le salamo, e le toe i ai ni ma’ila e totoo ona o le Togiola a Iesu Keriso.”
22. 2 Nifae 31:20.
23. Tagai i le Iosua 24:15.
24. Julie B. Beck, “Ou Te Liligi Ifo foi Lo’u Agaga i Auauna Fafine i Ia Ona Aso,” *Liahona*, Me 2010, 12; Na sii mai e Sister Beck upu a Eliza R. Snow, na saunoa atu ai i le Aualofa a le Uarota a Liae i le aso 27 Oke., 1869, Uarota a Liae, Siteki a Alpine (Iuta), i le Api Minute a le Aualofa, 1868–79, Potutusi o Talafaasolopito a le Ekalesia, Aai o Sate Leki, 26–27.
25. Tagai i le 2 Nifae 4:35; Helamana 10:5.
26. Tagai i le “O Le Aiga: O Se Folafofaga i le Lalolagi,” *Liahona*, Me 2017, 145.
27. 2 Nifae 10:23–24.
28. 2 Nifae 10:25.



Elder Jack H. Gerard

O Le Fitugafulu

O Le Taimi Lenei

Afai o i ai se mea i lou olaga e te manaomia ona iloiloina, o le taimi la lenei.

ni nai tausaga ua mavae, a o sauni mo se faigamalaga faapisinisi, sa amata ona ou lagonaina le tiga o lo’u fatafata. Ona o le popole tele, sa tonu ai i lo’u toalua na te faafeaoina a’u i la’u malaga. I le vaega muamua o le ma faigamalaga i le vaalele, sa faateteleina le tiga i le tulaga sa faigata ai ona ou mānava. Ina ua matou tulaeleele, sa ma tuua le malaevaalele ma o atu i le falemai i le lotoifale, lea, i le mavae ai o suesuega e tele, sa tautino mai ai e le fomai lo ma saogalemu e toe faaauau le ma faigamalaga.

Sa ma toe foi atu i le malaevaalele ma malaga ai i le ma nofoaga mulimuli. A o matou faaifoifo i lalo, sa saunoa mai le pailate i le alaleo ma talosaga mai ia te a’u ia faailoa atu a’u. Na sau le tagata faigaluega i luga o le vaalele, ma fai mai sa faato’a o latou mauaina se valaau faafuasei, ma fai mai ia te a’u o loo i ai se taavale o le falemai o loo faatali mai i le malaevaalele e ave ma’ua i le falemai.

Sa ma feosoi i le taavale a le falemai ma faataalise atu loa ma’ua i le potu o faalavelave faafuasei. O iina sa matou





feiloai ai ma ni fomai popole se toalua, o ē sa faamatala mai sa vaaiesē lo'u ma'i ae e ogaoga le ma'i sa ia te a'u, o le pulmonary embolism, po o le alu'alutoto poloka, i o'u māmā, lea sa manaomia ai le togafitiga vave faa-fomai. Sa ta'u mai e fomai ia i ma'ua, o le toatele o gasegase e lē faasaoia i lenei tulaga. I le iloina sa ma mamao ese mai le aiga ma sa lē mautinoa pe ua ma sauni mo na suiga o le olaga, sa faapea mai fomai afai o i ai se mea i ō ma'ua olaga e manaomia ona ma iloilo-ina, o le taimi la lenei e fai ai.

Ou te manatua lelei le toetoe o le taimi lava lena i le atuatuvaale, sa suia atoa ai la'u vaaiga. O mea sa foliga mai na matua taua i sina taimi na muamua atu, ua faalēāno nei i ai. Sa vave ona me'i ese lo'u mafaufau mai le mafana-fana ma popolega o lenei olaga ae see atu i se vaaiga e faavavau—o mafaufau-ga i aiga, o fanau, o lo'u toalua, ma i'u ane ai i se iloiloga o lo'u lava olaga.

Pe na faapefea mai i matou o se aiga ma tagata taitoatasi? Sa matou ola ea i o matou olaga e ōgatusa ma feagaiga sa matou osia ma i faamoemoe o le Alii, pe masalo na matou faatagaina ma le

lē manatu i ai ia popolega o le lalolagi e faalavelave ia i matou mai i mea e aupito sili ona taua?

Ou te valaaulia outou e mafaufau i se lesone taua mai i lenei aafiaga: ina ia laa ese i tua mai le lalolagi ae toe iloilo lou olaga. Po o i upu a le fomai, afai o i ai se mea i lou olaga e te manaomia ona iloiloina, o le taimi la lenei.

Iloiloina o ō Tatou Olaga

Ua tatou ola i se lalolagi ua matuā anoanoa'i faamatalaga, ua puleaina e mea faalavefau ua matua faateteleina ia ua atili ai ona faigata tele ona faavasega i le vāvāō o lenei olaga ma taulai atu i mea e taua e faavavau. Ua tumu saisai o tatou olaga i aso uma i ulutala faatosina, o loo tuuina mai e tekinolosi ua matua saoasaoa le fesuisui ai i taimi uma.

Atonu tatou te le iloina le aafiaga o lenei siosiomaga pisi i o tatou olaga i aso taitasi ma filifiliga tatou te faia, vagana ua tatou faaaluina le taimi e mafaufau i ai. Tatou te ono iloa ai ua alu tele lo tatou olaga i nai faamatalaga e aumai e ni manatu taatele i le initoneti, vitio, ma ulutala faatosina. E ui e mata'ina ma faafiafiaina, ae o le

tele o nei mea e itiiti se mea e faatatau i lo tatou alualu i luma e faavavau, ae ua latou mamauina le ala tatou te vaai ai i lo tatou olaga faaletino.

O nei mea faalavefau faalelalolagi e mafai ona faatusaina i mea faalavefau i le miti a Liae. A o tatou agai i luma i le ala o feagaiga ma ō tatou lima o loo pipii mau i le āi u'amea, tatou te lagona atu ma vaaia i latou o loo "faatauemu ma tusitusi mai o latou tamatamailima" mai le fale tele ma le ateatea (1 Nifae 8:27). Atonu tatou te lē faamoemoe moni e faia lea mea, ae o nisi taimi tatou te tutu ai ma sui lo tatou taulaiga e fia vaai po o le a le mea ua vāvāō ai. O nisi o i tatou e oo lava ina faama'a-mulu le āi u'amea ae sosō atu atili mo se vaaiga lelei atu. O isi e ono pa'u'u ese atoatoa "ona o i latou o e sa faatau-emu mai ia te i latou" (1 Nifae 8:28).

Na lapataia i tatou e le Faaola "[ia faaeteete] . . . ne'i faamamafaina o outou loto [i] . . . le popole i mea a le olaga" (Luka 21:34). Ua faamanatu mai ia i tatou e faaaliga o aso nei e toatele ē e valaauina, ae toaititi ē e filifilia. E le filifilia i latou "aua ua pupū tele o latou loto . . . i mea o lenei lalolagi, ma saili viiga a tagata" (Mataupu Faavae ma Feagaiga 121:35; tagai foi i le fuaiupu e 34). O le iloiloina o ō tatou olaga tatou te maua ai se avanoa e laa ese ai i tua mai le lalolagi, mafaufau po o fea o tatou tutu ai i luga o le ala o feagaiga, ma, pe a manaomia, ia faia ni fetuuna-iga e faamautinoa ai se pipiimau ma se taulaiga agai i luma.

Talu ai nei, i se faigalotu a le autalavou i le lalolagi atoa, sa valaaulia ai e Peresitene Russell M. Nelson le autalavou ia laa ese i tua mai le lalolagi, o ese mai ala faasalalau faaagafesootai e ala i le faia o se anapogi fitu-aso. Ma o le afiafi na tuanai atu nei, sa ia faia ai se valaaulia talitutusa i tuafafine o se vaega o le sauniga a tamaitai o le kona-fesi. Ona ia fai atu lea i le autalavou e matau soo se eseese i le ala latou te lagona ai, o mea latou te mafaufau ai, e oo lava i le auala latou te mafaufau ai. Ona ia valaaulia lea o i latou "ia faia se iloiloga auiliili o le olaga faatasi ma le Alii . . . ina ia mautinoa o ou vae o loo tutū mausalī i le ala o feagaiga."

Sa ia uunaia i latou e faapea, afai o i ai ni mea i o latou olaga ia e manaomia ona sui, “o le asō o le taimi sili lea ona lelei e sui ai.”¹

I le iloiloaina ai o mea i o tatou olaga e manaomia ona sui, atonu tatou te fesili ifo ia i tatou lava i se fesili aogā: E faapefea ona tatou tula’i a’e i luga o mea faalavefau o lenei lalolagi ma tumau mausali i le vaaiga mamao o le faavavau i o tatou luma atu?

I se lauga o le konafesi i le 2007 e faaautuina “Lelei, Lelei Tele, Lelei Silisili,” na aoao mai ai e Peresitene Dallin H. Oaks le auala e faamuamua ai filifiliga mai i le tele o ō tatou manaoga feteenai faalelalolagi. Na ia fautua mai, “E ao ona tatou tuuese nisi o mea lelei ina ia filifili ai mea isi mea e lelei atu pe silisili ona lelei aua latou te atiina ae ai le faatuatua i le Alii o Iesu Keriso ma faamalolosia ai o tatou aiga.”²

Ou te fautua atu o mea lelei silisili i lenei olaga e faatotonugalemu ia Iesu Keriso ma le malamalama i upumoni e faavavau o le, o ai o Ia ma o ai i tatou i la tatou sootaga ia te Ia.

Saili le Upumoni

A o tatou saili ia iloa le Faaola, e lē tatau ona laaloa le tatou vaai i le upumoni taua o le, o ai i tatou ma pe aisea ua tatou i ai iinei. Ua faamanatu mai e Amoleka ia i tatou “o le olaga lenei o le taimi lea . . . e saunia ai e feiloai ma le Atua,” le taimi “ua tuuina mai ia i tatou e saunia ai mo le faavavau” (Alema 34:32–33). E pei ona faamanatu mai ia i tatou e se faaupuga lauiloa, “E lē o i tatou o ni tagata soifua o loo i ai se aafiaga faaleagaga. O i tatou o tagata faaleagaga o loo i ai se aafiaga faaletagata.”³

O le malamalama ai i lo tatou tupuaga paia e taua i lo tatou alualu i luma e faavavau ma e mafai ona faasaoloto i tatou mai mea faalavefau o lenei olaga. Sa aoao mai le Faaola:

“Afai tou te tumau pea i la’u mata-upu, o o’u soo moni outou;

“E iloa foi e outou le mea moni, e tuu sa’oloto foi outou e le upu moni” (Ioane 8:31–32).

Na folafola mai e Peresitene Iosefa F. Samita, “O le mea silisili a le tagata e



mafaia ona faataunuaina i lenei lalolagi o le faamasani lea o i latou i le mana o le upumoni, i lona auililiga, i lona atoatoaga, ina ia le mafai ai e faataitaga ma amioga a meaola uma i lenei lalolagi ona liliueseina i latou mai le malamalama ua latou maua.”⁴

I le lalolagi i le asō, o finauga i upumoni ua oo atu i se tulaga sili ona lavelave, ua manatu ai itu uma o le upumoni e peisea’i o se manatu fetāla’i e tatala i le faauigaga a le tagata lava ia. Sa maua e le taulealea o Iosefa Samita e faapea “sa matua tele na’uā le faanununu ma le fefinauai” i lona olaga “sa le mafai . . . ona maua se faaiuga mautinoa po o ai ua sa’o ma o ai foi ua sese” (Iosefa Samita—Talafaasolopito 1:8). Sa “i le taulotoaiga o lenei taua o upu ma vevesi o taofi” lea sa ia saili ai le taitaiga faalelagi e ala i le sailia o le upumoni (Iosefa Samita—Talafaasolopito 1:10).

I le konafesi ia Aperila, sa aoao mai ai Peresitene Nelson, “Afai e ao ona tatou maua se faamoemoe o le suesueina o le tele o manatu ma filosofia a tagata ia e osofaia le upumoni, e tatau ona tatou aoao e maua ia faaaliga.”⁵ E tatau ona tatou aoao e faalagolago i le Agaga o le Upumoni, lea “e le mafai e le lalolagi ona talia o ia, auā, ua le vaaia o ia, ua le iloa foi o ia” (Ioane 14:17).

A o vave ona agai atu lenei lalolagi i isi mea moni sesē, e tatau ona tatou

manatua upu a Iakopo e faapea “e tautala mai le Agaga i le upumoni ma e le pepelo. O le mea lea, e fetalai mai o ia e uiga i mea e pei ona i ai moni lava, ma e uiga i mea e pei o le a i ai moni lava; o le mea lea, ua faaali manino mai nei mea ia te i tatou, mo le olataga o o tatou agaga” (Iakopo 4:13).

Pe a tatou laa ese i tua mai le lalolagi ma iloilo o tatou olaga, o le taimi la lenei e mafaufau ai po o a suiga e manaomia ona tatou faia. E mafai ona tatou maua le faamoemoe sili i le iloaina o lo tatou faataitaga o Iesu Keriso ua toe taitaia foi le ala. A o lumanai ai Lona maliu ma le Toetu, a o Ia galue e fesoasoani ia i latou na siomia o Ia ia malamalama i Lana matafaioi paia, sa Ia faamanatu atu ia i latou “[tou te] maua le manuia ia te au. E maua foi outou e le puapuaga i le lalolagi: a ia outou loto tetele; ua ou manumalo i le lalolagi” (Ioane 16:33). Ou te molimau atu ia ia te Ia i le suafa o Iesu Keriso, amene. ■

FAAMATALAGA

1. Russell M. Nelson, “Faamoemoe o Isaraelu” (faigalotu a le autalavou i le lalolagi atoa, 3 Iuni, 2018), [HopeofIsrael.org](https://www.hopeofisrael.org).
2. Dallin H. Oaks, “Lelei, Lelei Tele, Lelei Silisili,” *Liahona*, Nov. 2007, 107.
3. Upusii e masani ona ta’ua e Pierre Teilhard de Chardin.
4. *Aoaga a Peresitene o le Ekalesia: Iosefa F. Samita* (1998), 43.
5. Russell M. Nelson, “Faaaliga mo le Ekalesia, Faaaliga mo o Tatou Olaga,” *Liahona*, Me 2018, 95.



Saunia e Elder Gary E. Stevenson

○ Le Korama a Aposetolo e Toasefululua

Leoleoina o Agaga

Tatou te aapa atu i le alofa i isi ona o le mea lena na poloaia i tatou e lo tatou Faaola e fai.

se talanoaga talu ai ma sa'u uo, na ia ta'u mai a o talavou o ia, faato'a papatisoina o se tagata o le Ekalesia, sa faafuasei ona ia lagonaina se mea e pei ua le toe talia ea o ia i lana uarota. Na siitia ese faifeautalai sa aoaoina o ia, ma sa ia lagona ai e pei ua leai se tasi e toe kea atu ia te ia. O le leai ai o ni uo i le uarota, sa ia toe maua ai ana uo tuai ma latou auai ai i ni gaioiga sa aveesea ai o ia mai le auai ai i le lotu—sa faateteleina o lea na amata ai ona se ese mai le lafu. Ma loimata i ona fofoga, sa ia faamatala lona faafetai tele ina ua faaloaloa atu e se uso i le uarota se lima auauna ia te ia ma valaaulia o ia e toe foi mai i se auala mafanafana ma le faauo. I totonu o ni nai masina, sa toe i ai o ia i le saogalemu o le lafu, ma faamalosia isi faapea ai ma ia lava. Tatou te le faafetai ea mo le leoleo mamoe i Pasila sa saili atu i lenei alii talavou, o Elder Carlos A. Godoy, lea o loo nofo i o'u tua atu o se uso o le Au Peresitene o Fitugafulu?

Pe le ofoofogia ea le auala e mafai ai e ni nai taumafaiga laiti ona maua ai ni taunuuga e faavavau? O lenei upumoni o loo i ai i le fatu o tau-mafaiga o auaunaga a le Ekalesia. E mafai e le Tama Faalelagi ona ave a tatou taumafaiga laiti i aso taitasi ma liliu i se mea faavavega. Ua na o le

ono masina talu ona faasilasila mai e Peresitene Russell M. Nelson e faapea “ua faia e le Alii ni fetuunaiga taua i le auala tatou te tausia ai le tasi ma le isi,”¹ ma faamalamalama mai, “O le a tatou faatinoina i se auala fou atu, ma paia atu e tausii ma auauna atu ai i isi. O le a tatou faasino atu ma le faigofie i nei taumafaiga o ‘aunaga.’”²

Sa faamalamalama mai e Peresitene Nelson: “O se faailoga o le Ekalesia moni ma le ola a le Alii o le a avea pea ma se taumafaiga faatulagaina ma faatonutonuina e auauna atu i fanau



taitoatasi a le Atua ma o latou aiga. Ona o Lana Ekalesia lenei, o i tatou o Ana auauna o le a auauna atu i le tasi, e pei lava ona sa ia faia. O le a tatou auauna atu i Lona suafa, i Lona mana ma le pule, ma i Lona agalelei alofa”³

Talu mai le faasilasilaga, ua maoae lo outou tali mai! Ua matou maua ni lipoti o le faamanuaina tele o le faatinoina o nei suiga i le toetoe o siteki uma i le lalolagi e pei ona faatonuina ai e lo tatou perofeta soifua. Mo se faataitaiga, o uso ma tuafafine o auau-naga ua tofia i aiga, ma soa—e aofia ai alii talavou ma tamaitai talavou—ua faatulagaina, ma ua faia foi faatalanoaga o auaunaga.

Ou te manatu e le o se mea e tupu fua i le ono masina ao lumanai le faasilasilaga faafaaliga o ananafi; “O se paleni fou i le va o aoaoga o le talalelei i totonu o le aiga ma totonu o le Ekalesia”⁴—lea na tuuina atu ai le faasilasilaga faafaaliga i le auauna atu. E amata atu ia Ianuari, ao tatou faaaluina le itiiti mai ma le tasi le itula ia tatou tapuaiga faalelotu, o mea uma ua tatou aoaoina i le auauna atu o le a fesoasoani ia i tatou e toe faapaleniina lena avanoa i se aafiaga sili ona maua ma sili ona paia, o le aso sapatu e faaogatonu i le aiga faatasi ma aiga ma e pele.

Faatasi ai ma nei auivi faalefaalapotopotoga ua faatulagaina, tatou te ono fesili, “E faapefea ona tatou iloa o loo tatou auauna atu i le ala a le Alii? O tatou fesoasoani ea i le Leoleo Mamoe Lelei i le ala o loo Ia faamoemoeina?”

I se talanoaga talu ai nei ma Peresitene Henry B. Eyring, sa ia faamālō ai i le Au Paia i le fetuutuunai i nei suiga iloga ae na faailoa mai foi lona faamoemoe faamaoni ia iloa e tagata o le au paia o le auaunaga e sili atu nai lo le “tau na ona faaali atu o lou lelei.” E le o faapea atu la o le faaali atu o le lelei e lē taua, ae o i latou e malamalama i le agaga moni o le auaunaga e iloa ina e matua sili atu nai lo le na o le faaali atu o le lelei. O le faia i le ala a le Alii, e mafai ai e le auaunaga ona maua se faatosinaga tumau mo le lelei lea e faauau atu i le faavavau atoa, e pei ona i ai mo Elder Godoy.

“Sa faaali mai e le Faaola e ala i faaitaiga le uiga o le auauna atu a o Ia auauna atu ona o le alofa. . . . Sa Ia . . . aoao atu, tatalo mo [isi], faamafanafana atu, ma faamanuia i latou sa siomiaina o Ia, ma valaaulia tagata uma ia mulimuli ia te Ia. . . . Pe a auauna atu tagata o le Ekalesia [i se ala maualuga atu ma paia atu], latou te saili atu ma le agaga tatalo e auauna atu e pei ona Ia faia—e . . . ‘leoleo lea i luga o le ekalesia e lē aunoa, ma faatasi ma faamalos i latou,’ e ‘asiasi atu i fale o tagata taitoatasi o le ekalesia,’ ma fesoasoani i tagata taitoatasi ia avea ma se soo moni o Iesu Keriso.”⁵

Tatou te malamalama o se leoleo mamoe moni e alofa i ana mamoe, silafia [mamoe] taitasi i o latou igoa, ma “i ai le fiafia ia” te i latou.⁶

Sa faaalu e se uo ua leva lona olaga o se leoleo manu, ma faia le galuega mamafa o le tausiga o se lafupovi ma mamoe i Atu Mauga Papa gaoā. Sa ia faasoa mai i se tasi taimi ia te a’u luitau ma lamatiaga e fesoatai ma le tausiga o mamoe. Sa ia faamatala mai i le amataga o le tautotogo, pe a tele ina liusuavaia le kiona mai luga o tumutumu lautetele o atu mauga, na te tuu ai le lafu a le aiga pe tusa ma le 2,000 mamoe i atu mauga mo le taumafanafana. O iina, na te leoleo ai mamoe seia oo ina faai’ui’u le tautoulu, ma aveese atu ai manu mai le nofoaga taumafanafana i se nofoaga taumalulu i le toafa. Sa ia faamatalaina le faigata tele o le tausiga o se lafu mamoe telē, e manaomia ai le usu i le vaveao ma le foi mai ua po—alapo e le’i taitai oso le la ma le manava ua leva le po. Sa le mafai ona ia faia na o ia.

Sa fesoasoani isi e tausi le lafu, e aofia ai se suifefiloi o leoleo manu ua i ai le potomasani sa fesoasoani i ai ni lima talavou o ē na faamanuiaina mai le atamai o a latou soa. Sa ia faalagolago foi i ni solofanua matutua se lua, solofanua po’a laiti se lua, lua taifau leomanu matutua, ma tamai taifau leomanu e lua pe tolu. I le taimi o le taumafanafana, sa feagai ai la’u uo ma ana mamoe ma matagi ma timuga mamafa, ma’i, manu’aga, lāmala, faapea ai ma isi uma faigata e te mafaufauina. O nisi

tausaga e tatau ona latou la’uina le vai i le taumafanafana atoa ina ia ola ai mamoe. Ona oo lea i tausaga uma i le faai’ui’uga o le tautoulu, pe a taufaa-mata’u mai le taumalulu ma aveese atu mamoe mai atumauga ma faitauina, e masani lava e silia ma le 200 mamoe na leiloloa.

O le lafu e 2,000 na tuu i atumauga i le amataga o le tautotogo sa faaititia ifo ma le 1,800. O le tele lava o mamoe leiloloa sa *le’i* leiloloa ona o le mama’i po o le mamate faanatura ae ona o manu-feai e pei o liona o le mauga po o luko. O nei manu-feai e masani lava ona latou maua tamai mamoe o se ese mai le saogalemu o le lafu, ua aveese i latou lava mai le puipuiga a o latou leoleo mamoe. E mafai ona outou mafaufau mo se taimi i le mea lea faato’a ou faamatala atua, i se aano faaleagaga? O ai le leoleo mamoe? O ai le lafu? O ai o loo fesoasoani i le leoleo mamoe?

Sa fetalai mai le Alii o Iesu Keriso lava Ia, “O a’u nei o le leoleo mamoe lelei, ua ou iloa a’u mamoe, . . . ou te tuuina atu foi lo’u ola e sui a’i mamoe.”⁷

Sa faapena foi ona aoao mai le perofeta o Nifae e faapea o Iesu “e fafaga i ana mamoe, ma o le a latou maua [le vaomu’a] ia te ia.”⁸ Ou te maua le filemu tumau i le iloina “o le Alii o lo’u leoleo mamoe”⁹ ma ua Ia silafia i tatou taitoatasi ma i lalo o Lana tausiga. A tatou fetalai ma matagi o le olaga, timuga mamafa, ma’i, manu’aga, ma lāmala, o le Alii—lo tatou Leoleo Mamoe—o le a auauna mai ia i tatou. O le a ia toefuataiina mai o tatou agaga.

I lea lava ala e tasi na tausia ai e la’u uo ana mamoe faatasi ma le fesoasoaniga a le aufaigaluega talavou ma matutua, o solofanua, ma taifau leomanu, ua manaomia ai foi e le Alii le fesoasoaniga i galuega faigata o le tausiga o mamoe i *Lana* lafu.

I le avea ai ma fanau a se Tama Faalelagi alofa ma ni mamoe i Lana lafu, ua tatou olioli ai i faamanuiaga o le tautuaina taitoatasi e Iesu Keriso. E faapena foi, ua ia i tatou se tiutetauave e tuu atu le fesoasoaniga faaleaunaga i isi o siomiaina i tatou i le avea ai o i tatou lava ia ma ni leoleo



mamoe. Ua tatou faalogo i le afiga a le Alii ia “auauna mai ia te a’u ma alu atu i lo’u igoa, ma faapotopoto faatasi mai a’u mamoe.”¹⁰

O ai se leoleo mamoe? O alii, tamaitai, ma tamaiti uma i totonu o le malo o le Atua o se leoleo mamoe. E le manaomia ai se valaauga. Mai le taimi na tatou tutu a’e ai mai le vai o le papatisoga, na faatagaina ai i tatou i lenei galuega. Tatou te aapa atu i le alofa i isi ona o le mea lena na poloaiina i tatou e lo tatou Faaola e fai. Sa faamamafa mai e Alema: “Ona o ai se leoleo mamoe . . . ua ia te ia ni mamoe e tele, ae ua ia lē leoleo i luga o i latou, ina ia lē ulu mai luko ma ai lana lafu? . . . Na te lē tuli ese ea o ia i fafo?”¹¹ Soo se taimi lava e oo ai o tatou tuaoi i ni mafatiaga faaletino pe faaleagaga, tatou te tauave avega a le tasi ma le isi ina ia māmā. Tatou te faanoanoa faatasi ma i latou o ē faanoanoa. Tatou te faamafanafana ia i latou e manaomia le faamafanafanaga.¹² Ua faamoemoeina ma le alofa e le Alii lenei mea mai ia i tatou. Ma o le a oo mai le aso o le a tatou tali atu ai ia te Ia mo le tausiga o loo tatou faia e auauna atu ai i Lana lafu.¹³

Sa faasoa mai e la’u uo leoleo mamoe se isi elemene taua tele i le



E taitai atu e se taifau leoleo mamoe naunautai ia mamoe ua leiloloa e toe foi atu i le saogalemu o lo latou leoleo mamoe ma le lafu.

leoleoina o mamoe i le mauga. Sa ia faamatalaina e faapea o mamoe leiloloa e patino lava le lamatiaina i le matautia o manufeai. O le mea moni, e oo atu i le 15 pasene o lona taimi ma le taimi o lana afaigaluega e tuuto atu i le sailiga o mamoe leiloloa. Sa latou iloaia o le vave lava ona latou mauaina o mamoe leiloloa, ae le'i se ese mamao tele mamoe mai le lafu, o le itiiti foi lena o le ono lamatiaina o mamoe. O le toe maua mai o mamoe leiloloa e manaomia ai le tele o le onosai ma le amio pulea.

I nai tausaga ua mavae, sa ou maua ai se tusiga i se nusipepa i le lotofale sa matua faagaetiaina lea na ou sefeina ai. O le ulutala o le itulau pito i luma sa faitauina faapea, “O Le A Le Tuulafoaia e le Ta’ifau Naunau le Mamoe ua Se.”¹⁴ O lenei tusiga ua faamatalaina ai sina aofaiga laitiiti o mamoe na anaina e se lafumanu sa le'i mamao mai ma le fanua o la'u uo lea sa lafoaia i lo latou nofoaga

taumafanafana. E lua pe tolu masina mulimuli ane, sa saisaitia ma mamao ese i latou i se atumauga. Ina ua tuulafoaiina mamoe, sa nofo ai le ta'ifau leomanu ma i latou, aua o lona tiute lea le vaavaaia ma le puipua o mamoe. Sa le'i taitai masepu lana vaai. O iina sa nofo ai—faataamilomilo i mamoe ua se mo masina e tele i le tau malulu ma le kiona, ma auauna atu o se puipuiga mai luko, liona o le mauga, po o se isi lava manufeai e ono lamatia ai mamoe. Na ia nofo ai lava iina seia oo ina mafai ona ia toe taitai pe leoleoina mamoe e toe foi atu i le saogalemu o le leoleo mamoe ma le lafu. O le ata na faaali mai i le itulau i luma o lenei tusiga na mafai ai e se tasi ona iloa uiga i fofoga ma le amio o lenei taifau leomanu.

I le Feagaiga Fou, tatou te maua ai se faataoto ma faatonuga mai le Faaola lea e maua ai nisi malamalamaaga e faatatau i lo tatou tiutetauave o ni leoleo mamoe, o tuafafine ma uso o auaunaga, i mamoe ua leiloloa:

“O ai ea so outou e ana mamoe e selau, afai e le iloa le tasi, e le tuua e ia le ivagafulu ma le iva i le vao, a e alu ma saili i le ua le iloa, seia maua?”

“A maua, ua faafuata ma le olioli.

“A oo atu foi i lona aiga, ua faapopototo ai i ana uo ma e tuaoi ma ia, ua fai atu ia te i latou, Ia tatou olioli ia; aua ua ou maua la'u mamoe na leiloa.”¹⁵

A o tatou aoteleina le lesonea o loo aoao mai i le faataoto, tatou te maua ai lenei fautuaga taua:

1. Muamua, e ao ona tatou faailoaina le mamoe ua leiloa.
2. Lua, tatou te saili ia i latou seia maua i latou.
3. A maua i latou, atonu tatou te ave i latou i o tatou tauau ma aumai i latou i le aiga.
4. Tatou te siomiaia i latou i uo i lo latou taunuu mai.

Uso e ma tuafafine, o o tatou luitau silisili ma a tatou tau silisili e mafai ona oo mai a o tatou auauna atu i le mamoe ua leiloa. O tagata o le Ekalesia i le Tusi a Mamona sa “leoleo i luga o lo latou nuu, ma fafaga i latou i mea tau i le amiotonu.”¹⁶ E mafai ona tatou mulimuli i le latou faataitaiga pe a tatou manatuaina o le auaunaga e ao ona “taitaia e le Agaga, . . . fetuutuunai, ma e fua i manaoga o tagata taitoatasi.” E taua tele foi lo tatou “saili atu e fesoasoani i tagata taitoatasi ma aiga e saunia mo o latou sauniga e sosoo ai, tausia [a latou] feagaiga . . . , ma ia ola tutoatasi.”¹⁷

E taua agaga uma i lo tatou Tama Faalelagi. O Lana valaaulia patino ia auauna atu, o le tau silisili ma le taua lea ia te Ia, aua o Lana galuega ma le mamalu lea. O le galuega moni lava lea o le faavavau. E i ai i Ana fanau taitasi se gafatia le mafaatauina i Lana silafaga. E alofa o Ia ia te *oe* i se alofa e le mafai ona e malamalama i ai. E pei o le ta'ifau leomanu faamaoni, o le a afio o Ia i luga o mauga e puipui *oe* i taimi o matagi, timuga mamafa, kiona, ma *isi mea e tele*.

Sa aoao mai Peresitene Russell M. Nelson i le konafesi talu ai: “O le tatou savali i le lalolagi [ma ou te fia

faaopoopo atu, ‘i la tatou lafu o auau-naga’] e faigofie lava ma faamaoni: tatou te valaauliaina fanau uma a le Atua i *itu uma e lua o le veli* ia o mai i lo latou Faaola, maua faamanuiaga o le malumalu paia, maua le olioli tumau, ma agavaa mo le ola e faavavau.¹⁸

Tau ina ia tatou siitia la tatou vaai i lenei vaaiga mamao faaperofeta, ina ia mafai ona tatou leoleoina agaga e agai atu i le malumalu ma mulimuli ane i lo tatou Faaola, o Iesu Keriso. Na te le o faamoemoeina i tatou e faia ni vavega. E na o le pau le mea o loo la talosaga mai ai ia tatou aumai o tatou uso ma tuafafine ia te Ia, aua o loo ia te Ia le mana e togiola ai agaga. Pe a tatou faia lea mea, e mafai ma o le a tatou mauaina lenei folafolaga: “Pe a faaali mai le Leoleo mamoe silisili, e maua e outou le pale [o le mamalu] e le mamae lava.”¹⁹ Ou te molimau atu ai i nei mea—ma ia Iesu Keriso lo tatou Faaola ma le Togiola—i le suafa o Iesu Keriso, amene. ■

FAAMATALAGA

1. Russell M. Nelson, “Faamalosia i le Galuega Nei,” *Liahona*, Me 2018, 118.
2. Russell M. Nelson, “Auaunaga,” *Liahona*, Me 2018, 100.
3. Russell M. Nelson, “Auauna Atu i le Mana ma le Pule a le Atua,” *Liahona*, Me 2018, 69.
4. Russell M. Nelson, “Malelega Amata,” *Liahona*, Nov. 2018, 8.
5. “Auaunaga faatasi ma Korama o le Au Perisitua Mekisateko ma Aualofa ua Faamalosia,” aumai faatasi ma le tusi a le Au Perisitene Sili aso 2 Ape., 2018, ministering.lds.org; Mosaea 18:9; Mataupu Faavae ma Feagaiga 20:51, 53; tagai foi Ioane 13:35.
6. Tagai i le James E. Talmage, *Jesus the Christ* (1916), 417.
7. Ioane 10:14–15.
8. 1 Nifae 22:25.
9. Salamo 23:1; faaopoopo le faamamafa.
10. Mosaea 26:20.
11. Alema 5:59.
12. Tagai i le Mosaea 18:8–9.
13. Tagai i le Mataio 25:31–46.
14. Tagai i le John Wright, “Safe or Stranded? Determined Dog Won’t Abandon Lost Sheep,” *Logan Herald Journal*, Jan. 10, 2004, hjnews.com.
15. Luka 15:4–6.
16. Mosaea 23:18.
17. “Auaunaga faatasi ma Korama a le Au Perisitua Mekisateko ma Aualofa ua Faamalosia,” 4, 5, ministering.lds.org.
18. Russell M. Nelson, “Faamalosia i le Galuega Nei,” 118–19; ua faaopoopo le faamamafa.
19. 1 Peteru 5:4.



Saunia e Peresitene Russell M. Nelson

Avea ma Faataitaiga Lelei o le Au Paia o Aso e Gata Ai

Ou te tuua lo’u alofa ma la’u faamanuiaga i o outou luga, ina ia outou taumamafa i le afioga a le Alii ma faaaoga Ana aoaoga i o outou olaga patino.

O se konafesi musuia ma faasolopito lenei. Tatou te vaai atu i le lumanai ma le naunautai. Ua faaosofia i tatou ia *faia* le mea sili atu ma *ia* lelei atu. O savali ofoofogia ua tuuina atu mai lenei pulelaa e le Au Pulega Aoao ma Taitai Aoao atoa ai ma musika ua matua musuia! Ou te matua uunaia outou ina ia suesue i nei savali, e amata atu i lenei vaiaso.¹ O loo

faailoa mai ai le mafaufau ma le finagalo o le Alii mo Lona nuu, i le asō.

O le mataupu aoaoina fou ua tuu-faatasia e faatotonugalemu-i-le-aiga, ma lagolagoina-e-le-Ekalesia ua i ai le gafatia e tatala mai ai le mana o aiga, pe a mulimulitaia e aiga taitasi ma le toto’a ma le faaeteete ina ia liua o latou fale i se malutaga o le faatuatua. Ou te folafola atu pe a e galue filiga e toe





faafou lou fale e avea ma se nofoaga autu e aoaoina ai le talalelei, i le gasologa o taimi o le a avea *au* aso Sapati ma aso fiafia. O le a fiafia *lau* fanau e aoa ma ola i aoaoga a le Faaola, ma o le a faaitiitia le faatosinga a le fili i *lou* olaga ma i *lou* aiga. O suiga i lou aiga o le a iloga ma tumau.

I lenei konafesi ua tatou faamallosia ai lo tatou naunautaiga e faatino le taumafaiga taua e faamamalu le Alii o Iesu Keriso i taimi *uma* tatou te faasino atu ai i Lana Ekalesia. Ou te folafola atu o lo tatou gauai atu ma le maelega e faaoga le igoa sa'o o le Ekalesia a le Faaola ma ona tagata, o le a taitai atu ai i se faatuatua faateleina ma le mauaina o le mana sili atu faaleagaga mo tagata o Lana Ekalesia.

Ia se'i o tatou liliu atu nei i le autu o malumalu. Ua tatou iloa o o tatou taimi i totonu o malumalu e taua tele i lo tatou faaolataga ma le faaeaga faapea ai ma o tatou aiga.

A mavae ona tatou maua o o tatou lava sauniga o le malumalu ma osia ni feagaiga paia ma le Atua, e manaomia e i tatou taitoatasi le faamallosiauga ma le aoaoina faifai pea faaleagaga lea e *na* o le maota o le Alii e mafai ai. Ma e manaomia e o tatou tuua i tatou e auauna atu e fai ma sui mo i latou.

Mafaufau i le alofa mutimutivale tele ma le sa'olele o le Atua o lē, a o le'i faavaeina le lalolagi, na saunia se ala e avatu ai faamanuiaga o le malumalu ia i latou o ē na maliliu e aunoa ma se malamalama o le talalelei. O nei sauniga paia o le malumalu na i ai anamua. Ia te a'u o lena tulaga faaanamua e faagaetiaina ma o se isi lea molimau o lo latou moni a'ia'i.²

O'u uso e ma tuafafine pele, o sauaga a le fili ua matuā faateteleina le saoasaoa, i le malolosi ma le eseese na'ua.³ O le manaomia ona tatou i ai soo i le malumalu e le aunoa ua matuā sili ona manaomia i le taimi nei. Ou te aioi atu ia te outou ia tagai ma le agaga tatalo pe faapefea ona faaalu lou taimi. Ia saofagā lou taimi i lou lumanai ma i lou aiga. Afai e te latalata i se malumalu, ou te uunaia oe ia saili se auala e fai ai sou taimi faatulagaina ma le Alii—ia i ai i totonu o Lona maota paia—ona tausia lea o lena taimi faatulagaina ma le sa'olele atoatoa ma le olioli. Ou te folafola atu ia te outou o le a aumai e le Alii ni vavega ua Ia silafia tou te manaomiaina a o outou faia ni osigataulaga e auauna atu ma tapuai atu i totonu o Ona malumalu.

O le taimi nei e 159 a tatou malumalu ua faapaiaina. O le tausiga lelei ma le faaleleia tumau o na malumalu e matua taua ia i tatou. Faatasi ai ma le aluga o taimi ma aso, ua matua manaomia ai e malumalu le faaleleiga ma le faafouga. I lena tulaga, ua faia ai nei ni fuafuaga e toe faafou le Malumalu o Sate Leki ma isi malumalu o augatupulaga o paionia. O le a faasoa atu auiliiliga o nei galuega faatino a o atiaeina.

O le asō matou te fiafia lava e faasilasila atu le fausiaina o isi malumalu e 12. O na malumalu o le a fausiaina i nofoaga nei: Mendoza, Atenitina; Salvador, Pasila; Aai o Iupa, Kalefonia; Phnom Penh, Cambodia; Praia, Cape Verde; Yigo, Guam; Puebla, Mekisiko; Aukilani, Niu Sila; Lagos, Nigeria; Davao, Filipaina; San Juan, Puerto Rico; ma le Itumalo o Uosigitone, Iuta.

O le fauina ma le tausiga o nei malumalu atonu e lē suia ai lou olaga, ae o le faaaluina o lou taimi i totonu o le malumalu o le a mautinoa lava

[le suia ai o lou olaga]. Mo i latou ua matuā leva lava e lei toe alu i se malumalu, ou te uunaia oe ia saunia nei ma toe foi atu i le vave e mafai ai. Ona ou valaaulia lea o oe e te tapuai atu i totonu o le malumalu ma tatalo ia matuā lagona le alofa lēmafuatia o le Faaola mo oe, ina ia tofua maua e outou taitoatasi sau oe lava ia molimau o loo faaauau pea ona Ia taitai lenei galuega paia e faavavau.⁴

Ou uso e ma tuafafine, ou te faafetai atu mo lo outou faatuatua ma taumafaiga tumau. Ou te tuua lo'u alofa ma la'u faamanuiaga i o outou luga, ina ia outou taumamafa i le afioga a le Alii ma faaoga Ana aoaoga i o outou olaga patino. Ou te faamautinoa atu ia te outou o loo faaauau pea faaaliga i totonu o le Ekalesia ma o le a faaauau pea seia oo ina “faataunuu faamoe-moega o le Atua, ma fetalai ai le Ieova Silisili ua maea le galuega.”⁵

Ou te faamanuia ia te outou i se faatuatua faateleina ia te Ia ma Lana galuega paia, faatasi ai ma le faatuatua ma le onosai e onosaia ai ou lava luitau patino i le olaga. Ou te faamanuia ia te outou ina ia avea ma ni faataitaiga lelei o le Au Paia o Aso e Gata Ai. Ou te faamanuia ai ia te outou ma ou te molimau atu ai o loo soifua le Atua! O Iesu o le Keriso! O Lana Ekalesia lenei. O i tatou o Lona nuu, i le suafa o Iesu Keriso, amene. ■

FAAMATALAGA

1. Tagai i savali o le konafesi aoa o i luga o le initoneti i le LDS.org ma i le polokalama o le Gospel Library. O le a lolomiina i le *Ensign* ma le *Liahona*. O mekasini a le Ekalesia, e aofia ai le *New Era* ma le *Friend*, e tiliva atu i le meli pe sii mai le initoneti, o se vaega taua lea o lau mataupu aoaoina o le talalelei e faatotonugalemu-i-le-aiga.
2. Tagai mo se faataitaiga i le, Esoto 28; 29; Levitiko 8.
3. Tagai i le Mosaea 4:29.
4. Tagai i le lauga a Uilifoti Uutilafi, “The Law of Adoption (O le Tulafono o le Vaetamaina),” sa tuuina atu i le konafesi aoa o le Ekalesia, 8 Ape. 8, 1894. Sa saunoa ai Uutilafi: “E le'i mae'a lava a tatou faaaliga. E le'i mae'a foi le tatou tiute i le galuega a le Atua. . . . O le a leai lava se mutaaga o lenei galuega seiloga e faaatoatoaina” (*Deseret Evening News*, Apr. 14, 1894, 9).
5. *Aoaoga a Peresitene o le Ekalesia: Iosefa Samita* (2007), 151.

Faasino Upu o Tala o le Konafesi

O le lisi lea o aafiaga na filifilia mai saunoaga o le konafesi aoao, e mafai ona faaaoga i suesuega a le tagata lava ia, afiafi faaleaiga, ma isi aoaoga. O le numera o loo faasino i le itulau muamua o le lauga.

Failauga	Tala
Neil L. Andersen	(83) O le iloina na silafia e le Faola ona puapuaga, na faatoiloina ai e se faifeautalai faamaoni ni lagona faanoanoa ao faasolosolo ina manuia mai ni manu'a na afaina ai i pomu a le au faatupu faalavelave. I le mavae ai o le malii o lona afafine, na tautino atu ai e Russell M. Nelson o le a faaaoga e Iesu Keriso ki o le toetu mo i latou uma o e maliliu. Molimau atu Russell M. Nelson i tagata o le ekalesia i Puerto Rico faapea, "e mafai ona tatou maua le olioli i le lotolotoi o o tatou tulaga sili ona leaga."
Brian K. Ashton	(93) Ua malamalama lelei le faletua o Brian K. Ashton i le natura o le Atua ma lona alofa ma le agaga faafetai mo Ana fanau.
M. Russell Ballard	(71) Ina ua mavae le lagonaina o le faanoanoa tele i le maliliu ai o tagata o le aiga ma le faitau miliona i taua ma faama'i, sa mauaina e Iosefa F. Samita "le faaaliga o le togiloina o e ua maliliu."
Steven R. Bangerter	(15) Na tanuina e fanau a fanau a Steven R. Bangerter ni tamai maa e suitulaga ia Iesu Keriso o le faavae o se olaga fiafia. Ua toe faamanatu mai e Peresitene Russell M. Nelson i matua o latou tiutetauave ina ia aoaoina a latou fanau. Ua ofoina atu e le atalii o Steven R. Bangerter le fesoasoani i ona matua e saunia ai e auuuna atu i se misiona. Ua taialaina e le Agaga Paia se tamalii matua ia toe foi i le Ekalesia ma i le saogalemu faaleagaga o lona olaga laitiiti.
Shayne M. Bowen	(80) O le liuaina o se tamalii i le Ekalesia e ala i le mana o le Tusi a Mamona na tele si aafiaga ia Shayne M. Bowen.
M. Joseph Brough	(12) I se malaga i Alaska, ISA, na aoao ai e M. Joseph Brough faapea e leai lava se mea e tasi e le mafaia e le Atua. Na aoaoina e se peresitene o se siteki faapea o le filemu e sau faatasi ma le faamagaloga e ala i le Togiola a Iesu Keriso. E ala i lona manao e auuuna atu i se misiona, na aoao atu ai e le afafine o M. Joseph Brough ia te ia ia faia mea faigata.
Matthew L. Carpenter	(101) Na faamaeaina e le atalii o Matthew L. Carpenter lana misiona faafaifeautalai ina ua mavae lona toe malosi mai se ma'i o le pe o le tino.
D. Todd Christofferson	(30) E ui i faigata, na tumau mausali ni sui e toafa o le Ekalesia i lo latou faatuatua ia Keriso ma mauaina Lana fesoasoani lagolago.
Quentin L. Cook	(8) Na faamalosia e le <i>Sau, Mulimuli Mai ia te A'u—Mo Tagata Taitoatasi ma Aiga</i> le faatuatua, molimau, ma le malamalamaaga i le talalelei o se aiga i Pasila.
Bonnie H. Cordon	(74) Na faia e se tamaitai talavou ma se uso matua se faauooga lea na faamanuiaina ai o laua olaga. Na atiinaeina e Bonnie H. Cordon ma lana soa o le auuunaga se sootaga vave o le alofa ma se uso sa la asia. Na atiinaeina e se tuagane o le auuunaga se sootaga mafana ma faatuatuaina ma se tuagane na taumafai lona toalua e pule i le ola.
Michelle D. Craig	(52) Na aoao atu e Camilla Kimball se tagata o le uarota ia "aua lava ne'i teenaina se mafaufauga lelei."
Dean M. Davies	(34) Na muai vaايا e Peresitene Gordon B. Hinckley le nofoaga e tatau ona fausia ai le Malumalu o Vancouver British Columbia.
Henry B. Eyring	(58) Na ofo Henry B. Eyring pe na faapefa ona maua e lona tina le taimi ma le malosi e fai ai se faafanua o femalagaaga a le Aposetolo o Paulo. (90) Na aoao Henry B. Eyring ina ia taulimaina tagata e pei o latou "i ai i le ogaoga o faigata." Na tauaveina e le Faola le faletua o Henry B. Eyring e ala atu i ona faigata.
Cristina B. Franco	(55) Na aoao e Cristina B. Franco o le alofa ma le ositaulaga o ni mea faalilolilo lea sa i totonu o le keke sukalati a lona faiaoga Peraimeri.
Robert C. Gay	(97) Na fesoasoani le Agaga Paia ia Robert C. Gay ina ia vaai atu i lona tuafafine matua e pei ona silasila mai ai le Atua ia te ia. Na auuuna atu James E. Talmage i se aiga na mafatia i le faama'i o le diphtheria.
Jack N. Gerard	(107) Ina ua uma ona suesueina Jack N. Gerard ma iloa ai e maua i se ma'i ogaoga, sa ia vaai atu i lona olaga mai se vaaiga e faavavau.
Gerrit W. Gong	(40) Na talanoaina e Elder Richard G. Scott ma Gerrit W. Gong le faatuatua ao la valiina se atavali o le afi o le tolouapiga. Na fesoasoani se tasi e umia le perisitua i se ulugalii e le o toe toaaga i le lotu ia toe foi mai i le Lotu.
Jeffrey R. Holland	(77) O se aioiga faaleauunaga mai lana fanau na fesoasoani i se tama ia faamagalogo atu ma toe foi i le Lotu, ma aumaia ai faamanuiaga i lona aiga.
Joy D. Jones	(50) Na atiinaeina e Joy D. Jones ma lona toalua se faauooga umi ma se aiga sa lei toe toaaga mai i le lotu i le mavae ai o le aoaoina ia auuuna atu ma le alofa mo le Alii.
Russell M. Nelson	(6) E fiafia se tina e fai lotu i lona fale ona o le faamanuiaina o le faamanatuga i lona fale i Aso Sa taitasi na uunia ai lona toalua ia faaaoga le gagana sili atu. (68) Na faafuasei lava ona faatatau Russell M. Nelson ia te ia o se tina. Na faafetai atu se atalii i lona tina ina ua mavae le taitaia o ia e le Agaga Paia e fesui ai lana telefonipoto mo se telefoni faamoe. (87) Na faamatala e Benjamin De Hoyos i se taitai mo polokalama a le leitio faapea o le igoa umi o le Ekalesia na filifilia e le Faola.
Dallin H. Oaks	(61) Na falepuipui se alii talavou sulufai ina ua mavae le tali faasagatau atu i talavou na taufaalili ia te ia.
Paul B. Pieper	(43) Na fai mai se teineitiiti o loo sauniuni e papatiso o le ave o le suafa o Iesu Keriso o lona uiga, "E mafai ona ou maua le Agaga Paia."
Ronald A. Rasband	(18) Na faatoilalo e le afafine ma le atalii faaletulafono o Ronald A. Rasband lo la fefefe i le aumaia o fanau i le lalolagi.
Gary E. Stevenson	(10) Sa faaloaloa atu e se uso i le uarota se lima auuuna atu ia Carlos A. Godoy o le na se ese. Na leiloloa mamoe e 200 a se leoleo manu i manufeai. Na taitaiina e se taifau leomanu ni mamoe na leiloloa i le saogalemu.



Ua Taialaina e Peresitene Nelson le Ala

Ua fautuauina i tatou taitoatasi e Peresitene Russell M. Nelson ina ia agalelei atili, avea faapei o Keriso, ma faaleagaga ao tatou auuina atu i isi, ma ua ia setiina se faataitaiga o le uiga o lena mea i le ala ua ia auuina atu ai talu mai le konafesi aoao ua tuana'i.

I se taimi faatoa mavae atu le konafesi aoao ia Aperila 2018, na malaga ai Peresitene Nelson faatasi ma lona faletua, o Wendy, ma Elder Jeffrey R. Holland o le Korama a Aposetolo e Toasefululua ma lona faletua, o Patricia, i Egelani, Isaraelu, Kenya, Zimbabwe, Initia, Taialani, Saina, ma Hawaii, ISA.

I malaga na sosoo ai, sa feiloai ai Peresitene Nelson ma tagata o le ekalesia, faifeautalai, taitai, ma uo o le Ekalesia i Kanata i sisifo, tutotonu, ma sasae; Seattle, Uosigitone, ISA; ma Ripapelika Tominiko—lea na umi se taimi na ia saunoa atu ai i le faaSpaniolo, o se uluai taimi lea ua tuuina atu ai e se Peresitene o le Ekalesia se lauga lautele i se gagana e ese mai le faaPeretania.

I sauniga ma i faeasaita, na aoao atu ai Peresitene Nelson e uiga i le igoa sa'o o le Ekalesia; faasoa atu le talalelei ma isi; faatauaia o le Tusi a Mamona; pe faapefea i le ola ai i le talalelei ona avea ma olaga sili

atu ona lelei; pe faapefea ona avea le ala a Keriso ma auala o le olioli ma le fialia, i le taimi nei ma i le faavavau; tatalo; aveaina o fale po o aiga o se malutaga mo le fanau; faaagaina o le faitalia e faatoilalo ai faaosoosoga ma mulimuli i le Faaola; tausia o isi; ma saunia mo ma le mauaina o faama-nuiaga lea e oo mai i le malumalu.

Na saunoa foi Peresitene ma Sister Nelson i se faigalotu mo le autalavou i le lalolagi atoa i le aso 3 Iuni, 2018, lea na saunoa ai Peresitene Nelson faapea ua mauaina e le autalavou o loo auai i le “autau a le Alii” ma fesoasoani e faapotopoto Isaraelu le avanoa e avea ai ma se “vaega o se mea sili ona tele, se mea sili ona maoae, mea sili ona malualii!” Na ia uunaia le autalavou ina ia o ese mai le faalagolago faifaiepa i luga o ala faasalalau faaagafesootai, ositaulaga sina taimi i le Alii, fai se iloiloaga maeaea o le olaga faatasi ai ma le Alii, tatalo i aso taitasi ina ia maua e fanau uma a le Atua le talalelei, ma avea ma se malamalama i le lalolagi. ■

Mo nisi faamatalaga e uiga i le auuina a Peresitene Russell M. Nelson, alu i le prophets.lds.org. Maimoa i le faasalalauga atoa a le autalavou i le HopeofIsrael.lds.org.

Tala Fou o Malumalu

Ua fuafua le Ekalesia e fausia ni malumalu fou se 12, na faasilasila mai e Peresitene Russell M. Nelson i lana malelega faaii i le konafesi aoao (tagai i le itulau 113). Na ia faasilasila mai ai foi ni fuafuaga o le toe faaleleia o le Malumalu o Sate Leki ma isi malumalu o “augatupulaga a paionia”, ma faaopoopo mai o le a tuuina mai na faamatalaga i se taimi mulimuli mai.

O malumalu o le a fausiaina i Mendoza, Atenitina; Salvador, Pasila; Aai o Iupa, Kalefonia, ISA; Phnom Penh, Cambodia; Praia, Cape Verde; Yigo, Guam; Puebla, Mekisiko; Aukilani, Niu Sila; Lagos, Nigeria; Davao, Filipaina; San Juan, Puerto Rico; ma le Itumalo o Uosigitone, Iuta, ISA.

E fa malumalu e le o toe mamao ae faapaiaina: o le Malumalu a Concepción Chile i le aso 28 o Oke-topa; le Malumalu o Kolumupia i le aso 9 o Tesema; le Malumalu o Roma Italia i le vaiaso o le aso 10 i le aso 17 o Mati, 2019; ma le Malumalu o Kinshasa Temokalasi Ripapelika o Congo i le aso 14 o Aperila, 2019.

Ma e lua malumalu na toe faapaiaina talu ai nei: o le Malumalu a Houston Texas na toe faapaiaina i le aso 22 o Aperila, 2018, ma le Malumalu o Jordan River Iuta lea na toe faapaiaina i le aso 20 o Me, 2018. ■

Aoao atili i le temples.lds.org.

Ua Fesoasoani Suiga e Faapaleni Aoaoga o le Talalelei i le Aiga ma i le Ekalesia

I le avea ai ma se vaega o taumafaiga faifaipēa e fesoasoani atu i le Au Paia o Aso e Gata Ai ia “aoao ai aoaoga faavae, faamallosia le faatuatua, ma atiae ai se lototapu ai faamaonia faaletagata lava ia,” na fofogaina ai e Peresitene Russell M. Nelson ni fetuunaiga e fesoasoani ai i le faapaleniina ma le faafesootaia o auala tulagaese ma taua o loo tapuai ai tagata o le ekalesia ma aoao ma ola ai i le talalelei a le Faaola i le lotu ma i le fale.

Ua faasilasila mai e taitai o le Ekalesia ni suiga i le faasologa o sauniga i le Aso Sa, e amataina ia Ianuari 2019, i le fesootai ai ma le faalauiloa mai o se mataupu aoaoina fou e faagatotonu

i le aiga ma lagolagoina e le Ekalesia. O nei suiga ma isi ua fausia i luga o ni uluai fuafuaga na faatulagaina e le Ekalesia i tausaga talu ai, ia fesoasoani i tagata o le ekalesia e taulai atili atoatoa atu o latou olaga i le Tama Faalelagi ma Iesu Keriso ma faateleina le faatuatua ia i La’ua. O nei gaoioiga tamua e aofia ai le taulai atu i ni suesuega anoa atili e uiga i le talalelei i le fale, faamamaluina o le Alii e ala i le tausia ia paia o le aso Sapati, ma le tausia o le tasi ma le isi e pei ona faia e le Faaola ma e pei ona taialaina ai e le Agaga.

O lona uiga o le saunia o tagata o le Alii mo Lona toe afio mai, o nei suiga ua taulai atu i le faateleina o le liua o

tagata taitoatasi, na faamalamalama mai ai e Elder Quentin L. Cook o le Korama a Aposetolo e Toasefululua, ao ia ototoina mai suiga i le sauniga o le taeao o le Aso Toonai o le konafesi aoao.

“Ua tatou iloa le aafiaga faaleagaga ma le liuaina loloto ma tumau lea e mafai ona ausia i le faatulagaga faaleaiga . . . ,” na ia saunoa mai ai. “O lo tatou faamoemoega o le faapaleni lea o aafiaga i le Lotu ma le aiga i se auala o le a matua faateleina ai le faatuatua, faaleagaga, ma faalolotoina ai le liua i le Tama Faalelagi ma le Alii o Iesu Keriso.”

Fetuunaiga i le Aiga

Ua valaauliaina e taitai o le Ekalesia se taulaiga sili atu i le faateleina o le auai i le tausiiaina o mataupu faalelotu e le tagata lava ia ma faaleaiga i totonu o le aiga, e aofia ai le suesue o le talalelei i le aiga i Aso Sa ma i le aluga o le vaiaso ma fetuunaiga i afiafi a aiga.

I le avea uma ai ma potuaga ma potu mo suesuega, o le aiga o se nofoaga autu taua mo le aoaoina ma le ola ai i le talalelei. O le suesueina o le talalelei e tagata taitoatasi ma le aiga i le fale i Aso Sa ma i le faasologa o le vaiaso e saunia ai avanoa mo le mauaina o le malosi faaleagaga i aso taitasi ma mafai ai ona fetuutuunai atili mo suesuega ma faaaliga faaletagata lava ia. O le faalagolago atoa atu i taimi faatapulaa i le lotu mo le aoaoina o le talalelei e fatuina ai se le paleni lea e ono le ausia ai le liuaina loloto ma tumau e manaomia.

“E nafa i tatou taitoatasi ma lo tatou tuputupu ae faaleagaga faaletagata lava ia,” na saunoa mai ai Peresitene Nelson. “Ma ua faamanino mai e tuisitiga paia ua i ai i matua le tiutetauave muamua e aoao atu aoaoga faavae i a latou fanau.”

O suiga e aofia ai le faalauiloa atu o se punaoa fou o le suesueina o le talalelei mo tagata taitoatasi ma aiga i



le fale. E mafai e tagata taitoatasi ma aiga ona faaaoga le *Sau, Mulimuli Mai ia te A'u—Mo Tagata Taitoatasi ma Aiga*, fou pe afai latou te mananao ai, e taialaina ai o latou aafiaga o le suesueina o le talalelei i fafo atu o le lotu. O le punaoa fou e galulue faatasi ma punaoa fesoasoani mo faiaoga o le Aoga Sa ma le Peraimeri e faaogatusaina ia lesonea o le Aso Sa ma suesuega o tusitusiga paia i le fale ma fautuaga mo afiafi faaleaiga.

E le gata i le uunaia o le suesueina o le talalelei, e faafouina e taitai o le Ekalesia le latou valaaulia mo tagata uma ia auai i le aso Sapati—ma i le vaiaso atoa—i fonotaga faaleaiga, afiafi faaleaiga, talafaasolopito o aiga ma galuega o le malumalu, auaunaga, tapuaiga faaletagata lava ia, ma taimi fiafia faaleaiga.

O anomea e auina atu i tagata ma taitai o le ekalesia ua faamalamalama atu ai le uunaia e taitai o le Ekalesia ia tagata o le ekalesia ina ia faia se afiafi a aiga ma se suesuega o le talalelei i le Sapati—po o nisi taimi e filifilia e tagata taitoatasi ma aiga. O se po o gaoioiga faaleaiga e mafai ona faia i le Aso Gafua po o se isi taimi. I lenei tulaga, e tatau ai i taitai ona faaavanoa afiafi o Aso Gafua mai fonotaga ma gaoioiga faale-Ekalesia. Peitai, o taimi e faaaluina i suesuega o le talalelei i le aiga ma gaoioiga mo aiga ma tagata taitoatasi ua faatulagaina e tusa ma tulaga faaletagata lava ia.

O tapuaiga i le Atua i le lotu, auai i sauniga paia iina, ma le potopoto faatasi e aoao atu le tasi ma le isi ma faamallosia ma feuaunaai le tasi i le isi o ni elemene taua ia mo le faalolotoina o le faatuatua ma le liua faaletagata lava ia. O le faaitiitia o le aofai o le taimi e faaaluina i le lotu e mafai ona le manuia sei vagana ai ua i ai se faamoemoega o tagata taitoatasi ma aiga i le faamallosia o o latou aiga.

Na aoao mai Peresitene Nelson: “I le aveai ai ma tagata o le Au Paia o

Aso e Gata Ai, ua tatou masani lava i le manatu o le “lotu” o se mea e tupu i totonu o o tatou falesa, ma e lagolagoina e mea o loo tutupu i le aiga. Ua tatou manaomia se fetuunaiga i lenei mamano. O le taimi lenei mo se *Ekalesia e-faatotonugalemu-i-le-aiga* ma lagolagoina e mea o loo tutupu i totonu o faletapu ai o a tatou paranesi, uarota, ma siteki.”

Fetuunaiga i le Ekalesia

O fetuunaiga i aafiaga o le Ekalesia ua faamoemoe e lagolago i le faateleina o le aoaoina o le talalelei ma le ola ai i le aiga. O nei suiga e aofia ai le fetuunaia o le faasologa faalevaiaso o le Aso Sa ia aofia ai:

- Se sauniga faamanatuga e 60-minute.
- Se taimi e 10-minute e taape ai i vasega.
- Ma se vasega e 50-minute, e pei ona ototooina atu i le faataitaga o le faasologa o i lalo:

FAASOLOGA O SAUNIGA I LE ASO SA E AMATA ATU IA IANUARI 2019	
60 minute	Sauniga faamanatuga
10 minute	Taape i vasega
50 minute	Vasega mo tagata matutua: vasega mo le autalavou; Peraimeri

O vasega 50-minute o le a aofia ai le Peraimeri i vaiaso taitasi mo le fanau ao le autalavou ma tagata matutua o le a felafuai i vaiaso taitasi faapenei:

- Aso Sa muamua ma le lona tolu: Aoga Sa
- Aso Sa lona lua ma le lona fa: korama a le au perisitua, Aualofa, ma Tamaitai Talavou.

- Aso Sa lona lima: o vasega a le autalavou ma tagata matutua o le a i lalo o le taitaiga a le epikopo.

Afai e lava le toatele o le Peraimeri e tuueseese ai le au laiti ma le au matutua o le Peraimeri, e tatau i taitai ona faafeūa'i le faasologa lenei mo le afa o tamaiti ma fetuunai le taimi pe a talafeagai ai.

FAASOLOGA O SAUNIGA A LE PERAIMERI E AMATA ATU IA IANUARI 2019	
25 minute	Tatalo, se mau po o se mataupu faavae o le faatuatua, lauga (5 minute). Taimi o pesepesega: Musika ia e lagolagoina mau o loo suesueina i le vasega (20 minute)
5 minute	Taape i vasega
20 minute	Vasega: lesonea mai le <i>Sau, Mulimuli Mai ia te A'u—Mo le Peraimeri</i>

Suiga mo Mataupu e Aoaoina

O lenei fetuunaiga i faasologa o sauniga e ogatusa ma le faaopoopoga fou i le mataupu aoaoina a le Ekalesia o le *Sau, Mulimuli Mai ia te A'u*. E amata atu ia Ianuari, o le a faalaugatasia e lenei mataupu aoaoina e faaogatonu i le aiga, ma lagolagoina e le Ekalesia mea o loo aoaoina e tagata matutua, autalavou, ma tamaiti i le Aoga Sa ma vasega o le Peraimeri, ma o le a faafai-gofie ai mo aiga le suesueina faatasi ai i le fale i le aluga o le vaiaso.

O faatonuga, ototooga o lesonea, ma punaoa e mafai ona maua i le:

- *Sau, Mulimuli Mai ia te A'u—Mo le Korama a Toeaina ma le Aualofa*

(maua i le *Ensign* ma le *Liahona* o Novema 2018)

- *Sau, Mulimuli Mai ia te Au—Mo Korama a le Au Perisitua Arona*
- *Sau, Mulimuli Mai ia te A'u—Mo Tamaitai Talavou*
- *Sau, Mulimuli Mai ia te A'u—Mo le Aoga Sa*
- *Sau, Mulimuli Mai ia te A'u—Mo le Peraimeri*

Asiasi i le **comefollowme.lds.org** mo nisi faamatalaga.

O isi suiga autu e aofia ai mea nei:

- O fonotaga a le aufono a faiaoga o le a faia faalekuata nai lo le faalemasina.
- O faasologa o lesone a le korama a toeaia ma le Aualofa o le a le toe aofia ai se fonotaga faalea-fono i le Aso Sa muamua po o se autu faapitoa mo le Aso Sa lona fa. O le a taulai atu lesone i savali o le konafesi aoao faatoa mavae atu.
- O taimi mo pesepesega o le a suia ai le taimi o le fetufaaiga. O le *Otootoga mo Taimi o Fetufaaiga* o le a faamutaina.
- O le vasega o Mataupu Faavae o le Talalelei o le a faamutaina. O tagata uma o le ekalesia ma uo e naunau e fiafai o le a valaauliaina e auai i a latou lava vasega o le Aoga Sa matutua po o le autalavou.
- O kosi e tuu i le faitalia—e pei o kosi mo le faamallosia o faaipopoga ma aiga, sauniuniga mo le malumalu, sauniuniga mo se misi-ona, ma talafaasolopito o aiga—o le a lē faia i le taimi o vasega o le Aso Sa. O nei vasega e mafai ona aoaoina i nisi taimi mo tagata taitoatasi, aiga, po o vaega e fua i manaoga i le lotoifale ma i le pule faitalia a le epikopo.

O Faamoemoega o Nei Suiga

O loo saili taitai o le Ekalesia e fausia se faapaleni fou ma se fesootaiga sili atu i le va o malosiaaga tulagaese o aafiaga o le aiga ma le Ekalesia ma ia mafaufau i ni faamoemoega faapitoa.

“E telē atu se mea o loo i ai i lenei fetuunaiga nai lo le na ona faapuupuuina o le faasologa o sauniga i falelotu i le Aso Sa . . . ,” na saunoa ai Elder Cook. “O faamoemoega ma faamanuiaga e fesootai ma lenei fetuunaiga ma isi suiga talu ai nei ua aofia ai mea nei:

- “Faalolotoina o le liua i le Tama Faalelagi ma le Alii o Iesu Keriso ma le faamallosia o le faatuatua ia i La'ua.
- “Faamallosia o tagata taitoatasi ma aiga e ala i le mataupu aoaoina e faatotonugalemu-i-le-aiga, ma lagolagoina-e-le-Ekalesia lea e saofagā atu i le ola fiafia i le talalelei.

- “Faamamaluina o le aso Sapati, ma se taulaiga i le sauniga o le faamanatuga.
- “Fesoasoani atu i fanau uma a le Tama Faalelagi i itu uma e lua o le veli e ala i le galuega faafaifeautalai ma le mauaina o sauniga ma feagai-ga ma faamanuiaga o le malumalu.”

Mo le faalauiloina atu o nei fetuunaiga, tagai ia Peresitene Russell M. Nelson, “Malelega Amata,” i le itulau e 6 o lenei mekasini; Quentin L. Cook, “Liuaia Loloto ma Tumau i le Tama Faalelagi ma le Alii o Iesu Keriso,” i le itulau e 8. Mo nisi faamatalaga e uiga i nei fetuunaiga, asiasi ane i le **sabbath.lds.org** e maua ai se tusi mai le Au Peresitene Sili, o taili i fesili e fesiligia soo, ma punaoa faaopoopo lea e mafai ona fesoasoani i tagata taitoatasi ma aiga ia faamamaluina le Sapati. ■





Ia Auai i le Tusipese Fou mo Viiga, Tusipese

O loo sauniaina e le Ekalesia ni lomiga fou o *Viiga* ma le *Tusipese a Tamaiti* ma o loo sailia ni fautuaga ma ni talosaga mai tagata o le Ekalesia i soo se nofoaga.

I le **MusikaFou.lds.org**, e mafai ona e:

Tuuina mai ni fautuaga—ni viiga o i ai nei e sili ona e fiafia i ai po o pese a tamaiti, viiga a le Au Paia o Aso e Gata Ai po o ni viiga e le o ni viiga a le Au Paia o Aso e Gata Ai po o pese a tamaiti e aofia ai, viiga o i ai nei po o pese e le o aofia ai, faafitauli i tusi musika o i ai nei, ma nisi manatu faaalai.

Ia auina mai anomea autu—viiga, anotusi o viiga, pese a tamaiti, ma fati o pese a tamaiti. E tatau ona talafeagai le musika mo sauniga faaletapuaiga. O le a iloiloina ia gagana ma ituaiga o aganuu uma. O i latou e i lalo ifo ma le 18 tausaga e mafai ona auina mai [ni fautuaga po o anomea] pe afai latou te tuuina mai se faatagana a matua po o le tagata o vaaia. E tatau ona mauaina talosaga ao lei sailia ma le aso 1 Iulai, 2019. ■



Elder Brook P. Hales

Fitugafulu o le Pulega Aoa

A o valu pe iva tausaga o Elder Brook P. Hales, sa i ai o ia i se sauniga o le anapogi ma molimau lea sa pulefaa-malumalu ai lona tama o se epikopo. Sa valaauliaina e lona tama le au paia e tuuina atu ni molimau, ma e toetoe lava o tagata uma sa auai na tuuina atu se molimau. “Masalo o le taimi muamua lea na ou lagona ai le molimau mai o le Agaga ia te a’u e uiga i le moni o le talalelei,” na toe mana-tuaina e Elder Hales.

Na ia lagonaina lona molimau i le tele o taimi talu mai lona taimi, aemaise lava ao ia auauna atu o se failautusi i le Au Peresitene Sili talu mai le 2008. Ina ua lagolagoina Peresitene Thomas S. Monson o se perofeta ma le Peresitene o le Ekalesia, ma ina ua lagolagoina Peresitene Russell M. Nelson, na ia molimauina “le ofutalaloa o le perofeta o pau atu i luga o nei tamalii taitoatasi, ma sa ou iloaina e aunoa ma se masalosalo na filifilia ma valaauina i la’ua e avea ma Peresitene o le Ekalesia mo lo la’ua lava taimi faapitoa.”

Sa valaauina Elder Hales e avea o se Fitugafulu o le Pulega Aoa i le aso 17 o Me, 2018, ma lagolagoina i le aso 6 o Oketopa, 2018. O le a faaauau pea ona ia avea ma failautusi i le Au Peresitene Sili.

Sa soifua mai i Ogden, Iuta, ISA, i le aso 7 o Aperila, 1956, ia Klea ma Glenn Phillip Hales, sa maua e Elder Hales se tikeri i mea tau tupe ma teugatupe i le faletupe mai le Kolisi a le Setete a Uepa (ua ta’ua nei o le Weber State University) i le 1980. Ina ua uma ona faauu, sa ia galue i le matagaluega o faletupe ma i le Matagaluega o Tupe ma Faamaumaga a le Ekalesia. Sa ia faaipoipo atu ia Denise Imlay Hales i le 1981, ma o i la’ua o ni matua o se fanau e toafa. Na auauna atu Elder Hales o se faifeautalai faamisi-ona i le Misiona a Farani Pale, fesoasoani i se au epikopo, taitai vaega o faitaulaga sili, epikopo, peresitene o se siteki, ta okeni mo le au perisitua, faiaoga o le Aoga Sa, ma se fai faamauga o le malumalu.

I lona aso ao avea o ia ma se tamaitiiti, e lei tuuina atu e Elder Hales lana molimau. Peitai ua tuputupu ae talu mai lona taimi. “Ua toefuatai mai le talalelei a Iesu Keriso e ala mai i le Perofeta o Iosefa Samita, e moni le Tusi a Mamona, e alofa le Atua ia i tatou ma le atoatoa ma e naunau e faamanuia mai ia i tatou, o Iesu o lo tatou Faaola, ma ua faamanuiaina i tatou ina ia maua le mafutaga faifaipaea o le Agaga Paia pe a tatou agavaa i ai,” na ia saunoa mai ai. ■



SAU, MULIMULI MAI IA TE A'U

Mo le Korama
a Toeaina ma le
Aualofa

Oketopa 2018

*Saili punaooa nei i le polokalama o le Potutusi
o le Talalelei i le comefollowme.lds.org.*

Aisea E I Ai Ai A Tatou Fonotaga/ Sauniga A Le Korama Ma Le Aualofa?

O nei aso e gata ai, ua toefuataiina ai e le Atua le perisitua ma faatulaga korama a le au perisitua ma le Aualofa e fesoasoani e faataunuu Lana galuega o le faaolataga. Ona o lenei mea, o Aso Sa taitasi pe a tatou faatasitasi i sauniga a le korama a toeaina ma le Aualofa, tatou te talanoa ai ma fuafua mea o le a tatou faia e fesoasoani ai e faataunuu le galuega a le Atua. Ina ia aoga, o nei sauniga/fonotaga e tatau ona sili atu nai lo ni vasega. O ni avanoa ia e fefautuaai ai e uiga i le galuega o le faaolataga, aoao faatasi ai e uiga i lena galuega mai aoaoga a taitai o le Ekalesia, ma fuafua ma faatulaga i tatou lava ina ia faataunuuina.



Faasologa mo Oketopa–Tesema 2018

I le 2018, o sauniga i Aso Sa a le korama a toeaina ma le Aualofa o le a mulimuli i le faasologa faalemasina lenei:

Aso Sa Muamua: Fefautuaai faatasi e uiga i tiutetauave, avanoa, ma luitau i le lotoifale ma fai ni fuafuaga e faatino ai.

Aso Sa Lona Lua ma le Lona Tolu: Suesue i savali o le konafesi aoao talu ai nei ia na filifilia e sui o le au peresitene po o i nisi taimi, o le epikopo po o le peresitene o le siteki.

Aso Sa Lona Fa: Talanoa i se autu faapitoa na filifilia e le Au Peresitene Sili ma le Korama a Aposetolo e Toasefululua. Mai ia Oketopa seia oo ia Tesema 2018, o le autu o le suesueina o tusitusiga paia faaletagata lava ia ma faaleaiga.

Aso Sa Lona Lima: I lalo o le taitaiga a le au epikopo.



*“Matou te faatua-
tuaina outou ia
fefautuaai faatasi
ma ia saili atu i faa-
aliga mo le faatino-
ina o nei fetuunaiga
... [O le faasologa
fou o le Aso Sa] o
le a oo ai i faama-
nuiaga loloto mo
i latou o ē taliaina
ma le naunautai ia
fetuunaiga ma saili
atu i le taitaiga a le
Agaga Paia. O le a
tatou latalata atili
atu i lo tatou Tama
Faalelagi ma lo
tatou Alii ma Faaola,
o Iesu Keriso.”*

Elder Quentin L. Cook
Korama a Aposetolo e
Toasefululua

Faasologa Fou mo le 2019

E amata atu ia Ianuari 2019, o le a faia sauniga o korama a toeaia ma le Aualofa i na o Aso Sa lona lua ma le lona fa o masina taitasi. O nei sauniga o le a taulai atu i savali mai le konafesi aoao aupito lata mai. O fautuaga mo le aoaoina atu mo nei sauniga o loo maua i lomiga o konafesi aoao ia Me ma Novema o le *Ensign* ma le *Liahona* ma i le Gospel Library app.

O isi suiga e amata i le 2019 e aofia ai mea nei:

- O fonotaga faaaufono i Aso Sa muamua o le a faamutaina. Peitai, pe a manaomia, e mafai e korama a toeaia ma Aualofa ona faaagaina se vaega o se vasega a le korama e fefautuaai ai e uiga i se autu patino.
- O sauniga amata, lea e potopoto faatasi ai korama o Perisitua Arona ma le Perisitua Mekisateko po o tuafafine o le Aualofa ma tamaitai talavou, o le a le toe faia.
- O le a lē amataina sauniga o le korama a toeaia ma le Aualofa i se pese po o se tatalo ae o le a faaiuina i se tatalo faaiu.



Aoao Mai i Savali o Konafesi Aoao (2018 ma le 2019)

O aoaoga a perofeta soifua, tagatavaai, ma talifaaaliga e mafai ona tuuina mai le taitaiga musuia mo le galuega a le korama a toeaina ma Aualofa. Mo vaiaso o le a susesueina ai savali o konafesi, o le a filifili e au peresitene o korama a toeaina ma le Aualofa se savali o le konafesi e faaaoaga, e faalagolago lea i manaoga o tagata o le au paia. I nisi taimi, e mafai foi e le epikopo po o le peresitene o le siteki ona fautua atu se savali. E tatau i taitai ona tuu atu le faamamafa i savali mai i sui o le Au Peresitene Sili ma le Korama a Aposetolo e Toasefululua. Ae peitai, e mafai e sui o le au peresitene ona filifili soo se savali mai le konafesi sili ona lata mai, e faatatau i manaoga o Au Paia i le lotoifale ma le uunaiga mai le Agaga.

E tatau i taitai ma faiaoga ona saili ni auala e uunaia ai tagata o le au paia e muai faitau savali ia ua filifilia. E tatau ona latou uunaia tagata ina ia o mai saunia i sauniga e faasoa atu upumoni o le talalelei na latou aoaoina faapea ma o latou manatu e uiga i le auala e galulue ai i luga o na upumoni. O gaoioiga mo le aoaoina ua fautua-ina atu i lalo, lea e faatatau i mataupu faavae ua aoaoina i le *Aoao Atua i le Ala a le Faaola* e mafai ona fesoasoani i tagata o le au paia ia aoao mai i savali o le konafesi aoao.



David A. Bednar, “Faapotopoto Faatasi Mea Uma ia Tasi ia Keriso”

Mafaufau e aumai se maea ma se lisi o mea e fai e faaali atu. Valaaulia tagata e talanoaina le eseesea i le va o upumoni o le talalelei ma polokalama o le Ekalesia o se maea ma vaavaai atu ia i latou o se lisi o mea e fai o autu taitoatasi ma galuega. Uunaia tagata e vaavaai mo ni malamalamaaga i faataitaiga o le savali a Elder Bednar. O le a le uiga ia “faaopoopoina [mea uma] ia Keriso”? (tagai i le Efeso 1:10). O a mea e mafai ona tatou faia ina ia maua ai le folafolaga i le faaiuga o le savali a Elder Bednar?

Dallin H. Oaks, “Upumoni ma le Fuafuaga”

E faapefea e le malamalama i “upumoni o le talalelei toefuataiina” ona fesoasoani ia i tatou pe a tatou fetaiai ma mea faafeagai i a tatou talitonuga ma faatinoga? Ina ia tali lenei fesili, e mafai e tagata ona toe iloilo faataitaiga o upumoni faavae i le vaega II o le savali a Peresitene Oaks. E mafai foi ona latou toe iloilo faataitaiga o le auala e faaogaina ai nei upumoni (tagai i le vaega III). Atonu e fesoasoani mo tagata le faatino o se tala pe faapefea ona latou faaogaina nisi o nei upumoni faavae e tali atu ai i faitioga e uiga i se aoaoga po o se faatinoga a le Ekalesia.

Quentin L. Cook, “Liuaia Loloto ma Tumau i le Tama Faalelagi ma le Alii o Iesu Keriso”

Atonu e fia faalogologo tagata o le ekalesia mai le tasi ma le isi po o a ni o latou uluai lagona ina ua latou faalogo e uiga i suiga na faamatalaina i le savali a Elder Cook. Afai e fesili atu se uo o se isi faatuatuga ia i latou pe aisea ua faia ai e le Ekalesia nei fetuunajiga, o le a se latou tala e fai atu? Uunaia i latou e vaavaai mo ni tali talafeagai i le savali a Elder Cook. O a mea e mafai ona tatou faia o ni tagata taitoatasi ma aiga, ma o se korama po o le Aualofa, ina ia mautinoa ai ua ausia e suiga ia faamoemoega a le Alii? I le avea ai ma se vaega o lenei talanoaga, e mafai foi ona e faasoa maia ni malamalamaaga mai le malelega amata a Peresitene

Nelson lea e uunaia ai tagata o le ekalesia e “taliaina ma le naunautai” ia suiga nei.

Ronald A. Rasband, “Aua Le Atuatuvale”

O le savali a Elder Rasband o loo faamamafa mai ai ni nai mau lea e mafai ona fesoasoani ia i tatou e aveese soo se fefe atonu o ia i tatou e uiga i taimi faigata o tatou ola ai. Fai atu i tagata e susesue i mau nei mo ni fautuaga e mafai ona latou faasoa atua i se tasi o loo fefe e uiga i le lumanai. O le a seisi mea e mafai ona latou faasoa atua mai le savali a Elder Rasband? E mafai faapefea e le fefe ona “[faatapulaaina] le vaai a fanau a le Atua”? Valaaulia tagata e faasoa mai le auala ua latou aoao ai e faatolalo o latou fefefe ma ola ai i le faatuatua.

D. Todd Christofferson, *“Tumau ma Mausali i le Faatuatua o Keriso”*

E mafai ona e amataina se talanoaga o lenei savali e ala i le tusia o se laina i luga o le laupapa i le *Uunaia e Agafesootai* i le tasi itu ma le *Tuuto FaaKeriso* i le isi itu. Valaaulia tagata e faitau le parakalafa lea e amata i le “O le toatele o i tatou e iloa i lenei taimi o loo i ai i se mea i le va o le auai i le talalelei . . .” ma mafaufau po o fea o latou i ai i luga o lenei va. O le a se mea ua tatou aoao mai i faataitaiga i le savali a Elder Christofferson lea e uunaia i tatou ina ia tumau ma mausali i puapuaga? (tagai foi i le Alema 36:27–28). Uunaia tagata e faasoa atu faataitaiga o tagata latou te iloina o e na faaalua le tuuto faaKeriso i le talalelei, e tusa pe na feagai ma puapuaga.

Ulisses Soares, *“Tasi ia Keriso”*

E tusa ai ma Elder Soares, e faapefea ona ave le Vaitafe o Amasone ma sui o tagata o le Ekalesia toefuataiina a Iesu Keriso? O le a le mea o loo aoao mai e lenei faatusatusaga ia i tatou e uiga i faatosinaga o mafai ona maua e tagata fou e uiga i le Ekalesia? E mafai faapefea e i tatou o se korama po o le Aualofa ona mulimuli i le fautuaga a Elder Soares e faamalosiua, lagolago, ma alolofa i tagata fou liliu mai? (tagai i le Moronae 6:4–5). Atonu e mafai e nai tagata ona faasoa mai nisi o luitau latou te fetai ai o ni tagata fou o le Ekalesia ma pe faapefea e isi tagata ona fesoasoani ia i latou. E mafai foi ona e talanoaina auala na faamalosi ai e tagata fou o la outou uarota po o le paranesi.

Gerrit W. Gong, *“O La Tatou Afi o le Tolauapiga o le Faatuatua”*

Mafaufau e faaali atu se ata o le afi o le tolauapiga ma valaaulia se tasi e faasoa mai se aafiaga sa ia faafetai ai i le mauaina o se afi o le tolauapiga. Fai atu i tagata e talanoa i le uiga [o le saunoaga] a Elder Gong ina ua ia saunoa mai e uiga i se “afi o le tolauapiga o le faatuatua.” Ona mafai lea ona e vaevaeina tagata i ni vaega ma valaaulia vaega taitasi e toe iloiloma faasoa mai se tasi o auala e lima na fautuaina mai e Elder Gong e mafai ai e se “afi o le tolauapiga” ona uunaia i tatou. Tuu atu i tagata le taimi e mafaufau loloto ai i le auala latou te mafai ai ona faamalosiua lo latou lava faatuatua po o le faatuatua o se tasi latou te silafia.

Dieter F. Uchtdorf, *“Talitonu, Alofa, Faia”*

E mafai ona e amataina se talanoaga o lenei savali e ala i le tusi i luga o le laupapa o le *Leai o se Faamoemoe* ma le *Fiafia*. Valaaulia tagata ina ia saili i le savali mo ni uiga ma talitonuga lea e taitai atu ai i le leai o se faamoemoe ma le fiafia ma lisi i luga o le laupapa. Valaaulia tagata e faasoa mai auala sa latou maua ai le fiafia lea e sau mai le talitonu, alofa, ma le faia, e pei ona aoao mai e Elder Uchtdorf. Uunaia tagata e saili se upusii faamalosiua mai le savali e faaali atu i totonu o le latou aiga pe faasoa atu i se uo.

Joy D. Jones, *“Mo Ia”*

Mafaufau e faasoa atu le tala o i le amataga o le savali a Sister Jones ma fai atu i tagata e

mafaufau e uiga i taimi sa foliga “sa le amanaia pe . . . sa le talisapaia pe sa le manaomia foi” a laua taumafaiga o le auauna atu ma le auaunaga. A maea ona talanoaina le tala, mafaufau e tusi i luga o le laupapa *Aisea e tata ai ona tatou auauna atu?* Valaaulia tagata e tali mai i lenei fesili e ala i le iloiloina o le vaega o totoe o le savali a Sister Jones, ma vaavaai mo ni malamalamaaga (tagai foi Mataupu Faavae ma Feagaiga 59:5). E mafai faapefea e le fautuaga a Sister Jones ona suia le auala tatou te tausua ai mo ma auauna atu i le tasi ma le isi?

Michelle D. Craig, *“Lē Faamalieleina Faaleagaga”*

Ua saunoa mai Sister Craig e uiga i “se va i le tulaga o tatou i ai ma tagata o tatou i ai, ma le tulaga ma tagata tatou te mananao e ave ai.” O le a le mea ua finagalo le Atua ia tatou lagona e uiga i lenei va? O le a le mea ua manao Satani ia tatou lagona e uiga i ai? E mafai e tagata ona saili i se tasi o vaega e tolu o le savali a Sister Craig e maua ai tali i nei fesili. O a mea e mafai ona tatou faia ia mautinoa ai o lo tatou “le faamalieleina faaleagaga” e le ave ma “faavaivailoto”?

Cristina B. Franco, *“O Le Olioli o Auaunaga Lē Manatu Faapito”*

Ina ia aoao atu o le “alofa e faapaiaina e ala i le ositaulaga,” ua faasoa mai e Sister Franco ni tala se lua—e tasi e uiga ia Victoria ma le tasi e uiga i se tina ua oti lana tane. Atonu e te valaaulia ni tagata se tolu e o mai saunia e faasoa mai mea sa la aoaoina e uiga i le alofa ma le ositaulaga mai i nei tala. O a isi aafiaga e mafai ona tatou faasoa atu lea e aoao mai ai le mataupu faavae e tasi? O le faaali atu o se vitio lea e faaalua ai le Faaola o loo auauna atu i isi (e pei o le “Light the World—Follow the Example of Jesus Christ” i le LDS.org) e mafai ona taitai atu ai i se talanoaga e uiga i le mafai faapefea ona tatou mulimuli i Ana faataitaiga o le “aunaga e vaavaalua ma le alofa ma le ositaulaga.”

Henry B. Eyring, *“O Tamaitai ma le Aoaoina o le Talalelei”*

O faitau ma upusii o mau mai le “O Le Aiga: O Se Folafolaga i le Lalolagi” lea na faaaga e



Peresitene Eyring i lana savali e aumaia ai le malamalamaaga e uiga i le taua o faatosinaga a tamaitai i le aiga. E mafai e tagata ona galulue faatasi e saili ai fuaitau nei ma upusii ma talanoa i mea ua latou aoaoina. O a ni valaaulia na tuuina mai e Peresitene Eyring? O a ni folafolaga na ia faia? Mafaufau pe faapefea e le lagiina po o le faitauina o se viiga e uiga i le aiga, e pei o le “O Se Lagi se Aiga” (Viiga, nu. 179), ona mafai ona faaleleia le talanoaga.

Dallin H. Oaks, “Matua ma Fanau”

Ao e sauni e aoao atu, mafaufau pe o le fea o vaega o le savali a Peresitene Oaks e sili ona talafeagai i tagata o i lau korama po o le Aualofa. O fesili talafeagai nei e mafai ona e faia e uunaia ai le talanoaga e uiga i lana savali: E faapefea e sitaaili faaona po nei o loo ta’ua i le savali a Peresitene Oaks i le vaega I ona aoga e faasaga i le fuafuaga a le Tama Faalelagi? O a faataitaiga o tamaitai faatuatua e mafai ona tatou faasoa i ai lea e faataitaia faamatalaga e uiga i tamaitai i le vaega II? E mafai faapefea ona tatou uunaia tamaitai talavou tatou te iloina e mulimuli i le fautuaga a Peresitene Oaks e faapitua mo i latou i le vaega III?

Russell M. Nelson, “Auai o Tuafafine i le Faapotopotoina o Isaraelu”

Afai e te faiaoga i le Aualofa, mafaufau e vae vae tuafafine i ni vaega se fa ma talosagaina vaega taitasi e faatau se tasi o valaaulia e fa i le savali a Peresitene Nelson. E mafai e vaega ona talanoaina mea e faagaetia ai i latou e

uiga i le valaaulia, o aafiaga na latou maua i le faatinoina, ma manatu e uiga i le auala e faatino ai i le lumanai. Ona mafai lea e vaega taitasi ona faasoa ma tagata uma mea sa latou talanoaina. Afai e te faiaoga i e umia le perisitua, atonu e te fai atu ia i latou e saili faamatalaga i le savali a Peresitene Nelson lea e faailoa mai ai pe faapefea lagona o le Tama Faalelagi e uiga i Ona afafine. O le a le mea e mafai ona tatou faia ina ia lagolago ma uunaia ai le auai o tuafafine i le faapotopotoina o Isaraelu?

M. Russell Ballard, “O Le Faaliga o le Togiolaina o E ua Maliliu”

E mafai ona e valaaulia tagata e talia le valaaulia a Peresitene Ballard ma faatau le Mataupu Faavae ma Feagaiga 138 ao lei faia la outou talanoaga. Fai atu i tagata e faasoa mai a latou aafiaga ma malamalamaaga mai le vaega lenei i le taimi o le sauniga. O fesili e pei o fesili nei e mafai ona fesoasoani i tagata ina ia malamalama i le taua o lenei faaliga: E faapefea ona aumaia e lenei faaliga le lagonalelei ia i tatou? Ma le O a upumoni o loo i ai i lenei faaliga lea e mafai ona aafia ai ‘le auala o loo tatou ola ai i o tatou olaga i aso taitasi?

Bonnie H. Cordon, “Avea ma se Leoleo Mamoe”

Ina ia fesoasoani i tagata e mafaufau i auala e mafai ona latou faaleleia ai a latou taumafaiga faaleaunaga, e mafai ona e vae vaeina i latou i ni vaega se tolu ma fai i vaega taitasi e faatau se tasi o vaega ua faaulutalaina i

le savali a Sister Cordon. Valaaulia i latou e faasoa mai mataupu faavae o le auaunaga na latou aoaoina. E mafai faapefea e le tauivi e mulimuli i nei mataupu faavae ona fesoasoani ia i tatou e “avea ma leoleo mamoe lea e manaomia e le Alii ona tatou aveai ai”? Valaaulia tagata e faasoa mai aafiaga i le taimi na fesoasoani ai se auaunaga a se isi tagata ia i latou e lagona ai le iloina ma alofagia e le Faaola.

Jeffrey R. Holland, “O Le Galuega o le Faaleleiga”

E mafai ona e amatalia se talanoaga e uiga i le savali a Elder Holland i le valaaulia o tagata e mafaufau i se sootaga i o latou olaga lea e manaomia le faamalologa po o le faaleleiga. Ona mafai lea ona latou saili le savali a Elder Holland, ma vaavaai mo le auala na mafai ai e Brad ma Pam Bowen ona fesoasoani i lo laua tama ina ia faamalolo. O a ni faamanuiaga na maua mai i lenei taumafaiga? O a malamalamaaga e maua e tagata lea e mafai ona fesoasoani ia i latou ina ia faamalolo a latou lava sootaga?

Neil L. Andersen, “Manu’a”

Ina ia faailoa atu le savali a Elder Andersen, e mafai ona outou faatau faatasi le Luka 10:30–35 pe matamata le vitio “Parable of the Good Samaritan” (LDS.org). E faapefea ona pei i tatou o le alii sa maua e tagata fao mea? E tusa ai ma Elder Andersen, o le a le uiga o Iesu Keriso o “lo tatou Samaria Agalelei”? E mafai faapefea ona tatou taliaina Lana faamalologa? Atonu e mafai ona e valaaulia tagata e faasoa mai auala lea na faamalolo ai e le Faaola o latou manu’a po o manu’a o e pele ia i latou. E mafai foi ona latou saili upu a Elder Andersen e maua ai se savali faamalosiua e mafai ona latou faasoa i se tasi o loo manu’a.

Russell M. Nelson, “O Le Igoa Sa’o o le Ekalesia”

Ua poloai mai Iesu Keriso ina ia faaigoa le Ekalesia i Lona sua. E mafai ona e fesoasoani i tagata e faateleina lo latou manao ina ia mulimuli i lenei faatonuga e ala i le valaaulia o i latou e saili le savali a Peresitene Nelson, ma vaavaai mo mafuaaga o le aisea e “le fetuunaia ai le igoa o le Ekalesia.” Ona,



valaaulia lea o i latou e saili i le faaiuga o le savali a Peresitene Nelson mo folafolaga na ia saunao mai o le a oo mai ao tatou galulue e “toefuatai ai le igoa sa’o o le Ekalesia a le Alii.” O le a se mea e mafai ona tatou faia e fesoasoani ai i lenei taumafaiga?

Henry B. Eyring, “Taumafai”

Ua tuuina mai e Peresitene Eyring “fesili taua e lua”: “O le a le mea e tatau ona ou faia e ave ai i o’u luga le suafa [o le Faaola]?” ma le “E faapefea ona ou iloa pe o ou alualu i luma?” Atonu e mafai ona e tusia fesili nei i luga o le laupapa ma valaaulia tagata e faasoa mai malamalamaaga latou te maua e uiga i fesili nei mai le savali a Peresitene Eyring ma le faataitaiga a Sister Eyring. Ua faasino foi Peresitene Eyring i le pese “O Loo Ou Tau-mafai e Avea e Pei o Iesu” (*Tusipese a Tamaiti*, 40-41). O le a se mea o faaopoopo e upu o lenei pese i le talanoaga?

Dale G. Renlund, “Ina Filifili ia o Outou i le Aso Nei”

E mafai e tagata ona mafaufau i se tasi latou te mananao e faamalosiua e mulimuli i le fuafuaga a le Tama Faalelagi, e pei o se tagata o le aiga po o se tasi latou te auauna atu i ai. Ona latou faitau lea o le savali a Elder Renlund e iloa ai pe faapei lagona o le Tama Faalelagi ma Iesu Keriso e uiga ia i tatou. E faapefea ona La fesoasoani mai ia i tatou ia filifili le usiusitai? O a mea o fautua mai e a Laua faataitaiga i le ala e mafai ai tatou faaleleia a tatou taumafaiga i totonu o tatou aiga ma i la tatou auaunaga?

Gary E. Stevenson, “Leoleoina o Agaga”

Atonu na fesili i latou e te faiaoga ai i se fesili e pei o le fesili lenei mai le savali a Elder Stevenson: “E faapefea ona tatou iloa o loo tatou auauna atu i le ala a le Alii?” E mafai ona latou manuia mai le talanoaina o tali talafeagai i lenei fesili ua latou mauaina i lenei savali. I le isi itu, e mafai ona e aumaia se ata o le Faaola i le aveai ai o se leoleo mamoe (tagai *Tusi Ata o le Talalelei* [2009], nu. 64) ma valaaulia tagata e faasoa mai se upumoni mai le savali a Elder Stevenson lea e faatusa i ai le ata. E mafai e tagata ona faasoa mai mea na faagaetia ai i latou e faia o se taunuuga o le talanoaga.



Sauniga o Aso Sa Lona Fa (Oketopa–Tesema 2018)

SUESUEINA O TUSITUSIGA PAIA FAALETAGATA LAVA IA MA FAALEAIGA

I Aso Sa lona fa i le 2018, o le a talanoaina ai e korama a toeaina ma le Aualofa le suesueina o tusitusiga paia faaletagata lava ia ma faaleaiga. E mafai e taitai po o faiaoga ona filifili e taitai ni talanoaga i soo se mataupu faavae nei:

Suesuega o Tusitusiga Paia Faaletagata Lava Ia

Ina ia fesoasoani e musuia tagata e suesue e le aunoa tusitusiga paia, mafaufau e valaaulia tagata taitoatasi e filifili se tasi o fuaitau nei e faitau: Iosua 1:8; 2 Timoteo 3:15–17; 1 Nifae 15:23–25; 2 Nifae 32:3; Mataupu Faavae ma Feagaiga 11:22–23; 33:16–18. A maea le taimi na latou faitau ma mafaufau loloto ai, e mafai ona latou fefaasoaai ma se isi tagata i le potu i mea o loo aoao mai e a latou fuaitau ia i latou e uiga i le suesueina o tusitusiga paia.

E mafai foi ona e valaauliaina nisi tagata e faasoa mai a latou molimau e uiga i faamanuiaga ua latou maua ao latou suesueina tusitusiga paia. E mafai foi ona manuia

tagata mai le faalogologo atu o faasoa mai le tasi ma le isi i mea latou te faia e anoa ai le suesueina o tusitusiga paia faaletagata lava ia (tagai i nisi o faataitaiga i le “Manatu e Faaleleia ai Lau Suesuega o Tusitusiga Paia Faaletagata Lava Ia” i le *Sau Mulimuli Mai ia te Au—Mo Tagata Taitoatasi ma Aiga*). E mafai ona e faasoa atu i tagata le mea na aoao mai e Elder Quentin L. Cook e uiga i “faamoemoega ma faamanuiaga e fesootai ma [le fetuunaiga i le faasologa o le Aso Sa] ma isi suiga talu ai nei” (tagai i le “Liuaia Loloto ma Tumau i le Tama Faalelagi ma le Alii o Iesu Keriso,” *Ensign* po o le *Liahona*, Nov. 2018). E mafai e tagata ona talanoaina pe faapefea e a tatou taumafaiga e faaleleia la tatou suesueina o tusitusiga paia ona

mafa'i ona fesoasoani e ausia ai faamoemoega nei. O vitio nei i le LDS.org e mafai foi ona musuia ai tagata: "Words with Friends," "The Blessings of Scripture," "Daily Bread: Pattern," ma le "What Scriptures Mean to Me."

Ia Fai e le Aunoa le Suesueina o le Talalelei

Sa faatusatusa e Elder David A. Bednar le suesueina e le aunoa o tusitusiga paia ma isi mausa amiotonu i tosi laiti o le pulumu lea e faia ai se atavali matagofie. Ina ia fesoasoani i tagata ia malamalama i le mea na aoao mai e Elder Bednar, atonu e mafai ona e faaali atu se atavali lea e iloa gofie ai tosi o le pulumu a le tagata faatufugaga. Ona faitau lea e tagata le tala faatusa a Elder Bednar, o loo maua i le "Ia Matua Melega ma Mafaufau i le Aiga" (*Ensign* po o le *Liahona*, Nov. 2009, 19–20), ma talanoa pe faapefea e tosi o le pulumu i lenei atavali ona faapei o le suesueina o tusitusiga paia. O a mea na fesoasoani ia i tatou e faa-toilalo ai faalavefau i le suesueina e le aunoa o le talalelei, pe o tatou suesueina o ni tagata taitoatasi pe faatasi ai ma o tatou aiga? O le a le mea na folafola mai e Peresitene Russell M. Nelson ia i latou o e "galue filiga e toe faafou [o latou aiga] e avea ma se nofoaga autu e aoaoina ai le talalelei?" (tagai i le "Avea ma Faataitaiga Lelei o le Au Paia o Aso e Gata Ai," *Ensign* po o le *Liahona*, Nov. 2018). Tuu atu le taimi mo tagata e mafaufau ai ma faasoa mai mea na musuia i latou e faia ona o mea na latou aoaoina i le aso lenei.

Talanoaina o le Talalelei i le Aiga ma i le Ekalesia

O se tasi o auala e fesoasoani ai i tagata ia malamalama i le taua o talanoaga o le talalelei i le aiga ma le ekalesia, e mafai ona valaau-lia se tamaitiiti ma se matua e usu le "Aoa'o Mai ia Ou Ui i le Malamalama" (*Viga*, nu. 187). O le a se mea o aoao mai e upu o lenei pese i le fegalegaleaiga i le va o le tamaitiiti ma le matua ia i tatou e uiga i le aoaoina o le talalelei? Masalo o le a naunau nisi o tagata e faasoa mai a latou manatu i le auala e faia ai talanoaga o le talalelei o se vaega masani o le olaga faaleaiga. O mau nei e mafai ona maua ai malamalamaaga: Teuteronomi 11:18–20; 1 Peteru 3:15; Mosaea 18:9; Moronae 6:4–5, 9; Mataupu Faavae ma Feagaiga 88:122. E mafai faapefea e a tatou talanoaga i le fale ma le ekalesia ona aumaia latalata atili i tatou i le Tama Faalelagi ma Iesu Keriso?

MANATU MO LE LAGOLAGOINA O LE SUESUEINA O TUSITUSIGA PAIA I LE AIGA I LE 2019

I le aluga o le 2019, o le a aoaoina e tagata uma o le uarota le Feagaiga Fou—i le aiga ma i le Aoga Sa ma le Peraimeri. I sauniga o le korama ma le Aualofa, e tataui i taitai ma faiaoga ona faamanatu atu i tagata e uiga i le faasologa o mau mo le vaiaso e sosoo ai i le Sau, Mulimuli Mai ia te Au—Mo Tagata Taitoatasi ma Aiga lea e mafai ona latou suesueina i le aiga. O lenei faamanatu faigofie e mafai ona faasoa atu i se faamanatu tusitusia, pe tuugutu, ia po o auala uma e lua.

E mafai e taitai o le korama a toeaina ma le Aualofa ma faiaoga ona uunaia lenei suesueina o tusitusiga paia e ala i le sailia o avanoa e aumaia ai malamalamaaga o le Feagaiga Fou i totonu o sauniga o le korama a toeaina ma le Aualofa. Mo se faataitaiga, e mafai e taitai o le korama a toeaina ma le Aualofa ma faiaoga ona:

- Matauina le auala e faatatau ai tala po o le aoaoga faavae mai la latou suesueina o tusitusiga paia i se lesone o le korama a toeaina po o le Aualofa. Atonu e faasoa atu e taitai ma faiaoga lenei malamalamaaga i se sauniga o le Aso Sa.
- Faasoa atu i tagata le auala e faatatau ai tagata po o aoaoga faavae mai le Feagaiga Fou i o latou tiutetauave i le korama a toeaina ma le Aualofa.
- Fefaasoaai faatasi ma tagata ni aafiaga lelei na latou mauaina i le suesueina o le Feagaiga Fou i le aiga ma uunaia ai tagata e faasoa atu foi aafiaga nei.





“O lo tatou Alii ma le Faaola, o Iesu Keriso, e ala i le meaalofo e lēmafaamatalaina o Lana Togiola, e le gata ina laveai ai i tatou mai le oti ma ofo mai ai ia i tatou, e ala i le salamo, faa-magaloga mo a tatou agasala, ae ua tu saunia foi o Ia e laveai i tatou mai faanoanoaga ma tiga o ō tatou agaga ua manu’a.

“O le Faaola o lo tatou Samaria Agalelei, na auina mai ‘e faamalolo i e loto momomo.’ [Luka 4:18]. E afio mai o Ia ia i tatou pe a pasi ifo isi ma matamata mai. Ma le agaalofo, e tuu e Ia Lona aao faamalolo i luga o ō tatou manu’a ma fusi i ai. E tauave e Ia i tatou. E popole o Ia mo i tatou. Ua Ia fetalai mai ia i tatou, ‘O mai ia te au . . . ma o le a Ou faamaloloina [outou]’ [3 Nifae 18:32].”

Elder Neil L. Andersen o le Korama a Aposetolo e Toasefululua, “Manu’a,” 84–85.

Samaria Agalelei, saunia
e Annie Henrie Nader



“O le mataupu aoaoina fou ua tuufaatasia e faatotonugalemu-i-le-aiga, ma lagolagoina-e-le-Ekalesia ua i ai le gafatia e tatala mai ai le mana o aiga, pe a mulimulitaia e aiga taitasi ma le toto’a ma le faaeteete ina ia liua o latou fale i se malutaga o le faatuatua,” sa saunoa ai Peresitene Russell M. Nelson i le sauniga faaii o le Konafesi Aoa Faaleafatausaga lona 188 o le Ekalesia. “Ou te folafola atu pe a e galue filiga e toe faafou lou fale e avea ma se nofoaga autu e aoaoina ai le talalelei, i le gasologa o taimi o le a avea moni *au* aso Sapati ma aso fiafia. O le a fiafia *lau* fanau e aoao ma ola i aoaoga a le Faaola, ma o le a faaititia le faatosinaga a le fili i *lou* olaga ma i *lou* aiga. O suiga i lou aiga o le a iloga ma tumau.”